


〔重刊訂正本〕

中國醫學大成

錢若利題



【三十一】



〔重刊訂正本〕

# 中國醫學大成

三七  
卷

上海科學技術出版社

期

末

中國醫學大成 (全套共五十冊)

上海科學技術出版社出版

(上海瑞金二路四五〇號)

新華書店上海發行所發行

上海市印刷十廠印刷

開本七八七×一〇九二

三十二開

精裝

總字數二二,七九〇,〇〇〇

總印張八六二

一九九〇年六月第一版 一九九〇年六月第一次印刷



\*C0159019\*

程杏軒醫案

〔清〕程杏軒 著

何澹安醫案

〔清〕何澹安 著

邵蘭蓀醫案

〔清〕邵蘭蓀 原著

原 編 曹炳章

總審定 裘沛然

總審閱 蕭敏材 朱邦賢 沈麗君



## 重刊訂正《中國醫學大成》序

《中國醫學大成》一書，我鄉先輩四明曹炳章先生所輯集，爲發揚中醫學，保存古醫籍，以饗同道並惠後學作也。曹氏纂集是書時，正值西學東漸，國內淺見倖進之徒，競尙浮華，大肆鞭撻我國文化固有之精英，如民族醫學，悉在消滅之列，中醫學不絕如縷。而先生乃在此時從事中醫叢書巨著之編輯，姑不論其學術價值，獨其保存民族文化精粹之苦心孤詣令人可敬，其卓識遠見，又何其可欽也。

楊志一在原書序中有說：『大凡學術之成立，歷久而不敗者，必有其真實之價值在。』善哉言乎！中華民族立國數千年而得以生存繁衍，如無優秀之文化及可貴之醫學，則亦何逃於優勝劣敗之例。尤



其在科學迅猛發展之今日，百技更新，而古老之中醫藥學日益引起國內外有識之士之重視。各類中醫藥研究所之建立，亦爲保護人民健康之需要，順應世界醫學發展之潮流而設。凡此種種，夫豈偶然。

惟中醫學歷史悠久，濫觴於炎黃，昌盛於漢唐，歷代醫家多有創見，其學術經驗載於文獻者浩如煙海，遺佚者可弗論，僅就先生纂集之時，存書尙達萬種，學者既不能盡讀，又無力購置，且諸書精粗雜糅，版本文字舛誤殊多，使學習中醫者常興望洋之嘆。先生乃爲之博採精選，上自先秦，下迄近代，凡理論、方藥、臨床各科咸備，別爲十三類，書計三百六十五種，分醫經、藥物、診斷、方劑、通治、外感病、內科、外科、婦科、兒科、針灸、醫案及外集雜著各類。其中傷科、眼科及五官病歸入外科，推拿、手術歸入針灸，醫論、醫話、醫史歸入雜著。所收各書，皆中醫要籍，大都內



容精粹，切合實用，版本亦從精選，並加句斷。各書之首，皆列著作校刊略歷及內容提要，以便讀者入門粗知梗之助。

中醫學歷來叢書頗少，是書搜羅廣而選擇精，洵爲前所未有之巨著。惜全書印刊未半而抗戰軍興，烽煙迷漫，醫籍出版被迫中輟。而已印行之一百三十六種，今亦散佚不全。上海科學技術出版社爲應學者需求，重爲付梓，並影印以存原貌。書中明顯錯訛者，由我院及中醫文獻研究所等有關單位專業人員校勘改正，使之益臻完善。

夫文以載道，中醫學爲我國醫學之重要財富，文獻則是寶庫中之重要內容。故有志斯道者，務求先通中醫之理論法則、方藥效用和臨床處置，使對中醫學有全面之理解，更須驗之臨床，以汲取其理論精華與豐富經驗。學問之事，原恃艱苦以求而非獵取可得。昔張仲景勤求古訓，博採衆方；孫思邈青衿之歲，高尚是典，白首之



年，未嘗釋卷；葉香岩以不讀破萬卷，不敢輕言醫。茲三人者，皆由勤奮好學而成一代高醫，故學習中醫宜下一番札實工夫。在此基礎上運用現代科學技術研究和整理中醫學，才有闡明和提高希望。中西醫結合，亦將另具特色。以務實精神，走中醫現代化循序而進之道路，勇於繼承，敢於創新，使傳統醫學有所發現與創造。苟能如此，不僅爲祖國爭光，並將爲人類造福。

本叢書一百三十六種，分爲五十冊；每冊後並皆附有全部書目。它的出版，爲中醫和愛好中醫者提供珍貴之醫學文獻，讀者勤習而深研之，必能奠定中醫學根柢，大有助於中醫事業之繼承與發展。

裘沛然

一九八八年六月作於  
上海中醫學院



〔清〕

程杏軒

著

程杏軒醫案

中國醫學大成



## 程杏軒醫案提要

清程杏軒著。杏軒字文囿。嘉道年間新安人。陳安波評註。其父載安。紹興山陰人。先生於嘉慶丁丑初成醫述十六卷。胡麋枚序之。道光七年丁亥刻成醫案三編。乃其歷年所治疑難大症。隨筆記錄。陸氏再續名醫類案。多採錄之。開發新智。啓悟後學。山陰陳安波。同光間與海昌王士雄爲學友。學問淵博。經驗豐富。復爲評註。闡明其病理。解釋其方義。更將病情藥理。闡發無遺。使後學者登堂入室。卒無迂曲之難。是案三編。原爲炳章所藏。陳氏所評批。與別家印本不同。今公諸同好。爰述其事實如右。



## 劉序

新安程子杏軒。深於醫。著有醫案一書。發明其理甚悉。予因思醫書。惟靈樞素問最古。雖未敢必爲神農氏以後之書。然其爲戰國時神于是術者之所爲無疑也。由是推之。春秋左氏傳醫和醫緩諸論說。更推之周官醫師食醫瘍醫諸職守。所云陰陽風雨晦明之生疾。九竅九藏之變動。辭約義備。醫之理盡矣。後世著書者。代作短長。往往互見。程子去其短集其長。蓋尤有心得。醫案一書。謂與靈樞素問並傳可也。

嘉慶十年孟夏月長沙劉權之



# 鮑序

軒埃繇藐。岐風闐寥。素靈之書。遼乎遠矣。杏軒程子。高悟絕世。精思邁倫。擅潘陸之詩名。工俞扁之道術。平生療疾。多著奇效。或蹈背而出血。或舉水而灌頭。矚垣一方。騰譽千里。僕嘗邁危候。賴君獲全。爰契洽夫蘭金。實感深於肉骨。暇日造膝。示我成編。擘要則象網之挈元珠。鉤沉則紀昌之貫輪蝨。生枯起朽。能事匪一。視色察毫。殊績累奏。雖葛仙金匱之作。孫氏龍宮之祕。隱居本草之錄。宣公集驗之書。方茲蔑矣。慙然心服。退而弁言。洵堪拯夫膏肓。請以授之剖闕。

嘉慶庚申長夏愚弟鮑桂星



## 程序

子華子有言。醫者理也。意也。蓋理明則意得。意得則審脈處方。無所施而不中。於以稱國工不難。吾宗杏軒先生其人也。先生性穎悟。工詩。隱於醫。爲人療疾。應手輒奏效。余同年鮑覺生。嘗邁危疾。賴先生起之。每稱道不去口。一日出先生所著醫案。屬余弁言。余受而讀之。見其審脈處方。深得古人四然二反之理。而神明其意。以是嘆先生之藝之精。非尋常執經方習鍼石者。所能望其項背也。然則是書其桐君之別錄。越人之逸篇也夫。

嘉慶十年歲在構蒙赤奮若余月中泮鶴樵國仁拜書

# 自序

醫之有案也。昉於漢之倉公。繼倉公而作者。代有其人。若明之薛氏立齋、喻氏嘉言、其尤著矣。余自慚顛陋。安敢步諸賢之後塵。雖然莊生不云乎。輪扁之斲輪也。得之於心。而應之於手。余亦自道其得心應手者而已矣。且夫醫之爲術也。蔑古則失之縱。泥古又失之拘。余自業醫以來。以古爲師。亦或間出新意。以濟古法所未及。雖未能發皆中鵠。而鄭重不苟之心。固有可自信者。故凡應手之處。往往錄而存之。以自驗學力之淺深。太史鮑君覺生。見之稱善。勸付剞劂。余遲疑者久之。迄今所存之案日益多。友人江君晉三。復促梓行。竊不自揆。竟徇其請。因卽其信於心而應於手者。聊錄一二。尙乞海內高明君子。進而教之。歲在閏逢。困敦嘉平。月旣望。程文囿自序。



# 程杏軒醫案初集目錄

許靜亭翁夫人產後感邪重用清下治驗	一
劉明府少君先天不足心脾內虧治法	二
鮑覺生宮詹鬱傷心脾證類噎隔殆而復生	三
洪楚峰孝廉中臟殆證再生奇驗	三
方萃巖翁公郎滑精證治	四
余氏子瘧後變證	五
汪典揚翁外孫女體弱感邪證變抽掣	六
方玉堂翁孫女暑風驚證詳論病機治法	六
方宅揆翁幼孫暑風驚證病愈之奇	八
洪荔原翁尊堂大頭時疫真熱假寒之證	八
又夫人子嗽	九
族兄奏韓挾虛傷寒因循貽誤揀治原委	一〇

方牧夫兄尊堂寒溼內伏加感外邪·····	一一
曹近軒翁感後食復·····	一二
曹肖巖翁春溫兩感危證·····	一二
又三郎痲閉急證·····	一三
吳芳崖兄幼孫胎瘕·····	一四
方理豐翁中寒脫陽殆證救甦·····	一四
方晉偕翁乃媳咳嗽成癆預決不治·····	一五
潘氏室女經閉成癆不治之證·····	一五
方燦侶翁腹痛蓄瘀脫血治愈并商善後法·····	一六
農人某攻痞動血昏暈急證·····	一七
王以仁翁乃郎暑病熱久傷陰·····	一七
又翁自病肝鬱證似外感·····	一八
吳秀森翁乾脚氣·····	一八
洪臨川兄幼女偏癱·····	一九



吳禮庭兄時感腫腮消後畢丸腫痛	一九
莊炳南兄素稟火體病治與衆不同	二〇
柳蔭千兄令愛無故發癰	二一
柳聞鶯兄挾虛傷寒並後患陰瘧誤截致變拯治始末	二一
方繡文兄夫人懷孕日吐清涎數碗	二二
曹德酌兄乃郎水腫	二三
方詠葭兄傷寒轉瘧并論胎瘧病因	二三
閔方田兄初患少陰傷寒喉痺治愈後患脚氣雜治成痿	二五
汪心滌兄夫人半產血暈危證	二六
吳立亭翁幼孫傷暑危證治驗	二六
梅文彩兄令堂病類噎隔奇證	二七
鄭鶴鳴夾陰傷寒	二七
鄭媪便閉	二八
吳光先翁偏中便閉	二九

董千雲傷寒格陽證·····	三〇
許姬傷寒疑難證治·····	三一
吳某時瘧變證·····	三一
族叔曉堂失志狂妄·····	三二
族人聯昇休息痢證治奇驗·····	三二
堂妹感冒暑風證治·····	三三
家炳然兄女肝鬱氣厥實有羸狀·····	三四
陳某子感證體脈俱厥·····	三四
又婦憂勞傳染藥誤致變·····	三五
許生母傷食腹痛·····	三七
葉習方甥麻疳·····	三七
族兄女痘證并婦感證瀕危挽回大略·····	三八
蔡傭某單腹脹·····	三九
胡某乃媳感證·····	四〇



汪氏婦熱病喜飲沸湯·····	四一
蔣某陰暑·····	四一
汪木工感證舌苔變易之奇·····	四二
農人某傷寒誤服涼藥舌見人字紋·····	四三
李某陰證傷寒見純紅舌·····	四四
鄭氏婦肝風頭痛·····	四四
汪某頭痛預見真臟脈·····	四五
方氏婦目疾誤治變證·····	四五
閔某心脾虛皖痛·····	四六
許細長食厥·····	四六
商人某脣衄奇證奇治·····	四七
汪氏婦鼻衄止衄奇法·····	四八
某婦胎動下血·····	四八
呂婦產後胞衣不下誤藥暈脫·····	四九

族媪血崩奇證·····	四九
方氏女孩帶下罕見之證·····	四九
洪大登瘕病·····	五〇
王木工反關脈·····	五一
王某血證頻發·····	五一
族子石淋奇證·····	五二
曹某忍精淋痛·····	五三
王氏婦痺證·····	五三
自病臂痛·····	五四



# 程杏軒醫案初集

新安 杏軒程文囿觀泉甫著

山陰 安波陳光壽評

鄞縣 曹赤電炳章圈點

## 許靜亭翁夫人產後感邪重用清下治驗

丹溪云。產後當以大補氣血為主。他證從未治之。言固善矣。然事竟有不可執者。乾隆乙巳仲夏巖鎮許靜翁夫人病。延診。據述產後十二朝。初起洒淅寒熱。醫投溫散不解。卽進溫補。病漸加重。熱發不退。口渴心煩。胸悶便閉。時值溽暑。病人樓居。閉戶塞牖。診脈弦數。視舌苔黃。告靜翁曰。夫人病候。乃產後感邪。醫藥姑息。邪無出路。鬱而爲熱。今日本欲卽用重劑清解。恐生疑畏。且與一柴胡飲試之。但病重藥輕。不能見効。明早再爲進步。並令移榻下樓。免暑氣蒸逼。詰朝視之。脈證如故。舌苔轉黑。衆猶疑是陰證。予曰。不然。陰陽二證。舌苔皆黑。黑而潤滑。

病初卽見。腎水凌心也。陽證舌黑。黑而焦乾。熱久纔見。薪化爲炭也。前方力薄。不能勝任。議用白虎湯加芩連。飲藥週時。家人報曰。熱退手足微冷。少頃又曰。週身冷甚。靜翁駭然。亦謂恐係陰證。服此藥必殆。予曰。無憂。果係陰證。前服溫補藥效矣。否則昨服柴胡。飲死矣。安能延至此刻。此卽仲景所謂熱深厥亦深也。姑待之。薄暮厥回復熱。煩渴欲飲冷水。令取井水一碗。與飲甚快。予曰。揚湯止沸。不若釜底抽薪。竟與玉燭散下之。初服不動。再劑便解。黑矢五六枚。熱勢稍輕。改用玉女煎數劑。諸候悉平。調養經月而愈。衆尙慮其產後涼藥服多。不能生育。予曰。無傷。經云。有故無殞。至今廿載。數生子女矣。壬戌歲與訂朱陳焉。予來巖鎮。譚醫自靜翁始。

劉明府少君先天不足心脾內虧治法

劉少君年近三旬。春間由都來徽。抱疾數月。食減形倦。心悸少寐。浮火上升。間或見血。醫云。肝肺火盛。藥投清降。屢治不效。金文舫中翰薦延予診。謂曰。病由先天不足。心脾內虧所致。丹溪云。虛火可補。實火可瀉。虛以實治。宜乎無功。擬黑歸脾



湯合生脈散。數服稍應。復診令照原方再進。諸恙漸平。接服丸藥。次春北上。秋歸。晤之。狀貌豐腴。前病如失。

### 鮑覺生生宮詹鬱傷心脾證類噎隔殆而復生

鮑宮詹未第時。遊毘陵幕。抱疴半載。百治不痊。因買舟回里。延予治之。望色頰赤面青。診脈虛弦細急。自述數月來通宵不寐。聞聲即驚。畏見親朋。胸膈嘈痛。食粥一盂。且嘔其半。糞如羊矢。色綠而堅。平時作文頗敏。今則隻字難書。得無已成隔證耶。予曰。君質本弱。兼多抑鬱。心脾受傷。脾不能爲胃行其津液。故食阻。二腸無所稟受。故便乾。若在高年。卽慮成隔。今方少壯。猶可無虞。方倣逍遙歸脾出入服。至數十劑。病尙未減。衆憂之。予曰。內傷日久。原無速效。况病關情志。當內觀靜養。未可徒恃藥力。續得弄璋之喜。予曰。喜能勝憂。病可却矣。半月後果漸瘥。仍勸往僧齋靜養。共服煎藥百劑。丸藥數斤。乃瘳。因更號覺生。蓋幸其殆而復生也。

### 洪楚峯孝廉中臟殆證再生奇驗

洪楚峰孝廉病。遣使延診。問其使曰。何疾。曰中風。問年幾何。曰耄矣。予曰。殆證也。辭不往。使者強之。將及門。聞隣人語云。病將就木。醫來何爲。若能起之。其盧扁乎。入視。身僵若尸。神昏不語。目闔口張。聲嘶痰鳴。遺尿手撒。切脈虛大。歇至。予曰。此中臟也。高年臟真已虧。况見五絕之候。不可爲矣。其弟曰。固知病不可爲。然尙有一息之存。安忍坐視。求惠一七。姑冀萬一。勉處地黃飲子。合大補元煎。以爲聊盡人事而已。詎意服藥後。痰平。汗定。目開能言。再劑神清食進。復診更加河車鹿茸。脈證大轉。續訂丸方付之。半載後因視他病。過其家。見翁矍鑠如常矣。

方萃巖翁公郎滑精證治

萃翁公郎。稟質向虧。誦讀煩勞。心神傷耗。初病浮火上升。繼則陽強不密。精時自下。診脈虛細無力。方定六味地黃湯。除茯苓澤瀉。加麥冬五味。遠志棗仁牡蠣。芡實。期以功成。百日服藥數劑。未應。更醫病狀依然。復召診視。予曰。此水火失濟象也。豈能速效。仍用前方。再加龍骨。蒺藜。桑螵蛸。蓮蕊鬚。合乎滑者瀉之之意。守服兩旬。虛陽漸斂。精下日減。但病久形羸。食少。究由脾胃有虧。經云。腎者主水。受五

臟六腑之精而藏之。是精藏於腎。非生於腎也。譬諸錢糧。雖貯庫中。然非庫中自出。須補脾胃化源。欲於前方內參入脾藥。嫌其雜而不專。乃從脾腎分治之法。早用參苓白朮散。晚間仍進前藥。服之益効。續擬丸方。調養而瘳。

### 余氏子瘡後變證

余氏子八齡。形瘦陰虛。夏患瘡。愈後失調。值秋燥時。偶作寒熱。幼科泛投疏散之劑。轉致躁擾搐搦。危證百出。余翁求視。以決死生。予見其兒。肢掣痰鳴。身熱煩躁。勢頗危篤。診脈神根未敗。予曰。疾固劇矣。然尚可生。翁喜叩其說。予曰。驚風一證。時世無傳。小兒受害。不可勝數。喻氏雖闢其謬。特重外感。輕內傷。經曰。東方青色入通於肝。其病發驚駭。醫昧病因。用方通套。偶遇強實而應者有之。特此兒所患。本非外因。良由腎水下虛。肝失其養。木逢金制。故作寒熱。狀似外感。誤投疏散。津液更傷。因而肝風鼓動。變幻若此。予尙望其生者。因其脈猶未敗耳。方擬六味地黃湯。滋水生木。更加歸芍甘草鉤藤之屬。和陽熄風。風熄而驚自定矣。翁聞言甚悅。服藥痰平熱退。不搐不煩。另製膏子藥與服全愈。



汪典揚翁外孫女體弱感邪證變抽搐

典翁外孫女年三歲。病經旬日。發熱便瀉。初服疎導藥不應。忽作抽搐。復請前醫視之。云係動驚。更加金藥琥珀。典翁邀予商酌。望其兒色白神疲。頭身雖熱。四肢冰冷。按脈沉細無力。謂曰。病乃質虧感邪。便瀉多日。脾元受傷。以致肝風內動。金石之品不可用也。擬六君子湯加炮薑桂枝。服藥熱退瀉稀。再服肢溫瀉止。驚亦不作。

方玉堂翁孫女暑風驚證詳論病機治法

玉翁孫女年四齡。夏間感受暑風。熱發不退。肢搐體僵。目斜口噤。予曰。此暑風急驚也。暑喜傷心。風喜傷肝。心肝爲臟。臟者藏也。邪難入。亦復難出。證雖可治。然非旦晚能愈。且內服煎藥。仍須參以外治之法。令挑黃土一石。搥細攤於涼地上。鋪荷葉。再用蒲蓆與兒墊臥。慎勿姑息。俟熱退驚定。方可抱起。藥用防風香薷柴胡。鈎藤連翹川連石膏木通生甘草。引加鮮菖蒲扁莢葉。清暑疏風。一切金石之類。

概置不用。蓋病因暑風生熱。熱生驚。金石鎮墜錮邪。最爲害事。依法服藥。守至七朝。熱退驚定。渠家以爲病愈。恐久臥涼地不宜。將兒抱置牀上。當晚熱復發。予令仍放土上。熱即退。尙不之信。次晚復抱起。熱又發。乃問所由。予曰。邪未淨也。又問邪何日可淨。予曰。傷寒以十二朝爲經盡。大概亦需此期。屆期上牀安臥。不復熱矣。藥換養陰。調和肝胃。諸恙皆平。惟瘖啞不能言。其母憂甚。予曰。無傷。將自復。閱三月。果能言。予按此證。小兒夏間患者甚多。治不如法。往往不救。較之尋常驚證。特異。考諸古訓。鮮有發明。惟近時吾郡許宣治先生。敘有十則辨論頗詳。至若臥置土上。墊用荷葉一法。猶未言及。予治此證。每用此法。獲驗。蓋土能吸熱。荷葉清暑故耳。特其驚之作。必由熱盛而成。然有一熱即作者。有熱二三日而作者。其狀悉皆昏迷搐搦。肢厥咬牙。輕者時昏時醒。重者七日方甦。極重者至十二朝始轉。若由吐瀉而起。脈細質虧。不能受清涼者。多不可治。倘不因吐瀉。一熱即驚。脈洪質實。能受清涼者。十中可救七八。勿視其危而棄之也。再按驚後瘖啞一證。諸書亦未論及。每見證輕者。病後多無此。患重者有之。然有瘖至一兩月愈者。有三四月愈者。有終身不愈者。予堂姪女驚後數載始能言。又見保村族人子。驚後瘖啞。

至今十餘年。竟不能愈。其故總因多服金石之藥所致。若未服此等藥。雖包絡暫閉。當自開耳。

方宅揆翁幼孫暑風驚證病愈之奇

宅翁幼孫。夏月患暑風驚證。熱盛神迷。肢掣齒齬。目斜。予照治玉翁孫女法。數日。證猶不轉。不啼不食。氣息奄奄。儼如就斃。翁以爲殆。予曰。病誠可畏。若在他候。則無生理。惟此證乃暑邪內閉心竅。幸得竅開。尙可挽回。仍令守視勿懈。一夕迅雷驟至。兒臥地上。忽然作聲。如夢初覺。此後神明漸甦。熱平驚定。斯證予雖爲治愈。然理殊不可測。豈雷氣通于心。雷動則蟄啓。心爲邪閉。得雷聞而啓耶。

洪荔原翁尊堂大頭時疫真熱假寒之證

荔翁尊堂。年屆六旬。初發寒熱。疎散不解。越日頭顱紅腫。漸及面目。頤頰舌焦。口渴。發熱脈數。予視之曰。此大頭時疫證也。東垣普濟消毒飲最妙。翁云。家慈向患腸風。體質素弱。苦寒之劑。恐難勝耳。予曰。有病當之不害。若恐藥峻。方內不用黃



連亦可。市藥煎熟。僅飲一盃。旋復吐出。病人自覺喉冷。吸氣如冰。以袖掩口。始快。衆見其拒藥喉冷。疑藥有誤。促予復診。商欲更方。細審脈證。復告翁曰。此正丹溪所謂病人自覺冷者。非真冷也。因熱鬱于內。而外反見寒象耳。其飲藥旋吐者。此諸逆衝上。皆屬于火也。如盈爐之炭。有熱無焰。試以杯水沃之。自必烟焰上騰。前治不謬。無庸遲疑。令將前藥飲畢。喉冷漸除。隨服復煎。乾渴更甚。頭腫舌焦如前。荔翁着急。無所適從。予曰。無他。病重藥輕耳。再加黃連。多服自效。如言服至匝旬。熱退腫消。諸恙盡釋。可見寒熱真假之間。最易惑人。若非細心審察。能不爲所誤耶。

### 又夫人子嗽

荔翁夫人。懷孕數月。嗽喘胸痺。夜不安臥。食少形羸。予曰。此子嗽也。病由胎火上衝。肺金被制。相博失職。治節不行。經云。咳嗽上氣。厥在胸中。過在手陽明太陰。夫嗽則週身百脈震動。久嗽不已。必致動胎。古治子嗽。有紫苑散。百合湯法。猶未善。鄙見惟補肺阿膠湯。內有甘草兜鈴杏仁牛蒡清金降火。糯米阿膠潤肺安胎。一

方而胎病兩調。至穩至當。服藥兩日。咳嗽雖減。喘痺未舒。方內加葦莖一味。取其色白中空。輕清宣痺。再服數劑。胸寬喘定。踰月分娩無恙。

族兄奏韓挾虛傷寒因循貽誤抹治原委

族兄奏韓。年逾四旬。外腴內虧。邪乘虛入。寒熱咳嗽。頭身疼痛。脈大無力。予初投溫散不解。轉用補中益氣湯。加薑棗輔正托邪。語其姪曰。令叔病候不輕。慎勿泛視。旁人以爲病輕藥重。更醫漫不爲意。遷延數日。勢漸鴟張。延同道余朗亭先生診治。不肯立方。旣而曰。程某現居比隣。胡不邀來同議。乃復相招。觀其病狀增劇。面紅目赤。舌黑脣焦。神識昏亂。脈息豁大空虛。勢欲內陷。因與余君商。以壯中溫托。倣六味回陽飲方法。無如渠家皆係女流。其姪少不諳醫理。或謂煩熱。若此再投薑附。必致踰牆上屋。故此遲疑。藥不敢服。又復因循。病勢更劇。再請余君不至。闔家張皇。其姪偕鮑履平兄來舍懇治。并乞札邀余君。予爲作書。余君始至。賓朋交集。時金融若兄在座。私謂予曰。子可盡力舉方。服藥之事。吾能任之。復與余君斟酌。仍用前方。融兄俟藥煎熟。面督服下。次日神采稍回。脈象漸斂。方除炮薑。加

枸杞山萸。又服一劑。熱退舌潤。再將附子分兩減半。加杜仲山藥。繼進大補元煎。兩月始康。

### 方牧夫兄尊堂寒溼內伏加感外邪

嘉慶甲子初秋。牧兄邀視伊母恙云。家慈年逾五旬。外腴內虧。病經八日。上熱下冷。痰多汗少。咳嗽作嘔。昔患淋痛。茲亦帶發。醫爲散風清暑。治俱不應。又以爲肝火。擬用龍膽瀉肝湯。求爲決之。予曰。淋證爲本。感證爲標。從本從標。當觀病之緩急。未可臆斷也。比往診視。脈細面青。身熱足冷。時正酷熱。病人猶蓋氈被。舌苔白滑。胸腹脹悶。不飢不渴。謂牧兄曰。尊堂之病。乃寒溼內伏。加感外邪。治宜溫中逐邪。淋痛無暇兼顧。方用蒼白二陳湯。加薑附白蔻。以溫中燥溼。桂枝秦艽。以徹其表。牧兄問服藥以何爲驗。何期可愈。予曰。傷寒以舌爲憑。舌苔退淨。病邪自清。計非二候不可。初服舌苔稍退。再劑已退其半。服至四劑。寒熱全解。舌苔退淨。淋痛亦止。惟腹悶食少。大便未行。次日忽便瀉數次。僉以傷寒漏底爲慮。予曰。無妨。仲聖云。胃家實。穢腐當去也。方易六君子湯。加穀芽苡仁澤瀉神麴。健脾滲溼。三日



內共瀉廿餘行。始得胸寬食進。越日忽又發熱。診脈浮大。予曰。此復感也。牧兄曰。病人日來俱臥帳中。邪何由入。予曰。想因日前便瀉。夜間下牀。恙久體虛。易于感耳。仍用六君子湯。加薑附秦艽。一服即平。

曹近軒翁感後食復

近翁同道友也。夏月患感證。自用白虎湯治愈。後因飲食不節。病復發熱腹脹。服消導藥不效。再服白虎湯亦不效。熱盛口渴。舌黃便閉。予曰。此食復也。投以枳實梔豉湯。加大黃一劑和二劑已。仲景祖方。用之對證。無不桴鼓相應。

曹肖巖翁春溫兩感危證

道友曹肖巖翁。故居楊村。僑寓巖鎮。乾隆甲寅春初。病寒熱頭痛。自服溫散不解。又因胸膈脹悶。疑夾食滯。加用消導亦不效。直至七朝。熱發不退。精神恍惚。予視之曰。病由冬不藏精。又傷於寒。邪伏少陰。乘時觸發。即春溫兩感證也。渠慮客中不便。乃歸。詰朝廷診。勢漸加重。神昏脈大。面赤舌黑。方倣理陰煎。補中托邪。渠師

仇心谷先生。見方稱善。次早復診。予告仇公曰。此病全是真元內虧。邪伏於裏。猝難驅逐。吾料其熱須過二候。始能退去。熱退神自清耳。復訂六味回陽飲與之。越日再視。熱盛舌乾。煩躁脈數。因易左歸飲。令服兩劑。期屆二候。果汗出熱退。守至兩旬。飲食大進。日啜糜粥十餘碗。便猶未圓。其昆季問故。予曰。人胃中常留水穀。三斗五升。每日入五升。出五升。緣病中全不能食。胃中水穀。久經告竭。今雖日啜糜粥。不足彌縫其闕。井未有餘。焉能驟便。予閱方書。案載一人病後。納食頗多。井不欲便。亦無脹楚。衆疑之。醫曰。胃津虧耗。燥火用事。所進之食。即銷鎔。其渣滓須待津回燥潤。方能便利如常。閱月餘。便始通。今纔兩旬。何慮焉。後至三十餘日。便通。病亦全却。

### 又二郎麻閉急證

肖翁三郎。心成兄。幼時出麻。冒風隱閉。喘促煩躁。鼻扇目闔。肌膚枯澀。不啼不食。投藥莫應。翁商于予。見其勢已瀕危。謂曰。此麻閉急證。藥非精銳。蔑能挽救。方疏麻杏石甘湯與之一服。膚潤麻漸發出。再服。週身麻出如瘡。神爽躁安。目開喘定。

繼用瀉白散清肺解毒。復用養陰退陽之劑而愈。予治痲閉危候。每用此方獲驗。蓋痲出於肺。閉則火毒內攻。多致喘悶而殆。此方麻黃發肺邪。杏仁下肺氣。甘草緩肺急。石膏清肺熱。藥簡功專。所以效速。可見仲景方不獨專治傷寒。并能通治雜病也。

### 吳芳崖兄幼孫胎瘧

芳兄乃孫。甫生兩月。即患胎瘧。幼科僉用疎導和解不愈。面色黃滯。口鼻手足俱冷。予疏六君子湯。加炮薑。芳兄曰。襁褓即可服參耶。予曰。小兒如初生萌芽。不慣風日。攻伐宜少。補益宜多。况瘧久脾傷。溫補脾元。重扶生氣。不易法也。服藥色澤肢溫。瘧止無恙。

### 方理豐翁中寒脫陽殆證救甦

理翁年逾五旬。耽于酒色。時值寒夜。隣家邀飲。起身小解。昏眩仆地。促予往視。面白肢厥。口鼻氣冷。神昏遺溺。脈細如絲。予曰。陽脫矣。奈何。渠子弟泣求拯治。倉卒



市藥不及。令先取艾火。灸氣海關元數壯。并煎薑湯灌之。少頃。呻吟出聲。方訂參附湯。因其力難辦。參姑用黨參二兩。附子一兩。濃煎服訖。四肢漸溫。目開能言。昇歸。詰朝脈色略回。惟嘔惡畏寒。不思飲食。將前方分兩減半。參合理中湯方法。與服二日。轉用右歸飲。溫補腎元。月餘方能起簀。

### 方晉偕翁乃媳咳嗽成癆預決不治

晉翁乃媳。秋間咳嗽。不以為意。交冬漸甚。午後寒熱。醫云。外感。服藥不效。遂致形倦肌瘦。食少便溏。予視其行動氣促。診脈弦勁無胃。詢其經期。三月未至。私謂晉翁曰。此殆證也。危期速矣。翁驚曰。是病不過咳嗽寒熱。何以至此。予曰。經云。二陽之病發心脾。有不得隱曲。女子不月。傳為風消息貴者。死不治。矧脈弦勁無胃。乃真臟也。經又云。形瘦脈大。胸中多氣者。死。脈證如此。何以得生。辭不舉方。踰旬而歿。

### 潘氏室女經閉成癆不治之證

潘氏室女。年十五歲。初患腹痛。馴至咳嗽寒熱。形瘦食少。診脈細數。詢經事愆期三月。予曰。瘵證也。辭不治。未百日而歿。歷見婦人咳嗽寒熱。脈數經閉者。多不可治。若室女更無一生。任用補虛清熱。解鬱調經諸法。總無靈効。求諸古訓。鮮有良法。惟金匱載有大黃蠱蟲丸。及百勞丸二方。喻氏闡發其義。竊思此證當其初起。血痺不行。癆瘵將成。未成之際。卽以此藥投之。祛舊生新。或能圖功。亦未可料。倘遷延時日。元氣已衰。則無及矣。識此質諸明哲。

### 方燦侶翁腹痛蓄瘀脫血治愈并商善後法

燦翁年近七旬。向患腹痛。一夕忽吐下紫瘀血塊數碗。頭暈自汗。目闔神疲。診脈芤虛。謂其子曰。此血脫證也。書云。久痛多蓄瘀。蓋腹痛數年。瘀蓄已久。一旦傾囊而出。夫氣爲血之帥。高年氣虛。切慮暈脫。古人治血脫。每用獨參湯以益其氣。但目下參價甚昂。恐難措辦。乃訂大劑黑歸脾湯。資其化源。固其統攝。未幾獲痊。次年病復。雖不若前之劇。亦覺困倦莫支。仍守前法治愈。其子憂甚。恐其再發。商圖善後之策。予思血蓄之故。必有窠囊。如水之盈科而進。按胃爲生血之源。脾爲統

血之臟。苟脾健胃強。則氣血周流。何蓄之有。經以六經爲川。腸胃爲海。譬諸洪水。汎濫。究緣江河失疏。爲訂二方。早用歸脾丸。晚用參苓白朮散。每方俱加丹參。乾漆二味。冀其去瘀生新。服藥經年。其病遂絕。

### 農人某攻痞動血昏暈急證

農人某。久患痞積。腹如抱甕。偶遇方士。教以外用灸法。內服末藥。即可刈根。某信之。數日後。忽覺心嘈如飢。吐下紫瘀。成碗成盆。頭暈不能起坐。無力延醫。昇至鎮中戚家。招予往視。病者踞臥榻上。閉目呻吟。方欲診脈。又血湧出。狀如豚肝。遍地皆污。昏暈手戰咬牙。戚家恐其脫去。急欲扛回。予按脈雖虛細。尙未散亂。戒勿驚擾。姑俟之。少頃暈定。令先灌米飲以安其胃。續灌黨參湯以益其氣。再與八珍湯一劑。囑儘今晚服盡。明日再商。詰朝人來請云。昨服藥血幸止。惟心慌氣墜。睡臥不安。思血脫之後。心脾必虧。乃易歸脾湯。加黑薑。令其扛歸。多服自效。後果如言。

### 王以仁翁乃郎暑病熱久傷陰



以翁乃郎年五歲。夏月病踰兩旬。諸藥罔效。發熱不退。汗多口渴。色白肌瘦。切脈虛數無力。閱前方悉皆清散之屬。翁問病勢何如。答曰極重。又問此爲何病。予曰暑病也。初治甚易。醫不如法。熱久傷陰。元氣被伐。猶幸肝風未動。急宜養陰。保金生水。尙有生機。方用首烏料豆皮扁豆沙參玉竹麥冬五味石斛茯苓丹皮。令取稻露煎藥。守服四劑。汗止熱退。更進麥易地黃湯。神采漸轉。惟飲食欠旺。參用六神散。餐加元復。

又翁自病肝鬱證似外感

以翁自病寒熱脅痛。口苦食少。呻吟不寐。已經月餘。服藥不應。自以爲殆。診脈弦急。知其平日情志抑鬱。肝木不舒。病似外感。因係內傷。與加味逍遙散。一服而效。數服而安。

吳秀森翁乾胸氣

秀翁年將五十。體虛多勞。初病足痺。醫治數月不效。診脈虛濡無力。視其腓肉枯

癰。膝蓋腫大。謂曰。此乾脚氣也。又名鶴膝風。病由肝腎下虧。邪乘虛伏。醫者不知溫補托邪。泛從標治。轉致血氣耗傷。無性命之虞。有終身之患。治倣大營煎。加附子。黨參。河車。鹿角膠。初服十劑。其痛已減。再服十劑。足能履地。續服丸藥。枯回槁澤。行動如常。

### 洪臨川兄幼女偏癱

臨兄女三歲。右肢痿軟。不能舉動。醫作風治。予曰。此偏癱證也。病由先天不足。肝腎內虧。藥當溫補。若作風治。誤矣。臨兄曰。偏癱乃老人病。孩提安得患此。予曰。肝主筋。腎主骨。肝充則筋健。腎充則骨強。老人腎氣已衰。小兒腎氣未足。其理一也。與右歸飲。加參耆鹿角膠。數十服乃愈。

### 吳禮庭兄時感腫腮消後畢丸腫痛

禮兄平素體虛。時感寒熱。耳旁腫痛。維時此證盛行。俗稱猪頭瘟。醫與清散藥兩劑。耳旁腫消。畢丸旋腫。痛不可耐。寒熱更甚。予思耳旁部位屬少陽。畢丸屬厥陰。

肝膽相爲表裏。料由少陽之邪。不從表解。內傳厥陰故耳。倣煖肝煎。加吳萸一劑而效。同時族人澤瞻兄病此。予診之曰。得無耳旁腫消。畢九腫痛乎。澤兄驚曰。子何神耶。亦用前法治愈。後閱會心錄。載有腫腮一證。云醫不知治。混投表散。邪乘虛陷。傳入厥陰。畢九腫痛。耳後全消。昔賢之言。洵不誣也。

### 莊炳南兄素稟火體病治與衆不同

炳兄稟質多火。喜涼惡熱。夏月常以冷水灌汗。露臥石地爲快。素患痰火。方用生地丹皮麥冬山梔括蕁黃芩知母等味。發時服之即安。乃至他病亦服此方。并食肚肺鯢鮑湯。汗出即解。暇時向予道及。予曰。痰火藥應用涼。若凡病守服一方。似無其理。倘屬傷寒陰證。恐其誤事。後當慎之。一日果患陰暑感證。寒熱身痛。脈細肢冷。予投以附子理中湯。不應。再強服之。病反加重。堅不服藥。索食鯢鮑肚肺湯。予謂葷油膩邪。戒勿與食。不聽。食後得汗反安。欲服常治痰火方。家人勸阻不可。竟服之。病却。後亦無損。予思咫尺間。人病體質之殊若此。則南北地土不同。風氣各異。其人其病又何如耶。素問異法方宜論。不可不玩索也。



## 柳蔭千兄令愛無故發癰

嘉慶甲子秋。予在隣村。偶值余朗亭先生云。日前往富場視一女子。病甚奇。初起無故發癰。醫言是火。多投涼藥。漸變損怯。今脈證俱敗。此何故也。予曰。無故發癰。事屬罕聞。若云變怯。大都清涼過劑。元氣被戕耳。越日蔭兄令愛兩脰癰出。密密形如錦紋。診脈和平。詢其寢食如常。別無他疾。予曰。勿藥。蔭兄曰。癰乃重候。安可勿藥。因以余公所云告之。竟聽予言。後癰退無恙。設當時雜投湯藥。不幾踵富場女子之覆轍乎。

柳聞鶯兄挾虛傷寒并後患陰瘡誤截致變拯治

## 始末

聞兄體虛感邪。兼挾內傷。病起寒熱肢厥。診脈沉細。初投當歸四逆湯。肢厥雖回。身熱未退。審屬少陰下虧。邪乘虛陷。更進理陰煎兩劑。復診脈轉浮大。舌黑面紅。奄奄欲脫。貧士無力服參。姑以黨參熟地各四兩。熬成濃汁。晝夜與漿粥間進。神

稍回。脈稍斂。尙覺心煩內熱。舌枯津涸。囑煮團魚湯煎藥。諸候漸平。又轉爲瘧。發時甚劇。多方圖治。百日始痊。後數年。因夏傷於暑。秋發瘧瘧。邪伏於陰。寒熱夜作。予用補中益氣湯。參香紅飲數劑未止。自求速愈。雜服截瘧諸方。氣血大傷。面青形倦。寢食俱廢。目中時見紅光。洩溺淋漓。復迓予治。悉屏瘧門套藥。倣四明治久瘧不愈。用養營湯送入味丸法。十劑而止。

方繡文兄夫人懷孕日吐清涎數碗

繡兄夫人。舊冬曾患弱證。今春又病肝風。俱予治愈。續復得一奇證。口吐清涎。日計數碗。道經云。涕唾精津汗血液。七般靈物總屬陰。涎亦液屬。久吐真陰必傷。然百計治之不止。語其婦曰。古有嚙華池真水之法。嚙之不吐何如。婦曰。若強嚙下。卽憤憤欲嘔。診手少陰脈微動。問經事兩月未行。告繡兄曰。脈象似屬妊娠。不卜昔年懷孕有此證否。曰。拙荆往年受孕。原有吐證。但所吐者食耳。此番證絕不類。况舊病體虛未復。焉能受孕。予曰。據脈多屬重身。不然斷無此等奇證。今不論其孕否。專意補養肝腎。兼益脾胃。以俟消息。交夏後腹中躍動。孕形漸露。復邀診視。

繡兄笑曰。拙荆果孕矣。但吐涎如故。奈何。予曰。無傷。產後當自止。分娩後涎竟止。計自春徂冬。十月之間。所吐涎沫無算。而津液竟無所損。且胎前諸治不應。產後不治自痊。亦異事也。

### 曹德酌兄乃郎水腫

德兄乃郎年十四歲。證患水腫。醫投利水諸藥無效。轉致腹大如鼓。足冷如冰。頭身俱腫。陰囊光亮欲裂。行動喘促。勢甚危急。診脈沉細無力。謂曰。此脾肺腎三臟內虧之病也。肺虛則氣不化精而化水。脾虛則水無所制而反剋。腎虛則水無所主而妄行。仲師金匱腎氣丸。如禹之治水。行所無事。實爲至當不易之方。無如病久形羸。消耗藥多。真元敗壞。恐難挽矣。德兄固請救治。仍用本方。旬日而驗。不月而痊。

### 方詠葭兄傷寒轉瘧並論胎瘧病因

詠兄先天不足。形瘦質弱。夏夜貪涼。醉而使內。邪乘虛伏。交秋病發。初診脈細肢



冷。舌白面青。畏寒不熱。腰痛無汗。方訂附子理陰煎。服後夜發壯熱。次日復視。謂其尊人曰。令郎病候。乃夾陰傷寒。勢防內陷。藥當溫中托邪。冀其雲蒸雨化。令守原方。服至六日。病猶未減。舉家憂甚。予曰。正虧邪重。未易驅除。日來證未變幻。卽爲見效。須過二候。方望轉機。方內加入參耆。枸杞杜仲。一意照顧真元。毫不雜投標藥。屆期得汗熱退。渠家以爲病愈。是晚復發寒熱。詰朝往視。予曰。瘧作矣。詠兄曰。瘧疾吾生平未曾患過。恐其纏綿。懇爲截之。予曰。子病乃極重傷寒。賴溫補諸劑。守住三陰門戶。不使內陷。經言少陽爲樞。今未淨之邪。得從少陽轉樞而出。乃佳兆也。烏可言截。于是早進八味丸。晚服補中益氣湯。十數發纔止。予曰。慎之防復。旬日後瘧果復。更用養營湯。吞八味丸。乃愈。按胎瘧一證。諸書鮮有言及。患者多至淹纏。輕則月餘。重則數月。治不如法。或成虛勞。或變腫脹。卽質實之人。亦累成瘧母。爲終身之患。且常瘧有不入陰。胎瘧每多入陰。常瘧愈後少復。胎瘧愈後多復。又究此病淹纏之故。想由經隧路徑生疎。故邪不易出耳。續閱會心錄云。常發瘧者。邪從毛竅熟徑而出。其愈易。若胎瘧則隧道少疏通之機。毛竅非熟由之路。其愈難。乃知昔賢之言。先得我心矣。再按其證。似與痘疹相類。人生皆不能免。

夫人稟父母之精血以成形。其所以必患痘疹者。蓋因淫火種於有形之先。發於有生之後。不識胎瘧之因果。何所本耶。錄中惜未詳及。或謂此乃胎中感受風邪。故名胎瘧。是說予未之信。

閔方田兄初患少陰傷寒。喉痺。治愈後患脚氣。雜

### 治成痿

方兄體素清癯。證見身熱足冷。喉紅腫痛。脈息沉細無力。診畢謂予曰。賤恙似屬風熱。煩君爲我散之。不卜喉痛可吹冰硼散否。予曰。不然。君病乃少陰傷寒。少陰之脈循喉嚨。良由腎元下虛。寒邪客之。雷龍不安其宅。是以上熱下寒。其喉爲痺。治當溫補下元。引火歸根。若泛視爲風熱。而清散之。殆矣。方倣鎮陰煎。一服喉痺愈。再服寒熱退。是日有何生者。從本里吳澹泉先生遊。證候相類。向與喉科某善。因便道託診。某與清散藥一劑。服後徹夜煩躁不安。比曉。吳公迂予。至已逝矣。歸告閔君。駭爲吐舌。後數年。渠又患脚氣腫痛。予初爲祛風滲溼。因其下元素虧。兼益肝腎。診視數次。病猶未減。更醫消散過劑。血氣耗傷。腿膝枯癟。致成痿癱。足不

任地。閱十餘年。始能出戶。

汪心滌兄夫人半產血暈危證

汪心滌兄夫人。體孱多病。懷孕三月。腹痛見血。勢欲小產。延余至時。胎已下矣。血來如崩。昏暈汗淋。面白如紙。身冷脈伏。予曰。事急矣。非參附湯莫挽。僉謂用參恐阻惡露。予曰。人將死矣。何遠慮爲。亟煎參附湯灌之。少甦。旋復暈去。隨暈隨灌。終夕漸定。續用參朮耆草歸地枸杞大劑濃煎。與粥飲肉汁間服。旬日始安。再投歸脾湯數十劑乃愈。後張效伊翁夫人。證同。亦照此法治驗。乾隆甲寅秋。予室人叶孕三月。胎墮血暈。日進參耆十數兩乃定。後仍半產數次。勢皆危險。均賴補劑挽回。倘惑于浮議。並殆矣。

吳立亭翁幼孫傷暑危證治驗

嘉慶辛酉夏。立翁幼孫。傷暑發熱。吐瀉不止。神煩體躁。脣赤舌黃。口渴欲飲。飲後卽吐。診脈沉伏。手冷過肘。足冷過膝。料非寒厥。欲投涼劑。恐其吐瀉。脾胃受傷。擬



用六君子湯。除白朮加川連木瓜黃土稻花。安脾胃。祛暑邪。服藥不效。維時赤日當空。暑氣正酷。偶見庭前花卉。枝葉枯萎。童子汲水澆之。因悟病機。乃與生脈地黃湯一服。吐瀉即止。再服。脈出肢溫。未及旬而愈。思前脈伏肢厥者。乃童真未充。吐瀉日頻。津液頓傷。脈乃血派。脾主四肢。脾不能爲胃行其津液。四肢不得稟水穀氣故也。六味大培真陰。生脈保金化液。小兒臟氣易爲虛實。是以效速。

### 梅文彩兄令堂病類噎隔奇證

噎隔一病。古人論之甚詳。尙有似隔非隔之證。猶未言及。文兄令堂年屆四旬。病經數月。初時不能食飯。後并米飲俱不能咽。強之即吐。隔證無疑。然每日尙可啖乾麵粿數枚。思古人論隔證。不出胃脘枯槁四字。又稱陽氣結于上。陰液衰于下。今既不能食飯。何獨能食麵。且飲湯即吐。乾食反安。理殊不解。與逍遙散數服不應。考張氏醫通有飲鵝血法。行之又不驗。更醫多方圖治。亦不效。因勸勿藥。兩載後可食麵湯并精猪肉。今十餘年。肌肉不瘦。起居如常。亦奇證也。

### 鄭鶴鳴夾陰傷寒

鄭鶴鳴。君平之流。冬月適患傷寒。初起寒熱身痛。不以爲意。延挨數日。陡然肢冷。脈伏肌肉青紫。面赤煩躁。呃逆頻頻。請同道曹肖巖翁診視。詢知係慾事後起病。以爲少陰下虧。寒邪乘之。逼其真陽外越。與六味回陽飲。服之不應。勢已瀕危。邀予商酌。予曰。景岳回陽二方。皆能救急。其中尙有分別。夫寒中陰經。審其陰陽俱傷。而病尙緩者。則從陰陽兩回之法。苟真陽飛越。重陰用事。須取單騎突入重圍。舉旗樹幟。使旣散之陽。望幟爭趨。若加合陰藥。反牽制其雄入之勢。定方單用薑附參草四味煎。令冷服。外用葱艾炒熱熨臍。老薑附子皮煮汁蒸洗手足。於是一晝夜厥始回。脈始出。惟呃未止。每呃必至百聲。知爲腎氣上衝。於前藥中參以熟地枸杞五味丁香。攝納真元。諸恙漸減。改用右歸飲。與服二日。目辣舌燥。投六味地黃湯。浮陽頓平。復爲調理脾胃。及脾腎雙補而起。

鄭媼便閉

鄭媼年逾古稀。證患便閉。腹痛肛脹。寢食俱廢。已經兩旬。諸治不應。延診以下爲囑。切脈虛細而澀。謂曰。此虛閉也。一補中益氣湯足矣。何下爲。服藥兩日。便仍不

通。自言脹痛欲死。刻不可耐。必欲下之。予曰。下法吾非不知。但年高病久。正氣虧虛。下後恐其脫耳。媼曰。與其脹閉而死。莫若脫之爲快。因憶心悟篇云。病有不可下而又不可以不下。下之不得其法。多致誤人。沉思良久。于前湯內加入製大黃三錢。倣古人寓攻於補之意。飲藥後腸鳴失氣。當晚便解。結糞數枚。略能安臥。次日少腹尙痛。知其燥矢未淨。仍用前方大黃分兩減半。再劑便行兩次。先鞭後澹。痛止食進而愈。夫補中益氣湯。原無加大黃之法。此雖予之創見。然醫貴變通。固不容膠柱鼓瑟也。

### 吳光先翁偏中便閉

光翁年踰七旬。偏中臥床不起。治用地黃飲子。參左右二歸飲。服藥半月。證已守住。惟大便兩旬未圓。腹痛肛脹。蓋由氣血俱虧。不能傳送。方如通幽湯。補中益氣湯。五仁湯。濟川煎。屢投不驗。思用猪膽汁蜜煎導法。無如燥糞已抵肛門。阻不能入。每一努掙。魄汗淋漓。頭暈欲脫。無可如何。偶記葉氏案中載治便閉有用挖法。令病人自用中指染油探入肛內。將燥糞挖碎而出。奈病者肢癢自難掉動。囑其



孫依法行之。當卽挖出燥糞數塊。隨後自解。穢腐甚多。不勞餘力。病者稱快。洵治便閉捷法也。

董千雲傷寒格陽證

董千雲賣花爲業。年逾四旬。外狀豐腴。冬月患傷寒。診脈沉細無力。證見寒熱煩躁。頭身疼痛。面紅目赤。舌吐脣外數寸。病來勢暴。詢因房勞感受寒邪。逼其虛陽外露。卽格陽證也。方定六味回陽飲。令其煎成冷服。無如飲藥旋嘔。并吐虵蟲。躁擾如故。甚爲躊躇。其母跪求救治。勉取前藥半盞。沖入豬膽汁數匙。試服不嘔。良久又與半盞。夜間盡劑。晨診躁象略安。舌收吐止。仍照原方再進。次易八味地黃湯。時屆九朝。忽口噤不語。十一二日。又寒熱如瘧。有從外感起見者。予曰。溫中卽可以散邪。強主正所以逐寇。力排衆議。堅持數日。稍見轉機。此後尙多枝節。極力扶住正氣。守至兩旬。寢食雖安。神采欠爽。因思前病重時。祇圖固正。未暇驅邪。溫補藥多。未免留邪閉竅。曾記方書論傷寒時疫愈後。神識不清。有屬邪滯心包之語。與服蠶煎兩劑。神明頓清。續爲調理而痊。

## 許姬傷寒疑難證治

許姬冬月病傷寒。寒熱頭痛。醫投疏表和解不應。漸致昏譫口渴。更進芩連清之。亦不應。便秘經旬。用大黃亦不下。予初望其面赤煩躁。意屬陽證。及切脈細澹。又疑陽證陰脈。思維未決。因問其汗自病起。至今未出。捫之膚皴而枯。予曰是矣。且不立方。姑先與藥一劑。有驗再商。幸彼農家不諳藥性。與藥卽服。次日往視。面紅稍退。煩躁略平。膚腠微潤。予曰生矣。疏方付之。乃大青龍湯也。又服一劑。更見起色。轉爲調理而安。渠族人佩之。兄與予善。亦知醫理。問曰。君治此病。殆有神助。不然如斯重候。何藥之奇效之速也。予曰。仲聖云。太陽病不罷。面色緣緣正赤者。此陽氣怫鬱在表。其人躁煩。不知痛處。但坐以汗出不徹。更發汗則愈。何以知之。脈澹故也。子能參悟此篇。自知此病之治法矣。

## 吳某時瘧變證

吳某嘗富後貧。體虛多鬱。病患時瘧。堅不服藥。已半月矣。一夕忽發熱不退。胸悶

乾嘔。醫投小柴胡湯不應。熱盛汗多。神昏體倦。脈細無力。嚙語音低。急延予診。按仲師云。譫語有虛有實。實則譫語。虛則鄭聲。素問云。言而微。終日乃復言者。此奪氣也。用補元煎合生脈散。兩服霍然。

族叔曉堂失志狂妄

族叔曉堂。向在吳地貿易。情志不舒。抑鬱成病。神迷譫妄。諸醫無效。同人慮有不可測。送回里中。診脈弦急搏指。知其因鬱生火。因火生痰。痰火擾其神明。蒙其心竅。是以語言不正。舉動異常。與陽明胃實狂亂之候不同。故前醫用下藥不應。病久正氣固虛。補之又恐助其痰火。爰倣服蠻煎加犁尖鐵琥珀辰砂爲引。初服譫妄稍定。再劑寢食漸安。共服十二劑。神清語正。舉止如常。蓋此方能清心肝之熱。而通神明。故效速如此。

族人聯昇休息痢證治奇驗

族人聯昇。患休息痢。淹纏兩載。藥如清火固澁。補中升提。遍嘗無效。偶遇諸塗。望

其色萎氣怯。知爲脫血之候。謂曰。爾病已深。不治將殆。渠告其故。予曰。吾寓有藥。能愈爾病。盍往取之。比隨至寓付藥。再服卽愈。渠以兩年之疾。百治不瘳。此藥效速如此。稱爲神丹。方用鴉膽子一味。去殼取仁。外包桂圓肉。熬丸。每早米湯送下三十粒。旋以食壓之。此方初得之人。傳專治休息痢。并治腸風便血。少則一二服。多則三四服。無不應驗。其物不載本草。無從稽考。其味極苦。似屬性寒。後閱幼幼集成書云。痢久邪附大腸屈曲之處。藥力所不能到。用此奇效。思治虛怯沉疴。參耆歸地有用數斤愈者。治傷寒熱病。薑附硝黃有用數兩愈者。何此物每用不過二三分。治積年之病。其效如神。物理真不可測。先哲云。千方易得。一效難求。信矣。

### 堂妹感冒暑風證治

堂妹適隣村許姓。夏日浴罷。忽頭暈仆地。家人扶起。旋即發熱。夜間熱盛。煩渴嘔吐。譫妄不安。手指掣動。醫藥無效。予診脈息弦數。視舌尖絳苔黃。謂其翁曰。病由暑風相搏。邪熱燔熾。亟宜清解。以杜痙厥之患。方用川連香薷甘草半夏茯苓鉤藤防風青蒿羚羊角荷葉扁莢葉。服藥兩劑。熱緩神清。嘔渴亦止。方內除川連香



需釣藤防風半夏。加沙參麥冬石斛稻露。又服兩日。證減七八。再除青蒿羚羊荷葉扁莢葉。加玉竹生扁豆女貞子當歸白芍。調養而愈。

家炳然兄女肝鬱氣厥實有羸狀

炳兄女在室。年已及笄。性躁多鬱。初春曾患吐血。夏間陡然發厥。厥回嘔吐不止。汗冷肢麻。言微氣短。胸膈脹悶。脈息細澀。狀似虛象。醫投補劑益劇。予診之曰。此鬱病也。經云。大怒則形氣絕。而血菀于上。使人薄厥。又云。血之與氣。并走于上。乃爲大厥。議與越鞠丸。加鬱金枳殼茯苓陳皮半夏。兄曰。女病臥牀數日。粒米不入。脈細言微。恐其虛脫。奈何。予曰。依吾用藥則生。否則難救。蓋此脈乃鬱而不流。非真細弱。欲言而訥。乃氣機阻閉故也。觀其以手頻搥胸臆。全屬中焦鬱而不舒。且叫喊聲徹戶外。豈脫證所有耶。請速備藥。吾守此。勿遲疑也。取藥煎服。少頃。膈間漉漉有聲。噯氣數口。胸次略寬。再服嘔止。寢食俱安。轉用八味逍遙散。除白朮加香附鬱金陳皮。病愈血證亦泯。

陳某子感證體脈俱厥

陳某子年十六歲。夏月患感證。壯熱神昏。面赤煩渴。脣燥舌焦。口鼻牙根出血。俱屬熱象。惟脈息沉細。四肢厥冷。諸醫不效。時屆九朝。延予商之。予曰。此非陰證。乃陽證也。今日本應重用涼藥。恐汝家畏而不服。姑以小柴胡湯去半夏人參。加生地花粉山梔丹皮試之。無如歛俗以爲吃壞熱藥有救。涼藥無救。因見方有涼藥。果畏不服。三日後勢更劇。復來迂予。予辭不往。乃挽友人胡君景三代請。予曰。救病如救焚。彼病已重。况復遷延。恐難治矣。胡君曰。試往一決。可治則治之。至診其脈。前之沉細者。今竟絕。撫捫其肢。則冷過肘膝。更加腹痛拒按。欲便不解。驚狂不定。予曰。疾急矣。非承氣湯下之不可。疏方訖。胡君私叩予曰。從來傷寒陰陽二證。憑脈用藥。不拘浮沉大小。總以有力無力分之。有力爲陽。無力爲陰。今按脈全無。四肢冷甚。恐屬陰證。奈何。予曰。此乃陽極似陰。證載吳又可瘟疫論中。所謂體脈二厥也。歸檢書與閱。胡君以爲然。竟服下劑。夜間便行二次。比曉厥回。脈出。改用甘露飲。後易生脈地黃湯。匝月而痊。

### 又婦憂勞傳染藥誤致變

陳某子病愈後。其婦憂勞傳染。初起頭疼寒熱。予與香蘇飲一服汗解。旋又勞復發熱。口苦耳聾。兼值經期。恐其熱入血室。酌以柴芩煎。加生地赤芍丹皮。熱猶不退。更加面赤舌黃。謔語脈數。予曰。邪犯少陽陽明也。倣生生子小白湯。炒黃芩換生黃芩。加竹葉燈心爲引。并語某曰。予適有他出。倘明日到遲。可請胡君商之。或照原方先服一渣亦可。次日午刻予歸。渠已着人相促數次。急造其廬。某泣曰。病大變矣。問其何狀。曰。昨服尊劑。夜來煩熱不眠。今早忽咬牙閉目。昏厥遺尿。已請胡君斟酌。并照原方煎服一渣。迄今不轉。奈何。予曰。昨病雖重。然已加增藥味。卽不應驗。亦不至此。豈更服他醫藥歟。某曰。小兒病承救活。深爲感佩。今且專心倚仗。曷敢易醫。胡君恍然曰。往日市藥。吾未之閱。今早閱劑內生黃芩。藥店錯發生黃耆。比令換去。得無昨劑中誤服黃耆耶。因驗昨傾之藥杵。果然。予曰。此病受邪本重。前藥悉力驅之。尙不能解。誤服黃耆。將邪熱補住。內攻心包。迷塞竅隧。故致變若此。惟有急瀉心包之熱。通竅辟邪。庶有生機。擬導赤各半湯。除人參。加銀花金汁。外用紫雪點舌。飲藥至暮。神采略回。連投四劑。寢有起色。惟神呆耳聾。時多妄語。易以服蠻煎兩服。神明稍清。後用養陰定志之品。月餘始平。是役也。使非胡

君驗明藥誤。在病家必歸咎于醫。而醫亦不自知其故矣。識此凡治重病。所市藥劑。醫須親驗。不可忽也。

### 許生母傷食腹痛

許生詠堂母病請治。據云因食豚肝麵餅後。偶觸佛鬱。致患腹痛。自用麥芽檀麴香砂二陳不應。因其痛在少腹。以爲寒凝厥陰。加吳萸炮薑服之。益劇。予問痛處可按乎。曰拒按。又問日來便乎。曰未也。切脈沉細。視舌苔黃。中心焦燥。顧謂生曰。此下證也。生曰。連服溫消諸劑不驗。思亦及此。因家母平素質虧。且脈沉細。故未敢下。予曰。痛劇脈伏。此理之常。質雖虛而病則實。書稱腑病以通爲補。仲師云。腹滿不減。減不足言。當下之。又云。舌黃未下者。下之黃自去。今痛滿拒按。舌黃焦燥。下證悉具。夫復何疑。方定大承氣湯。用元明粉代芒硝。仍加香砂檀麴。兼行氣滯服。頭煎後便行一次。其痛略定。隨服復煎。夜半連下三次。痛勢大減。舌乾轉潤。易以調中和胃。旬後起居如常。

### 葉習方甥痲疳



予甥習方。穉年出麻。麻後熱久不退。乾咳無痰。肌瘠食少。糞如羊矢。神形疲困。諸醫束手。姊氏憂惶。抱負來舍。予曰。此麻疳也。病屬難療。姊囑拯治。思麻後熱久。陰血必傷。咳乾便難。津液必涸。計惟養陰保液。清肺潤腸。庶可望效。方定麥易地黃湯。加石斛沙參玉竹芝麻阿膠梨汁白蜜。并令飲人乳。食猪肚湯。姊言前醫以嗽熱未清。戒勿食葷。予曰。穀肉果菜。食養盡之。今病久腸胃乾枯。須假物類脂膏。以補人身血液。古有猪膚湯。猪肚丸。可法也。于是藥食并進。熱嗽漸減。便潤食加。調治一月。諸候均愈。肌肉復生。乃送歸焉。

族兄女痘證并婦感證瀕危抹回大略

族兄女三歲。出痘如蠶種。醫初認爲麻。越日始識爲痘。駭甚辭去。更醫泛投清解套藥。延至九朝。色白頂陷。勢欲癢塌。兄商於予。予曰。毒盛氣虛。船輕載重。本屬險逆。初起按法圖治。尙望生機。今無及矣。兄懇救治。勉訂保元湯。用糯米鯽魚羊肉煮汁煎藥。晝夜頻灌。喜得漿行陷起。再加熟地當歸枸杞鹿茸溫補之品。倣倖收功。無何婦病感證。兩進逍遙散不應。熱盛脈數。口渴舌黃。照方加生地黃芩。次日

證仍未減。神昏舌苔乾黑。予曰。疾急矣。非重劑莫挽。乃用大劑甘露飲。令其濃煎數碗。儘今日夜服盡。詰朝復視。昏熱舌黑如故。反增胸腹脹悶。旁議二冬寒涼。二地滋膩。與脹不合。予曰。古人論治感證。始終以存津液為主。今熱熾舌涸如斯。舍是別無良法。兄曰。固知藥好。然腹脹藥勢不行。奈何。沉思良久。令市大西瓜一枚。取汁與服。汁盡少頃。忽作寒戰。目闔昏睡。汗出如雨。衣被皆濡。至晚始定。兄問故。予曰。此戰汗也。非此則邪不能達。今無憂矣。嗣此熱退神清。知饑納食。惟覺身輕如葉。倦怠不支。徐爲培養血氣而安。

### 茱傭某單腹脹

茱傭某。初患腹脹。二便不利。予用胃苓之屬。稍效。渠欲求速功。更醫目爲臟寒。生滿病。猛進桂附薑黃。脹甚。腹如抱甕。臍突口乾。溲滴如墨。揣無生理。其兄同來。代爲懇治。予謂某曰。爾病由溼熱內蘊。致成單脹。復被狼藥吃壞。似非草木可療。吾有妙藥。汝勿嫌穢可乎。某泣曰。我今祇圖愈疾。焉敢嫌穢。令取乾鷄矢一升。炒研爲末。分作數次。每次加大黃一錢。五更清酒煎服。有效再商。某歸依法製就。初服

腸鳴便瀉數行。腹脹稍舒。再服腹輒脹寬。又服數日。十愈六七。更用理脾末藥而瘳。衆以爲奇。不知此本內經方法。何奇之有。予治此證。每用此法。效者頗多。視禹功神佑諸方。其功相去遠矣。

胡某乃媳感證

胡某。乃媳夏月患感證。延診時已七日矣。切脈弦數搏指。壯熱譫狂。面目都赤。舌黑便秘。腹痛拒按。診畢令先取冷水一碗與服。某有難色。予曰。冷水卽是妙藥。飲之無傷。蓋欲觀其飲水多寡。察其熱勢之輕重耳。其姑取水至。雖聞予言。心尙猶豫。勉傾半鍾與飲。婦恚曰。何少乃爾。予令盡碗與之。一飲而罄。問曰。飲此何如。婦曰。其甘如飴。心地頓快。吾日來原欲飲水。奈諸人堅禁不與。致焦煩如此。予曰。毋憂。今令與汝飲。但勿縱耳。因謂某曰。汝媳病乃極重感證。邪踞陽明。已成胃實。問所服何藥。某出前方。乃小柴胡湯也。予曰。杯水能救車薪之火乎。卽投白虎瀉心。尙是揚湯止沸耳。某曰。然則當用何方。予疏大承氣湯與之。某持方不決。隣人曰。吾婦昔病此。曾服此方得效。於是取藥煎服。夜間便行兩次。次早腹痛雖止。他證

依然改用白虎瀉心及甘露飲三方出入。石膏用至四兩。芩連各用數錢。佐以銀花金汁驅穢解毒。數日間共計用藥數斤。冷水十餘碗。始得熱退病除。衆皆服予膽大。予曰。非膽大也。此等重證。不得不用此重劑耳。

### 汪氏婦熱病喜飲沸湯

汪氏婦患熱病。壯熱不退。目赤脣乾。舌黑起刺。便閉溲赤。診脈弦數有力。應用清劑無疑。試問渴乎。曰不甚渴。惟喜飲沸湯數口。稍涼即不欲。思如此熱證。當渴飲水。何反嗜飲沸湯。若以此一端而從陰治。似乎不可。偶憶律云。二罪俱犯。以重者論。今脈證均屬陽熱。烏可以喜飲沸湯一事爲疑。先與小白湯。病狀彷彿。知其藥不勝病。乃進大劑白虎湯。石膏重用四兩。因其胃熱上衝。嘔惡不食。更加蘆根竹茹爲引。另取元明粉蜜拌塗舌。以潤其燥。如此寒涼疊進。閱十四朝。始得熱退神清。便通舌潤。使拘古法。以喜熱從陰而投溫藥。不幾抱薪救火乎。孟子云。盡信書。則不如無書。斯言可證矣。

### 蔣某陰暑



蔣某夏月病患發熱。口渴。頭疼。身痛。醫云傷暑。初用香薷飲不應。因其熱盛。更加青蒿連翹。服之益劇。診脈沉細。望色舌白面青。身雖熱而反近衣。口雖渴而喜熱飲。謂曰。此陰暑證也。非薑附莫治。其家人曰。病者日來熱盛。聯服涼劑。尙未見效。且天時酷暑。薑附恐未可用。予曰。夏月伏陰在內。人多畏熱貪涼。受寒最易。若云夏月不可服熱藥。則冬月不可服涼藥矣。何仲景治冬月傷寒。每用石膏芩連耶。舍時從證。自古有之。乃投附子理中湯。一服熱退。再服病却。

汪木工感證舌苔變易之奇

汪木工年二旬餘。夏間患感證。初起寒熱嘔瀉。自汗頭痛。他醫與疎表和中藥。嘔瀉雖止。發熱不退。汗多口渴。形倦懶言。望色青白不澤。舌苔微黑而潤。診脈虛細。經云。脈虛身熱。得之傷暑。因擬清暑益氣湯加減。服藥一劑。夜熱更甚。譫狂不安。次早復診。其脈更細。疑爲陽證陰脈。及視舌苔與昨大異。色紫肉碎。凝有血痕。渴嗜冷飲。予思此必內有熱邪。蘊伏未透。當舍脈從證。改用白虎湯。加生地丹皮山梔黃芩竹葉燈心。下午人來請云。服頭煎藥後。週身汗出。譫狂雖定。神呆肢冷。不

識何故。予往捫其手足。果冰冷異常。按脈至骨不見。闔目不省人事。知爲熱厥。命再進藥。旁議以爲體脈如此。怕係陰證。前藥恐未合宜。予曰。此非陰證。乃陽極似陰耳。若誤投熱劑。則殆。否則今晚勿藥。明日再看何如。衆然之。次日神呆略回。體脈如故。視其舌苔。又與昨異。形短而厚。滿舌俱起紫泡。大如葡萄。并有青黃黑綠雜色。膩苔罩于其上。予甚驚異。辭以不治。其母哀懇拯救。予憫之。揣摩再四。令取紫雪蜜調塗舌。於前方內加入犀角黃連元參以清熱。金汁人中黃銀花萊菔豆以解毒。另用雪水煎藥。翌日再診。厥回脈出。觀其舌泡消退。苔僅乾紫耳。再劑熱淨。神清。舌色如常。是役也。予雖能審其陽證似陰於後。然未能察其實證類虛於前。自咎學力未到。但生平歷治傷寒瘟疫諸候。曾未見此舌苔之異。且診視五日。變幻如出五人。前賢諸書亦鮮言及。真匪夷所思也。諺云。讀盡王叔和。不如臨證多。洵非妄語。

### 農人某傷寒誤服涼藥舌見人字紋

農人某患傷寒。數日寒熱交作。自汗如雨。就予診治。脈虛神倦。視其舌苔白滑。分

開兩歧。宛如刀割。考已任編中有陰證誤服涼藥。舌見人字紋之語。閱前方果然。予辭不治。渠懇拯救。先與六味回陽飲服之有效。繼進左右二歸飲數劑。舌苔漸退。諸恙續痊。

李某陰證傷寒見純紅舌

李某患傷寒。畏寒發熱。下體如冰。脈息沉細。飲沸湯猶不知熱。陰寒脈證悉具。藥當從溫無疑。然視其舌色如硃。方書云。舌見純紅。熱蓄裏。與證不符。因其病初起。憑脈用藥。先與小劑理中湯探之。無礙。隨用重劑六味回陽飲。數服病痊。舌色亦退。爲詳其故。殆所謂腎水凌心。逼其心陽外越者歟。

鄭氏婦肝風頭痛

鄭婦年近三旬。質虧多鬱。證患頭痛。上及巖頂。下連齒頰。醫稱太陽風邪。藥用羌防芎芷。痛劇而厥。嘔吐不食。經脈動惕。予曰。此肝風病也。經云。諸風眩掉。皆屬於肝。下虛上實爲厥巔疾。究由水虛不能涵木。怒木生風。勃勃欲動。誤投溫散。益助

其威。鼓舞鴟張。漸變瘰癧。誠可慮耳。方用地黃湯。加菊花。鈎藤。白芍。甘草。數服稍應。思陽但上冒。陰不下吸。熄風務用鹹寒。潛陽必須介類。方加阿膠。鷄子黃。牡蠣。龜版。更用磁石爲引。使其吸引肝腎之氣歸原。服之病釋。

### 汪某頭痛預見真臟脈

汪某中年質薄。且多斷喪。頭痛時作時止。夏間診脈。弦急而枯。囑以脈象欠佳。速宜靜養。多服補藥。切勿因循。病者以疾雖時發。然寢食如常。猶不爲意。逮冬至前二日。忽目花面赤。昏暈不支。延予至。勢已敗壞。且無力服參。因辭不治。逾日而逝。是病雖敗于冬。而真臟脈早見于夏。乃枝葉未害。本實先撥故也。

### 方氏婦目疾誤治變證

方氏婦本體血虛。偶患目疾。眼科認爲實火。初用芩連清之。更用大黃下之。飲藥一盞。頃忽暈去。舌吐脣外。不能縮入。肢厥脈伏。時已薄暮。急延予診。謂曰。寒下耗傷真陽。陽氣暴脫。勢屬可畏。速投溫補。希冀挽回。方疏通脈。四逆湯。藥熟不能下。



咽。令取艾火灸氣海關元數壯。身始動。舌始收。忙灌藥一鍾。移時又厥。仍令再灸。厥回。復進前藥。守至黎明始甦。續進左歸飲。及滋腎生肝諸劑。病痊。目亦明矣。

### 閔某心脾虛脘痛

閔某處境艱難。向多憂慮。脘痛經歲。諸治不瘳。望色萎黃。切脈細弱。問痛喜按乎。曰然。得食痛緩乎。曰然。予曰。此虛痛也。古云。痛無補法。此特爲強實者言。非概論也。爲訂歸脾湯。囑多服。乃效。如言服廿劑。有應。百劑獲痊。後一丐者患同。某檢方與之。服數十劑亦愈。

### 許細長食厥

許細長。石工也。病起少腹脹痛。堅韌如石。醫用消導藥。轉致吐衄。便溺俱閉。更醫目爲寒凝厥陰。投以薑附吳萸。痛劇而厥。肢冷脈伏。急來延予。予以手按其少腹。見其眉攢難忍之狀。謂其婦曰。此食厥證也。婦曰。病果因食冷麵而起。然已服過消導藥無效。或藥力不及。亦未可知。第停食小恙。何至厥逆吐衄。便溺俱閉。予曰。

穀食下行。由少腹右角後出廣腸。今食積不下。故大便不通。直腸緊脹。撐迫膀胱。小溲因而不利。下既不通。氣反上行。故爲嘔吐。嘔多胃逆。虵必上攻。是以隨嘔而出。務得大便一通。通則不痛。諸證自釋矣。但病經多日。凝沍已堅。非精銳之品。不能奏績。旋進備急丸三錢。頃之腹中雷鳴。下結糞數枚。再與錢半。復瀉十餘行。厥同脈出。痛減腹軟。觀者動色。驚有神助。後畏藥不服。將息而起。

### 商人某脣衄奇證奇治

脣衄之名。醫書未載。而予則親見之。證治之奇。理不可測。乾隆壬子秋。一商人求診。據述上脣偶起一瘡。擦破血出不止。或直射如箭。已經旬矣。求與止血之藥。按脣屬脾。必由脾熱上蒸。以故血流不止。初用清劑不效。因血流多。恐其陰傷。更用滋水養陰之劑。亦不效。及敷外科金瘡各種止血藥。又不效。挨至月餘。去血無算。形神羸憊。自分必死。忽夢其先亡語曰。爾病非醫藥能治。可用栗一枚。連殼燒灰。同硫磺等分研末和敷。自愈。醒後依法敷之。血果止。商人親向予言。真咄咄怪事也。

### 汪氏婦鼻衄止衄奇法

汪氏婦。夏月初患齒衄。衄止旋吐血。血止鼻又衄。大流三日。諸治不應。診脈弦搏。知其肺胃火盛。非寒涼折之不可。乃用犀角地黃湯。取鮮地黃絞汁。和童便沖藥。外用熱酒洗足。獨蒜搗塗足心。一晝夜衄仍不止。因憶門人許生曾言。人傳止衄奇法。先用粗琴線數尺。兩頭各繫錢百文。懸挂項下。再用手指掐定大谿穴。大谿在兩足內踝下動脈陷處。神驗。外治之法。於病無傷。今既諸治罔效。姑一試之。衄竟止。惟神形疲困。頭昏少寐。思血去過多。真陰必傷。改用麥易地黃湯。加龜版石斛白芍女貞沙參阿膠。旬日霍然。識此以廣見聞。

### 某婦胎動下血

昔聞先輩云。補中益氣湯。乃安胎聖藥。予未深信。乾隆癸丑秋。某婦懷孕數月。腰腹俱痛。惡露行多。勢欲下墮。諸藥不應。投以此方。加阿膠即安。後屢用皆驗。緣方中有參耆歸朮。培補氣血。妙在升柴二味。升舉之力。俾胎元不至下陷。然後補藥

得以奏功。血熱加黃芩。血虛加地黃。尤妙。

### 呂婦產後胞衣不下誤藥暈脫

呂婦年甫三旬。平時面黃體弱。因少乳求方。與八珍湯服之。有驗。數年後又因胎產胞衣不下。予診之。曰。此氣虛不能傳送。血虛不能濡潤故也。令服十全大補湯。衆議以爲新產。胞衣積血。阻礙不出。補之不宜。或授以單方。用芒硝一兩煎服。云下胞如神。衆咸稱善。一七入喉。卽時暈脫。

### 族媼血崩奇證

族媼年逾八旬。天癸復行。日漸淋漓。時或如崩。頭昏食少。心悸不寐。予與黑歸脾湯服之。不應。他醫投以清補固瀉諸方。亦不效。淹纏數月而歿。予歷見老婦病此。皆不能治。古罕言之。亦奇疾也。

### 方氏女孩帶下罕見之證



隣村方氏女。年纔四歲。其母抱負來舍求治。予問何疾。曰帶下。問疾何時起。曰女夜遺溺。常以帛墊臥。舊春晨起晒帛。乍見白物。以爲偶然。後頻下不已。漸覺面黃肌瘦。飲食減少。今經一載。時發時止。附近求醫。皆言未見之證。予曰。此先天稟弱。脾虛挾溼故也。但童真未充。早洩誠非所宜。令夜服地黃丸。早服參苓白朮散。匝月而效。半載後疾復發。仍令守原方服愈。嗣後不聞消息。及閱怡堂散記載一七歲幼女患此證。雖已治痊。後出室懷孕。一產卽脫。亦夭之由也。方氏女孩得無類此。

### 洪大登瘕病

洪大登爲人廝役。體虛多勞。初病夾車緊痛。服疏風藥二劑。臥不能起。口不能張。日飲米泔。僅以茶瓶嘴灌入。四肢攣急。每小便須兩人抬起。痛甚汗淋。診脈細濡。兩尺尤弱。有從外感起見。仍欲用風藥者。予曰。此瘕病也。氣血大虧。服此卽不救。處用大劑補元煎。旬餘未效。病家亟請更方。予曰。毋庸。藥力未到耳。原方令守服廿劑。漸能掉動。服至兩月。始出戶庭。

## 王木工反關脈

王某木工也。向患胃痛。諸治不效。一醫以草藥與服。陡然便血半桶。時時暈去。閉目懶言。汗淋氣怯。診脈全無。按脈乃血脫。此必血脫之故。然血脫益氣。須用人參。彼木工焉能得此。辭不與治。料其旦晚必脫也。越月遇諸途。見其行動如常。心竊訝之。後因他病來視。問其前恙如何得愈。曰。先生言我病危。非參莫救。求醫無益。只得日煎黨參湯飲之。倖得活。予曰。此亦血脫益氣法也。再診兩手仍然無脈。思人久無脈。焉能得生。沉吟半晌。恍然悟曰。此必反關脈也。覆候之果然。渠乃匠人。脈之如何。原不自知。予前診時。因見其外證之危。倉卒未及細究。識此。告諸診家。務須留神詳察也。

## 王某血證頻發

老醫方星巖。曾向余言。昔從上海王協中先生遊。論及血證愈後。每多反復者。此由胃膜破傷。須用法補之。思之至再。訂方用白芨魚膠絲綿三味。燒灰等分爲丸。

服之永不復發。王某患此證。莫能除根。令服此丸。果驗。

族子石淋奇證

族子年方舞勺。初時小便欠利。不以爲意。後每溺。莖中澁痛。醫作淋治。溺更點滴不通。少腹脹。臥牀號叫。晝夜靡安。延予至家。其母手拈一物。與予視之。云病者連日小便全無。昨夕努掙多時。突然溺出此物。當覺通快。喜爲疾却。今又復閉。豈尿管內尙有此物塞住耶。予視其形如豆。色蒼而堅。置臼中搗之不碎。考方書雖有石淋一證。卽予平素目覩患此者。亦不過如鹽沙之細。今此石形大如豆。從未之見。初以爲妄。試取簪柄探入莖中撥之。硃然有聲。方信溺之不通。竟由于此。思將此石取出。特古無是法。不敢妄出意見。辭不與治。聞後石不得出。莖根爛開一孔。洩又彼洩。遷延而歿。越數年。道出廬江。遇呂墨從先生言。彼邑昔有徐姓老醫。能治此證。親見其治愈數人。其術用刀將陰莖剖開。取出石子。數以末藥。旬日卽愈。予心異之。欲求其方。其人已物故矣。因并誌之。倘後有患此者。須求巧手剖之。可也。

## 曹某忍精淋痛

淋痛一證。今人多用八正分清等方。然有效有不效者。蓋陰莖有精溺二竅。若因溼熱阻閉膀胱。病在溺竅。則前藥投之是矣。倘因房勞忍精。病在精竅。乃有形敗濁阻於隧道。徒進清利無益。此證葉香巖論之甚詳。言古有虎杖散。近世不識此藥。治用杜牛膝根絞汁一鍾。沖入麝香少許。隔湯燉服。并宗朱南陽方法。用兩頭尖川棟子。韭白歸尾等味。曹某患此證。予倣前法治愈。後治數人俱驗。因并識之。

## 王氏婦痺證

王婦週體痺痛。醫作風治。臥簀月餘。肢攣頭暈。予見之曰。此痺證也。軀殼外疾。雖無害命之理。但病久寢食不安。神形困頓。速救根本。猶可支撐。若見病醫病。則殆矣。方定十全大補湯。加枸杞杜仲鹿角膠。兩服未應。衆疑之。予曰。緩則療病。急則顧命。今病勢敗壞如斯。舍是不救。且補虛與攻實不同。非數十劑莫效。又服十日。週身發腫。衆稱病變。予曰。勿憂。凡風寒客於人。壯者氣行則已。怯者著而爲病。本



由營氣不足。邪陷於裏。今服補劑。托邪外出。乃佳兆也。仍命照方多服。痛止腫消而愈。識此爲治痺恣用風燥藥者戒。

自病臂痛

嘉慶癸亥歲。予因夏熱。夜臥石地受涼。秋後臂痛。莫能屈伸。初服溫經散邪之劑。不效。外貼膏藥。又不效。思筋骨間病。藥力難到。古有煖洗一法。日洗藥水。其痛如故。偶閱韓氏醫通云。有痿痺疾者。偃臥患處于壯陰之懷。久之生氣和浹。病氣潛消。試倣其法。將痛臂夜令室人以熱體偎之。數日而愈。接歸田錄云。人氣能粉犀。則療痺固其宜矣。

## 侯序

家弟端生。昔遊新安。適遘疴瘧。觀泉先生爲之蠲疴。歸述盛名。越數年。予始得見。豐頤藹度。信爲有道者。既乃讀所刻古近體稿。多隱居冲澹。及壯遊奇麗之作。既又讀所著醫案。益肅然於先生之爲通儒也。夫醫者。意也。必有與天地同流之意。而後能誦古人方藥之書。又必一空膠室方藥之言。而後能伸其用。當通神之意。醫果可以意爲。案果可以臆說哉。先生尙有未刻之書。曰醫述。蓋博覽靈素以後。歷代諸家之論。採其精當者。萃爲一集。卷帙盈尺。其精勤過於海錄。他日刊布。讀者參考互證。當益知通儒之所闡揚。不僅功侔良相也。

道光六年子月上澣白下侯雲松拜識

程杏軒醫案續錄 侯序

## 朱序

內傳稱良醫者再。醫緩視晉侯疾。曰在肓之上。膏之下。攻之不可。達之不及。數語卽案也。又醫和視晉侯疾。曰是謂近女室。疾如蠱。非鬼非食。惑以喪志。後及六氣六淫。不節不時。并括內經運氣諸編。精義所言。亦案也。醫案如讞案。根源洞澈。治法精嚴。均繫乎此。顧非博物君子。深於醫理。未足語此。杏軒先生。於嘉慶九年。刊有醫案初集。隨證處方。靈心獨運。足度後學金針矣。嗣後所聞見益擴。所全活益衆。又彙記治驗若干條。定爲二集。出以示鍾。反覆讀之。彌歎先生之才大心細。師古而不泥於古也。虛實判之病。寒燥審之時。南北燥溼因乎地。弱壯貧富視乎人。批卻導窾。有指與物化。而不以心稽之妙。因亟請付梓以善世。其初集藏版。不戒干火。今乃一並補刊。以著雙玉爲珏。鍾蓋於道光丁亥冬日。訪道至巖鎮。親見先



生勤求醫奧。手不釋卷。積數十年博覽之功。年彌高而學彌篤。真所謂博物君子。深於醫理者也。吾願先生自今以往。日記所治。由周甲而晉期頤。靈丹救世無盡。而新編傳世亦無盡。三刻四刻。鍾且不揣穉昧。自訂續爲序言。以期附名於驥尾也。虹橋朱鍾謹序

## 吳序

曩余在都門。知鮑覺生侍讀。少邁奇疾。賴程君杏軒獲全。越二十年。覺生視學中州。復病如前。杏軒又起之。心奇其人。以不得一見爲恨。嘉慶丁卯春。余撻疾南歸。遇杏軒於大梁使院。乞刀圭焉。十數年來。殆不知其疾之在體也。丁丑夏。余再至新安。杏軒亦倦遊歸。相見甚喜。晤語浹旬。盡出其所著書數種示余。上溯軒岐。旁及越人仲景。下逮河間東垣丹溪諸家。靡不究其精微。擴其旨趣。就中醫案續錄一編。說理精當。視前刻初集尤佳。余勸其付梓。杏軒讓未遑。余曰。子無然也。余見世所爲醫者多矣。讀湯頭歌括一冊。誦藥性賦一篇。遂榜於門曰醫室。號於人曰醫師。病者不察。從而求診。乞方焉。幸而得貲財。愈益肆其欺謾。乘堅車。策怒馬。馳聘以耀於衢人。尊信之者日益衆。殺人日益多。其不忍爲此態者。又或達心而儒。訥於言語。拙於文詞。爲世所輕。而醫理卒以不明於天下。今先生立盧扁之幟。入孫葛之壘。使是書不脛而走。風行海內。天下望而爭趨。登蒼生於仁壽。甚盛事也。縱山川修阻。鍼砭莫及。世醫即可奉爲準繩。以奏效於旦夕。其善養生者。得領緒

餘亦足以却病駐年。所全不已多乎。夫士君子之托業。國家之設官。皆爲養人計也。先生少業儒術。長習方書。常自恨不得用於世。以竟其學。余觀斯編所載。審是非於毫釐。察虛實於微妙。其良有司之矜慎。以折獄乎。補養以培元氣。和解使無鬱滯。其良有司之和煦。以愛民乎。法當攻伐。如厲鷹鷂。以逐烏雀。法當清涼。如沃淵泉。以救燎原。其良有司之鋤暴安良。不事姑息乎。吾願與先生同業者。皆以先生之學爲學。其不與先生同業者。皆以先生之心爲心。則郡邑之呻吟。皆起矣。先生斯編。顧可秘而不宣乎哉。杏軒曰。唯唯。然猶藏之篋笥。自是又增入數十條。今年春。郵寄是書。問序於余。披閱之下。猶記曩在新安。與吾杏軒晤言一室時也。爰追述之。以爲序。

道光四年歲次甲申季春月桐城吳廣枚

# 程杏軒醫案續錄目錄

黃敬修兄咳血·····	一
鮑宗海風寒喘嗽誤補肺脹欲絕治驗·····	二
胡某婦臟燥面論證治方法·····	三
余振如兄幼子胎癰·····	四
柳聖依翁夫人熱病戰汗而解·····	五
鮑子欽兄感風停食小恙猝變虛脫宜用急療之法·····	六
族婦眩暈續堂弟媳所患證同治皆無效不藥自痊·····	七
洪荔原翁挾虛傷寒·····	八
洪召亭翁夫人胎動血暈急救保全·····	九
曹引泉翁竹筒痢·····	一一
王策勳先生幼孫疳疾·····	一二
金蔭陶封翁久瀉滑脫之證·····	一二



洪梅渚翁肝鬱犯胃痛嘔發黃溫補藥誤危而復安	一三
又乃愛暑邪擾胃發熱吐瀉欲作驚搐	一五
又乃郎溼溫感證	一六
張汝功兄乃郎嗽久傷陰奇治驗	一七
又令愛暑入心包拯治無功後見數人證同皆不可救并答門人	
四問	一八
葉蔚如兄脅痛便閉一劑而效	二五
曹靜川翁孫女頻脫音啞	二六
堂妹吐證	二七
方萃巖翁乃郎跌後又患腹痛藥傷胃氣治驗	二八
又翁自患陰疽復中寒陽脫救急治法	二九
次兒光墀單腹脹奇驗	三〇
巴聲茂生佈痘癰閉險逆一劑救轉	三二
答鮑北山翁詢伊郎飲澀證治始末并商善後之策	三四

許玉書翁大郎腹痛吐瀉危證拯治之奇	三八
又次郎脾腎陽虛伏寒凝沍重用溫補而瘳	四〇
鮑宅京翁僕人中寒暴脫救轉之奇	四一
許綱之兄齒痛	四三
鮑智原翁令孫痘後鬼腫潰久藥投溫補而愈	四三
吳尙時兄春溫兩感危證治愈附載鄭晉康兄令弟病同致殂之	
故井誨門人	四四
家芑生兄怔忡治法	四八
汪靖臣兄乃郎冒暑瀉甚欲脫亟挽元氣一法	四九
又幼女外感咳嗽誤藥釀成肺痺急證	五〇
黃曙堂翁乃郎頭痛忽變痙厥續見數證皆不治	五一
家秀翹兄肝鬱痛傷胃氣詳論病機治法	五二
別駕菽田何公僕婦子痢	五四
鮑覺生宮詹病發三次不能復起	五五

黃就唐表兄腕痛嘔吐危證治驗·····	五六
燕雲亭司馬伏暑感證·····	五七
饒君揚翁公郎風溫證治原委·····	五八
饒厚卿兄幼女因熱生風之證治愈并明其理·····	六〇
又僕人肝風用藥大意·····	六一
許兌巖兄尊堂久痢治驗·····	六一
許月隣翁令愛齒衄·····	六三
族弟義家血湧欲脫·····	六三
何少君令政傳尸蟲異附載歷見諸證并詳治法·····	六四
汪紹由翁尊堂脫證救甦·····	六七
汪商彝翁夫人風寒襲絡之證·····	六八
予久患腹痛忽下瘀血而痊·····	六九

# 程杏軒醫案續錄

新安 杏軒程文囿觀泉甫著

山陰 安波陳光壽評

鄞縣 曹赤電炳章圈點

## 黃敬修兄咳血

敬兄向在金華貿易。恙患咳血。醫治無效。食微肌瘦。慮成損怯。予時至蘭谿。友人薦延診視。閱前諸方。偏於溫補。謂曰。古人治血證。雖有此法。然須審其證屬虛寒。方爲合轍。據茲脈證。責諸肺腎陰虧。肝陽上僭。咳甚火炎。血隨溢出。理應滋水生木。潤肺保金。得以咳稀。血當自止。服藥投機。予欲辭回。敬兄固留。爲治月餘。咳血全好。餐加神旺。肌肉復生。

安波按。溫熱治虛損。與艸菅人命何異。故前賢云。男子陽常有餘。陰常不足。蓋男子氣恆有餘者多。血患不足者不少。以溫熱治虛損者。仲聖建中之類也。其



內以稼穡作甘之本味。急建其中氣。俾中宮得強。飲食增而津液旺。以至充血生精。而復其真陰之不足。愚意以治脾虛損怯則可。若腎陰耗乏。相火燥金。見咳。噎。累血。形銷骨折。遺洩潮熱等病。投之如抱薪救火矣。

鮑宗海風寒喘嗽誤補肺脹欲絕治驗

黃敬修兄店內。有同事鮑宗海者。因感風寒。喘嗽多日。就彼地某姓老醫看視。謂其證屬內虧。藥與地歸參朮。予見方勸其勿服。宗海以爲伊體素虛。老醫見識不謬。潛服其藥。是夜喘嗽益甚。次日復往加減。醫謂前藥尙輕。更增黃耆五味子。服後胸高氣築。莫能臥下。呻呀不休。閉悶欲絕。敬兄詢知其故。囑予拯治。予曰。前藥吾原勸其勿服。伊不之信。况加酸斂。邪錮益堅。如何排解。敬兄云。渠與我同事多年。不忍見其死而不救。揣摩至再。立方用麻黃桂枝細辛半夏甘草生薑杏仁葶藶子。并語之曰。此乃風寒客肺。氣阻痰凝。因而喘嗽。醫不開解。反投斂補。以致閉者愈閉。壅者愈壅。釀成肺脹危證。金匱云。咳逆倚息不得臥。小青龍湯主之。予於方中除五味白芍之酸收。加葶藶杏仁之苦瀉者。蓋肺苦氣上逆。急食苦以瀉之。

如救眉燃。不容緩待也。敬兄欣以爲然。卽令市藥煎服。少頃嗽出稠痰兩盂。胸膈頓寬。再服復渣。又吐痰涎盡許。喘定能臥。宗海始悟前藥之誤。泣求救援。予笑曰。無妨。枉自喫幾日苦耳。次劑麻桂等味分兩減輕。參入桔梗橘紅茯苓蘇子。更爲調和肺胃而痊。

安波按。風寒咳嗽。亦一大症也。不可渺視爲輕淺者。徐氏靈胎。苦志三十年。始能治咳。先生於小青龍。去味芍加葶杏。真善法古人而不泥古人者也。

### 胡某婦臟燥面論證治方法

長林胡某。延診婦病。據述證經半載。外無寒熱。飲食月事如常。惟時時悲泣。勸之不止。詢其何故。伊不自知。延醫多人。有云抑鬱。用逍遙散者。有云痰火。用溫膽湯者。藥俱不效。又疑邪祟。禳禱無靈。咸稱怪證。懇爲診治。視畢出語某曰。易治耳。立方藥用甘草小麥大棗。某問病名及用藥方法。予曰。病名臟燥。方乃甘麥大棗湯。詳載金匱玉函中。未見是書。不識病名焉。知治法。宜乎目爲怪證也。某曰。適承指教。足見高明。但拙荆病久。諸治無功。尊方藥只三味。且皆平淡。未卜果能去疾否。

予曰。此仲聖祖方。神化莫測。必效無疑。服之果驗。

安波按。有時法於古而不泥於古。有時竟法於古而泥於古。此之謂良工也。

### 余振如兄幼子胎癰

振兄乃郎。出胎兩月。突然肢搐目斜。踰時乃定。乳食如常。以爲偶然。次日又發。幼科作胎驚治。藥用疎風鎮驚不應。發經數日。俱在巳午時候。予視之。曰。此非胎驚。乃胎癰也。振兄云。胎驚則嘗聞之矣。胎癰之名。請問出於何典。予曰。名出內經。帝曰。人生而有癰疾者。病名曰何。安所得之。岐伯曰。名爲胎病。此得之在母腹中時。其母有所大驚。故令子發爲癰疾也。注云。癰癰也。夫驚之搐搦無定。癰之發作有時。大人之癰疾亦然。惟其發作有時。故較驚稍輕耳。爰用茯神遠志麥冬丹參甘草白芍菊花鈎藤桑寄生以安神定志。養肝熄風。少入橘紅半夏麴以滌擾心之痰涎。蓋疾由母腹受驚而得。病在心肝二臟。神安風熄。其疾自平。妄行疏散。則風益動。襁褓胃氣薄弱。金石鎮墜。尤非所宜。服藥其發漸輕。未幾而定。後見數兒證同。皆照此法治愈。

安波按。斯症邇來幼醫輒以抱龍等丸從事。徒不知孩提之負屈者。豈止恆河沙數乎。

### 柳聖依翁夫人熱病戰汗而解

聖翁夫人。夏間病患熱盛無汗。煩渴昏譫。醫治旬餘不解。聖翁外舅。伊郎蔭千兄。延予診視。脈數舌黃。謂曰。此熱病也。非清不可。疏竹葉石膏湯與之。時夜將半。聞叩扉聲甚急。啓視。蔭兄慌入而言曰。病危矣。詢其故。曰。妙劑。當服頭渣。至暮未見動靜。再服復渣。更靜後。忽寒戰肢抖。少頃汗出如漿。膚冷息微。閉目不語。衆以爲殆。歸咎藥性太涼。欲投參附。以救其脫。亟求復診以決之。予卽隨往。捫其肌膚果冷。細按脈雖虛。然至數和緩。并不急疾。曰。無妨。此戰汗也。因本氣不足。邪氣鴟張。予重用清劑驅之。邪不能留。遂與正爭。是以戰而汗出。邪雖從此而解。正亦由此而虧。且任其養息。切勿驚擾。元氣來復。自然膚暖神甦。若驟進參附。誠恐餘燼復炎。反爲害矣。葉氏論溫熱病戰汗解後。胃氣空虛。有膚冷一晝夜之說。取書與閱。羣疑始釋。另立一方。用生脈散加茯神玉竹白芍甘草。囑市藥煎好。俟其蘇醒。



與服。并啜稀粥。以養胃氣。次早蔭兄來謝云。昨夕非子有定見。幾爲旁言所誤。遵囑靜守逾時。汗歛神甦。忙將煎好之藥服訖。復睡至曉。肌膚已溫。惟形倦氣怠耳。更爲輔正養陰和胃。漸次而康。

安波按。斯證若脈急數。自汗如雨。躁煩不安。神志不寧。是自氣脫陽越之候。速宜大劑回陽。與此大相懸絕。

鮑子欽兄感風停食小恙猝變虛脫宜用急療之

法

子欽兄幼年質弱。偶因停感。發熱腹痛。兒科藥用荆防查曲。服後熱退痛止。以爲應驗。詎意次日臥床不起。頭垂目闔。氣怯懶言。不飲不食。急延予至。見其形狀倦怠。切脈細弱無神。維時伊舅柳蔭千兄在座。予告之曰。令甥之恙。乃元氣不支。切恐虛脫。亟宜峻補。遲則難救。蔭兄云。舍甥病纔兩日。消散又未過劑。童質固虛。何至遽脫。豈可驟投重補耶。予曰。小兒臟氣易爲虛實。脈證疲憊如斯。舍此別無他策。倣補元煎方法與服二劑。病仍未轉。伊乃堂憂甚。予曰。凡治病補虛與攻實不

同。攻實可求速效。補虛本無近功。服藥病既不增。虛能受補。卽爲見效。古稱填補。如地有陷穿。方能容填。若平地填之。成敦阜矣。仍依原方加入耆朮茯神棗仁合歸脾湯。守服。旬。頭豎目開。飲食照常。儼如無病。

安波按。於庚辰歲。治餘杭金姓穉子。年甫五齡。形頗骯髒。忽患暴注下迫。形神頓減。小尿短滴。幼醫以消導之屬。靡不備嘗。或有以暴瀉屬熱者。需胡黃連之類。其瀉轉甚。延余診治。脈之細弱乏神。按之則空。胎微黑不渴。曰寒邪直中太陰所致。非附子理中湯不可。遲則恐變。乃尊曰。邪中太陰。已領教矣。然小兒體若純陽。胡可以熱濟之乎。余曰。醫貴活潑。不可紐執一說。以塞見聞。彼以爲然。投之果應。此症與斯案相類。險爲庸見所阻。故錄出爲固執者鑑。

族婦眩暈。續堂弟媳所患。證同。治皆無效。不藥自痊。

予童時。見族中一婦人。頭額常繫一帶。行動須人扶掖。云無他病。惟頭目昏眩。飲食倍增。形體加胖。稍飢。心內卽覺難過。醫治無效。只得屏藥。越數年。疾自愈。形體

退瘦。飲食起居如常。其致病之由。及所服方藥。均不可考。後堂弟媳年二旬餘。因遭回祿。憂鬱成疾。見證與族婦彷彿。予知其疾由鬱而起。初投逍遙達鬱。繼加丹梔清火。更進地黃阿膠滋水生木。白芍菊花平肝熄風。磁石牡蠣鎮逆潛陽等法。俱不應。他醫以爲無痰不作眩。藥用豁痰。又以爲無虛不作眩。藥用補虛。亦皆無驗。遂不服藥。四旬外病自瘳。予生平所見眩暈之疾。未有甚於此二證者。且病中諸治不應。後皆不藥自痊。事亦奇矣。細求其故。蓋病關情志。是以草木無靈。由此觀之。凡七情內傷致病。皆可類推。

安波按。七情致病者。尼師寡婦室女爲尤甚。必須陶情怡悅。所謂心病必以心藥治也。

### 洪荔原翁挾虛傷寒

荔翁年踰強仕。冬月重感寒邪。診脈細緊。見證寒熱無汗。頭疼體痛。初投附子理陰煎。汗發不出。復診方加人參麻黃。翁曰。麻黃性悍。駛不能禦。吾質素弱。恐不可服。予笑謂曰。他人之麻黃或不可服。予之麻黃。放心服之。蓋醫當論方。不當論藥。

若以此加入表散藥中。則誠駛不能禦。今合補劑。有人參熟地監制之。雖勇過孟賁。亦難肆其強悍之性矣。古人用散法。有皮毛肌肉血脈筋骨之殊。峻散平散溫散涼散之異。至於陽根於陰。汗化於液。雲騰致雨之妙。獨景岳先生得之。其所製理陰煎。及麻桂飲。大溫中飲。數方。真可稱長沙之功臣。而補其所未備也。况理陰煎方後。原有加麻黃之法。又何疑耶。翁信予言。一服汗出而解。

安波按。於辛巳歲。治王少蓮者。夏月納涼痛飲。日晡覺頭重惡冷。至次日壯熱憎寒。口燥渴而不飲。目赤汗沾。診得脈洪大而空。沉按若無。苔來黑滑。余曰。此腎陽爲陰暑所迫。致見陽氣上戴。目赤口燥不飲。脈空無神。壯熱惡寒。卽傷寒論之戴陽證也。擬附子理中湯加香薷人參一劑。而神清楚。寒熱頓減。口不燥。目赤退。諸恙稍愈。後以斯方減輕。加以祛暑滲濕而痊。似此案之相類。故亦錄出。以廣後來者之目。

### 洪刀口亭翁夫人胎動血暈急救保全

召翁夫人懷孕三月。胎動血崩發暈。促往診視。乃告翁曰。妊娠胎下血暈。已爲重



險。今胎未下而暈先見。倘胎下暈脫。奈何。翁囑立方。予曰。血脫益氣。舍獨參湯別無良藥。翁問所需若干。予曰。數非一兩不可。翁出取參。予聞房內僱婦私語。胎產服參不宜。亟呼之出。語曰。爾何知。勿妄言以亂人意。少頃。翁持參至。予欲辭回。思適纔僱婦所言。恐病人聞之。疑而不服。豈不僨事。只得俟之。翁持參湯。予隨入房。病人果不肯服。翁無如何。予正色言曰。性命安危。在此一舉。今若不服此湯。胎下暈脫。莫救。俗見胎產忌服人參。無非恐其補住惡露。在胎下後。猶或可言。今胎未下。與平常臨產無異。豈平常臨產可以服參。今昏暈欲脫。反不可服乎。予治此證頗多。勿爲旁言所惑。病人疑釋。一飲而罄。予曰。有此砥柱中流。大勢可守。尙防胎下復暈。其參渣再煎。與服爲妙。詰朝復診。翁云。昨遵論。仍將參渣煎服。薄暮胎下。惡露無多。暈亦未作。令多服培養氣血之劑而痊。續翁媳升治。兄令政半產。胎下血暈。時值寒冬。夤夜招診。兩脈已脫。面白肢冷。亟以參附湯灌甦。一家兩證。勢俱危險。皆仗參力保全。胎產不可服參。殊屬謬語。

安波按。半產之虛。虛不待言。况產前血暈等脫候。可不以參輔乎。險爲愚婦僨事。得以獲全者。亦幸耳。

## 曹引泉翁竹筒痢

引翁年將花甲。秋季患痢。纏綿日久。清利過劑。肛如竹筒。直下無度。臥牀不起。診脈細濡。望色憔悴。知爲脾腎兩虧。元氣下奪。所幸尙能納穀。胃氣未敗。倣胃關煎。調石脂餘糧末。與服兩日。其痢稍減。再加桑螵蛸。晚間參服四神丸。治療匝月始止。

安波按。痢者利也。不可以通利治痢之常藥。以醫老人久痢之不固。其法不一。醫師胸有成竹耳。

## 王策勳先生幼孫疳疾

予弟綺蘭。服賈廬江。戊辰冬。予自中州回。道經彼地。羈留信宿。有王策勳先生者。與予弟善。抱其幼孫。懇爲診治。視其體熱面黃。肢細腹大。髮焦目暗。頸起結核。予曰。此乃疳疾。疳者乾也。小兒腸胃柔脆。乳食失調。運化不及。停積發熱。熱久津乾。故名曰疳。又謂之丁奚哺露。丁奚者。言奚童枯瘠如丁。哺露者。言愈哺而骨愈露。

但是疾每多生蟲。蟲匿日滋。侵蝕臟腑。非尋常藥餌所能去病。古方有布袋丸。治此證多驗。藥用人參白朮茯苓使君子肉各一兩。蘆薈夜明沙蕪荑甘草各五錢。共爲末。蒸餅糊丸。每粒約重三錢。日用一丸。以夏布袋盛之。另切精猪肉二兩。同煮汁服。肉亦可食。如法製就。服完一料而愈。

安波按。布袋丸名亦奇。方亦奇。故治亦奇。沈姓幼童五齡者。余之內戚也。患腹膨形黑。善食作瀉。雖骨支牀已半載矣。余宗是丸服半料。沉疴霍然。蓋意布袋者。今人之胃。如物之袋。病久致疳。蟲蝕已空。故其胃必虛。津液必涸。賴以猪肉汁充養胃陰。而衆藥得以各司其司。同心共濟。以奏凱歌也。

### 金蔭陶封翁久瀉滑脫之證

封翁年逾古稀。恙患泄瀉。公郎邁倫兄善岐黃。屢進溫補脾腎諸藥。淹纏日久。瀉總不止。招予診視。謂邁兄曰。尊翁所患乃瀉久腸胃滑脫之候也。十劑云。補可去弱。瀉可去脫。瀉久元氣未有不虛。但補僅可益虛。未能固脫。仲景云。理中者。理中焦。此利在下焦。赤石脂禹餘糧丸主之。李先知云。下焦有病人難會。須用餘糧赤

石脂。况腸胃之空。非此不能填。腸垢已去。非此不能復其粘着之性。喻西昌治陳彥質浦君藝瀉利。久而不愈。用此俱奏奇功。遂於原方內加入石脂餘糧。服之果效。

安波按。善師古人之法。

洪梅渚翁肝鬱犯胃痛嘔發黃溫補藥誤危而復

安

嘉慶辛未春。予患眩暈。不出戶者累月。友人張汝功兄來。言洪梅翁病劇。述其證狀。起初少腹痛。嘔吐。醫謂寒凝厥陰。投以煖肝煎。痛嘔益甚。又謂腎氣上衝。更用理陰煎。合六君子湯。每劑俱用人參。服之愈劇。腕痞畏食。晝夜呻吟。面目色黃。醫稱體虧病重。補之不應。慮其虛脫。舉室憂惶。復有指爲疸證。欲進茵陳蒿湯者。囑邀子診以決之。予辭以疾。汝兄強之。於是扶掖而往。診畢笑謂翁曰。病可無妨。但藥只須數文一劑。毋大費主人物料。方疏加味逍遙散。加鬱金陳皮穀芽蘭葉。乃弟並鋒翁曰。家兄年將花甲。病經多日。痛嘔不食。胃氣空虛。輕淡之品。恐不濟事。



予曰。此非虛證。藥不中病。致益劇耳。經云。諸痛屬肝。病由肝鬱不舒。氣機遏抑。少腹乃厥陰部位。因而致痛。肝氣上逆。衝胃爲嘔。溫補太過。木鬱則火鬱。諸逆衝上。皆屬於火。食不得入。是有火也。至于面目色黃。亦肝鬱之所使然。非疸證也。逍遙一方。治木鬱而諸鬱皆解。其說出趙氏醫貫。予輯載拙集醫述中。檢書與閱。翁以爲然。初服各證均減。服至四劑。不痛不嘔。黃色盡退。共服藥十二劑。眠食如常。是役也。翁病召診日。皆汝兄代邀。語予曰。翁前服參藥不應。自以爲殆。子藥如此之輕。見效如此之速。甚爲感佩。囑予致意。容當圖謝。予曰。醫者愈病。分所當然。惟自抱疾。爲人療病。行動蹣跚。殊可笑耳。翁有盛情。拙集輯成。藉代付梓。亦善果也。勝酬多矣。晤間。翁問尊集成乎。予曰。未也。翁曰。且俟脫稿。薄助剞劂。閱茲廿載。集成而翁已仙矣。集首閱書。姓氏款中。謹登翁名。不忘其言。

安波按。治肝一法。不外辛散酸收甘緩。此古製逍遙散之妙也。但肝病已久。必盜母氣。故前賢有溫煖肝腎。乙癸同源之治。如腎陰偏傷。木火內燃。雖滋腎陰一法。以柔肝。然肝最礙補。必須病久。或腎家素有宿疾。方爲合符耳。第治肝以辛散酸收爲多。以滋補收納者。十中一二耳。

又乃愛暑邪擾胃發熱吐瀉欲作驚搐

梅翁令愛。年甫兩齡。仲夏時發熱吐瀉。渠宅同事方心樹兄知醫。作暑風食滯治。熱甚煩渴。吐瀉益頻。延予至。心兄述其病狀。并用藥大意。予視其兒。身熱肢冷。舌絳苔黃。煩擾不定。謂心兄曰。證屬暑邪擾胃。熱氣上衝。以故渴飲吐瀉。經云。諸逆衝上。皆屬於火。暴注下迫。皆屬於熱。但嬰兒質脆。暑邪酷烈。最易激動肝風。許宣治先生論暑風驚候。由吐瀉而後發搐者。謂之慢驚。治之不易。且吐甚於瀉。吐多胃傷。不能宣布津液。是以諸藥無驗。必得生機活潑。方轉靈軸。所製黃土稻花湯。一方甚妙。予遇此證。每倣其法。治多應手。於是方疏黃土稻花沙參茯苓甘草半夏烏梅木瓜扁莢葉。因其熱甚。再加黃連。一劑而效。夏月小兒感受暑邪熱渴。吐瀉不利於香砂朮藳者。服此方而晏如。

安波按。細繹方義。暑邪犯胃爲嘔。以黃土稻花溫而不燥。香而不竄。安胃爲君。吐多傷液。以沙參茯苓甘草半夏養而不膩。輔而不滯。使中宮得以運旋。則吐瀉不治而自愈矣。故主爲臣。蓋土氣衰微。致招客邪。則勝己之木來侮。可不待

言而知也。故以爲梅木瓜預以定木爲佐。而脾胃得以安。肝得以伏。而炎炎之暑邪未驅。故使以扁豆葉得金氣之最早。祛暑平木。良由斯乎。

又乃郎溼溫感證

梅翁幼郎。夏閒患感證。見其發熱口乾。舌苔白膩。知有伏邪。思膏粱稚子。提攜捧負。邪何由受。詢其乳媪。據云向係樓居。近緣天暑。移住地房。微氣甚重。病因此受。亦未可知。予曰是矣。蓋微溼之氣。從口鼻吸入。伏於膜原。醞釀爲熱。自裏達表。不比風寒客於皮毛。可以辛溫發散而治也。初用淡豉蘇梗鮮藿香秦艽廣皮桔梗連翹甘草通草之屬。芳香解穢。辛涼透邪。服藥熱甚。煩渴。舌苔轉黃。方除蘇梗廣皮。加入黃芩黑梔赤苓澤瀉。熱渴不止。舌色欲焦。予素手戰。渠宅視恙。方俱心樹兄代書。乃謂之曰。此證熱勢熾甚。非白虎湯不能去病。心兄云。據證應用此方。但白虎之名。俗多恐懼。或至明日。如病不減。再進如何。予曰。拯溺救焚。急不及待。今舌欲焦。邪熱燔灼。胃津已傷。倘到明日。舌若變黑。而成胃實。則非白虎所能任。再投承氣。豈不更駭聽聞。因將病原治法。細與渠宅說明。當用石膏一兩。知母一錢。

并加滑石蘆根。其餘梔芩等味。分兩均照前加重。次日復看。身熱較輕。舌焦亦潤。但病來勢暴。若驟鬆手。恐其餘燼復燃。仍守原方。再服一劑。轉用沙參玉竹麥冬丹皮石斛料。豆梨汁芝麻。養陰濡液而痊。

安波按。讀斯篇未終。不覺喟然長嘆。已三息矣。蓋古之名湯治疾。二翻三復者。甚衆。今時地卑氣薄。藥未終劑。更醫已數四矣。故出類拔萃之輩。常立於人背之後。是殆所謂命也夫。

### 張汝功兄乃郎嗽久傷陰奇治驗

汝兄乃郎。年方韶齔。秋間咳嗽。入冬不止。初起噎嗽痰澁。氣急面紅。漸次潮熱脈數。食減肌瘦。藥如瀉白散。止嗽散。清燥救肺湯。徧嘗無驗。汝兄慮成童怯。囑予籌治。令且停藥。每日用甜雪梨一枚。去皮渣。雄猪肉四兩。同切塊。清水煮湯。啜之。其肉與粳米稀粥同食。兒病日久。戒食葷油。復爲藥苦。得此可口。食而甘之。數日而效。浹旬而痊。汝兄稱謝。並問其故。予曰。斯證卽喻西昌所謂秋傷於燥。冬生咳嗽之候也。夫燥者濡之。其所以服諸清潤之劑而不應者。緣童質向虧。嗽久陰傷。凡



藥皆草木根莖。祇可濡其時邪之燥。未能滋其津液之乾耳。經云。陰之所生。本在五味。五穀爲養。五果爲助。五畜爲益。故用猪肉雪梨粳米。諸多濡液滋乾之品。氣味合而服之。以補精益氣。豈尋常方劑可同語耶。汝兄慨然曰。人知藥能療病。不知藥反增病。人知食肉病復。不知食肉病愈。今而後益信醫理淵深。不易知也。安波按。讀斯案字字珠玉。可見醫貴圓通。徒執成方於胸中。亦復何益。

又令愛暑入心。包拯治無功。後見數人證同。皆不

### 可救并答門人四問

汝兄令愛。笄年在室。時屆季夏。薄暮忽覺微寒。夜發壯熱。頭痛嘔吐。次早迓予。其女出房就診。脈弦急數。舌苔白膩。謂汝兄曰。證屬時感暑風。來勢不輕。防其生變。方用葛根防風以祛風。香薷茯苓甘草半夏滑石扁莢葉以清暑。詰朝入房診視。脈證如故。舌苔轉黃。熱盛口渴。目定神呆。方除葛根防風半夏。加入連翹知母花粉鮮荷葉。四朝再視。病者扶坐榻上。昏昏不語。令其伸舌。勉伸半截。尖絳起刺。汝兄云。小女夜來熱熾。煩渴呻吟不安。黎明稍定。以爲病減。不意神更昏迷。肢漸厥

冷。未識何故。予曰。此暑入心包。邪陷於裏。熱深厥深。肝風欲萌。勢屬危險。可延他醫酌之。汝兄堅囑拯治。思暑由上受。首先犯衛。漸傳入營。葉氏有清絡熱必佐芳香。開裏竅。以清神識。用至寶丹一法。吾鄉苦無此藥。姑用生地。元參。銀花。麥冬。川連。犀角。鮮菖蒲。西瓜翠衣。令取荷露煎藥。翌日復召。病勢益劇。目闔肢掣。口噤牙咬。予曰。肝風已動。證成痙厥。不可爲矣。汝兄乞籌以希萬一。揣諸病情。治法不過如此。奈服藥不應。無已再想外法。令挑黃土攤地上。鋪荷葉。將病人抬置其上。另用紫雪牛黃蜜調塗舌。方加鉤藤桑寄生羚羊角。平肝熄風。至第六朝。汝兄來云。昨晚肢掣不作。口噤已開。似有生意。再煩視之。至見病人眼戴口張。痰聲漉漉。切脈如絲。予曰。此非掣定。乃元氣內奪。無力鼓動故也。脈證俱敗。危期速矣。延至七朝而歿。未幾。又見鮑華莪翁令媳之證。

率翁邀視媳病。云日前因熱貪涼。起初頭痛嘔惡。旋即怯風發熱。至今熱猶未退。似屬外感。煩爲解散。免致成瘧。導予入室。診際問其頭痛乎。病者不答。轉令使女詢之。亦復默然。予曰。殆證也。辭不治。率翁云。小媳病纔兩日。其候不過發熱頭痛。何以言殆。予曰。害雖未形。其機已露。蓋此病因於冒暑。夫暑喜傷心。心者君主之

官。神明出焉。頃問病原。蔑知應對。足徵邪犯心包。神明爲之紊亂。按心肝爲臟。臟者藏也。邪已入臟。斷難驅逐。且手足厥陰相表裏。肝風痙厥。蟬聯而至。預期一候。恐有風波。并將張汝兄令愛病狀告之。翁雖唯唯。然未深信。續延他醫療治。諸證蜂生。果至七朝而逝。始信予言不虛。後旬日又見許禮門翁令姪媳之證。

禮翁儒而通醫。因乃姪媳病見招。晤間予告以近視張鮑兩女病。均不治之故。翁感然云。舍姪媳病候。與此彷彿。奈何。予問病經幾日矣。曰五日。問其狀。曰身熱肢涼。昏迷瘈瘲。予曰。邪已入臟。不可救矣。其姑堅託診視。脈證俱殆。翁求舉方。予曰。適談前視張鮑兩女證。維時病人猶能行動。尙不可療。况如是乎。辭欲登輿。其僕乞診婦病。詢其何疾。云病起三朝。發熱不退。神漸昏冒。今早手足微掣。予曰。此亦暑入心包之候也。可不必往。翁強之。偕至其家。見婦昏臥於牀。熱盛息粗。面赤唇乾。舌伸不前。挾視色絳。苔黃。切脈弦數。辭不用藥。僕人跪懇。勉議清解暑邪芳香宣竅之劑。并囑用黃土荷葉墊臥。越日僕來言。主母已故。妻病服藥熱緩掣定。神識稍清。復爲加減。幸得獲痊。後暮年再見洪慈春兄令媳之證。慈兄乃媳。長夏患病。四朝熱盛神昏。舌黃口渴。肢冷脈細。予診之曰。此暑邪內犯

心包。棘手之候。蕊兄囑治。勉商清暑滌邪。參以芳香開竅。并語之曰。服藥熱減。神蘇。庶可圖幸。若肝風一動。則難救矣。旁議予方過涼。另延他醫。以病者肢冷脈細。認爲陰寒。遂用薑附。置諸陽證不問。歎俗病家服藥。喜熱畏涼。膏粱殆甚。維時姻婭咸集。度其少年新婚。當從陰證治法。蕊兄自不知醫。因聽衆咻。信以爲是。友人方瑞徵。病者之表兄也。予視病時。渠亦在座。見後醫之方。與予相左。私叩所以。予曰。病屬暑邪入臟。熱極似寒。實非陰證。亟爲清解。猶恐不及。再投薑附。豈不火上添油乎。瑞兄云。家姑現在伊宅。吾往告之。勿服其藥。如何。予曰。子固婆心。但予雖能決其服彼藥而必死。然未能料其服予藥而必生。續聞竟服彼藥。肝風大動。顛簸反張。憑空躍起數尺。爬床搔席。嚙舌齟齬。未至一候而亡。予所見數證。臨危俱動。風抽掣。然不若此之劇。蓋由薑附燥烈。以剛與剛。益助其威耳。後十餘年。復見吳蔚揚兄令愛之證。

蔚兄令愛。適本里洪宅。卽星垣翁之乃媳也。年近二旬。形瘦質弱。星翁乃郎。向外貿易。因病遄歸。媳侍湯藥。憂勞交集。時值溽暑。偶作寒熱。次日熱發不退。頭痛嘔吐。逆予診之。擬屬暑風相搏。投以輕解之劑。詰朝脈證如故。神識欠慧。予謂星翁



曰。令媳病勢頗劇。刻防傳變。可速告知令親。切勿輕忽。原方佐以清熱辟邪。四朝再召。蔚兄在座。據言昨夕熱盛煩躁。今晨人事更迷。予入房診畢曰。邪已入臟。旦晚肝風卽至。病人體薄。且多憂勞。料難支撐。并將疇昔所見諸證向說。囑早延醫斟酌。蔚兄務求畫策。勉於昨劑中參入芳香開竅。以盡人工。五日黎明。星翁遣价來請。予辭不往。再四相邀。至見病者昏臥肢掣。喉中痰鳴。予曰。內閉外脫。蔑能爲力。他醫用藥。亦無效靈。越日而殂。

安波按。於壬午小春初二。治錢清場司秦積卿公祖。年將古稀。神采矍鑠。六旬餘得類中症。後以大補獲痊。今歲秋季。忽覺形寒怕熱。溺短便澀。素善飯膳。須豚蹄之屬。飢必以大碗燕窩。其餘茶食之類。常不輟于口。寒熱之際。啖食亦恐失餓。致見神采矍鑠。口牽指搖。目閉洩遺。切脈沉伏。搖視舌苔。乾燥黃厚。余曰。此伏暑候也。年高怯弱。慎防內閉外脫之險。辭以不起。彼人固求立方。余勉擬芳香開竅。辛涼豁痰之劑。令伊速覓妙手評酌。醫亦吾藥彷彿。竟服彼方。次日復診。余視脈病仍然。令搜真西黃幾釐。調至寶丹抹塗舌上。倘得神定。搖回。可望萬一。如是彌留者五日矣。渠竟獲得西黃幾釐。調至寶丹將塗。詎期舌初沾

染。而公竟仙逝矣。茲閱斯案。益奇先生之明決於一候之間。神乎神乎。

門人問曰。暑入心包一證。古人略而不詳。近葉氏案載證治數條。似非不救之候。且六淫首重傷寒。其危莫如兩感。雖軒岐祇有死期。而無治法。然後賢謂用藥先後。發表攻裏。復推出可生之機。今讀先生所著暑入心包數案。咸辭不治。或拯無功。果斯候之危甚於兩感。而竟不可救耶。答曰。傷寒兩感固危。畢竟其邪表裏雙傳。猶或可據可療。暑邪變幻無常。彼暴中之激烈。扁鵲不及攬指而投咀。蓋緣心爲君主之官。心包乃其外郭。邪犯心包。至危至急。烏可同類而語乎。又問曰。暑入心包。危急之故。已聞命矣。然三因病候多端。豈無一二可與比類者乎。答曰。安得無之。小兒夏月冒暑發熱。陡然神昏肢搐。俗呼暑風急驚。其證彷彿。其原相同。洵可以稱比類也。但暑邪感觸。小兒卽作驚搐者多。大人卽入心包者少。小兒暑風急驚。十中可救七八。大人暑入心包。十中難拯一二。此中奧義。不可不明。蓋小兒質弱。臟氣未實。邪入易。故病多。大人體強。臟氣已實。邪入難。故病少。惟其入之易。則其出亦易。故治易。入之難。則其出亦難。故治難。卽此觀之。病情思過半矣。又問曰。夫子發蒙解惑。暢論病機。頓開茅塞。頑

鈍輩以爲古人治病。證分寒熱。藥析溫涼。今見數案。治法悉是清暑辟邪。參以芳香通竅。不識此外尙有他法可施與。答曰。凡治他病證。有寒熱之殊。藥有溫涼之異。惟此一證。有熱無寒。比例溫病。病必有陽而無陰。藥必用寒而遠熱。夫暴病暴死。皆屬於火。若寒則凝。沍稽遲。焉有如此之激烈哉。予爲子輩再伸其義。醫方八法。汗吐下和溫清補瀉是也。此證邪已入臟。汗之不宜。腑病宜通。臟無下法。溫則以剛與剛。和解滲利。絕無干涉。痰食結胸則吐之。臟邪從無吐出之理。至於補法。傷寒中風邪陷于裏。往往用之。無如此證。邪入瀰漫。虛靈閉塞。不滌其邪。徒補無益。故舍清法。別無可施。譬諸救焚。舍水他無可用。再按小兒暑風驚證。質實能受清涼者可治。質虛不受清涼者不可治。此證亦然。曩治許禮門翁僕婦之證得愈者。亦因其藜藿體堅。能受清涼故也。膏粱羸弱。患此欲求幸免者。幾希。又問曰。傷寒論云。太陽病頭痛至七日以上自愈者。以行其經盡故也。若欲作再經者。鍼足陽明。使經不傳則愈。此仲師驗治傷寒傳經之法也。夫子言暑入心包之候。危於傷寒。但寒之傷人尙少。暑之傷人甚多。暑邪之入臟。如傷寒之傳經。應可預知。曷不做仲師鍼法。使其不入可乎。答曰。此未

可易言也。夫寒邪未傳之先有證可據。暑邪未入之先無證可憑。當其疾作之始。身熱頭疼。嘔吐口渴。與尋常暑證不殊。有此慧眼。能預知其邪之欲入。而爲設法堵禦耶。內經論卒中云。急虛身中卒至。譬如墮溺。不可爲期。可類推矣。雖然邪之未入。固難預知。而邪之既入。不可不識。凡診暑證。二三日間。視病者神識微呆。卽是邪入之徵。此語未經人道。舟子望雲而知風汛。予閱歷有年之一得耳。旣知邪之已入。維時其入尙淺。肝風未萌。似可極力驅之。勿令入深可也。無如暑邪變幻。電掣雷奔。迅速異常。縱使驅逐。枉竭其力。罕見其功。亦非臨證目擊。不能知之。茲因子輩之問。一伸病機。惜未水飲上池。無浣腸滌胃之術。能起人於九死一生之中。徒自歉耳。

安波按。病至危證畢聚。雖有慧心妙手。亦奚以爲。姑立方者。聊盡良工之婆心耳。

### 葉蔚如兄脅痛便閉一劑而效

蔚兄來診云。病初右脅刺痛。皮膚如烙。漸致大便閉結。坐臥不安。每便努掙。痛劇



難耐。理氣清火。養血潤腸。藥皆不應。切脈弦急欠柔。謂曰易治耳。一劑可愈。蔚兄云。吾病日久。諸藥無靈。何言易治。予曰。此乃燥證。肺苦燥。其脈行於右。與大腸相表裏。方書論脅痛。以左屬肝。右屬肺。今痛在右脅。而便閉結。肺病顯然。但肝雖位於左。而其脈繫於兩脅。內經言邪在肝。則兩脅中痛。今痛雖在右脅。不得謂其專屬肺病已也。夫金制木。憂傷肺。金失其剛。轉而爲柔。致令木失其柔。轉而爲剛。辛香益助其剛。苦寒愈資其燥。潤腸養血。緩不濟急。訂方用括蕓一枚。甘草二錢。紅花五分。蔚兄見方稱奇。乃詢所以。予曰。方出赤水元珠。夫括蕓柔而潤下。能治插脅之痛。合之甘草。緩中濡燥。稍入紅花。流通血脈。肝柔肺潤。效可必矣。服藥便通。痛減。能以安臥。隨服復渣。微瀉兩次。其痛如失。

安波按。懷抱奇。脅痛法。亦可參用。

曹靜川翁孫女頰脫音啞

靜翁孫女。年甫三齡。夏月發熱。醫作暑風治。投清散藥兩劑。忽頰脫音啞。食莫能嚼。飲莫能啜。又以爲風中會厭。仍用散藥。靜翁遲疑。邀予商酌。謂曰。頰屬腎。頰脫

腎虛之徵。腎脈循喉嚨。挾舌本。爲聲音之根。經云。內奪而厥。則爲瘖痺。兒質本薄。暑復傷氣。更服辛散。元氣益漓。致變若此。倘再行疏泄。肝風一動。慢驚旋至。不可救矣。倣左歸飲合生脈散服之而瘥。

安波按。勘此等證。腹中無內經。猶瞎子行路。

### 堂妹吐證

堂妹年二旬。因情懷憂鬱。致患吐證。每餐隔間哽哽。少頃卽吐。輕則只吐數口。甚則所食之物。傾囊而出。溫中調氣。清火解鬱。治俱不應。予用安胃制肝法。亦不驗。只得停藥。越十餘年。疾仍如故。肌肉不瘦。產育如常。予見此證數人。藥皆罔效。然亦無損。復有梅氏女一證。案載輯錄卷中。其候更加經期阻閉。纏綿數年。咸目爲殆。出室後得自愈。可見情志之病。藥餌難療。至於病久而血氣無損者。良由胃爲多氣多血之經。腑病較臟病輕耳。若果臟真損傷。焉能久延不壞乎。

安波按。古人云。師尼寡婦。必須異治。愚謂室女之治。較師尼寡婦爲尤甚。蓋室女人道未周。情竇早露。以致窒塞之鬱。百變百幻。結禱後。諸病霍然。余亦有見。

之者。馬陸氏女也。年過及笄。識書算。談吐淵博。知藥性。貌亦加常人一等。後得肝厥一症。每月如死者一二次。及合卺有時。而適逢厥來。從此好事多磨者有二次。余至。以疏肝息風爲事。然雖救目前之急。奈終身痼疾。總少妙術。忽忽三年。壅突至。完姻迄今。沉疴若失。而瓜瓞已三四矣。

方萃巖翁乃郎跌後又患腹痛藥傷胃氣治驗

萃翁公郎葆晨兄。稟質素弱。曩患滑精。予爲治愈。案載初集中。斯病之始。偶因登山跌仆傷足。吾鄉專科接骨頗善。但其藥狠。弱者每不能勝。葆兄緣傷重。欲圖速效。日服其藥。已戕胃氣。又患腹痛。更服溫肝行氣活血等方。胃氣益傷。神疲倦臥。痛嘔不止。藥食不納。邀予診視。脈虛細澁。氣怯言微。面青自汗。謂萃翁曰。公郎病候。乃藥戕胃氣。恐蹈脫機。人以胃氣爲本。安穀則昌。治先救胃。冀其嘔止。穀安。然後以大補氣血之劑繼之。不徒愈病。且足得血而能步矣。但治嘔吐之藥。最宜詳辨氣味。不獨苦劣腥臊不能受。卽微郁微酸亦不能受。惟人參力大氣味和平。胃傷已極。非此莫可扶持。而單味獨用。分兩需多。購辦不易。姑以高麗參代之。日用

數錢。陳米水煎。緩緩呷之。守服數日。嘔止食納。神采略轉。接服大補元煎。漸可下床。移步尙苦。筋脈牽強。行動艱難。翁慮成跛。予曰。無憂。血氣未復耳。仍服前方。半載後步履如常。

安波按。味單則力峻。古人所以獨參名湯也。而其用專。

### 又翁自患陰疽復中寒陽脫救急治法

壬午冬。萃翁患外證甚重。因往候之。翁臥於床。謂予曰。背偶生毒。已經旬矣。知子不專瘍科。故請潘日章兄看視。潰膿無多。并不痛楚。惟形疲食少。煩爲診之。切脈沉細而栗。觀其毒形平塌。乃告之曰。此疽也。其病在陰。治須溫補內托。由陰轉陽。掀腫作痛。毒化成膿。庶幾無慮。囑邀潘日章兄同議。方訂十全大補湯加白芷穿山甲。薄暮使來促云。刻病甚劇。祈速往。入室見翁靠坐於地。衆皆倉皇。予驚問故。乃弟子橋先生言。家兄因起身更衣。站立不住。忽然跌仆。遂作昏暈。故此不敢動移。按脈遲細欲伏。面青肢冷。嘔惡頻頻。予曰。此中寒也。病上加病。切防脫。變計惟參附湯以濟其急。嘔多胃逆。更以乾薑佐之。古有霹靂散之名。形其迅速也。適日兄



亦至。意見相符。於是用高麗參五錢。附子乾薑各二錢五分。令先扶掖上床。藥熟傾服。予與日兄同坐室中。俟其消息。時屆三鼓。漸見嘔定肢溫。神蘇脈出。予喜曰。可無憂矣。令煎二渣與服。次早復召。謂日兄曰。昨夕中寒急暴。幸賴參附湯挽回。今視其疽形。仍平塌。尙不知痛。昨同議之方。猶恐不濟。商以大劑養榮湯。加附子。再診更增枸杞兔絲巴戟天及河車鹿茸血肉之屬。日漸知痛。腫起膿稠。腐化新生。治療月餘。瘡口始斂。

### 次兒光墀單腹脹奇驗

墀兒年踰弱冠。向無疾病。夏間偶患腹脹。以爲濕滯。無關緊要。雖服藥餌。然飲食起居失於謹慎。糾纏兩月。腹形漸大。肌瘦食減。時作嘔吐。自療不愈。就同道曹肖巖余朗亭二公診治。藥如和滲溫清消補。徧嘗無驗。其時尙能勉力出戶。猶不介意。予思既諸藥無功。諺云。不藥得中醫。遂令停藥。迨至冬初。因事觸怒。病益增劇。食入旋嘔。臥卽氣衝。二便欠利。予憶經云。肝主怒。怒則氣上。得無肝氣橫逆。阻胃之降。是以爲嘔爲脹。與自擬越鞠逍遙及安胃制肝方法。亦不應。漸致腹大如鼓。

堅鞭如石。筋綻臍突。骨立形羸。行步氣促。予技已窮。復邀同道諸公視之。皆稱證成中滿。消補兩難。有進專治鼓脹丸藥者。言其應如響。一下其腹即消。予料彼藥乃巴黃霸劫之品。今恙久胃虛。如何能受。即古治單脹有用雞矢醴一方。顧斯畏食嘔吐。氣味亦不相投。晝夕躊躇。無策可畫。俄延至臘。忽覩梅梢蕊放。見景生情。旋摘數十枝。令以湯泡代茶。日啜數次。機關勘破。觸類旁通。家有藏釀。用木瓜橘餅各三錢。另以村醪煎熟。與藏釀對沖。晚飲兩盃。以前腹脹否塞。絕不響動。如此啜飲三日。腹中微鳴。不時失氣。堅鞭稍軟。迨至旬餘。脹勢減半。二便覺爽。食入不嘔。夜能安臥。匝月後腹脹全消。當時脹甚。腹如抱甕。疑謂何物邪氣。若此之盛。及其脹消。大便并無穢惡遺出。可知即此身之元氣。與此身為難首耳。兒病愈後。咸以爲奇。友人問予所用梅花治脹。出於何書。予曰。運用之妙。存乎一心。此予之會心偶中。無古可師。大概梅占先春。花發最早。其氣芳香。故能舒肝醒脾。橘皮調和諸氣。肝以斂爲瀉。木瓜酸柔。能於土中瀉木。更藉酒力。是以得效。友人喟然曰。子良工也。公郎之疾。固雖有術起之於後。尙且無法療之於前。此醫之難也。然使此證患於不明醫理之家。當其迫切之際。未有不隨下藥而斃者。此又醫之不可不

知也。予聆斯語。不覺悚然。

安波按。膨證一候。世乏良方。細繹此子得愈之由。緣年正方剛。血氣甚盛。雖病久形衰。而根蒂尙固。更兼年輕無知。鬱怒未深。並非冤沉海底。大怒不解。日就憂抑者。同日而語。不然。騰殘春回。木升當陽。其病日增之不暇。豈藉梅花微末之材。可能却病乎。余見是證。不治者甚衆。其年均。在四五六左右。三十以外。尙未之聞也。余生也晚。不然。責之杏翁。以爲然乎否乎。

### 巴聲茂生佈痘癰閉險逆一劑救轉

巴生居近比隣。尊公秉昭翁。早子俱殤於痘。是春痘令盛行。兒多夭折。生年數齡。尙未出痘。翁以爲憂。一夕忽發熱嘔吐。臥寐不安。比曉。迺予望其頰赤。脣乾。捫其身熱。指冷。煩渴舌黃。細驗週身標點。隱隱夾有紫癰。顧謂翁曰。此佈痘癰閉險逆之證也。服藥癰消痘透。庶可無虞。方定羌活散癰湯。加石膏燈心。午後復視。云服頭渣藥後。熱盛悶亂。頭搖肢掣。予曰。此欲作驚。令服復渣。薄暮煩熱益甚。昏譫渴飲。舌吐脣外。掉弄不休。痘仍不透。癰反增多。其勢頗劇。舉家倉皇。旁議劑中石膏。

過涼。冰伏爲害。予辭焉。秉翁堅求拯治。因在隣居素契。且此子又從次兒受業。情難固却。復告之曰。方書雖有痘初宜於升發。忌用清涼。恐其冰伏之說。特此證乃心。胃火毒壅遏。致成癰閉。不清其火。癰何由消。痘何由透。前方清藥力輕。故不勝任。於是重用石膏爲君。佐以犀角酒炒。黃連元參。升麻連翹。赤芍牛蒡。紫草之屬。燈心筭尖爲引。每服另沖無比散。取其大熱利小便。亦釜底抽薪之義。方已寫就。思舌爲心苗。今舌吐弄不休。內服煎藥。須外用紫雪塗之。奈此物吾鄉甚罕。乞諸其隣。所與些微。亦不濟事。翁云。吾有紫雪藏之久矣。取出稱有三錢。快甚。卽令蜜調塗舌。并速煎藥與服。次早翁來云。昨夕遵諭服藥。塗舌至半夜。熱緩癰收。渴止躁定。似有轉機。再煩一看。果諸證悉平。癰消痘透。予曰。生矣。詢其紫雪只剩三分。餘皆塗去。予笑謂翁曰。此證雖仗藥力挽回。然非如許紫雪。亦無此速效。今火勢旣平。藥當褪鬆。酌以十神解毒湯。仍稍用石膏犀角。清其餘火。轉用太乙保和湯。人參易沙參。加天蟲白芷貝母鮮鱗。漿成之後。補脾利水。清涼解毒。漸次收功。此等險證。幸在比隣。朝夕看視。藥隨病轉。得以保全。使病家與醫居隔遠。倉卒變幻。鞭長莫及。欲圖慶成。不亦難乎。



安波按。方議精妙入神。讀者不可忽過。

答鮑北山翁詢伊郎飲癖證治始末并商善後之

策

飲證名載內經。特經文專論。運氣司天在泉。勝復之義。僅啓大端。仲聖於金匱玉函中。闡發病機。詳辨治法。條分縷析。後世有所遵循。可稱幸甚。經云。水火者。陰陽之徵兆也。水爲陰。火爲陽。足見飲爲陰類。致病之由。必其人之元氣虧乏。陰盛陽衰。津液凝滯。不能輪布。留于胸中。則清者悉變爲濁矣。使果真氣充足。飲入于胃。游溢精氣。上輸于脾。脾氣散精。上歸于肺。通調水道。下輸膀胱。何患之有。經又云。陽化氣。陰成形。夫氣卽水也。水卽氣也。氣可化水。水可化氣。今則陰翳瀰漫。水精凝聚。得無陽衰。氣無以化之故乎。人身之陽有三。一曰膻中之陽。如離照當空。纖雲不掩。膻中陽虛。則濁陰上干。竊踞陽位。所謂濁氣在上。則生腹脹也。一曰腎中之陽。如釜底之火。熟腐水穀。腎中陽虛。則釜底無火。物終不熟。所謂戊癸少化火之機。命陽無蒸變之力也。一曰膀胱之陽。膀胱者。州都之官。津液藏焉。氣化則能

出。膈中位於膈內。膀胱位於腹內。膀胱氣化。則膈中之氣得以下行。膀胱陽虛。則氣不化。失其通調水道之職矣。童年既無色慾之戕。又鮮情志之擾。其膈中腎命膀胱之陽。從何而虧。飲病從何而起。得無水果生冷所傷之咎與。軒岐於病治之後。尚以穀肉果菜食養盡之。非謂水果不可食也。惟食之有節。無使過之。過則傷矣。童質稟薄。素嗜水果。胃陽受傷。致成飲癖。夫蔗性寒清胃。詩稱大官還有蔗漿寒者此也。舊夏日啖蔗漿。致發宿疾。胸膈支滿。漉漉有聲。憤然無奈。嘔吐冷水。成碗成盆。投以苓桂朮甘理中六君之屬。通陽滌飲。服至月餘。始得獲效。復訂溫健脾胃丸方。并囑戒食生冷。冀杜病根。仲秋病復召診。詢知丸藥未服。復食梨菱。此則自誤。非醫咎也。窺其病狀。較前加甚。不但嘔吐水冷。并且脘中喉口俱冷如冰。食薑不辣。洩色如泔。經云中氣不足。洩便爲變。諸病水液澄澈清冷。皆屬於寒。初則胃陽之傷。繼及膀胱腎命。一寒至此。誠爲可畏。薑椒桂附。屢投不應。思商硫黃丸。大熱純陽。差堪有濟。此藥吾鄉苦無市處。無已。每日方內附子加至五錢。連進十二劑。纔見春回暘谷。細揣此病。定有窠囊附於膈間。如賊寇依山傍險。結成巢穴。出沒不常。窠囊之說。許叔微論之於前。喻嘉言詳之於後。師古而非杜撰。前番

勢輕。病後只須治脾。此番勢重。病後務須治腎。因倣腎氣丸方法。令其上緊製服。并囑水果不可沾唇。卽菜蔬性寒之品。均不可食。詎意旁人少所見。多所怪。因見方內附子分兩加重。咻爲有毒。不可多服。致令藥已奏功。反生疑畏。又將所立丸方。付未達不敢嘗之例。無如病雖暫愈。其根猶在。交春萌動。一夕吐水半桶。夫水之爲物。不盈科不行。積之日久。故復傾囊而出。不明窠囊之因。反詆溫藥之過。嗟吁。周禮冬至採毒藥以供醫事。凡攻疾之藥。俱是有毒。不獨附子爲然。但有病病當。彼性攻寒不逮。何暇留連作毒。如兵者。毒物也。然勦賊必須用之。若無故用兵。則受其毒矣。倘用兵以勦賊。勦賊以安民。則不惟不見其毒。而反受其益。故第論用之當不當。不必問其毒不毒。苟用之不當。卽無毒亦轉爲大毒。用之得當。卽有毒亦化爲無毒。仲聖傷寒方中。如四逆湯。回陽救急。生附俱用一枚。今時種附力薄。况經童便甘草製透。其力更緩。方將慮其無毒以攻疾。何至慮其有毒以傷人乎。試思一月之中。附子服過觔許。設不對證。早已禍起蕭牆。何以病後毫無喉痛口瘡之恙。安得視爲砒鴆。執迷不悟耶。果疑溫藥非是。盍請他醫療之。醫來案稱胃寒氣痛。藥用吳萸丁香。雜以枳朴蘆根石斛。僕因素契。不忍緘口。復實告以證

屬寒凝。飲積且發。經數次吐多胃傷。豈特不可寒涼。卽枳朴消耗真氣。亦屬不合。此次病發。得以勢輕。未始非仗從前溫藥回陽之力。觀其吐後卽渴。金匱飲證條中。以渴者爲欲解也。愈期非遙。不藥亦可。但窠囊不除。終爲後患耳。如言停藥數日卽安。論商善後之策。所云五炷朝元丹。僕前原思及此。惟是此番疾作。寒象旣已減輕。溫藥亦應稍損。純陽剛復。似可無需。矧窠囊之疾。非迅速可以蕩掃。藥性過悍。久防增氣。且前僅用附子。衆咸詆其有毒。今若再進硫黃。更駭聽聞。莫若仍從外飲治脾。內飲治腎。不偏不倚。中正和平。禹之治水。行所無事。病去元氣不傷。斯爲盡善。再按治飲用溫。固屬無難。要知其病。雖由虛而成。非同全實。可以直行攻消。然亦非同全虛。可以專行溫補。酌於溫藥中。少加開導。俾飲邪不至逗留。合乎溫而和之之旨。考諸金匱云。心下有痰飲。胸脅支滿。目眩。苓桂朮甘湯主之。心下有支飲。小半夏加茯苓湯主之。原痰飲之作。不外脾胃陽虛。濁陰凝聚。而施治之法。亦不外燥土升陽。驅導飲邪。蓋胃寒則痰生。胃煖則痰消。脾溼則飲留。脾燥則飲去。二方雖治支飲。然用之於諸飲。亦無不行。并考許叔微本事方。專用蒼朮一味。療痰飲之癖囊。喻氏寓意草中。有華太夫人餌朮方法。效驗彰彰。聖域賢關。



心心相印。外飲治脾。當如是也。金匱又云。短氣有微飲。當從小便去之。苓桂朮甘湯主之。腎氣丸亦主之。蓋治飲雖以升陽燥土爲第一義。然從小便去之。尤爲先務。苓桂朮甘亦導水利小便之劑也。設其人腎陽不充。則難勝任。故又主之以腎氣丸。以桂附加入六味補腎藥中。益火之原。蒸暖中焦之陽。使胃利於消。而脾快於運。則飲邪自無伏留之患矣。况方內苓澤原有淡滲水邪之能。亦本溫而和之意。較他溫補諸方。相去逕庭。奈世無好桂。而種附力復淺薄。雖以枸兔佐之。猶恐不逮。再假斑龍血肉。純陽溫煦奇經。以補玉堂關下之闕。方內減丹皮者。恐其清瀉相火故也。內飲治腎。不亦宜乎。

安波按。可稱盡善盡美。

許玉書翁大郎腹痛吐瀉危證拯治之奇

玉翁大郎。童年曾患頭昏。諸藥不愈。予作肝風治。疏歸芍地黃湯。僉謂頭昏是有風寒。童子不可輕服熱地。翁排衆議。依方多服而瘳。次春又患腹痛。嘔吐便瀉。延診。藥用溫中調氣。兩服未愈。家人着急。令更他醫。日請數人。或以爲蟲。或以爲血。

或以爲火。治總不驗。淹纏旬餘。痛甚不止。嘔瀉不停。寢食俱廢。復邀診視。脈細面青。呻吟疲憊。予思病勢增劇。玉翁固雖相信。然旁議紛紛。難與着手。轉薦同道余朗亭先生診治。初投五苓散。續進真武湯。亦俱不應。玉翁堅囑想法。予曰。非不欲爲借籌。奈令郎病久。胃氣必空。輕劑諒不濟事。若背城借一。尊公愛孫如珍。見方駭然。焉肯與服。翁沉吟云。有一善策。今早友人談及隣村有扶鸞治病者。家人欲往求方。予呵止之。祈擬一方。予持語家人云。是乩仙所開。自必信服。予曰。策固善矣。治法尙難。令郎之病。起初不過寒凝氣滯。本無大害。因求速效。諸治厖雜。痛久傷氣。吐多傷胃。瀉多傷脾。致困頓若此。倘仍見病療病。必至土敗氣脫。計惟扶陽益氣。以拯其急。爰議附子理中湯。米水煎飲。氣固胃安。庶堪保守。詰朝玉翁來舍。喜云。曩服他藥。如水投石。昨服尊方。不但病減。并可啜粥。家人信爲神丹。相煩往視。懇爲加減。予曰。藥已對證。勿輕易輟。今日照方仍服一劑。明日再爲斟酌。次早往診。病勢大轉。因其體素陰虛。方內除去附子。又服兩日。更用參苓白朮散。調理而痊。是役也。非玉翁平素信心。兼施權變。安能圖成。誌此以見醫家臨證。不特病情之難窺。而人情之難處尤甚也。

安波按。人情難處。近今爲尤甚。杏翁處嘉道盛世之際。而不見光緒醫生之吃苦乎。今日之醫。必須一劑知。二劑已之技。否則另商他人矣。可見人心不古。愈流愈下。

又次郎脾腎陽虛伏寒。凝沍重用溫補而瘳

王翁次郎。形貌豐腴。向無疾病。丁亥季秋望後。陡作寒熱。延予次兒光墀診治。藥投溫解。其熱即退。嗣後單寒不熱。肢麻指涼。口吐冷涎。臍腹隱痛。便溏畏食。知係伏寒凝沍。方換薑附六君附子。初用八分。增至一錢。未見鬆動。邀予商酌。切脈遲細無力。望色面白舌潤。予曰。此正仲聖所謂無熱惡寒。發於陰也。前方不謬。尙恐病重藥輕。附子加用二錢。更加吳萸肉桂砂仁川椒。次日復診。病狀髣髴。思火爲土母。陽虛生寒。溫理脾陽不應。非補火生土不可。王冰所謂益火之原。以消陰翳也。倣生生子壯原湯。加吳茱萸胡盧巴肉果巴戟天。附子增至三錢。以爲必效矣。詰朝脈證依然。王翁問故。予曰。無他。藥力未到耳。蓋市中種附力薄。况經製透。其味更淡。可增四錢。再加鹿茸枸兔峻補真陽。自可春回暘谷。依法服之。證仍如舊。

翁姪召成兄私詢予曰。舍弟之病。先生審屬陰寒。第用如許熱藥。毫不見功。理殊不解。且附子大毒。今已服過數兩。久而增加。可無患否。予曰。其他勿論。時下秋燥。此等純陽之藥。若不對證。一七亦不能堪。況其多乎。夫攻病之藥。皆有毒。無毒之品。不能攻病。凡傷寒中陰等證。非附子不能驅陰回陽。有病則病受之。何有餘性遺留作毒。即使有毒而生。不勝於無毒而死乎。仍守原方。附子加至五錢。維時旁議沸騰。幸玉翁信而不疑。予告之曰。此證確屬沉寒痼冷。然煎劑溫藥止矣。再得硫黃丸佐之。庶有裨益。於是煎丸并進。漸見好機。熱藥稍減。參入熟地河車杜仲。予與墀兒日爲診視。兩閱月始得全愈。共計服過附子一觔。硫黃丸二兩。乾薑六兩。鹿茸一架。黨參三觔。高麗人參共十餘兩。其他肉桂吳萸川椒等。不可勝計。予生平治陰證。用溫藥。未有若斯之多。而效驗亦無如此之遲也。

安波按。病家相信。醫家放膽。所以爲醫一道。非易事也。

### 鮑宅京翁僕人中寒暴脫救轉之奇

宅翁令政。質虧恙久。是歲季春病劇。延診。投以大補之劑。諸證漸減。六月初旬。病



人夜臥受涼。微覺怯寒體痛。其時宅翁往淮。公郎輝遠兄。遣僕相招。予至視畢。謂曰。此新感陰暑。但病軀不勝表散。暫進參附湯。得以邪從汗解。仍服本藥。比用人參二錢。附子錢半。各煎和就。正待與服。恰病人睡去。少頃輝兄出。告曰。家母方纔睡醒。身已有汗。體痛亦鬆。不甚怯寒。日內天暑。附子過溫。或可不用。卽服本藥。何如。予曰。質虛偶感。邪原無多。標證旣除。自應治本。仍將舊方加減配藥。其所和之參附湯。留貯盞內。置放几上。時值正午。輝兄留餐。甫將舉箸。忽僕人之婦。張皇奔入。泣云。伊夫病在垂危。叩求拯救。予曰。爾夫早間迂我。隨同歸來。并未見有病狀。婦云。陡然暈倒。不知所由。輝兄本家莆田翁偕往。果見神昏汗冷。肢厥脈伏。初爲躊躇。繼而猛省。笑顧莆翁曰。證固危殆。然有一大奇事。可望生機。翁驚問故。予曰。此證乃卒中陰寒。陽欲暴脫。而救脫必須人參。伊等焉能得此。况安危呼吸。急不可待。頃輝兄乃堂所煎之參附湯未服。人參雖貴重之物。但和有附子在內。他人無此病。斷難服此藥。不意盛紀突遭斯疾。適與此藥脗合。豈非天造地設乎。令婦跟至輝兄宅中。予道其詳。衆咸稱異。當將几上參附藥盞付之持去。諭其稍溫與服。再看動靜。下午其婦來云。服藥踰時。汗斂肢溫。人事漸甦。復診脈出神清。惟倦

怠耳。方疏參耆建中湯。仍加附子。囑向伊主人處乞高麗參四錢。分兩劑服。更見起色。續增枸杞山萸當歸杜仲服之而瘳。觀此可見人之死生有數。而一飲一啄莫非前定矣。

安波按。證似中暑。以參附同陽。非大識見不可。

### 許綱之兄齒痛

綱兄質虧多病。予爲調治。所用藥劑。不外歸脾湯補元煎之屬。一日遣使相促。予至時將薄暮。綱兄踰臥榻上。起告予曰。早晨齒牙忽痛甚。不可耐。至今不止。恐挾風熱外因。故停前藥。相煩診視。暫解標邪。切脈沉細無力。見證形寒足冷。謂曰。此屬虛寒。非關外感。不徒用補。更須從溫。爰倣古方八味地黃湯。加骨碎補。一服痛已。

### 鮑智原翁令孫痘後鬼腫潰久藥投溫補而愈

智翁令孫三歲。痘後左手曲池穴側鬼腫。潰經年餘。外科療治。不能收口。逆予商

之。維時伊兄朗玉翁。及同事葉殿揚兄在座。二公俱知醫理。予視畢告曰。毒生手足。固不害命。然潰久膿水流多。氣血受傷。面黃肌瘦。神形疲倦。目無精采。天柱骨垂。一派大虛之象。最爲可慮。潰口收否。無暇計也。朗翁云。證旣屬虛。虛則當補。予曰。不但用補。且須用溫。智翁云。時下炎暑如蒸。過溫恐其難受。予曰。醫家治病。盛夏遇寒證。用熱藥。隆冬遇熱證。用涼藥。所謂舍時從證也。病若虛而不寒。單補亦可見功。今虛而兼寒。非溫補莫能奏效。爰定人參養營湯。加附子。鹿茸。枸杞。杜仲。合乎內經形不足者。溫之以氣。精不足者。補之以味之義。二公見方稱善。初服精神略轉。再服頸骨不傾。守服數十劑。氣血恢復。潰口亦斂。此證獲痊。雖予之執理不阿。亦賴二公贊襄之力也。

吳尙時兄春溫雨感危證治愈附載鄭晉康兄令弟病同致殂之故并誨門人

尙兄體素清癯。春月病溫。延診。金邁倫翁偕往。據述昨午先寒後熱。頭痛汗出。熱灼不退。口渴心煩。夜不安臥。形倦莫支。就榻診之。脈虛浮大而數。視舌無苔。撫如

乾版。予爲之駭曰。此證乃春溫兩感。至危至急。仲聖云。發熱而渴不惡寒者。爲溫病。發汗已身灼熱者。名曰風溫。內經云。冬傷於寒。春必病溫。冬不藏精。春必病溫。既傷於寒。又不藏精。同時病發。謂之兩感。凡傷寒瘟疫。熱盛舌乾。亦須至一候之外始見。今病纔一日。舌卽乾涸。足徵腎水素虧。冬傷於寒。邪伏少陰。暗吸腎真。劫其家寶。故一見發熱。津液無以上供。舌卽乾矣。熱論篇云。傷寒一日。巨陽與少陰俱病。則頭痛口乾而煩滿。斷爲兩感。不可救藥。比類而推。殊難着手。爰用熟地一兩。當歸三錢。料豆五錢。玉竹五錢。甘草一錢。疏方訖。告邁翁曰。予生平治少陰。先潰於裏。太陽復感於表。傷寒春溫兩感危殆之候。初起悉宗景岳新方。理陰托邪。往往獲效。無如此證。津液既涸。再投薑附。則陰立亡。故但師其意。以廣期前輩風溫湯佐之。雖一時之權宜。亦經營之慘淡耳。邁翁曰。善。遂服其藥。熱減神安。舌稍轉潤。再加沙參麥冬女貞石斛。更進復脈。左歸漸次而愈。

安波按。形倦句不妥。蓋外感一病。人人皆倦。

鄭晉康兄。僑居潛口。設帳汪宅。予因其居停延診。晤間云。舍弟抱恙。便託一看。予問恙經幾日矣。曰。昨日起病。發熱至今未退。予曰。此感證也。汪宅去伊家不數武。



即與偕行。途次談及時下患感證者頗多。須驗其舌。若初起舌苔膩厚。則受邪深重。纏綿難愈。既至其室。病者出房就診。令其伸舌。乾涸無苔。形如鏡面。予曰殆矣。晉兄驚問所以。予曰適言感證輕重。須驗舌苔厚薄。不意令弟舌毫無苔。光明如鏡。初病見之。甚非佳兆。晉兄云。予言感證苔薄病輕。今舌無苔。反以爲殆。此曷故耶。因將曩視吳尙時兄病情向說。即照所用治法。疏方付之。并告之曰。服藥應效。則吉。否則難救。渠以予言爲過。另更他醫。日甚一日。揆至六朝。勢已沉篤。予言果驗。欲復相招。恐予不至。乃札託家芑生兄勸駕。予曰。非不肯往。奈彼病本重。即服予藥。亦難必效。况復稽遲。內經論兩感之危。在於六日。今已屆期。盧扁再世。亦無能爲。芑兄曰。固雖如此。但渠昆仲與吾交契。今急而相求。且屈一行。以全吾之友誼耳。勉爲呼輿。將及門。其疾已革。

安波按。兩證舌俱無苔。外感固屬陰候。但亦須問其平日舌胎無苔否。倘若體質如是。不在此例也。

門人問曰。叔和序例云。寒毒藏於肌膚。思肌膚淺近。豈容邪棲數月。而病始發與。答曰。喻氏云。寒邪由肌膚而入。辛苦之人。邪藏肌膚則有之。若膏粱之輩。冬

不藏精者。其寒邪且有藏於骨髓者矣。程扶生云。藏於肌膚。當云藏於骨髓。周禹載云。逆冬氣則少陰不藏。不藏寒邪得而入之。傷於肌膚。伏於骨髓。合三條而觀之。謂傷於肌膚則可。謂藏於肌膚則不可。又問曰。序例又云。至春變爲溫病。喻氏謂變字下得怪誕駭人。周禹載言變字大妙。未審孰是。答曰。內經論伏氣爲病。如冬傷於寒。春必病溫。春傷於風。夏生飧泄。夏傷於暑。秋必痃瘕。秋傷於溼。冬生咳嗽等條。未言變也。又如夏暑汗不出者。秋成風瘧。亦未言變也。其有稱變者。如高粱之變。足生大疔。逆春氣則少陽不生。肝氣內變。逆之則傷肝。夏爲寒變等條。乃謂病之由此變。彼如實證變虛。熱證變寒之類。始可言變。若春溫則本冬傷於寒。至春病作。流異源同。似未可言變也。經又云。秋傷於溼。上逆而咳。發爲痿厥。曷不一宗經旨。曰。至春發爲溫病。豈不違乎。又問曰。經云。冬不藏精。春必病溫。然則室女童男。曠夫嫠婦。皆無溫病乎。答曰。經語渾融。在人之意會耳。蓋冬不藏精一語。亦指天時。非專指人事也。試觀天明則日月不明之句。義可見矣。夫一日之中。早明而夜晦者。卽藏精也。一歲之中。春生而冬藏者。亦藏精也。使入夜不晦。入冬不藏。人物能無夭札疵癘乎。軒岐於此分

定兩例。曰冬傷於寒。春必病溫。冬不藏精。春必病溫。但寒乃冬令之正氣。人知畏避。受病尙少。冬陽開泄。天暖而雷。乃爲淫氣。受病殊多。此雖予之臆說。然揆其理。似當不謬。又問曰。劉松峰謂內經冬傷於寒。春必病溫。雲笈七籤改作冬傷於汗。蓋言冬時過暖。以致汗出來。春必病溫。冬日嚴寒。來春并無瘟疫。以其應寒而寒。得時令之正故耳。以汗易寒可乎。答曰。此創論也。似亦近理。但內經格言。豈容率改耶。

### 家芑生兄怔忡治法

芑兄恙抱怔忡。久而不愈。每發心旌搖搖。頭暈神倦。輾轉不安。予診之曰。此煩勞鬱傷。心脾肝三經病也。方定黑歸脾湯。去木香。加白芍。柴胡。合逍遙散。間參以麥冬。五味。柏子仁。丹參。牡蠣之屬。疾發雖輕。然猶未斷。芑兄憂之。予曰。神者伸也。人之神好伸而惡鬱。鬱則傷神。孔聖二論。首揭說樂。佛家般若經。首稱自在。莊生著南華。首標逍遙。遊情志中。病未可全憑藥力。務須屏煩頤養。方能除根。如言閒散半載。服煎藥兩百劑。至今疾不復發。

安波按。鬱則傷神一句。妙極。蓋心有悒鬱。則事事肘掣。雖有樂境當前。變爲畏途。

### 汪靖臣兄乃郎冒暑瀉甚欲脫亟挽元氣一法

靖兄乃郎。年甫四齡。稟質向虧。夏冒暑邪。發熱便瀉。幼科僉用清散消導之品。服至匝旬。熱瀉如故。形疲氣餒。食入作嘔。醫稱邪滯未淨。仍用前藥。乃致食粥瀉粥。飲藥瀉藥。更醫以爲脾虛。投六君子湯不應。始來逆予。兒臥几上。闔目無神。脈細如絲。予曰。胃氣告竭。慢驚欲來。不可爲矣。靖兄曰。固知病久屬虛。然昨服六君子補藥。亦無靈效。何也。予曰。病有倒懸之危。一縷千鈞。焉能有濟。考古人製六君子湯。原爲平時調養脾胃而設。非爲救急拯危而設也。且閱方內并無人參。僅用錢許黨參。數分白朮。而市中種朮味苦性烈。與蒼朮等。不能補脾而反燥脾。復有二陳消之。茯苓利之。欲求撥亂反正之功。真蚍蜉之撼大樹矣。靖兄曰。然則治當如何。予曰。非真人參不可。蓋參者參也。與元氣爲參贊也。魚一刻無水卽死。人一刻無氣卽亡。兒質本薄。瀉久氣傷。加以醫藥重戕胃氣。經云。食入則胃實而腸虛。食下



則腸實而胃虛。今腸胃通爲一家。幽門闌門。洞開不固。飲食入胃。不使少留。卽從腸出。倉廩之官。廢弛厥職。此誠危急存亡之秋。惟仗參力。急固其氣。氣不奪則命不傾。然須獨用。始克見功。古有獨參湯可法也。靖兄聞言大悅。卽懇立方。專用人參二錢。令分兩次。米水煎服。熱退瀉稀。次日照方再進。便瀉全止。啜粥不嘔。更製八仙糕與服而痊。

### 又幼女外感咳嗽誤藥釀成肺痺急證

歎俗信神。無知之徒。將神廟籤詩。混編藥名。鄉愚患病。輒往求之。呼爲神藥。貽害甚多。靖兄外貿。幼女在襁褓中。時值冬寒。感冒外邪。發熱咳嗽。其妻誤聽人言。往求神籤。藥用貝母三錢。女流不諳藥性。卽市煎灌。咳嗽頓止。以爲神驗。少頃忽痰湧氣促。頭仰胸高。徹夜攪擾。次早迓予。視其兒身熱肢冷。口張鼻扇。啼聲如鴉。乃姑告其所以。予曰。此肺痺大證。危期甚速。夫肺主皮毛。皮毛受邪。肺氣閉塞。因而發熱咳嗽。不爲疏解。反投寒斂之品。且單味重用。爲害更烈。經云。風寒客於人。使人毫毛畢直。皮膚閉而爲熱。病入舍於肺。名曰肺痺。孩提弱質。焉能堪乎。辭不舉。

方。友人譚萃升翁。代懇試施一七。以圖僥倖。予思病既瀕危。藥非精銳。料難應效。方用麻黃桂枝杏仁桔梗橘紅半夏薑汁。并囑服藥豎抱。旋走。勿令臥倒。如此一晝夜。始得咳嗽出聲。痰喘略定。知其痺象稍寬。但病勢過重。藥雖見效。未便驟鬆。麻黃昨用三分。令其減半。餘照原制。再進一劑。汗出膚潤。熱退喘平。更用六安煎。加桔梗。臥穩嗽稀。予曰。痺開病去。大局無虞。古云小兒勿多服藥。蓋兒質薄弱。臟腑嬌嫩。藥多恐傷真氣。今可停藥。乳哺調之。自然恢復。果如予言。識此爲鄉愚信求神藥者戒。

安波按。神藥貽害。不可勝道。余見病傷寒服籤內人乳斃者兩人。可不戒哉。

黃曙堂翁乃郎頭痛。忽變痙厥。續見兒數證。證皆不治。頭痛久而不愈。名曰頭風。頭風多害眼。方書固已言之矣。尙有一種突變。神迷肢掣。不可救治之證。前賢未經道及。曾見曙翁乃郎。年約十歲。頭痛時發。予因他事過其家。見兒號泣。詢之。翁告之故。出方藥皆辛散之屬。予曰。此由先天不足。木失水涵。風陽上冒。辛散不宜。翁求方。疏歸芍地黃湯付之。翁惑旁言。遂置不服。仍請

原醫看視。以爲前藥尙輕。更增細辛藁本。一夕痛劇而厥。手足瘳瘳。急來延予。予曰。肝風動矣。不可爲也。翁懇拯援。勉用熟地黨參麥冬阿膠炙甘草麻仁棗肉茯神白芍。合復脈湯。參入牡蠣龜版。方諸水介潛之法。不驗。辭之。更醫無功。遷延數日而歿。續見仇姓稚子及方氏女。證同皆不治。推詳病機。證屬頭痛巔疾。下虛上實。治當上病下取。醫昧病原。恣行辛散。以致變幻。其理顯然。凡諸痛厥可治者尙多。惟此證一經神迷。卽莫能救。此其故豈所謂甚則入腎。內奪而厥。則爲瘖痺者與。初集載有鄭氏婦一證。予雖爲治愈。然亦幸也。

安波按。肝風肝厥。髮逆以後。此風盛行。大抵感乎日久。人情矯柔。造作所致。何則。當髮逆熾張時。人且謀食療生之不暇。豈有怒髮冲冠之患乎。

### 家秀翹兄肝鬱痛傷胃氣詳論病機治法

秀兄年逾五旬。向在維揚貿易。患病數月。延醫多人。愈療愈劇。因買舟載歸。望其形容枯槁。行動艱難。診脈弦勁欠柔。詢其病原。據述舊冬少腹痛起。漸次痛連中脘。時作嘔惡。彼時納穀雖減。尙餐爛飯一盂。交春病勢日增。卽啜稀糜亦吐。形羸

肉脫。便秘皮枯。藥餌遍嘗。毫無一效。邇來更加惡聞藥氣。入口卽吐。君將何以教之。予曰。醫之審病。如吏之審案。審案必得其情。審病須明其理。推詳脈證。其病機已了然心目矣。按弦爲肝脈。諸痛屬肝。厥陰之脈。循少腹。究緣平日情懷不適。木鬱失條。少腹因而致痛。然肝爲將軍之官。臟剛性急。醫投辛香溫燥。希圖止痛。肝陰被劫。怒木益橫。衝胃爲嘔。此肝爲受病之源。胃爲傳病之所。醫多藥雜。胃氣益傷。夫胃爲水穀之海。氣血俱多之經。既不安穀。氣血從何生化。膚無血潤則枯槁。腸無血潤則乾燥。陽氣結於上。陰液衰於下。欲走噎途。豈區區草木所能回枯轉澤耶。經云。諸澁枯涸。乾勁皴揭。皆屬於燥。燥者濡之。治法固無難也。無如濡潤之品。恆多凝滯。現今胃氣空虛。嘔吐惡聞藥氣。焉能強進。考古人治血氣兩傷之候。先當益氣。氣爲血之帥也。但益氣藥品殊多。首推人參者。以其能回元氣於無何有之鄉也。再考東垣云。胃中虛熱。穀氣久虛。而爲嘔吐者。但得五穀之陰以和之。則嘔吐自止。不必用藥。謹擇參米飲一方。氣味冲和。諒當合轍。於是每日用人參二錢。陳米水煎。果受不吐。服至匝旬。餐加色轉。再合參乳湯。守服兩月。便濡膚澤而起。如此大證。只此二方。並未別參他味。藥簡功專信矣。



安波按。病久屬虛。故人參能受。不然肝無補法之旨。竟置於無矣。

別駕菽田何公僕婦子癰

吾郡別駕何公。續遷甘肅。眷屬仍居郡城。宅中一僕婦。重身九月。偶患頭痛。醫作外感治。其痛益甚。嘔吐汗淋。至二鼓時。忽神迷肢掣。目吊口噤。乍作乍止。何公少君六吉兄。當晚遣力相召。曉造其宅。六兄告以病危之故。入視。搐搦形狀。診脈虛弦勁急。謂曰。此子癰證也。勢雖危險。幸在初起。當不殞命。六兄曰。昨夕倉皇。恐駕到遲。故近邀女科一看。亦言證屬子癰。然服藥不效。奈何。出方閱之。羚羊角散也。予曰。此乃古方。原屬不謬。不知子癰疾作之由。因子在母腹。陰虛火熾。經脈空疏。精不養神。柔不養筋。而如厥如癰。神魂失守。手足抽掣。其病初頭痛者。即內風欲動之徵也。醫家誤作外風。浪投疎散。致變若此。至羚羊角散。方內惟羚羊角入肝舒筋。當歸棗仁補肝益血。茯神安神。甘草緩急。與證相符。其餘防獨木香杏仁。俱耗真氣。苡仁下胎。多不合宜。豈可以爲古人成方。漫不加察耶。於是仍以本方除去防獨等味。參入熟地沙參麥冬阿膠芝麻。養陰濡液。少佐鉤藤桑寄生。平肝熄風。

頭煎服後。其搐漸平。隨服二煎。搐定頭痛亦減。六兄喜甚。予曰。病來勢暴。今雖暫熄。猶恐復萌。囑再市藥一劑。儘今晚服盡。搐不再作。方許無虞。次日復診。痛搐俱止。神清脈靜。納食不嘔。方除鉤藤寄生。加白芍玉竹女貞石斛。逾月分娩。母子俱得無恙。

安波按。論證一端。總在靈機活潑。隨症變化。不可效尾生之見。至死不悟也。

### 鮑覺生生宮詹病發二次不能復起

宮詹前於乾隆丁未冬。自毘陵抱疾歸。證類噎隔。已瀕於危。予爲治之而愈。嘉慶乙丑。宮詹視學中州。病發召診。又爲治愈。案載初集及輯錄中。道光乙酉秋。宮詹在都。前疾又作。初時尙輕。來書語狀。予輒憂之。慮其年逾花甲。血氣旣衰。非前此少壯可比。未又云。幸得請假南歸。便圖就診。深爲之喜。及至臘底。伊宅報中詳述病情。較前兩次發時更劇。體憊不支。勢甚危篤。令姪子碩兄。亟欲邀予入都診治。予雖老邁。誼不容辭。適迫歲暮。冰雪嚴凝。水陸舟車。都難進發。道阻且長。恐其病不及待。子碩兄躊躇無策。再四相商。只得酌擬一方。專足送去。冀幸得效如前。即

可回籍調治。另函致意。勸令速歸。回書云。手翰再頒。感淪肌髓。妙劑服之。不似昔年之應手。蓋衰憊日久之故。欲歸不得。進退維谷。負我良友。何以爲人。弟之心緒。不可名狀。永別之感。慘割難言。然奄忽而徂。勝于癡狂而活也。專泐敬謝。不能多寫。亦不知結草何時。南望故鄉。惟有悵結。未幾遂卒。悲夫。宮詹自訂年譜未竟。令弟時任乾州。續成之。譜末有云。兄病中嘗語人曰。吾生平患此疾。及今而三矣。丁未乙丑。皆瀕於危。皆賴程杏軒治之而愈。今無杏軒。吾病殆不可爲矣。予閱及此。不禁泫然。

安波按。厥隔等症。較癰瘍尤險。大約倉扁復生。亦無如之何矣。

### 黃就唐表兄脘痛嘔吐危證治驗

就兄體素虛寒。向患腹痛。服溫藥相安。年來痛移上脘。氣逆嘔吐。飲食漸減。丁亥之秋。病發益劇。食全不納。自服理中六君之屬。溫理脾陽未應。形羸氣怯。臥床不起。遣价逆予。診脈胃少弦多。望色青白不澤。自以爲殆。予曰。無妨。治未中肯耳。尊體平素虛寒。原宜溫理。據茲脈證。由於心境欠舒。木鬱不達。厥陰干犯陽明。肝氣

逆橫。胃降失職。仲聖云。厥陰爲病。氣上衝心。心中熱疼。飢不欲食。夫肝爲將軍之官。臟剛性急。脾胃雖俱屬土。然須分別治之。不容僮統而論。葉香巖謂胃司受納。脾主運化。脾宜升則健。胃宜降則和。太陰溼土。得陽始運。陽明燥土。得陰自安。數語實發前人之所未發。觀其食入卽嘔。足見其病在胃。而不在脾。理中六君皆是脾藥。不能治胃。今胃空若谷。必須參力扶持。始克有濟。寒士購參不易。姑思其次。以高麗參代之。乃於六君子湯中。除朮甘之守。加入川椒烏梅乾薑木瓜白芍。另用陳倉米水煎服。藥則辛酸并投。法合制肝安胃。予辭歸。越日就兄專札來云。妙方連服兩劑。痛緩吐止。稍能安穀。頗見效靈。深爲感佩。尙祈加減。照原法略爲出入。守服而痊。次春相晤。郡城饒君揚翁宅中。丰采倍勝於前。安波按。此亦病久胃虛。故麗參能受。然必須參入梅椒瓜等。倣安胃腕。以辛散酸收甘緩三法並濟也。

### 燕雲亭司馬伏暑感證

戊子夏。徽郡蛟水暴漲。橫流泛濫。田廬人畜。到處被湮。歎休尤甚。公奉委往勘。暑



溼煩蒸。感伏膜原。交秋疾作。始而寒熱似瘧。繼則單熱不寒。吾宗思敏翁爲治兩旬。大熱已退。日晡微潮。擬屬邪去正虧。轉爲養陰和胃。越日寒熱又作。以爲感復。輔正驅邪。病狀如故。神形益疲。度其恙久。陰陽兩虛。連投補劑。寒熱總不能止。囑邀予商。予進署時。公寒熱正發。臥榻呻吟。診畢。思翁適至。謂予曰。燕公祖之恙。吾看多次。愈而反復。煩子酌之。予曰。頃診脈象數猶帶弦。熱時口猶作渴。是屬秋時晚發。感證似瘧之候。大局無妨。但恙久正氣固虛。餘波似仍未淨。過補恐其膩邪。過清慮其傷正。酌以輔正劑中。微寓和解之意。邪退而正不傷。斯爲美也。思翁稱善。遂令疏方。藥用首烏人參當歸茯苓甘草料豆衣扁豆殼陳皮半夏糯稻根鬚。引加鮮薑紅棗。另以井河水各半煎。露一宿。明早溫服。後旦再議。屆期復召。詢其家人云。昨服藥後。寒熱未來。夜眠安穩。入室公起坐就診。笑曰。瘧魔已被君驅去矣。復與思翁斟酌加減。不旬日而痊。公善畫山水。有倪迂風。惜墨如金。求之不得。病痊後。親繪一箋贈予。并序其事。

饒君揚翁公郎風溫證治原委

道光戊子冬。郡城饒君揚翁公郎厚卿兄病。初起寒熱頭痛咳嗽。服辛散藥一劑。次日單熱不寒。口渴煩躁。嗽痰帶血。下午突作昏暈。當晚折簡逆予。黎明至郡。見其面目俱赤。舌黃耳聾。噎咳脅痛。汗出而熱不衰。診脈洪大數疾。謂君翁曰。公郎之恙。乃風溫犯肺。邪在上焦。速爲清解。免致蔓延中下。辛散之品。不宜用也。方用料豆甘草桑葉萸皮杏仁桔梗牛蒡子貝母梨皮之屬。詰朝復召。問知夜來熱甚煩譫。咳血甚多。望其面目仍赤。診畢昏暈又作。額汗淋漓。翁甚徬徨。適黃就唐表兄至。予告之曰。此證確屬風溫爲病。但質虧病重。慮難支撐。昨方力薄。故不應效。就兄曰。鄙見亦然。不識當如何用藥。予曰。噫。難言。考風溫名載仲景傷寒論中。但只言脈證及誤治之變。并未出方。叔和以下。亦皆無治法。惟朱奉議創立六方。可謂登壇樹幟。然旣言不可發汗。何萸蒹湯中又用麻黃羌活等藥耶。宋元迄今。名賢代出。所論風溫證治。未有一言折衷。可爲法守者。惟近時休邑汪廣朝先生。所立風溫湯一方。只萸蒹料豆甘草三味。藥簡功專。頗有深意。予治此證。每宗此方。範圍而擴充之。往往獲驗。就兄以爲然。於是照方加入沙參生地丹皮地骨皮知母貝母黃芩。引用蘆根梨汁白蜜。服之大效。診視數次。熱勢漸退。苦寒漸減。轉手

養陰潤肺。調理兩月。幸得保全。是役也。使非君翁信而不疑。就兄推誠贊助。未見其有成功也。予常語人曰。凡起一大證。務須病家能篤信。醫者有主持。旁人不妄議。三者失一。不可爲矣。

饒厚卿兄幼女因熱生風之證治愈并明其理

厚兄病愈。其女三歲。發熱目赤。醫謂證屬因風生熱。投以羌活荊防。目腫如李。眇流如膿。熱甚搐搦。尊公君揚翁。囑予治之。予曰。此因熱生風證也。非清不可。方用生地丹皮山梔生甘草菊花桑葉石決明羚羊角。服之熱退搐定。目腫亦消。君翁疑而問曰。小孫女之病。醫云因風生熱。予云因熱生風。同一風耳。風則當散。何服散劑而病反增。服清劑而病旋愈。此曷故也。予曰。風熱二字。不可概言。須知內外標本之別。因風生熱者。乃外入之風。風勝則熱。遏散其風。而熱自解。所謂火鬱發之。此風爲本。熱爲標也。因熱生風者。乃內出之風。熱勝則風。旋清其熱。而風自熄。所謂熱者寒之。此熱爲本。風爲標也。醫家因風熱二字。義未解明。模稜施治。是以多誤。翁喟然曰。醫患不明理。理明則治病視諸掌矣。

安波按卓論也。

### 又僕人肝風用藥大意

君翁盛紀。年將二旬。暮春之初。始覺頭筋抽痛。旋見口眼歪斜。肢涼脈細。以爲風寒外感。藥投溫散。其病益劇。肢掣頭昏。心悸汗漿。君翁令舁至舍。囑爲診治。按諸風眩掉。皆屬於肝。春深時強木長。水不涵木。陽化內風。乘虛繞絡。凡治風須分內外。外入之風則可散。內出之風散之益助其升騰鼓動之勢。現在左肢痠癢。防變痙厥神迷。議以滋水涵木。和陽熄風。方用炙甘草。黑參。熟地。麥冬。阿膠。芝麻。茯神。棗仁。五味子。牡蠣。小麥。南棗。初服四劑。勢已減輕。更加白芍。當歸。萎蕤。服至廿劑。病瘥。虛猶未復。令製丸藥。數閱月。始得元復如初。

### 許兌兄巖兄尊堂久痢治驗

兌兄尊堂。年將及耄。本質陰虛。時常頭昏。口乾耳鳴。心悸。藥服滋補相安。秋初患痢。後成休息。延至次春。晝夜或十餘行。七八行之不等。每便腹痛後重。糞帶鮮紅。



間見白垢。形疲食少。醫治無效。召診服如平時。予曰。體素陰虧。原宜滋養。但痢久脾虛腸滑。滋藥又非所宜。方倣異功散。加首烏白芍山藥扁豆蓮肉老米。劑內俱用人參數服。痢仍不止。復診告兌兄曰。令堂證屬休息痢疾。病根在大腸曲折之處。諸藥力不能到。即服人參亦皆無益。兌兄云。然則奈何。予曰。非鴉膽子莫能奏效。特此物本草未收。他書亦鮮論及。惟幼幼集成載其功能。名爲至聖丹。予用治此證。頗多獲驗。檢書與閱。兌兄云。據書所言。并先生經驗。自必不謬。第恐此藥性猛。家慈年邁難勝耳。予曰。所慮固是。但每用只三十粒。去殼取仁。不過二三分。且有桂圓肉包裹。兼服補劑。扶持正氣。斷乎無傷。蓋非此莫達病所。病不能除。正反傷矣。如法製服。三日全瘳。是秋其疾復作。家黃洲兄爲治。多日未瘥。復邀同議。予曰。上春曾投鴉膽子見功。何不再用。兌兄仍以高年質虛爲憂。予曰。有病當之。不害。亦三服而愈。兌兄慮疾復萌。商用此味。研入調養丸藥內。冀刈病根。予曰。善。後之圖固妙。然研末入丸。似不合法。更與黃兄斟酌。仍照原製。每以五粒與丸藥和吞服之。兩月。至今三年。其病不發。可見此藥之功效如神。

安波按。久年腸紅亦效。可見醫貴圓通也。

許月隣翁令愛齒衄

月翁令愛患齒衄。藥服生地丹皮赤芍連翹石膏升麻之屬。衄反甚。予於方內除升麻加犀角。一服即止。翁問曰。古人治血證。用犀角地黃湯云。無犀角代以升麻。蓋升麻能引諸藥入陽明也。今服之不效。豈古方不足信與。予曰。朱二允有言。升麻性升。犀角性降。用犀角止血。乃借其下降之氣。清心肝之火。使血下行歸經耳。倘誤用升麻。血隨氣升。不愈湧出不止乎。古方未可盡泥也。翁又問。入陽明清胃熱。藥品尙多。惟犀角與齒衄相宜者。得無齒屬上部。角長於頭。本乎天者。親上之義耶。予曰。不寧惟是。人之上齒屬足陽明。禮云戴角者。無上齒。陽明之血脈。上貫於角。齒衄用之。輒應者。職是故也。

安波按。醫工古方而不知更變。猶一匠人拆舊料起翻房地基。雖合而鬬筭鉤角。總須刀鋸也。

族弟義采血湧欲脫

予僑居巖鎮。距祖居之東溪幾五十里。丁亥春。族弟義案證患吐血。近延予弟春圃門生詠堂酌治。血湧不止。勢欲暈脫。專价星夜逆予。至見病者仰靠於床。氣息奄奄。自云臍下熱氣上衝。血即湧出。切脈虛大不斂。顧謂弟與生曰。此水火失濟之候也。經云水爲陰。火爲陽。夫人身之陰陽相抱而不脫。是以百年有常。故陽欲上脫。陰下吸之。不能脫也。今陽但上越。陰不下吸。恐蹈危機。所服皆滋納之品。藥病相當。其所以不驗者。病重藥輕故耳。方定大劑兩儀煎。合生脈散。更加龜版懷牛膝白芍茯苓山藥童便阿膠之屬。服後血雖不湧。脈猶未斂。予曰。慎之防復吐。上午因親屬問病。應答煩勞。血又上湧。神思飄蕩。幾欲脫去。忙照原方熟地由一兩增至二兩。再加磁石。吸引腎氣歸原。另煮團魚湯煎藥。蓋治真陽之飛越。不以龜鼈之類引之。下伏不能也。如言飲藥。血旋止。日晡又因家人嘈雜。血復溢出。雖不若前之甚。亦覺難支。思血屬陰。喜靜。動則陽化。故越出上竅。令其閉戶屏煩。如此兩晝夜。始得脈斂神安。血止不吐。仍守前法調治。月餘而瘳。

安波按。方論並妙。

何少君令政傳尸蟲異附載歷見諸證并詳治法

何別駕少君六吉兄。召視令政病。診之曰。此瘵證也。危期甚速。可勿藥。憶別駕公如君。前亦患此疾而歿。因謂六兄曰。令政病狀。顯屬傳尸。此證五內有蟲。人將歿。蟲先出。迭相傳染。爲害最烈。慎防之。六兄曰。吾亦疑及此。據內子云。家庶母病篤時。伊坐榻旁。見帳中一物飛出。攢入伊鼻。自此得病。予曰。是矣。六兄求杜患之策。令研獾肝末。每人日服錢許。思蟲由鼻入。當以法禦之。囑撚紙毬外裹雄黃。入病人房。以此塞鼻。倘見蟲出。卽鉗置火中煉之。一夕六兄入房。突有物飛集於頭。似覺蜿蜒多足。驚撥墮地而沒。秉燭四照。瞥見其物潛伏几下。蠢蠢然。急呼家人持鉗夾住。視形如蝶。翅翼生毛。毛色雜花。投諸火。唧唧如鼠聲。六兄有妹。時又病劇。越日令政逝。有隣媼來慰。順至伊妹房中問疾。歸家脫衣。陡見一蟲綴其裾。媼亦如法煉斃。伊妹殂後。患遂絕。

曩見方理豐翁宅中。始而妻死於是。繼而媳死於是。後弟媳又死於是。一歲之中。同病而死者三人。次春皆續絃。未幾長子死焉。翁娶繼室。質偉體堅。自以爲無患。不數月而病矣。其前妻之女。年已及笄。侍繼母湯藥。忽見病人鼻內有物。蠕蠕而出。心異之。其物飛撲女面。倏不見。繼室殂。女疾作。未百日亦殞。一歲之中。又同病。



而死者三人。傳尸之禍。可勝言哉。

又許玉生翁。有女四人。先是二三兩女。俱患此證。相繼而夭。居無何。四女又病。予謂之曰。此證有蟲傳染。三傳乃靈。符藥莫制。宜設法以杜後患。翁因將長女遠送戚家。病女移於後院。家人日服獺肝。女歿。患幸泯。但三病臨危。俱未覩有蟲出。或能變化。而人莫之見與。

愚按。傳尸乃虛勞中另自一種。虛勞無蟲。傳尸有蟲。虛勞不傳染。傳尸傳染。但此病與虛勞形狀彷彿。卒難識認。而治之之法。諸說不同。務將證治辨明。則臨病庶有主持。亦醫家之不可不講也。請先以證言之。稽求古訓。如蘇游之說。道藏之言。不爲不詳。然後人謂其類於不經。流於妄誕。似難取信。夫傳尸之異在於蟲。但其蟲須俟人之疾篤而後見。不比別病之蟲。可先從吐從便而見也。紫庭方用乳香熏病人手背。有毛出者。爲傳尸。法雖未試。然恐不驗。又燒安息香煙。令病人吸之。嗽不止者。爲傳尸。不嗽者非也。此說亦不足憑。凡虛勞多嗽。嗽最畏煙。斷無吸之不嗽之理。惟喻氏謂狐惑聲啞。嘔。勞瘵亦聲啞。嘔。是則聲啞者。氣管爲蟲所蝕明矣。斯言可爲此證之一驗。愚於此更有一得焉。如一家之

中。先有患虛勞而歿。未幾又一人所患證同。不問前病之見蟲有無。後病之聲啞與否。即可斷爲傳尸。蓋尋常虛勞不傳染也。至於治法。肘後有癩肝散。治冷勞鬼疰。一門相染。青囊有取蟲用啄木鳥法。喻氏又謂虛勞熱久。蒸其所瘥之血。化而爲蟲。遂成傳尸。療證癩肝散。非不可以殺蟲。而未可以行血去瘥。仲景所製大黃蜜蟲丸。及授陳大夫之百勞丸。驅舊生新。誠有一無二之聖法。愚考二方。金匱原文。只言治五勞七傷。內有乾血。并未云治傳尸。喻氏從金匱敘虛勞於血痺之下。悟入。以爲血痺則瘥。瘥則生蟲。非具過人之識。不能若是。然則蜜蟲丸。百勞丸。可滌蟲之原。癩肝散。青囊藥。可除蟲之害。證有辨之之法。蟲有治之之方。傳尸之候。或有可生。然須及早圖之。若待其勢已成。噬臍何及。安波按。喻氏瘥化爲蟲。實闡前人之秘。

### 汪紹由翁尊堂脫證救甦

戊子之春。予由旌邑至孫村汪生德輝家。伊族紹由翁尊堂病劇延診。比至。已治木矣。入見病者色白如鹽。切脈弦勁少胃。予曰。此脫證也。何以至此。翁述病原云。

家慈年近古稀。體虛多鬱。向患氣痛。服辛香之品稍快。舊夏病目。眼科療治。其目已盲。今春又因痰嗽。藥如二陳枳桔杏仁蘇子。服經多日。前夕忽心慌暈汗。至今不止。畏食懶言。出所服諸方。予閱之曰。病傷猶可治。藥傷最難醫。今脫機甚速。駟馬追之。尙恐不及。奈何。翁懇舉方。商以兩儀煎合生脈散。每劑擬用人參三錢。熟地八錢。翁云。家慈因患氣痛。補劑向不敢嘗。分兩過重。慮其不受。請小試之。如何。予曰。亦可。但大廈搖搖。一木恐難支耳。姑用人參一錢。熟地三錢。麥冬一錢五分。五味子五分。予下榻汪生宅中。次早翁郎岷山兄來云。家祖母昨夕服妙藥後。安睡片時。汗斂暈定。略啜稀粥。稍能言語。幸已獲效。乞求復診。予曰。子歸先煎人參二錢。熟地五錢。備用。往察脈證。頗有起色。仍守原方。續做千金復脈湯。以救陰液。再加茯神歸芍牡蠣女貞石斛。柔肝養胃。漸次而痊。

汪商彝翁夫人風寒襲絡之證

商翁夫人。本質虛寒。常多疾病。舊春曾爲診治。藥投溫補有效。今春因乃郎心疾。晝夜看守辛勞。風寒之邪。乘虛襲絡。比時不覺。漸致頸脊痠痛。喜煖畏寒。欲人揉

打糾纏兩月。醫用羌獨防風以驅風。香砂陳皮以理氣。屢服不應。季夏予至孫村。延診。謂曰。此風寒襲絡之證也。夫初痛在經。久痛在絡。經主氣。絡主血。考督脈竝於脊裏。至風府入屬於腦。素問云。痛者寒氣多也。寒則泣而不流。溫則消而去之。大法治風先治血。血行風自滅。理當養血爲君。佐以溫通脈絡。非驅風理氣所能治也。方定當歸枸杞杜仲巴戟天附子鹿角膠霜狗脊五加皮秦艽桑枝四劑全愈。

安波按。此內風症也。名以風寒襲絡。似屬不切。不然前醫驅風已效靈矣。

### 予久患腹痛忽下瘀血而痊

予患腹痛多年。由午餐飯冷強食而起。痛處在臍之上。痛時腹冷。掌按熱熨稍瘥。雖盛暑亦必以帛護其腹。飲食漸減。喜煖畏涼。他物食尙相安。惟飯蒸煮未透。或稍冷食則必痛。素嗜瓜果。得疾後不敢嘗。向患痔紅。食薑蒜燒酒卽發。故忌之。此疾作時。食入阻滯。飲燒酒一二杯。反覺通暢。不但薑蒜不忌。卽食椒末辣醬均與痔紅無礙。經云。痛者寒氣多也。證屬寒凝氣滯無疑。予素畏藥。痛發無何。香砂薑



黃陳半穀芽神麴之類。服一兩劑即罷去。往歲發疎尙輕。惟餐飯不能如常。年來發頻且重。不拘何物。餐後必痛。須食下行。其痛方止。於是餐後不敢坐臥。乃學古人養生。食後行百步。常宜手摩腹之法。竝遵釋教過午戒食。然亦無益於病。遂視食爲畏途。無如疾經多載。消恐耗元。補防助壅。躊躇無策。友人謂予年近古稀。命陽衰弱。寒從內生。是以喜煖畏涼。釜底無火。物終不熟。是以穀食難化。須用八味丸補火生土。所論固是。予意終未坦然。思痛苦在鬲。慮其妨食成噎。今幸在腹。當不害命。藥餌亂投。恐反有傷。恪守不藥得中醫之誠。己丑季夏。旌邑孫村汪宅延診。下榻塾中。時二鼓既寢。急欲大便。燈滅暗中摸索。跌仆莫能掙扎。大孔汨汨遺出如瀉水狀。呼僕持火至。扶起視地皆污。色如漆。汗淋氣墜。卽忙就枕。汪宅獻楠志仁二公聞之馳至。殊爲着驚。予曰無妨。此因久痛蓄瘀。刻瘀下脫。未免傷氣耳。飲黨參桂圓湯。少頃氣稍續。汗亦斂。次早登廁。猶有餘瘀。予恐其瘀復脫。遄歸到家更衣。瘀已無矣。自此腹不再痛。餐飯如常。細求其故。究由瘀凝腸胃。阻其傳導之機。以故食入則痛。夫血猶水也。血之結而爲瘀。亦如水之結而爲冰。所以痛處常冷。按熨飲醇熱氣至。故覺稍快。至於瘀蓄年久。膠固已深。一旦傾囊自出。理殊

不解。得無長夏炎蒸。奔馳煩勞。動則陽化。如雪消而春水來耶。從斯悟入。書稱久痛在絡。絡主血。不獨肢體之痛爲在絡。卽胸腹之痛。痞積之痛。皆爲在絡。皆宜治血。無徒從事於氣。又如噎隔一證。方書雖有胃脘枯槁。及陽氣結於上。陰液衰於下等語。然由瘀血阻塞胃口者恆多。進而思之。予疾將十年。固未能自知瘀蓄於先。然不藥穩持。尙不失爲中駟。不然補瀉雜投。不殞於病。而殞於藥矣。予見敗壞之證。自萎者十之二三。藥傷者十之七八。藥本生人。而反殺人。可不懼哉。自今以往。伏願醫家證未審明。勿輕用藥。病家疾如可待。勿急求醫。如此或亦可爲衛生之一助耳。

安波曰。初痛在經。久痛入絡。二語。葉氏實發前人數千年之未發。啓後學於億萬載之無窮。然不獨胃病噎隔之症。渾融使然也。凡病久根深蒂固。綜須治血爲主。此卽古人窮必及腎之意也夫。

## 程杏軒醫案續錄終



# 程杏軒醫案輯錄序

嘉慶九年。歲在閏逢困敦。先生既成醫案初集一編。壽諸世矣。原版不戒於火。其續錄尙藏巾笥中。今年春。又成醫述十六卷。集諸家之大成。垂不刊之定論。誠醫宗之成軌也。既乃合醫案前後集付剞劂氏。而先生行踪所至。與凡所施治。隨筆劄記。及榜等錄存者。歷時既久。積而盈帙。先生以出於一時論列。詳略或殊。始末未備。不欲付梓。榜等竊以近世葉氏一家。亦臨證筆記。然惜其辭多簡括。而義少發明。若先生斯編。證必求其本。治必折其衷。發聾覺瞶。引示迷津。實有前賢屐齒所未及者。昔史遷傳太倉公。論證論治。辭繁不殺。幾及三十條。豈不以活人指南。端在是乎。乃敦請於先生。排次而梓行之。因并附記數語於其後云。

昔



道光九年歲在屠維赤奮若陽月上澣門人倪榜許樸小門人許俊洪鼎彝汪有容葉光煦鄭立傳等謹識

# 程杏軒醫案輯錄目錄

慶敬齋方伯耳鳴	一
又公子痘證	二
齊方伯脅痛	三
福方伯哮喘	三
台靜亭州尊陰陽兩虧傷及奇經	四
長中堂病機治法	五
馬朗山制軍公子中寒陽脫急救不及	五
溫景僑制軍飲傷脾胃商善後之策	六
周都憲咳久醫誤治用溫肺滌邪	七
方耒青制軍便瀉洩數	八
曾賓谷中丞痢疾	八
張觀察如夫人經期不調	九

龔闇齋觀察令媳療證·····	一〇
吳春麓儀曹不寐眩暈·····	一一
又少君水火失濟之證·····	一三
胡觀察疝證·····	一三
郭松厓郡侯瘧疾·····	一四
鮑蒔春部曹尊堂血枯久傷奇經·····	一五
周司馬痲風病後足膝軟弱·····	一五
王明府夫人積聚久痛·····	一六
沈虹橋廣文疫證·····	一七
洪廣文少君損過脾胃·····	一七
鮑覺生宮詹精氣內虧詳敘證治次第·····	一八
殷仲周先生筋攣便濁·····	二一
張佩韋先生肝腎兩虧證治·····	二二
家近陶翁肝陽逆肺咳嗽加感風溫標本異治·····	二二

汪舜廣翁令愛水腫·····	二三
方芷南茂才夫人產後心脾兩虧之證·····	二四
鮑禹京翁夫人厥證治法節略·····	二五
張仲箎翁息貫喘嗽·····	二九
方竹坪翁頭痛·····	三〇
洪竝鋒翁脾陽虛寒溼內伏重用溫補治法·····	三〇
洪庭光兄肝風眩暈證類粹中·····	三一
葉振標翁證患似隔非隔·····	三二
洪星門翁吐血·····	三三
龔西崖兄咳血·····	三四
吳曜泉翁乃媳瘰癧變幻證治之奇·····	三五
葉震先兄肝風眩暈·····	三六
吳雙翹兄幼女目疾·····	三七
汪式如兄陰暑感證轉爲癰瘡前後治法不同·····	三八



又乃嫂喉痛清藥過劑變證·····	四〇
又患伏暑危證拯治原委·····	四一
吳婦血崩·····	四三
許婦內傷經閉辨明非孕·····	四五
汪孚占翁乃孫暑風驚證反復治法·····	四六
黃禹功兄陰虛咳血誤服陽藥致害·····	四八
方侶豐兄挾虛傷寒誤治致變壞病·····	四九
謝翁證治并答所問·····	五〇
饒君揚翁脾虛瀉血肺燥咳嗽證治異歧·····	五一
方女慢驚·····	五四
某嫗本病風痺加感暑邪·····	五四
胡某令郎痲後頸生瘰癧籌治三法·····	五五
家若谷兄乃郎脅痛·····	五六
梅氏女嘔吐經閉·····	五七

葉某喉痛·····	五八
朱百春兄令燾半產崩暈寒熱似瘧·····	五九
王氏婦妊娠二便閉塞·····	六一
李某鼻淵孔潰·····	六二
王某背瘍潰後餘毒未淨·····	六二
王錫章肺腎虛喘畏補致脫·····	六三
吳媪肺痺·····	六四
施婦感證·····	六六
江婦崩證·····	六七
江氏子足痺誤治成廢·····	六八
葉翰周世姪感證反復狀類內傷·····	六九

程杏軒醫案輯錄 目錄

# 程杏軒醫案輯錄

新安 杏軒程文囿觀泉甫著

山陰 安波陳光壽評

鄞縣 曹赤電炳章圈點

## 慶敬齋方伯耳鳴

經言腎氣通於耳。故人至中年以後。腎氣漸衰。每多耳鳴之患。喻氏論之甚晰。然不獨肝腎之陰氣上逆。必兼挾有內風乘虛上升。夫風善入孔竅。試觀簾櫳稍疎。風即透入。人之清竅。本屬空虛。是以外感風邪。其息即鳴。韓昌黎云。草木之無聲。風撓之鳴。水之無聲。風蕩之鳴。凡物之鳴。由於不得其平。人身之陰失其平。陽失其秘。化風盤旋。上干清竅。汨汨之聲。晝夜不息。其義亦然。議與潛陽熄風。靜以制動之治。

安波按。耳爲腎之主竅。心膽寄附。是以體虛失聰。心腎同責。案內簾櫳稍疏。風



即透入之句。真是精議卓識。

又公子痘證

見點九朝成漿之期。孩提先天稟薄。痘形陷伏。根脚不齊。漿清色白。便澹食少。嗜臥無神。一派氣血虛寒之象。亟亟溫補內托。尙有生機。醫猶以爲肌熱未退。火毒未清。藥仍清解。誤之甚矣。夫痘證發熱。此其正候。蓋不熱則表不能透。標不能長。漿不能蒸。靨不能結。故痘證始終無不賴此熱力爲之主持。若欲盡攻其熱。不顧戕損其元。元氣受傷。安能送毒歸窠。苗而不秀。能成實者鮮矣。外科論癰疽。謂有膿則生。無膿則死。痘證亦然。又傷寒有養汗之法。痘證有養漿之法。傷寒須七朝以前。邪氣未傳。尙可養得汗來。痘證須七朝以前。逆證未見。尙可養得漿來。尙至七朝以外。生氣已離。再思養漿。亦猶傷寒邪氣已傳。再思養汗。其可得乎。無膿癢塌。勢所必至。十二險關。慮有風波。勉議保元湯。合參歸鹿茸一法。冀其堆沙發臭。或可倣倖圖成。

安波按。近時痘醫。輒以辛涼解毒。苦寒退熱。往往致成敗證。束手無策。良可嘆

也。

### 齊方伯脅痛

肝者將軍之官。謀慮出焉。情志不舒。木鬱爲病。據論恙起數年。左季脅下不時作痛。飲食入胃。其氣常注於左。不行於右。經言左右者。陰陽之道路也。肝位居左。其氣常行於右。脾位居右。其氣常行於左。左升右降。如環無端。今氣偏注一隅。豈非升降失司。肝脾不和之所使然。目前雖無大患。竊恐肝病日久。土困木橫。衝胃爲嘔。攻脾爲脹。可不早爲曲突徙薪之計乎。

### 福方伯哮喘

哮喘多年。原屬錮疾。往歲舉發尙輕。此番發劇。胸滿喘促。呼吸欠利。夜臥不堪。着枕。藥投溫通苦降。閉開喘定。吐出稠痰而後卽安。思病之頻發。膈間必有窠囊。痰飲日聚其中。盈科後進。肺爲華蓋。位處上焦。司清肅之職。痰氣上逆。阻肺之降。是以喘閉不通。務將所聚之痰。傾囊吐出。膈間空曠。始得安堵。無如窠囊之痰。如蜂

子之穴於房中。蓮子之嵌於蓬內。生長則易。剝落則難。不刈其根。患何由杜。考金匱分外飲治脾。內飲治腎。且曰。飲邪當以溫藥和之。議以早服腎氣丸。溫通腎陽。使飲邪不致上泛。晚用六君。變湯爲散。默健坤元。冀其土能生金。兼可制水。夫痰即津液所化。使脾腎得強。則日入之飲食。但生津液而不生痰。痰既不生。疾自不作。上工治病。須求其本。平常守服丸散。疾發間用煎劑搜逐。譬諸宵小潛伏里閭。乘其行動犯竊。易於拘執。勦撫並行。漸可杜患。

△口靜亭州尊陰陽兩虧傷及奇經

復診寒熱依然。神采更倦。前方初服。微見痰紅。疑係附子溫燥所致。續服五劑。紅不再吐。口井不渴。仲聖云。身大熱而反近衣者。熱在皮膚。寒在骨髓也。且越人明以陽維爲病。苦寒熱爲訓。豈寒慄如此。經年累月。憔悴不堪。不從溫補。尙有何策可施耶。王太僕云。熱之不熱。是無火也。益火之原。以消陰翳。旨可悟矣。雖內經有諸禁鼓慄。如喪神守。皆屬於火之言。丹溪有治用清涼之案。然與此似乎不合。無如補虛門中。歸脾十全補元煎。養營湯之屬。均已服過。即治奇經之鹿茸河車。亦

無應驗。殊爲棘手。但細詳脈證。總不外乎陰陽精氣兩虧。張介賓所謂以精氣分陰陽。則陰陽不可離。以寒熱分陰陽。則陰陽不可混。古人復起。不易斯言。

### 長中堂主病機治法

經云。陰陽者。萬物之能始也。水爲陰。火爲陽。是病機雖繁。可一言以蔽之曰。陰陽而已。試觀天有四時。以生寒暑燥濕風。人有五臟。以生喜怒悲憂恐。五臟所患不同。要不外乎心腎。此陰陽窟宅。水火根基。恙緣夙夜煩勞。心腎不交。水火失濟。夫營衛二氣。行陽則寤。行陰則寐。若衛氣不得入陰。則但寤而無寐矣。醫用補心丹。養心湯。安神定志。未爲不善。要知心爲虛靈之臟。草木無情。非假物類之靈以引之。焉能望效。擬以純甘加入龜版虎睛龍齒琥珀珍珠。諒當有應。

安波按。此議誠言人所未言。擬再參入磁石。取其黑色通腎。上交於心。靈情活潑。上應虛靈之臟。未識與先生合拍否。

### 馬朗山制軍公子中寒陽脫急救不及



診脈沉伏模糊。證見肢厥聲嘶。口鼻氣冷。人事迷惑。處由真元內戕。陰寒直中。陽氣外脫。勢屬危殆。內經以陽氣者。若天與日。今則沍寒凝泣。陰霾用事。使非重陽見睨。何以復其散失之元乎。夫人身之真陽。譬之鰲山走馬燈。拜舞飛走。無一不具。其間惟是一點火耳。火旺則動速。火微則動緩。火熄則寂然不動。而拜舞飛走之軀殼。未嘗不存也。方用參附二味。重加分兩。晝夜頻進。本草言人參能回元氣。於無何有之鄉。附子爲斬關奪門之將。潭底日紅。陰怪滅。分陽未盡。則不死。但脈證敗壞如斯。欲圖斷鰲立極之功。亦難之難矣。

安波按。此症亡陽也。急用附片墊氣海。關元灸數百壯。或可挽。

### 溫景僑制軍飲傷脾胃商善後之策

脈沉細緩。外腴內虛。飲多穀少。恙經三載。發時脘痞噯噫。小便欠利。年來戒飲。其疾雖平。然精神起居。未能如昔。飲食稍有失調。脘中猶覺不快。慮其病根復萌。商圖善後之策。此不治已病而治未病也。夫脾胃清和。始能生化氣血。酒者熟穀之液。其氣慄悍。入於胃中。則胃脹氣上逆。滿於胸中。故致患若此。今病雖愈。而倉廩

之官。未得驟反清和之舊。計惟調養脾胃。以資運化。考古治病。有煎膏丸散之別。心肺病在上焦。宜用煎膏。肝腎病在下焦。宜用丸。脾胃病在中焦。宜用散。審其致疾之因。投藥自中肯矣。

### 周都憲咳久醫誤治用溫肺滌邪

岐伯雖言五臟六腑。皆令人咳。然其所重。全在於肺。蓋皮毛者。肺之合也。皮毛先受邪氣。邪氣以從。其合其寒。飲食入胃。從胃脈上至於肺。則肺寒。肺寒則內外合。邪因而客之。則爲肺咳。是咳之不離乎肺。猶瘡之不離乎少陽。據論病緣夏熱。曉起感冒涼風。更兼飲冷。始而微咳。漸至咳甚。服藥月餘。咳仍不已。經云。形寒飲冷則傷肺。此致病之大端。醫者只知天時之氣熱。不察人身之臟寒。頻投滋潤。希冀清火止咳。適燕指南。無怪藥愈服而咳愈頻也。蓋肺爲嬌臟。性雖畏熱。然尤畏寒。金被火刑。固爲咳。金寒水冷。亦爲咳。五行之理。生中有剋。剋中有生。金固生水者也。然金寒則水冷。使非火剋金。則金不能生水矣。譬諸水冰地坼。猶以霜雪壓之。其能堪乎。診脈沉細。口不乾渴。時當盛暑。背猶怯風。使非溫中滌邪。何以春回暘

谷。倘再因循貽誤。寒邪不解。久咳肺傷。更難爲計。擬溫肺湯一法。安波按。咳嗽一症。治之最難。昔徐靈胎醫究三十年。始能治嗽。難怪庸流一見咳症。就以沙參麥冬從事。貽害良深。可歎可恨。

方耒青制軍便瀉洩數

經云。中氣不足。溲便爲變。人之二便。全藉中氣爲之轉輸。故不失其常度。腎氣虛則關門不固。脾氣虛則倉廩失藏。便瀉洩數之病生焉。方定補中益氣湯。升舉脾元。四神丸固攝腎氣。二藥合投。並行不悖。加枸兔佐菟萸之功。增蓮芡輔參朮之力。方則脾腎分施。病則溲便並治矣。

安波按。腎開竅於二陰。腎氣虛則失其司。脾氣弱則運失其旋。故以脾腎雙補治。然此公大約多年。或久瀉洩數。如新瀉溺短。則大相徑庭矣。

曾賓谷中丞痢疾

痢疾古名滯下。然此滯字。非單指飲食停滯之謂。言其暑濕內侵。腑氣阻遏而爲

滯耳。長夏感受暑邪。伏於腸胃。新秋患痢。腹痛後重。赤白稠粘。日夜頻次。考古賢治痢。不外通澁兩法。大都初痢宜通。久痢宜澁。夫暑濕邪熱。客於營衛。則生瘡癰。入於腸胃。則爲瀉痢。痢之紅白。如癰之膿血。膿血不淨。癰不收。紅白不淨。痢不止。證在初起。治貴乎通。經曰。通因通用。然此通字。亦非專指攻下之謂。言其氣機流行而無壅滯。乃爲通耳。丹溪以河間發明滯下證治。和血則便膿自愈。調氣則後重自除。二語實盲者之日月。聾者之雷霆。特其方法。每用芩連檳枳。苦寒攻伐。藜蘆洵屬合宜。膏粱恐難勝任。敝郡汪氏蘊谷書稱。痢疾卽時疫。濁邪中下。名曰滯。亦雜氣之所乘。故多傳染於人。其自定黃金湯一方。藥雖平淡無奇。然於逐邪解毒之義。頗爲切當。穀食不減。胃氣尙強。約期二候。可以奏功。

安波按。黃金湯者。用黃土金銀花扁豆肉扁豆花茯苓穀芽黑豆甘草生白芍五穀蟲生薑也。余治噤口痢甚效。已驗之數人矣。

### 張觀察如夫人經期不調

先天稟薄。情志欠舒。心脾抑鬱。診脈細澹。細爲氣少。澹主血虛。問寢食如常。惟月



事失調。每值經期。洒淅寒熱。腰脊痠疼。按衝爲血海。任主胞胎。二脈交通。乃能有子。脈證若此。卽無他患。恐難孕育。間進加味歸脾湯。調養心脾。血氣之源。常服毓麟珠。補益衝任。陰陽和協。衝任調勻。則合浦珠還。藍田玉茁。可預必也。

安波按。衝脈爲經水之本。故內經言太衝脈盛。則月事以時下。茲以毓麟珠等藥。以補益衝任。正合其旨。

龔闇齋觀察令媳瘵證

軒岐論五鬱。首究乎肝。肝主春生之氣。春氣不生。則長養收藏之令息矣。而欲其無災害者幾希。夫病端雖始於肝。久則滋蔓他臟。膚淺見血投涼。因咳治肺者。固無足論。卽知求本而不審諸陰陽消長之理。依然隔膜。所謂補陰補陽。義各有二。芩連知柏。有形之水也。麥味地黃。無形之水也。以無形之水。制無形之火。如盞中加油。其燈自明。乾薑桂附。溫烈之溫也。參耆甘草。溫存之溫也。以溫存之溫。煦虛無之氣。如爐中覆灰。其火不熄。日內咳頻。痰猶帶血。似須先投甘寒以降火。未可驟用參耆以補陽耳。醫貫云。凡人肺金之氣。夜臥則歸藏於腎水之中。腎水乾

枯。無可容之地。故復上逆而爲患矣。病始不得隱曲。漸至不月。風消喘咳息貴。莫能正偃。所以然者。雖云火熾之相煎。實由水虧之莫濟。夫火空則發。使非填實其空。炎焰何能斂納。王太僕云。益心之陽。寒亦通行。強腎之陰。熱之猶可。誠見道之論。昨論便溏。多恐脾元下陷。夜來便圓數次。煩熱少寐。夫土爲物母。心肝肺腎。若四子焉。子虛尙可仰給母氣。苟土母傾頽。中無砥柱矣。古人論脾肺兩虧之證。最難措置。方欲培土強脾。恐燥劑有妨於陰液。方欲濡燥生津。恐潤劑有礙於中州。惟上嗽熱而下不便溏。下便溏而上不嗽熱者。方好施治耳。今日用藥。當以扶脾爲急。昔士材先生治虛癆。嘗云。今日肺病。多保肺藥中兼佐扶脾。明日脾病。多扶脾藥中兼保肺。亦因時制宜法也。但臟真損傷已極。藥餌恐難圖成。

### 吳春麓儀曹不寐眩暈

經曰。水火者。陰陽之徵兆也。腎爲坎卦。一陽居二陰之間。故須陰得其平。然後陽藏於密。童年知識已開。陰精早洩。此致病之大端。及壯。血氣方剛。尙不覺其所苦。人四十而陰氣自半。起居日衰。精神不充。蟬聯疾作。診脈尺虛細澹。寸關大於平。

時。按尺爲腎部。脈見細瀋。腎虛奚疑。寸關大於平時。陰弱陽浮之象耳。夫醫之治病。不以用補爲難。而以分別水火氣血爲難。馮氏書云。小病治氣血。大病治水火。蓋氣血者。後天有形之陰陽也。水火者。先天無形之陰陽也。太極之理。無形而生有形。是治大病。可不以水火爲首重耶。請以不寐言之。人知其爲心病。而不知其爲腎病也。心雖爲神舍。而坎離尤貴交通。越人以陽不入陰。令人不寐。豈非水火未濟。坎離失交之故乎。內經又有頭痛顛疾。下虛上實。過在足少陰巨陽之語。形容厥暈。病機最切。方書稱風稱火。稱痰。漫無定見。景岳師其意。以爲無虛不作眩。治當上病療下。滋苗灌根。精矣。精矣。暫服煎劑。再訂丸方。王道無近功。內觀頤養爲要。舊患眩暈。怔忡不寐。遺洩。本屬心腎兩虧。水火失濟。曾訂煎丸。服經十載。茲診脈候平和。精神矍鑠。此亦頤養之功。非全關草木之力也。惟食多尙難運化。腰脊時痛。遺洩間或有之。藥物所需。仍不可缺。考古人用藥。有攻病保躬兩途。攻病則或涼或熱。當取其偏。保躬則適其寒溫。宜用其平。蓋溫多恐助相火。精關不藏。潤多慮傷脾陽。坤元失健。如云食蜜。便即溏瀉。脾虛不勝潤滑之徵。青娥丸固能治腎虛腰痛。但故紙胡桃味辛性溫。久而增氣。恐其助火。且常服丸藥。亦須分

別氣候。夏令炎熱。遠剛近柔。以防金水之傷。冬令嚴寒。遠柔近剛。以遂就溫之意。將交夏至。一陰初復。元精不足之時。商以益陰保金。兼調脾胃。秋季再為斟酌。

### 又少君水火失濟之證

水火之道。宜交而不宜分。水上火下。名曰交。交為既濟。不交為未濟。由是觀之。水火之切於人身者大矣。據脈與證。處由腎元下虧。水火失濟。以致魄汗淋漓。玉關滑洩。腰為腎府。腎虛則腰脊多疼。心為神舍。心虛則夜臥欠逸。面赤頸熱。虛陽上炎。體倦頭傾。髓海不足。且金乃生水之源。肺腎為子母之臟。子虛盜竊母氣。此喘欬之所由。腎開竅於二陰。心與小腸相表裏。心熱移於小腸。此血淋之所自。昔肥今瘦。虛里跳動。種種見證。虛象奚疑。不知持滿御神。日啖草木無益。積精自剛。積氣自衛。積神自旺。酸以收之。介以潛之。厚味以填之。水火交。精神治矣。安波按。廣成子云。無勞爾形。無搖爾精之言。誠為養身吃緊良方。而世人一至有疾。徒以草木從事。其先天不自攝。恣意斲伐。忍心剋剝。可歎可悲。

### 胡觀察疝證



經云。任脈爲病。男子內結七疝。督脈爲病。不得前後爲衝疝。是疝病雖屬於肝。而實衝任督三脈所生。據證畢腫。少腹形堅痛甚。攻衝腰俞。病根深遠。愈發愈劇。考任脈起於中極之下。上毛際循腹裏。衝脈起于氣街。督脈統督諸脈。而爲奇經之長。葉氏云。大凡衝氣從背而上者。係督脈主病。治在少陰。從腹而上者。係衝任主病。治在厥陰。揣諸病情。確爲奇經受病無疑。醫不中肯。是以藥治無功。

郭松厓郡侯瘧疾

瘧雖小病。而內經論之最詳。首稱夏傷於暑。藏於皮膚之內。腸胃之外。因得秋氣。汗出遇風。內外相薄。是以日作。可知瘧病由於暑風相薄而成。然暑必兼溼。若無溼。但爲乾熱。非暑也。卽此推之。瘧病雖屬暑風相薄而成。又必挾有溼邪醞釀之所致矣。特六淫分配四時。暑之與溼氣雖異。而因則同。有可分不可分之義也。今歲太陰司天。溼土主事。其變驟注。其災霖潰。人在氣交之中。感而卽病者。爲霍亂吐瀉。腫滿諸候。其不卽病。邪伏膜原。內趨大腸則爲痢。外走少陽則爲瘧。故瘧之寒熱往來。亦猶痢之赤白膠粘耳。恙逾匝旬。瘧經五發。胸腹飽悶。嘔惡不渴。脈沉

弦緩顯係溼鬱中焦。腑陽失運。幸得從樞外達。不至滯下疸滿。邪淨自瘳。無煩過慮。

### 鮑時春部曹尊堂血枯久傷奇經

產育多胎。衝任受虧。兼之自乳。陰血更耗。恙經年遠。腰脊刺痛。轉側維艱。小便血淋。痛引少腹。揣摩其故。非特血氣之傷。而且奇經亦損。故歸地養陰。參耆益氣。均無靈效。衝脈起於氣街。任脈起於中極之下。淋痛諸候。必有所關。卽寒熱一端。亦陽維爲病耳。病由血海空虛。損及奇經八脈。尋常藥餌。諒難奏功。宗內經血枯。治以四烏鰂骨一蘆茹丸。

安波按。古言病久入八脈。

### 周司馬痺風病後足膝輭弱

前患痺風。調治小愈。案牘勞形。元虛未復。腰脊雖能轉側。足膝尙覺輭弱。肝腎真元下虧。八脈不司約束。參耆歸地。僅可益其氣血。未能通及八脈。古人治奇經精

髓之傷。僉用血肉有情。豈諸草木根莖。可同日而語。推之腰爲腎府。膝爲筋府。轉搖不能。行則振掉。不求自強功夫。恐難彌縫其闕。恬澹虛無。御神持滿。庶幾松柏之姿。老而益勁也。

擬河車、鹿茸、虎脛骨、虎膝骨、牛骨髓、猪骨髓、羊骨髓、阿膠、海參之屬。

### 王明府夫人積聚久痛

脈弱質虧。操持多勞。昔年產後。少腹起有痞塊。不時作痛。邇來痛於早晨。日日如是。經云。任脈起於中極之下。循腹裏。任之爲病。其內若結。男子七疝。女子瘕聚。再考古人論積聚。分癥瘕兩端。癥者徵也。有塊可徵。其病在血。瘕者假也。聚則有形。散則無迹。其病在氣。良由新產之後。或因寒侵。或因氣滯。以致循經之血。凝結成形。膠粘牢固。長大則易。剷削則難。須待本身元氣充旺。始能消磨。倘務急攻。非但積不可消。反傷正氣。內經有大積大聚。其可犯也之戒。旨可見矣。現在痛勢攻衝較甚。滋膩之補。似非所宜。思久痛在絡。衝爲血海。先商煎劑。調和衝任。使其脈絡流通。氣機條暢。痛勢稍緩。再議丸藥。圖刈病根。

安波按。煎劑議通瘀煎法丸。以回生丹攻補兼用。

### 沈虹橋廣文疫證

時疫十朝。正虛挾邪。證見神倦耳聾。熱發不退。脈息沉細無力。憑脈用藥。理應壯中溫托。閱方曾服理陰煎三劑。病樣日增。前法似難再進。夫陽證陰脈。原屬不宜。方書有時疫邪伏于裏。脈多沉細。不同傷寒邪自外來。脈多浮大。語屬可參。仿趙氏六味湯加柴胡一法。復診脈仍虛細。神形倦怠。脣齒乾枯。舌胎黃燥變黑。夫邪熱最爲真陰之賊。高年腎陰本虧。熱甚津液更耗。已任編所謂感證始終以存津液爲第一義。蓋陽明燥土。全賴少陰腎水以滋養之。如旱田側有井泉。猶可供其灌溉之資。倘井井泉乾涸。燥土炎蒸。則苗槁矣。宗甘露飲。

### 洪廣文少君損過脾胃

書云。衛虛則惡寒。營虛則發熱。證見日晡寒熱往來。已經數月。洵爲營衛二氣之虛。斷非客邪外感也。病既屬虛。虛則當補。昨服補劑。胸膈反增滯悶。此中消息。頗



難窺測。蓋非藥不能應病。乃胃氣不行藥力耳。夫上損過胃。下損過脾。越人且畏。姑遵經旨。虛癆不足。當與甘藥。兩進甘藥。寒熱依然。惟粥食稍增。嗽咳略緩。藥病尙覺相符。稽古補虛方法。千蹊萬徑。而其關鍵。總以脾胃爲之主腦。夫人之一身。內而五臟六腑。外而皮肉經脈。何一非藉穀氣長養之功。苟土母傾頽。旣難輸化。飲食之精微。焉能傳送藥力。宜乎虛不納補也。難經發明五損。勿過脾胃。仲景治虛癆諸不足。出活人手眼。其所立建中方法。亦皆稼穡作甘。此古聖賢明訓。內傷大病。可不以脾胃爲首重耶。然病真藥假。終難圖功。

鮑覺生生宮詹精氣內虧詳敘證治次第

恙經半載。脈證合參。究屬質虧煩勞。以致坎離不交。水火失濟。五液內涸。虛陽不藏。誤服苦寒。重戕胃氣。諸證蜂生。糾纏不已。揆之古訓。以虛能受補者可治。虛火可補。參耆之類。實火可瀉。苓連之類。勞傷之火。虛乎實乎。瀉之可乎。趙氏謂陰虛之火。如盞中油乾。燈焰自熾。須以膏油養之。專主補陰。其說是已。然陰生於陽。血生於氣。顧此食少欲嘔。脘悶不快。又難強投滋膩。反復推詳。計惟培養脾胃。默運

坤元。以爲先着。脾爲土母。安穀則昌。金匱治虛勞。首用建中。越人言損其脾者。調其飲食。脾元日健。飲食日增。變化精微。滋榮臟腑。不治火而火自熄。不潤燥而燥自濡。充膚熱肉之功。可漸見矣。然內傷之病。宜內觀靜養。所謂大病須服大藥。大藥者。天時春夏。吾心寂然。秋冬也。參透此關。以佐草木之不逮。爲妙。服藥旬餘。脈象稍轉。寢食略安。惟足膝痠軟。項脊時疼。形神疲倦。考治五臟之虛。難經言之甚悉。曰損其肺者。益其氣。損其心者。調其營衛。損其脾者。調其飲食。適其寒溫。損其肝者。緩其中。損其腎者。益其精。聞發精微。了無遺蘊。再考金匱云。男子脈大爲勞。極虛亦爲勞。夫脈大爲真氣泄越。心脾耗傷。此歸脾建中養營四君等湯之所宜。極虛亦爲勞。乃精血內奪。肝腎下衰。此六味八味天真大造等丸之所宜也。但病證多端。治須次第。首從稼穡作甘。培補中宮。專崇其土。次第榮養心脾。蓋心爲離陽。補心陽以生胃土。虛則補母之義。至於皮枯肉瘠。肢懈形羸。精髓內竭。筋骨廢弛。明屬本實先撥。舍填納固攝。則解休何由而振。枯槁何由而同。特草木無情。須假物類之脂膏。發人身之血液。煎丸并服。脾腎分施。煉石補天。而收桑榆之效矣。調治兩旬。雖未大效。然處境煩劇。猶能支撐。未始非賴藥餌扶持之力。七年

之病。三年之艾。原無速功。春三月。此謂發陳。恪服煎丸。春氣得生。夏可得長。一陰來復。自可霍然。病機前案已詳。其中奧義難測者。尙有數端。請再陳之。凡人病若勞動。反覺精神強健者。此陰火沸騰。扶助於內。不覺其元氣之衰。若靜養調適。反覺神疲氣弱者。此陰火退。本相露故也。病情有類乎此者。一也。解你一證。由於肝腎二經之虛。肝虛則筋軟無力。以束周身。肌肉皆渙散而若解。腎虛則骨痿不能自強。遍體骨節皆鬆懈而多你。故慊慊悒悒。若不知所以爲人。病情有類乎此者。二也。男子精未滿而早搖其精。五臟有不滿之處。異日有難狀之病。病情有類乎此者。三也。衛氣晝行於陽主寤。夜行於陰主寐。平人夜臥。則陽升陰降。陰陽交合。然後漸入睡鄉。若營弱衛強。坎離失媾。神明之地。擾亂不安。萬慮紛云。却之不去。衛氣剛入於陰。契合淺而脫離快。升者復升。降者復降。是以欲寐之時。忽驚而寤矣。病情有類乎此者。四也。至若飲食雖能強餐。腹中常覺不暢者。胃得受納之司。脾失健運之職也。大便燥結。數日始一更衣者。腸脂枯滯。傳導艱難也。腕中時痛者。木失水涵。肝葉怒張而迫鬲也。心忤怔忡。營虛之故。臂多青脈。血脫之徵。更有皮肉之間。時如冰水滴溜。證狀之奇。方書未載。曾治一婦患此疾。數年投補藥百

劑而愈。豈非血氣空虛。失其溫分肉實腠理之司耶。

安波按。先生闡發經義。善發古人之意。

### 殷仲周先生筋攣便濁

據論病原始末。考諸經云。肝主筋。身之所束者。筋也。所以榮筋者。血也。病本血不榮筋。而附筋之血。又耗於足瘤之滲漏。加之時疫熱邪。深入經絡。足跗之大筋。得熱而短。經又云。肝氣熱。膽泄口苦。筋膜乾。則筋急而攣者。是矣。然治攣固難。而治濁亦不易。雖津液藏於膀胱。氣化能出。但肺爲生水之源。金燥則水不生。諸病水液渾濁。皆屬於熱。義可知矣。進而求之。筋攣血涸。使非養血榮筋。不可也。然徒知榮養。而不明夫輔金制木之法。亦不可也。苟以金制木。而木反榮。筋反舒矣。且金清則水生而熱降。此榮筋卽可以治濁也。水足則木暢而筋柔。此治濁卽可以榮筋也。明見諒以爲然。

安波按。金清則水生而熱降。此榮筋卽可以治濁。擬準繩人參清肺法。冀其治節之令行。則膀胱氣化出矣。所謂不治濁而治濁也。復以朱氏虎潛法。以濡養



營衛壯陰潛陽。所謂水足則水暢。不榮筋而筋自榮也。

張佩韋先生肝腎兩虧證治

兩尺細濇。肝腎下虧。必得之醉而使內也。壯時血氣方剛。故無所苦。自強仕以來。漸覺目盲不能遠視。耳如蟬吟蛙鼓。虛里其動應衣。闔目轉盼。則身非己有。腰膝痠楚。行步不正。種種病狀。就衰之徵。經云。肝開竅於目。腎開竅於耳。目得血而能視。耳得血而能聽。血氣衰耗。不能上充。故視聽失其常度。心爲君主之官。血虛心無所養。故掣動不安。腦爲髓海。下通命門。上氣不足。頭爲之苦傾。腰者腎之府。腎僣則憚於轉側。膝者筋之府。筋僣則艱於屈伸。方用人參爲君。形不足溫之以氣。地黃河車龜鹿膠爲佐。精不足補之以味。更用山萸五味。攝納腎氣歸元。氣旺精充。百骸司職。收視而視明。返聽而聽聰矣。

安波按。方議皆精妙入化。

家近陶翁肝陽逆肺咳嗽加感風溫標本異治

兩寸關脈候俱大。左關尤急。據述前冬因情志抑鬱。先見此脈。後覺心煩不安。舊春心煩稍定。咳嗽至今不止。舌苔時黃時退。此肝爲受病之源。腎爲傳病之所。夫肝之傷脾。人所易知。肝之傷腎。人所不識。譬如折花枝。安插瓶中。花枝日茂。瓶水日爲吸乾。肝陽吸引腎陰。此之謂也。且肺爲腎母。子虛必盜母氣。不特金不制木。而木反得侮金。肝陽上升。衝心爲煩。衝肺爲咳。脈大不斂。舌見黃苔。要皆陽亢陰虧之所使然。所幸寢食如常。別無兼證。議以滋腎生肝。保金化液。辛溫剛復。似非所宜。復診脈急依然。連日嗽甚。於前夜臥欠安。頭額手心俱熱。是屬挾有風溫外因。若云陰血之熱。當發於日晡。不應發在午前。且其來也漸。何驟若此。質虛恙久。固不能正從標治。然亦未可過補。仿汪廣期前輩風溫湯方法。

安波按。卓識名論。非鎔經鑄史者不能。

### 汪舜廣翁令愛水腫

色白膚嫩。腎氣不充。數月病魔。脾元又困。諸醫調治。病勢日增。請求其本而論治焉。經言諸溼腫滿。皆屬於脾。曩服五苓五皮。非無所據。但腎爲胃關。關門不利。故

聚水而從其類。仲師主用腎氣丸。卽此意也。若謂童年精氣未泄。補之不宜。然治標不應。理應求本。所謂有者求之。無者求之是已。夫水流溼。火就燥。二陽結。謂之消。三陰結。謂之水。消者患其有火。水者患其無火。且水病雖出三陰。而其權尤重於腎。腎居水臟而火寓焉。此火者真火也。天非此火不能生物。人非此火不能有生。卽膀胱津液藏焉。亦必由命門氣化而出。華元化曰。腎氣壯則水還於腎。腎氣虛則水散於皮。前服腎氣丸頗應。日來飲食不節。病復再投不效。考諸己任編云。此病單用腎氣丸不效。單用補中益氣湯亦不效。須用補中益氣湯。吞金匱腎氣丸。謹宗其旨。

安波按。于庚長秋。行醫於杭。篲橋。一士子患水腫。面目無縫。陰大如栲。小水點滴不爽。切脈沉細模糊。苔膩白滑。不渴。閱前醫有開鬼門者。有潔淨府者。有用五子五皮者。有需金匱腎氣法者。服之如石投海。余意腎氣虛則水泛爲腫。以腎氣丸爲旗鼓之劑。何反不應。追憶己任編有益氣陽。送腎氣丸之法。翻書令彼視之。伊以爲然。服之竟驗。視此與先生暗合也。

方芷南茂才夫人產後心脾兩虧之證

金匱云。婦人新產有三證。一曰瘕。二曰鬱冒。三曰大便難。三證所因。無非陰傷血耗之所致耳。人知四物湯能補血。此第認其面目。而未審其根源。夫血生於心。統於脾。欲求其源。舍此誰與。再按脾主肌肉。脾虛故肌肉發熱。心主神明。心虛故神明失藏。計惟黑歸脾湯一方。可稱對證之藥。泛涉他求。恐多歧也。語云。寧醫十男子。莫醫一婦人。蓋女科病本無難。其所難者。胎產兩端而已。胎前諸病。尙須培養氣血。况乎產後百脈空虛。不言可知矣。產經十朝。發熱昏冒。肢掣煩躁。夜臥不安。脈息數大無力。斷非蓄瘀風邪。顯屬陰虧陽越。病關根本。非枝葉小恙可比。歸脾湯培養心脾化源。喜其虛能受補。第補藥治虛。如旱田稼穡。灌溉宜頻。病人畏藥。昨晨至今。停藥未進。心煩肢掣。瘕厥欲萌。原方加膠黃棗麥。守服勿懈。

安波按。近時之大弊。產後輒以生花湯從事。徒不知芎歸等之走竄。散渙無常。茲閱此案。較以歸脾膠黃。何啻霄壤之殊。昔丹溪之產後多血虛。嘗以大補爲主。雖有雜症。以末治之。景岳云。產後多不虛症。胎前爲氣血所壅。及產後始見通快之語。細玩二言。在醫者之靈機活潑。不可固執一見。以致膠柱鼓瑟也。

鮑禹京翁夫人厥證治法節略



傷寒論厥證。分別陰陽。陰厥屬寒。陽厥屬熱。寒宜溫而熱宜涼。雜病論厥證。分別虛實。奪厥煎厥。痿厥爲虛。薄厥尸厥。食厥爲實。實可消而虛可補。病由情懷不釋。肝失條達。血氣日偏。陰陽不相順接。因而致厥。與全虛全實者有間。理偏就和。宜用其平。偏補偏消。爲能治情志中病。厥證婦人常有之。其爲情志鬱勃。致病顯然。惟晝夜頻發。陰陽臟氣俱傷。却爲可慮。若乍發乍止。疎而且輕。亦無妨礙。所嫌病關情志。難以除根。務須戒怒舒懷。惜勞靜養。冬令收藏之際。加意慎持。來春草木萌動。庶可不致復發。厥證有因痰者。有不因痰者。因痰而厥。厥時喉中必有痰聲。漉漉。此則厥來寂然無聞。且痰厥脈應帶滑。今脈細兼弦。濇洵屬氣厥無疑。持脈之道。須知人之平脈。然後察其病脈。質虧脈細。此其常也。惟細中見濇。右寸關兼帶弦象。故主病耳。濇者血虛氣滯。弦者胃弱肝強。細小弦濇。主病尙輕。牢大弦長。主病重矣。諸厥屬肝。女子以肝爲先天。肝主怒。怒則氣上。經云。血之與氣。並走於上。廼爲大厥。其由肝鬱爲病可知。考古人治鬱證。多用越鞠。逍遙二方。但越鞠燥而逍遙則潤矣。越鞠峻而逍遙則和矣。治肝三法。辛散、酸收、甘緩。逍遙一方。三法俱備。木鬱則火生。加丹梔。名加味逍遙。滋水以生木。加熟地。名黑逍遙。

已任編中一變。疏肝益腎湯。再變滋腎生肝飲。前用逍遙減朮者。恐其守中。用丹皮減山梔者。恐其苦泄傷胃也。肝胃二經同病。須分別其肝陰胃液已虧未虧。如陰液未虧。氣藥可以暫投。若陰液已虧。治惟養陰濡液。所謂胃爲陽土。宜涼宜潤。肝爲剛臟。宜柔宜和。葉氏論治鬱證。不重在偏攻偏補。其要在乎用苦泄熱而不損胃。用辛理氣而不破氣。用滑潤濡燥澁而不滋膩氣機。用宣通而不擾苗助長數語。深得治鬱之理。血虛治當補血。四物湯爲補血之首方。然其中尙須分別陰陽。若血虛肝燥。木火沸騰。芍藥微酸微寒。在所必需。地黃先應用。生涼血生血。繼則用熟。補水涵木。川芎辛竄。固屬不合。當歸亦須蒸去辛溫之性。養血諸藥。除四物外。惟丹參爲勝。本草言其色赤入心。有去瘀生新之能。功兼四物。乃女科要藥。可以備用。木鬱生火。火則宜涼。第此火非從外來。良由木失水涵。以致肝陽內熾。芩連知柏。苦寒傷胃。洵非所宜。不若生地丹皮之屬。清肝涼血爲穩。五行剋制。木必犯土。肝氣上逆。胃當其衝。詢其厥來。腕中有塊。按之則痛。食下阻滯。此肝犯胃。厥陰順乘陽明故也。旣知氣逆爲患。治應先理其氣。無如氣藥多燥。肝陰胃液已虧。如何燥得。經言蘭除陳氣。併能醒胃舒肝。可加爲引。桑葉輕清。

能瀉肝膽之鬱熱。葉案每與丹皮同用見功。虛則補其母。肝腎同治。乙癸同源。乃治肝病第一要訣。然須俟其痞消厥定。以作善後之籌。若用六味湯。可加當歸。白芍。或去山萸。恐其溫肝故也。如用須陳者乃佳。分兩減輕。并用鹽水拌炒。肢掣名爲肝風。此非外來之風。由乎身中陽氣變化。故曰諸風眩掉。皆屬於肝。第肝爲剛臟。須柔和濟之。治用和陽熄風。及養陰甘緩等法。至於鈎藤菊花桑寄生。均有平肝熄風之能。發時隨宜加入。內經有肝苦急。急食甘以緩之之語。金匱出甘麥大棗湯。祇用甘草小麥棗肉三味。蓋小麥春生。肝之穀也。最能養肝。合諸甘草棗肉之甘。以緩其急。後賢治肝風諸病。每參此法。木喜滋而惡燥。陰虧血燥之體。或逢天時陽氣泄越。或觸情志恚嗔。因而激動肝風。變幻症厥。糾纏日久。陰液內竭。可以借用千金之復脈湯。蓋脈乃血派。血脈既虧。藉其藥力以通營衛。致津液。葉氏於方內除去薑桂益精。諸厥雖屬肝病。然心爲君主之官。主安則十二官各得其職。厥發日久。肝風內扇。震動心營。養心安神藥品雖多。首推抱木茯神者。蓋茯神本治心。而中抱之木。又屬肝。以木制木之義。其次柏子霜。既能養心。更可潤腎滋肝。用棗仁須猪心血拌蒸晒。用麥冬須辰砂拌染。或加琥珀龍蟬。均

有鎮靜之功。肥人之病。慮虛其陽。瘦人之病。慮虛其陰。陰虧後下。則陽越於上。下虛上實。而爲厥顛之疾。是故養陰藥中。必佐以潛陽者。如畜魚千頭。須置介類於池中之意。牡蠣鼈甲。淡菜龜版。皆介類也。方中祇用牡蠣鼈甲者。取蠣之鹹能軟堅。鼈之色青入肝。不獨潛陽已也。

安波按。肝厥良由腎陰枯涸。肝陽上冒所致。是以輕則竅絡阻塞。甚則瘈瘲痙厥。故厥者必挾痙。往往若是。

### 張仲篋翁息賁喘嗽

情志抑鬱。原屬肝病。辛散酸收甘緩。俱厥陰正治之方。屢投未應。竊思肝木不平。金失其剛。肺臟不能無患。肺欲收。觀其胸痞喘咳不得臥。豈非肺張不收。臥則葉黏背俞。阻塞氣道之故乎。經言諸氣臍鬱。皆屬於肺。喻氏發明秋傷於燥。冬生咳嗽之義。是知鬱病可不專責於肝。而燥證則全關於肺也。蓋肺主氣。居相傳之官。苟治節有權。則清肅下行。克稱其職。病緣木鬱生火。兼挾燥邪。金受火刑。令失清肅。肺燥葉張。阻塞氣機。而爲患矣。倘果專屬肝病。而不涉肺。何至喘咳不能着枕。



耶。且肝病治肺。輔金制木。道猶不悖。設令肺病不救。則煩冤逆滿。內閉外脫。更何如耶。擬千金葦莖湯大意。

安波按。然氣閉欲死時。先總以開豁爲主。或降氣。或豁痰。善後之法。不出己任編等方意義也。

又按。木叩金鳴。以千金葦莖湯治。大有深意。

### 方竹坪翁頭痛

質虧煩勞證。經多日診脈。虛弦帶急。精神欠充。夜寐少逸。詢其病初。并無寒熱。知非外因。惟頭痛乍輕乍重。推求其故。東垣云。內傷頭痛。時痛時止。究緣煩勞抑鬱。水不涵木。肝風上擾。清空鼓動不定。夫頭痛神煩。倏然而至。迅速莫如風火。但身中陽化內風。非發散可解。寒涼可平。必須陽和。庶乎風熄。經旨以下虛則上實。陰傷陽浮。冒上病療下。滋苗灌根。語可味也。

按波按。胃陽不潛。宜和陽以就陰。擬虎潛法。

洪竝鋒翁脾陽虛寒。溼內伏。重用溫補治法。

夏月伏陰在內。當於寒溼中求之。議以理中湯。溫理脾陽。服藥瀉止嘔減。舌苔少退。此由脾陽向虧。卑監之土。易於釀溼。陽氣不足。寒自內生。即無外邪干之。本氣自能爲病。今既投機。只可於方內增分兩。不必於方外求他味。其所以不驟加陰藥者。蓋恐肥人之病。慮虛其陽耳。經云。陽氣者。若天與日。失其所則折壽而不彰。故天運當以日光明。日光不到之處。恆多溼生。土之薄也。經又云。脾苦溼。急食苦以燥之。脾陽健可冀運矣。昨方加增分兩有效。足見尙是病重藥輕。然當此盛暑。參附大劑。服逾兩旬。病猶未卻。虛寒情狀。亦可畏矣。安心穩守。功到自成。安波按。華氏云。低窳溼處。必須以烈日曬之。此病是也。

### 洪庭光兄肝風眩暈證類猝中

病起偶然眩仆。醫謂急虛身中。猛進甘溫峻補。轉增胸脹嘔吐。不飢不便。有時浮陽上騰。面赤脣口乾燥。然脈尙和平。寢尙安穩。言語尙覺明白。求其所因。良由腎元下虛。水不生木。肝風鷄張。以致發時。狀如中厥。經謂諸風眩掉。皆屬於肝。溫補藥重。激動肝陽。其胸脹嘔吐。不飢不便者。無非肝風擾胃。阻胃之降而然。使果真

陽飛越。雷龍不藏。則脈必浮大無根。證必煩躁。無暫安時。且前服溫補諸方。豈有不效。而反病增之理。所定制肝安胃。尚有商者。蓋肝陽衝逆。非介不足潛其威。木火沸騰。舍酸無可斂其焰。擬於方內加牡蠣烏梅二味。更覺相宜。痰涎頻吐。胃液必傷。再加赤斛蔗汁。益陰保液。尤爲符合。

安波按。肝風症由肝陽吸耗腎水。致水涸木熾。故上冒爲仆。爲痰迷。上泛爲暈。爲嘔。爲驚悸。爲不寐。爲瘕厥。爲耳鳴。種種惡候。變態不一。庸流不識。以熱補助火致斃者。何可勝計。故錄出以爲庸醫者解。

葉振標翁證患似隔非隔

肝主怒。怒則傷肝。脾主思。思則傷脾。病緣情志不適。初患上焦痞悶噯噯。此肝氣橫逆。阻其胃降而然。醫者不察。浪投檳榔枳椇。損傷胃氣。轉致胸脘脹痛。泛泛欲嘔。食麵尙安。稍飲米湯。脘中卽覺不爽。糾纏三載。似隔非隔。百計圖之。總不見效。經云。肝在地爲木。其穀麥不能食穀而能食麥者。肝強胃弱之故也。蓋胃弱故穀不安。肝強故麥可受耳。安胃制肝法當不謬。但證屬情志內傷。未可全憑藥力。張

雞峰以爲神思間病。當內觀靜養。惟逃禪二字甚妙。夫禪而名之曰逃。其心境爲何如哉。

安波按。安胃制肝法。想如半夏、廣皮、炒香荷葉蒂、茯苓、杵頭糠等以安胃。如烏梅、白芍、綠萼梅、木胡蝶、棗兒、檳榔之類以制肝。需以清香潔絡。鬆靈不鈍。使橫逆之氣下行。而胃陽疎動矣。

### 洪星門翁吐血

脈大不斂。陽虛。體質兼多煩勞。舊病喘汗。服溫補煎丸相安。月前偶感咳嗽。續見鼻衄痰紅。日來吐多不止。口苦食減。頭昏氣促。若論尋常吐血。不過肝肺之火。藥投清降。火平。其血自止。尊體精氣本虛。一陽初復。形神交勞。水火不交。氣隨血脫。病關根本。再投清降損真。則陰陽離決矣。先哲有見血休治血之語。可味也。議從黑歸脾湯。培養心脾。佐以生脈保金。攝納腎氣。服藥三劑。血止脈斂。經云。人四十而陰氣自半。平素質虧多病。今復大失其血。生生不繼。臟真耗傷。灌溉栽培。尤非易事。夫血雖生於心。藏於肝。實則統於脾。古人治血證。每以胃藥收功。良有以



也。再按痰之本水也。原於腎。痰之動溼也。由於脾。內經以痰多爲白血。此果痰也。果精血也。豈精血之外。別有稱痰者耶。故昔賢又有見痰休治痰之論。參五陰煎。水土金先天一氣化源也。

安波按。方議精妙入神。吐血以歸脾法治。大不易事。學者須審究的確。否則禍不旋踵矣。

### 龔西崖兄咳血

向患血證。發將匝月。醫用血脫益氣之法。未爲不是。惟嫌脈數不靜。肌熱咽乾。噎咳莫能正偃。咳甚則血來。咳止血亦止。血去陰傷。陰不戀陽。水不制火。刻值金燥秉權。肺被火刑。金水不相施化。醫貫云。不投甘寒以降火。驟用參耆以補陽。此非醫誤。不知先後着也。自述胸脘乍覺煩寃。卽咳頻血溢。按衝爲血海。其經起於氣街。挾臍上行至胸中。衝脈動則諸脈皆動。豈非下焦陰火上逆。血隨火升之故耶。火在丹田以下曰少火。出丹田以上曰壯火。少火生氣。壯火食氣。欲止其血。須止其嗽。欲止其嗽。須熄其火。然非尋常清火止嗽之藥所能奏功。務使下焦陰火歛

藏。火不上逆。金不受刑。嗽止血自止矣。

安波按、擬一陰煎加青鉛山萸。收納衝脈之逆。

### 吳曜泉翁乃媳瘕厥變幻證治之奇

前議安胃制肝。嘔吐稍止。脘仍痞痛。大便未圓。手抖目窳。齒齦唇乾。舌黃肌熱。肝風瘕厥。狀已顯著。據述病因情懷鬱勃。夾食而起。鬱則傷肝。食則傷胃。木鬱宜達。腑病宜通。昨宗仲聖厥應下例。便解結糞數枚。中宮痞形稍輟。飲入不嘔。惟肝風未熄。瘕厥仍發。肌熱口渴。面赤齒乾。胸脘嘈雜。病由肝木抑鬱。腑氣阻閉。變化火風。下焦腑氣雖通。上脘火猶未降。姑議平肝熄風。舒鬱清熱。諸厥屬肝。肝爲風木之臟。相火內寄。體陰用陽。肝氣上逆。胃當其衝。食不得入。是有火也。古稱寒熱之氣。相結於心下而成痞。相阻於心下而成格。又云。厥陰爲病。氣上衝心。心中熱疼。飢不能食。倣半夏瀉心減去守中之品。肝鬱逆胃。阻胃之降。中焦痞塞。不食不便。連日肝風勢平。脘熱亦減。惟胸痞未寬。不思飲食。前用潤下。微解結糞。昨晚兩番欲便。未得解出。似有宿滯未淨。胃宜通。肝宜涼。乃病治之法則。鬱抑夾

食。激動肝風。神昏肢掣。煩熱胸痞。不肌不便。曾投承氣瀉心獲效。加怒病復。連日診治。證猶未減。自言腕中熱悶。口渴唇乾。頭筋抽痛。有時氣衝。厥暈即發。大便欲出不解。病久反復。誠難想法。然揚湯止沸。不若仍用釜底抽薪。陽明腑氣一通。厥陰風木自平。但成敗利鈍。雖武侯之明。亦難逆覩也。便通復閉。腕痞依然。按之尙痛。食下阻塞不行。然下法用經兩次。燥糞已圉。所有熱滯。亦應推蕩。何至牢錮若此。遷延兩旬。言微形倦。似未可以再攻。奈痞結不開。補之不納。仍宗土鬱奪之。實有羸狀之義。

安波按。凡病之變幻不一。在病家之賢愚耳。如今時之人。病有一變。羣醫畢集。或論寒。或道熱。貽誤者焉可勝算。如先生之相信終不更醫。亦時也。運也。命也。爲之廢書一嘆。大約爲醫一途。命中必要爲天醫星者。何彼多遇而此不遇耶。

葉震先兄肝風眩暈

肝者。將軍之官。罷極之本。其藏血。其主筋。肝病則血病。筋失所養。眩掉強直。諸證

生焉。要知此乃肝家自生之風。非外中之風也。治肝之法。可不以爲先着耶。但東方木生於北方水。使無此水。何以生之。使水不足。何以涵之。虛則補母。厥有深意。平昔嗜飲醪醴傷陰。足間常患流火。行步振掉。皮肉乾瘠。春來漸有眩暈之象。肝風勃勃內動。加以陰絡之血。又從痔孔內溢。淋漓不已。將何以榮筋澤肉乎。斯恙由來有自矣。目下年紀尙壯。猶可撐持。過此以往。欲求良治。不可得也。

### 吳雙翹兄幼女目疾

目得血而能視。黑輪上戴。日久縫癢羞明。弦爛流淚。眼科苦寒消散。屢服無功。可知無形之火。原非苦寒可折。王太僕云。寒之不寒。是無水也。壯水之主。以鎮陽光。小兒純陽。從錢氏六味地黃湯治法。曩緣血虛肝燥。目痛羞明。苦寒消散。陰氣益弱。今年厥陰司天。風木氣王。秋深燥氣倍張。肝藏血。其榮在爪。觀其爪甲枯槁剝落。肝血內涸顯然。前議壯水。以平厥陽衝逆之威。繼佐芍甘培土。酸味入陰。甘緩其急。交冬腎水主事。木得水涵。庶可冀安。哭泣躁煩。究由臟燥。肝在竅爲目。肺在聲爲哭。地黃滋腎生肝。二冬清肺潤燥。所加黑羊膽汁引之者。蓋肝位將軍。



也。膽司決斷。膽附肝葉之下。肝燥膽亦燥矣。故取物類膽汁以濟之。同氣相求之義也。

安波按。羊膽味苦。恐蹈前轍。不若以磁珠丸之磁石。其性能引鐵制金。平木之義可知也。設肝膽得以有制。則其勢不暇他顧。只可足以自守本位。濟之以補益涵養。俾渴者得飲而燥者潤。衝逆之威下潛。則目疾釋矣。

### 汪式如兄陰暑感證轉爲痺瘧前後治法不同

證經七朝。兩投溫解。寒熱退而復發。乾嘔不渴。舌膩頭疼。病緣本質不足。因熱貪涼。感受陰暑之邪。怯者着而爲病。方訂理陰煎。冀其雲蒸雨化。邪從少陽轉樞。歸於瘧途則吉。寒熱如期。呵欠。指甲變色。似走瘧途。證因陰暑逗留。非開手正瘧可比。仍宜壯中溫托。參以薑棗和解。現在寒來。且看晚間熱勢若何。明日再議。寒熱仍來。邪猶未解。口仍不渴。體猶怕風。時當盛夏。薑附服至四劑。并無火象。使非陰暑。安能勝任。不問是瘧非瘧。總屬正虛邪留。輔正即所以驅邪。強主即所以逐寇。昨熱發至五更。汗出始退。今日午初又至。嘔惡呵欠。前次尙有微寒。此番

并無寒意。脈見弦急。由陰轉陽之機。大凡陰證得以轉陽爲順。證既轉陽。溫藥當退。中病則已。過恐傷陰。病經多日。正氣受虧。輔正驅邪爲是。汗出熱退。頭痛稍減。脈仍弦急。舌苔轉黃。瘡刺俱見。寒邪化熱無疑。恐其熱盛傷陰。酌以補陰益氣煎出入。質虧感證經十二朝。單熱無寒。午初起勢。黎明汗出退涼。確係伏暑爲病。較之傷寒。其狀稍緩。較之正瘧。寒熱又不分明。經云。少陽爲樞。陰暑伏邪。得從樞轉。尙屬好機。不然則邪正溷淆。如白銀中參入鉛銅。不成銀色矣。夫傷寒一汗可解。溫暑數汗不除。蓋暑溼之邪。伏匿膜原。所以驅之不易。今寒邪既化。似可清涼。惟嫌受病之原。終從陰分而來。甫經轉陽。苦寒未便驟進。昨用養陰和解。夜熱稍輕。頭痛稍減。脈急稍平。窺其大局。守過二候。當可獲效。熱來稍晏。勢覺和平。黎明退涼。渴飲較多。汗至午時。尙未收淨。夫暑汗與虛汗不同。經言暑當與汗皆出。勿止。脈急漸緩。頭痛漸輕。小便漸淡。邪剩無多。今將二候。愈期不遠。按純熱無寒。曰瘧瘧。瘧卽陽亢之名。用藥自應轉手。昨熱作止。勢猶彷彿。脈急已平。神采稍好。惟舌根尙有黃苔。口猶作渴。仍屬伏暑餘波。今明兩日。熱難驟止。好在發作有時。與瘧瘧同例。內經以爲陰氣孤絕。陽氣獨發。參加減一陰煎。昨熱仍作。其

勢較輕。證屬痺瘧。因係伏暑。了無遺義。喻氏論痺瘧會內經金匱微旨。從飲食消  
息。調以甘藥。二語悟入。主用甘寒。保陰存液。指南醫案。治用梨蔗。亦此意也。推諸  
病狀。似與秋時晚發之證相類。氣候稍有不符。情形大略則一。必須兩三候外。日  
減一日。方得全解。屆期可許霍然。

安波按。秋時伏氣之疾。考方書惟己任編另出心裁。論之甚晰。迄今以來。葉氏  
獨得其妙。此外無幾人矣。

### 又乃嫂喉痛清藥過劑變證

恙經兩旬。起初喉痛。清涼疊進。喉痛雖好。變出舌強語澁。食少形疲。頭昏足麻。虛  
里跳動。一派虛象。切防肝風變幻。若恐餘燼未熄。亦當壯水養陰。斷無再用苦寒  
之理。舌乃心苗。腎脈繫舌本。當於心腎兩家。求其水火既濟之道。早診言防肝  
風變幻。午後突然口眼歪斜。心悸肢掣。此腎真下虛。水不涵木。以致內風鼓動。更  
怕痙厥之險。經云。肝苦急。急食甘以緩之。祖千金復脈方法。連日肝風已平。食  
少欲嘔。人以胃氣爲本。病久正虧。全仗飲食扶持。胃氣不旺。藥難奏功。究緣前患

喉證煎吹二藥。清涼過度。脾胃受傷。不必慮其有火。且恐變爲虛寒。脾開竅於口。脾和則口能知五味。口冷不渴。豈非脾胃虛寒之明驗。與溫養脾陽。倣理中六君方意。服藥兩劑。嘔止胃安。虛里跳動。舌強口歪。諸證尙未見效。虛風不息。穀少胃虛。固當扶助脾元。建其中氣。第土由火生。旣虛且寒。更須兼補其母。安波按。擬景岳四味回陽飲合六味異攻煎法。

### 又患伏暑危證拯治原委

日前診視。擬屬質虧。受暑熱傷胃陰。諸嘔吐酸。皆屬於熱。商倣黃土稻花湯。養胃滌邪。服藥嘔減熱緩。惟舌膩未退。脈急未和。寐仍欠逸。心煩體躁。正虛邪留。輔正兼理餘波。治法固雖不謬。所嫌熱久嘔多。形倦不支。目闔少神。不獨傷陰。亦復傷氣。不患邪之不除。而患正之不守。未可以嘔減小效。恃而不恐。昨夜仍不安寐。今日已刻。陡然神昏齒噤。狀類痙厥。舌苔黃膩。反甚於前。證雖多朝。伏邪未透。本體向虧。况經三候之久。驅輔兩難。暑喜傷心。風喜傷肝。入心則昏迷。入肝則痙瘓。其危若此。姑訂甘露飲。合乾一老人湯。養正滌邪。穩持不變。庶可轉危爲安。夏



暑內伏。秋時晚發。前見熱勢鴟張。不得不爲清解。復慮正氣不勝。兼佐養陰固本。以杜瘥厥。脫變其熱。朝輕暮重。口渴心煩。舌黃欲黑。足徵內熱燔灼。若非急爲徙薪。必致焦頭爛額。幸得熱退。方許坦途。質虧伏暑。病經多朝。邪熱雖減。正氣更虛。自云心中焦煩。口渴嗜冷。固知邪熱未清。然形倦如此。清涼又難再進。前案所謂不患邪之不除。而患正之不守。洵非虛謬。原知邪實正虛。未敢直行蕩掃。無如邪熱蘊熾。舌苔欲焦。神迷欲厥。所商養陰固正。清熱滌邪。覩斯證狀。邪未淨而正欲傾。將何圖治耶。復脈生脈合參。再望倖成。昨訂亟固真元以拯危殆。夜來狂叫。暈汗黎明。神識漸甦。脈大稍斂。面赤略退。舌苔仍黃。口仍作渴。頭額手心尙有微熱。倦怠依然。惟詢問病原。略能應對。較昨昏沉形狀稍好。質虧載邪。糾纏四候。正虛固不待言。餘燼似乎未熄。苦寒雖不可投。甘寒尙可佐用。證將匝月。危而復蘇。雖屬伏邪黏着。迅速難驅。亦由正氣不充。無力托達。凡治質虧加感之病。起初最難着手。不比壯實之軀。發表攻裏。邪去病除之爲易也。神明清爽。似屬轉機。然肌熱未退。大便欲圉不解。固非實熱爲殃。亦緣虛焰不熄。仍議育陰固正。濡液存津。陰血下潤。便自通耳。養陰濡潤。便仍未圉。熱仍未淨。病人自言心煩口渴。

喜吃生冷。總屬熱久陰傷。津液被劫。雖仲景有急下存津之法。現在正氣動搖。焉能商進。考諸張介賓及高鼓峰前輩。所論傷寒溫暑。熱甚傷陰。舌黑便閉之候。悉用左歸六味甘露等方。以代白虎承氣。見效雖遲。穩當過之。謹宗其旨。病候纏綿。變幻不測。刻診脈。更形疲氣墜。都係虛象。外熱已輕。舌苔既退。內熱料亦無多。大便未圓。腹無苦楚。聽其自然。知肌啜粥。胃氣漸開。一意固本培元。當此九仞。加意留神爲上。

安波按。此症極數。紫雪牛黃至寶之候。必須詳察精凝。如此症之前。曾患肝風虛患。故決意以熱極傷陰四字作主。稍不經意。藥到人死。可不慎哉。又按。近時吳鞠通先生增液法。取添水行舟之意。大有深味。余治斯候。甚效。投之應若桴鼓。故參而啓後學之悟也。

### 吳婦血崩

經云。陰虛陽搏謂之崩。又云。悲哀動中。則胞絡絕。陽氣內動。發爲心下崩。病機已見大端。至於治法。方書雖有暴崩宜溫。久崩宜清之語。要知此溫清二字。乃示人

大意。未可執論也。夫氣爲血之帥。暴崩氣隨血脫。每見暈汗諸證。故宜甘溫。以益其氣。蓋有形之血。不能速生。無形之氣。所當急固。初非指溫字爲溫烈之溫也。陰爲陽之守。久崩血耗陰傷。每見躁熱諸證。又當滋養。以培其陰。蓋壯水之主。以鎮陽光。蓋中加油。浮焰自斂。亦非指清字爲清涼之清也。病由半產失調。始而經漏。繼則崩中。黑歸脾湯一方。按心脾肝三經用藥。暴崩之頃。洵屬合宜。若謂反復之故。除肝脾失其藏統之外。或情懷不釋。因怒動血者有之。或衝脈空虛。不司約束者有之。或腎水下虧。不能坐鎮。心火者有之。或元氣大虛。不能收攝。其血者有之。斷無因服歸脾湯而反致崩之理。凡血離宮。便成塊。未可見血之有塊。卽認爲瘀。果真內有蓄瘀。必然脹痛拒按。何崩決數番。腹無所苦耶。血色紫黑。固多屬熱。然須辨其熱之虛實。經言陽搏其陰必虛。心崩由乎悲哀太甚。其旨可見。再按腎開竅於二陰。衝爲血海。脈起氣街。據言小解後血隨溢出。此腎真下虧。衝脈不固。益彰彰矣。

安波按。洄溪云。崩漏宜大劑補陰。輕藥不能以取效。余擬砂仁炒枯。熟地蒲黃炒枯。阿膠桑螵蛸海螵蛸醋煅。牡蠣棕炭。以鷄黃炒茜草。以黃芩水炒血餘。以

童便炒枯煨盡烟。人參穀芽等分修丸。余自名爲補鍊丸。曾治吳觀察夫人患崩三月。諸味餌遍不效。余以此丸大劑作湯飲。十裹而痊。

### 許婦內傷經閉辨明非孕

病由不得隱曲。以致臟真內傷。經期阻閉。女科不察病原。僉用清熱安胎。愈醫愈劇。考金匱雖有蠱蟲丸治虛癆血痺之法。顧此羸軀。恐難勝任。卽水土金俱病。古人亦無僦統治理。議以早用四陰煎育陰保金。晚仿周慎齋前輩淡養胃氣。甘益脾陰。蓋土爲物母。脾乃至陰。其他退熱止嗽之藥。皆置不用。葉氏云。勿見熱而投涼。勿因咳而理肺。誠哉是言也。形瘦陰虧。脈虛近數。證見咳嗽。側臥汗多。食少。經停九月。失紅三次。據述曩因腹中微動。疑是妊娠。經云。婦人手少陰脈動甚者。孕子也。又云。身有病而無邪脈也。今脈證如此。諒非孕徵。果真有孕。不過氣血之虛。胎不長養。雖費調理。尙在可爲。無孕則血海乾枯。勢走怯途。殊難着手。且婦人重身。卽有病端。但去其病而胎自安。漫究妊娠之是否。惟論療治之何如。君以育陰保金。佐以調養胃氣。夏至一陰能復。差可保守。



安波按。女子以血爲主。首重在乎衝任。治衝任之法。首重養血。胃爲衝脈本。故陽明氣旺。則月事行。先生以育陰調胃。良由斯乎。

汪孚上占翁乃孫暑風驚證反復治法

一熱卽搐。幼科呼爲急驚。經云。東方青色。入通於肝。其病發驚駭。昨日驚作。至今熱發不退。神識昏迷。哭不出聲。脣乾鼻燥。舌苔中黃尖絳。雖屬時感燥邪。然必挾有伏暑。兩邪相合。致病勢暴若此。叫喊作努。頭仰肢搐。肝風動搖。亟亟清解。守過一候。邪淨熱退。庶可安穩。夏暑伏邪。秋時感發。病起三日。熱甚作驚。新舊兩邪。內犯心肝二臟。入心則昏迷。入肝則抽掣。觀其撮脣弄舌。尖絳苔黃。伏邪化熱顯著。夫邪在皮毛。疎散可解。伏熱內蘊。非清不除。病來勢暴。未可因循。亟當清解。伏邪舍此別無法想。兩服清解。熱退七八。驚勢雖定。神猶未清。舌仍乾黃。脣紅目赤。伏邪未淨故也。口中生瘡。火尋竅出。心熱外解之徵。清藥仍不可少。慮其熱盛陰傷。參以養陰亦可。九朝驚定復作。餘燼復燃。肝風熄而復動。幸病不由吐瀉而來。證屬急驚。猶可無妨。熱蘊在裏。外反不熱。肢反厥冷。所謂熱深厥亦深也。若

謂熱盛傷陰。理則有之。若直指爲虛寒。思投溫補。斷乎不可。仍當滌邪清熱。平肝熄風。病逾兩旬。驚猶未定。神迷齒齩。肢掣頭搖。證由夏伏暑邪。兼感秋燥之氣。兩邪相併。一熱即驚。邪傳手足。厥陰深伏於裏。所謂臟者藏也。邪難入。亦復難出。故治法宜守。更有初中末三法。病初邪熱熾甚。治宜清解。急驅其邪。不使陷伏。中治則和陽熄風。末治惟有養陰存津。緩肝之急而已。若云初起熱甚。驚作之時。當服桂枝湯。豈不抱薪救火。而犯桂枝下咽。陽盛則斃之戒乎。是病糾纏至今。尙有生機可圖者。幸能納穀。胃氣未散。倘一投桂附溫補。陽遇陽則爲焦枯。胃氣消亡殆盡矣。病勢潰裂若此。恐難紐轉機關。伏暑至秋而發。邪陷手足厥陰。證經五十餘日。肝風雖定。神躁未安。舌絳脣紅。鼻瘡便結。雖屬病久陰虧。而心肝伏邪。總未滌淨。今歲少陰君火司天。陽明燥金在泉。故多熱燥之證。治病須明運氣也。緩肝之急。以熄風。滋腎之液。以驅熱。服藥數日。躁定寐安。時或仍有強直之狀。經云。諸暴強直。皆屬於風。許宜治前輩。書稱暑風驚後。強直者。屬陰虛。治當養陰舒筋。僭仿其旨。

安波按。案內直犯心肝之句。似欠融化。蓋暑邪最喜犯心。其故由肺逆傳。肺病

則肝無所制。故手足制動矣。下句有五十餘日之久。其邪深入下焦陰分。故前輩以甘露復脈等方。雖不治肝。而已治肝。下言肝風兩字。日久者少似。蓋肝居位不及心肺之高。豈邪一中。即直趨至陰之地乎。

安波按。小兒驚症一候。歷來惟喻氏前輩。駁之甚詳。自斯涇渭析矣。其立名曰風熱驚痰四字。愚嘗溯之。蓋孩提氣血未充。府藏未實。每招微感。邪留皮毛。上注於肺。失治則蔓延於心。包絡。是以視識溷蒙。目睛上吊。肺失治節之司。聚液成痰。而肝失勝己之制。得以鷓鴣張上逆。為抽搐瘈瘲之勢。亦平矣。若陡用芳香金石之劑。開則痰行。熱清而昏定。昏定而抽搐瘈瘲之勢。亦平矣。若陡用芳香金石之劑。使陰液愈亡。肺熾愈橫。其禍不可待而言也。余誠愴惻。不愧贅言。若見斯症。輒投驚藥。其幼稚之含冤無勝數矣。

### 黃禹功兄陰虛咳血誤服陽藥致害

操持經營。勞思過度。病起咯血。後加咳嗽。孟秋診過。告以肺腎陰虧久咳。虛火上升。津液生痰。不生血。治當補水制火。則其痰自除。第此甘醇靜藥。本無速功。更醫

參附養陽。服至半月。諸證倍增。經曰。剛與剛陽氣破散。陰氣乃消亡。是知證有陰陽。藥有動靜。陽主動。以動濟動。火上添油也。不焦爛乎。且一星之火。能燒千仞之山。一杯之水。難救車薪之火。恙本火多水少。救陰尙恐不逮。豈堪燥烈更灼其陰乎。三冬腎水枯涸。來春奉生者少。語云。昌陽引年。欲進稀苓。其斯之謂歟。

### 方伯魯兄挾虛傷寒誤治致變壞病

年屆五旬。心事內傷。兼挾外邪。誤藥因循。邪留不解。脈濡無神。汗多頭暈。交午寒熱。此陰陽衰憊。邪正交爭。烏可與傳經少陽之寒熱同語。張介賓云。邪氣如賊。其來在外。元氣如民。其守在中。足民即所以強中。強中即所以禦外。斯證斯時。曰但驅邪可以却病。吾不信也。曰舍輔正可以拯援。亦不信也。仲聖云。傷寒若吐。若汗。若下。若溫。鍼不解者。名曰壞病。知犯何逆。隨證治之。雖然理固如斯。而病已瀕危。大廈欲覆。一木恐難撐持。勞感經旬。因循誤治。邪陷正虧。喻氏所謂輕則半出。不出。重則反隨。元氣縮入。觀其暈汗。每現於寒熱之頃。此陰陽交爭。正不勝邪。脫機顯露。如盜入人家。門戶洞開。藩籬不固。主憊如斯。何堪與賊角勝負邪。請先救



人。後醫病。

安波按、病到此等地步。雖有盧扁。於命云何。

謝翁證治并答所問

年逾花甲。天真既薄。酒多穀少。脾胃復虧。書稱胃主四肢。脾主肌肉。脾宜升則健。胃宜降則和。覩此手足牽強。膚腠絀急。麻癢。豈非脾胃不和。失其升降之道乎。內經以胃之大絡。名曰虛里。出於左乳下。即今乳房腫脹。胃絡不和之徵。又按痰生於溼。溼生於脾。由土薄也。土厚則無溼。無溼則無痰矣。閱所服諸方。均從肝治。以爲凡病皆生於鬱。但土爲萬物之母。試以五行言之。木雖生於水。然江河湖海無土之處。則無木生。是故樹木之枝葉萎悴。必由土氣之衰。一培其土。則根本堅固。津汁上升。布達週流。木欣欣以向榮矣。又問腎氣丸能治手足麻木否。答曰。天一生水。水之凝處爲土。堅者爲石。其最堅者爲金。水土金原同一氣。凡人戴九履一。心肺居上。脾胃居中。肝腎居下。胚胎始基。先具兩腎。此腎爲先天之根。元牝之宅。腎氣丸先天藥也。能助右腎命門火。使腎火生脾土。脾土生肺金。肺金生腎水。

腎水生肝木。一方而五藏皆調。一法而水火兩備。且夫人之手足。猶樹之有枝也。人之腎命。猶樹之有根也。烏有根本充盈。而枝葉不敷榮暢茂者乎。引指使臂。灌葉救根。何可與言至道。

安波按。確論。引喻亦妙。

### 饒君揚翁脾虛瀉血肺燥咳嗽證治異歧

診脈細濡。恙經多時。始而便瀉。繼則下血。漸致食少欲嘔。形疲心憤。藥無靈效。略投辛溫。血下卽多。稍用清涼。飲食卽減。輾轉卻難借箸。然醫貴變通。未可見病治病。印定眼目。溼曰瀉。多成五瀉。病始於瀉。脾虛釀溼。治溼固宜於燥。但脾爲血之統。剛燥過劑。致動其血。內溢不已。陰絡受傷。無如養陰之品。恆多膩滯。又與脾胃欠合。此培其中州。扶其土母。不得不爲之亟亟也。昔賢治血證。每以胃藥收功。土厚自能勝溼耳。酌以淡養胃氣。甘益脾陰。宗嘉禾飲。服藥數日。穀食稍增。視其病狀。與痢相似。卽痢久正氣未有不虧。亦當培養本元。資其生氣。據述脘中如飢如嘈。是屬下多亡陰。兼傷其氣。觀其得食則安。情已顯露。方內參力加重。佐以烏

梅。取其酸能生津。并可攝血。再考方書。論久痢病根在大腸曲折之處。藥力所不能到。有用至聖丹一方。余倣其法。治驗頗多。可備採擇。經云。陰絡傷血。內溢。然藥用清熱養陰而不效者何耶。經曰。營出中焦。中焦取汁。變化而赤。是謂血。中焦蓋指胃而言。夫胃爲水穀之海。氣血俱多之經。病之淺者。飲食如常。旋去旋生。病之深者。穀少氣衰。所生不償所耗。脾與胃以膜相連。胃弱則生化無權。脾虛則統攝失職。書稱不問陰陽與冷熱。先將脾胃爲調和。萬物以土爲根。元氣以土爲宅。議進歸脾。理當如是。又述向有肝陽衝逆之恙。近兼舉發。方內加入首烏。既可益陰。又可固攝。非熟地滋膩可比。烏梅畏酸。不用亦可。但腸滑已久。須參鱉以固脫。李先知云。下焦有病人難會。須用餘糧赤石脂。便稀食進。大有好機。病纏兩月。氣血受傷。以故尻骨痠楚。頗車乍痛。便時急墜。行動乏力。初議專培脾胃。乃血脫益氣之法。續進歸脾。乃虛則補母之方。李士材先生云。先天之本在腎。後天之本在脾。二藏安和。百骸皆治。今既食增瀉減。脾胃已調。自當進加腎藥。治療匝月。諸證均減。寐食俱安。精神漸長。體素陰虧。加以便血。久傷陰絡。屢服胃藥。氣分雖充。陰猶未復。金爲生水之源。金燥不能生水。是以上膈焦乾。鼻癢咳噎。夫藥隨病

轉。移步換形。譬如珠之走盤。貴乎活潑。氣不足便是寒。氣有餘便是火。改議養陰。潤肺。金水相生。津同燥自濡矣。經言。虛邪賊風。避之有時。恙後體虧。加受外因。形寒頭痛。腕悶欲嘔。然舌無苔。脈不急。受邪知不甚重。正氣不充。未可直行表散。治宜輔正驅邪。外感已解。痔瘡舉發。肛痛便復見紅。然每日便止一次。并不瀉。瀉此乃痔血。非前腸血可比。痔平血當自止。知飢能食。食後腕中微痛。按胃司受納。脾主運化。脾健失職。運化較遲。若果食滯致痛。則飽悶不飢矣。地黃益陰固妙。稍嫌其膩。不利於脾。暫商養胃調脾。復診再籌進步。據論向來冬春左畔畏風。夏秋上焦熱悶。藥投清散。服時雖效。過後依然。揆度其故。諒緣營衛失和。藩籬不固。邪之所湊。其氣必虛。斷無六淫之邪。久羈人身之理。使非探本尋源。徒泛治標。無益。且俟新病瘥後。再爲圖之。下極爲魄門。魄門亦爲五臟。使痔血去多。陰虧陽冒。上焦燥熱。乾咳。陽加於陰。謂之汗。前則瀉多納少。故倣胃藥收功。茲則大便如常。多食善飢。病情迥別。丹溪謂男子陽常有餘。陰常不足。陽主動。陰主靜。理當育陰濟陽。靜以制動。據言每屆秋時。卽患咳嗽。服清潤之劑頗驗。日前感後。恐有餘邪。地黃滋膩。似未可服。按質虛偶感。邪本無多。旣已驅逐。諒無逗留。肺與大腸相



表裏。腸熱上熏。肺燥則癢。癢則咳。此咳嗽之故。非關於風。而實由於燥也。經云。燥者濡之。痔血咳嗽。同歸一途。無煩分治矣。

安波按。大腸爲燥府。以潤爲補。擬桑麻丸意。以表裏同治。

### 方女慢驚

週歲女嬰。病經兩月。消散多劑。脾元內傷。面青目定。肢掣指冷。證屬慢驚。勢頗危殆。無風可逐。無驚可療。治惟溫補脾陽。百中冀圖一二。病緣脾元大虧。木橫土困。變生慢驚。屢進六君溫健脾元。已臻小效。日來停藥。神形復疲。小兒臟腑柔脆。初生萌芽。非蒼枝老幹可比。根蒂傷戕。恐難圖效。盡人工以邀天眷耳。

安波按。驚風一途。初感卽發爲急驚。慢驚。總緣食積傷脾。脾傷則木恣其所侮。宜培土之中。兼以抑木。雖聖人復起。不易吾言矣。丁酉仲春誌。

### 某嫗本病風痺加感暑邪

本證風痺。近加受暑。脈虛身熱。倦怠口渴。經云。脈虛身熱。得之傷暑。暑傷氣是以

倦怠。夫暑乃六淫標邪。雖無大害。特恐質虧不勝病耳。商倣清暑益氣湯大意。以俟消息。脈仍虛急。熱甚心煩。夜不安寐。方內酌除耆朮。加以玉竹。本草言其用代參耆。不寒不燥。且能治風淫溼毒。寒熱痞瘧。大便五日未圓。小溲數熱。肺與大腸相表裏。又與膀胱通氣化。古人治暑證。每用生脈散者。以其有保肺清金之能也。病軀加受暑邪。恙經六日。兩進清暑益氣。輔正滌邪。形倦膚乾。熱仍熇熇。心煩口渴。溲數便閉。張介賓云。乾鍋未裂。潤自何來。但加以水。則鬱蒸暢然。而氣化四達。宗玉女煎。早服玉女煎。薄暮復視。病勢依然。暑邪留着。原難急驅。今日已服藥兩渣。未便再進。暫與荷蜜煎代茶。便通膚澤。往日早晨熱緩。交午復甚。心內如焚。今午熱勢平和。無焦煩輾轉之狀。病軀治標。亦不得已。茲既勢平。自當斟酌。無使過也。前藥退鬆。昨午其熱復甚。溲數口渴。心如煎熬。質虛恙重。况加石復。切慮變更。揣諸病情。得無心營胃液。為熱灼傷。以致焦煩嘈雜者與。宗阿膠雞子黃湯法。

安波按。方議均佳。

胡某令郎麻後頸生瘰癧。籌治二法

痲出於臟。由陰而及乎陽。火毒燔灼。營血耗傷。故痲後每多遺毒之患。不可補氣以助火。只宜養陰以退陽。此治法之大綱也。病由痲後頸生瘰癧。自春徂冬。滋蔓不已。鄙籌三法而論治焉。蓋瘰之未消。由毒之未淨。然毒即火也。欲去其毒。須去其火。要知火有虛實。病有新久。痲出之先。其火屬實。藥宜清涼。痲斂之後。其火屬虛。藥宜滋養。酌以六味地黃湯。煎送消瘰丸。庶乎瘰消而元氣不傷。且人以胃氣爲本。久病服藥。必究脾胃。此養陰輒堅消其瘰。培補脾胃扶其元。道並行而不悖也。

安波按。妙論侃侃。令讀者口齒生香。

### 家若谷兄乃郎脅痛

感證已逾兩旬。脅痛依然不愈。按外感脅痛。病在少陽。內傷脅痛。病在厥陰。今外邪解經多日。脅痛何以不瘳。既無情志抑鬱。定屬動作閃力之傷。外邪引發耳。夫久痛在絡。絡主血。防其蓄瘀動紅。從金匱肝着例。用旋覆花湯一法。安波按。病久入絡。理固宜然。藥內再參入搜痰滌飲。則無遺蘊矣。

## 梅氏女嘔吐經閉

病逾四載。起初嘔吐。漸致經期不行。溫清攻下。遍投無驗。醫乃視爲癆瘵。棄而不治。診脈不數。亦無風消息。貴寒熱咳嗽兼證。似與癆瘵有間。果真損怯已成。病入膏肓。焉能久延歲月乎。經云。治病必求其本。又云。先病爲本。後病爲標。恙由嘔吐而起。自當以嘔吐爲病之本也。苟能止其嘔吐。則倉廩得藏。生生有賴。氣血周流。諸證不治而自安矣。考諸方書。論吐證非止一途。斯病既非真寒。又非實火。所以溫清俱不投機。至於下法。乃治傷寒暴急之方。施於內傷久病。殊屬悖謬。詢其飲食下噎。停注膈間。不肯下行。旋即嘔出。衝逆不平。時時噯噫。所以然者。乃肝爲受病之源。胃爲傳病之所。胃宜降則和。肝氣橫逆。阻胃之降。致失其和而爲患也。夫脾爲溼土。胃爲燥土。六君異功。止可健運脾陽。今病在胃而不在脾。溼燥異歧。不容僥統而論矣。再按肝爲將軍之官。臟剛性急。木喜條達。最嫌抑鬱。古人治肝病。辛散酸收甘緩。與夫補水生木。培土禦木。方法多端。非僅伐之瀉之而已。治宜安胃制肝。厥陰陽明兩調。王道無近功。戒怒舒懷。以佐藥力爲要。



安波按。灶心土溫中除嘔。平木制肝。此病在所必需之物。

### 葉某喉痛

病逾一年。醫稱陰虧陽升。水不制火。育陰清火潛陽。屢治無效。若云癆瘵已成。非草木之所能治。現在飲食如常。脈不細數。似又不侔。求其何以屢治不效之故。理殊難測。豈非另有隔膜未窺透耶。據述病緣舊春郊外垂釣。感冒風熱而起。經云。肺主皮毛。皮毛者。肺之合也。皮毛先受邪氣。邪氣以從其合。此肺爲受病之原。比諸勞風。法在肺下。巨陽不能引精。青黃之涕。不能咳出。適足傷肺之例。當時雖曾服過清解之劑。但外邪入肺。如油入麵。有倉卒難以浣滌者。膠黏醞釀。鬱而爲熱。鬱熱熏灼。津液受傷。所謂因病致虛者。由肺病而累及之也。何以言之。凡人咽喉兩管。咽通於胃。喉通於肺。今喉雖辣痛。而納食無礙。可知其病在喉而不在咽。人身之氣左升右降。肝主升。其脈榮於左。肺主降。其脈榮於右。今左畔肢體如常。而病端偏着於右。足見其病在肺。而不在肝。肺脈雖榮於右。然位居上焦。爲臟腑之華蓋。觀其上腕煩熱。時冲喉嚨。頸下皮膚作癢。搔爬如癩。咯吐痰色灰黃等因。其

爲肺臟蘊熱。金燥液乾。情已大露。再按大便堅輟。數日始一更衣者。肺與大腸相表裏也。倘果因虛致病。悉屬內傷。水不制火。而致喉痛。早已咳血音嘶。走入怯途。焉能緩待。且滋陰壯水。藥證相符。何以久服不應耶。然病情雖窺一斑。治法尙難計議。蓋治病須分新久。用藥貴審機宜。病初體質無虧。治惟滌邪。無庸顧慮。茲則病魔經歲。正氣已虧。豈容孟浪。進而求之。肺爲嬌臟。喜潤惡燥。邪熱久處肺中。金被火刑。津乾液涸。是以養陰藥餌。只可滋其津液之乾。莫能驅其蘊伏之燥耳。古人治燥甚少良方。惟西昌喻氏。會悟經旨。發明燥病根源。見得諸氣膹鬱。諸痿喘嘔。以及心移熱於肺。二陽之病發心脾。各種病機。俱關於肺。所立清燥救肺一方。頗有深意。蓋輔金制木。卽所以治肝。清肺澄源。卽所以治腎。僭倣其法。諒當有應。安波按。此方之義。無遺蘊矣。

### 朱百春兄令嬭半產崩暈寒熱似瘧

質虧。生育多胎。此番重身三月。又復半產。氣隨血脫。昏暈頻發。幸賴獨參湯挽回。日來熱發不退。時時怯寒。舌白。喜飲熱湯。頭疼形倦。脈急無力。合參脈證。明是氣

血兩虛。即有外邪。投鼠忌器。丹溪云。產後當以大補氣血為主。他證從未治之。做甘溫除大熱之旨。下午復診。脈象彷彿。早間服藥。安眠片時。頃復寒熱交作。此屬陰陽兩虛。正氣不勝。非瘧證也。原方更進一渣。明日再議。兩進甘溫。昨午寒後熱甚。扶掖下床。小溲遺出。直至半夜。熱始漸緩。切恐今午寒熱復來。撐持不住。揣其寒熱之故。非陰陽兩虧。即正虛邪陷。當此危迫。不問有邪無邪。一意扶元固本。蓋輔正即所以祛邪也。本草謂人參能回元氣於無何有之鄉。古人治氣隨血脫之候。悉仗參力斡旋。昨藥分兩固雖加重。惜乏參力。故難奏效耳。昨午寒熱仍來。神形益倦。二更後熱勢漸平。然起床勞頓。即作昏暈。頃進診間。暈又復發。連服溫補大劑。尙未見功。即云寒熱由於外因。覩此狼狽情形。焉可再從標治。仍守原制。佐以河車。亟挽真元。醫當醫人。不當醫病。昨夕昏暈頻作。頃診右脈虛栗。左猶帶數。體倦無力。氣怯懶言。虛象無疑。病緣質虧半產。加之寒熱糾纏。波濤洶湧。現在熱退神清。固見小效。奈病來勢暴。大廈搖搖。前議補元歸脾。更從養營進步。兩日未診。脈象依然。在前發熱之際。脈由熱搏而數。今外熱既退。理當和緩。何至數猶未平。口不乾渴。并無火象。無非產時血去過多。營陰受虧。脈乃血派。是

以急數不平耳。但諸藥皆是草木根莖。人身真元耗傷。倉卒焉能挽轉。參力既艱。他策又無可畫。前方減去辛溫。稍佐柔和之品。產後崩暈。血氣大虧。陰陽樞紐不固。見出種種疲憊之候。賴諸溫補藥餌。竭力挽回。寒熱已除。胃安穀納。無如事多磨折。腎生瘍毒。痛楚不安。瘍甫潰膿。痛勢稍定。又加時感溼邪。腹痛便瀉。節外生枝。暫與香砂六君。俟其痛瀉愈後。仍須峻補真元。冀圖恢復。安波按。先生方必中肯。劑不虛投。但此婦真元已敗。冥遊已近。不過聊盡人事矣。

### 王氏婦妊娠二便閉塞

孕婦脈來滑數。證見便溺不通。二陰牽脹。足膝浮腫。醫藥滋陰。疏利升舉。屢施不驗。按肺與大腸相表裏。又與膀胱通氣化。是二便之通閉。肺有所關係焉。金燥水無以生。清肅之令不能下降。是以二腸交阻。喻氏謂人身之氣。全關於肺。肺清則氣行。肺濁則氣壅。清肺之熱。救肺之燥。治其源也。氣行則壅自通。源澄斯流清矣。凡禽畜之類。有肺者有洩。無肺者無洩。故諸水道不利而成腫滿者。以治肺爲急。



前商清燥救肺。小溲雖通。大便未暢。足腫未消。二陰仍然牽脹。夜臥不適。口苦舌黃。原方加枯芩梨汁。

安波按。議論神妙。使讀者滿舌生津。

### 李某鼻淵孔潰

經云。肺氣通於鼻。又云。膽移熱於腦。則辛頰鼻淵。可知鼻淵一證。病端雖責於肺。實由膽熱移腦之所使。然證經數載。腥涕流多。肺腎爲子母之藏。金被火刑。陰液受傷。加之鼻竅右側。舊夏曾已穿潰。甫經收口。左側又潰一孔。至今紅腫未消。經謂熱勝則腫。雖由膽移之熱。醞釀爲患。但治病須分新久。診脈數大無力。是屬恙久。陰虛陽浮。非新病實熱可比。苦寒傷胃。洵非所宜。計惟壯水保金。冀其水升火降。庶幾紅腫可消。潰口可斂也。

安波按。擬清燥救肺法。輔金剝木。卽所以治膽清肺。澄源。卽所以治腎。

王某背瘍潰後餘毒未淨

癰從六腑生。疽從五臟生。營氣不循。逆於肉理。乃生癰腫。此先聖論癰疽之大端。瘍科之綱領也。證起月餘。毒發於背。始初平塌不痛。藥服溫補內托。得以由陰轉陽。掀腫潰膿腐化。新生瘡口漸斂。無如一波未平。一波又起。日前齧微腫痛。漸次腫甚流血。病中飲食本少。茲因齧腫。米汁難啜。人以胃氣爲本。瘍潰之後。胃氣空虛。全藉飲食精華。資其生氣。既不安穀。倉廩必傾。何恃不恐。且瘍後與產後同理。應培養氣血。現在齧腫咽乾。下利糞色如醬。利下齧腫稍鬆。利止腫痛復劇。詳審病機。似乎餘毒未清。奈病久困頓如斯。固正則火勢不平。清火則正氣不守。如何借箸。姑倣少陰不足陽明有餘之例。宗玉女煎方法。蓋腎主骨。齒者骨之餘。上齧屬手陽明。下齧屬足陽明。據理推詳。冀圖倣倖。安波按。擬於玉女煎外。再參入清胃散意方。有升麻使清升濁降。丹皮以疏其下滯。則斯候之上下處病。厥義無遺漏矣。

### 王錫章肺腎虛喘畏補致脫

經云。呼出心與肺。吸入腎與肝。是肺主出氣。腎主納氣。肺爲氣之主。腎乃氣之根。

母藏子宮。子隱母胎。金水相生之義也。前商保金生水。納氣歸根。正本澄源。治不爲謬。據述服藥。腕中微覺痞悶。心疑藥補。即不敢嘗。此由胃虛不能傳送藥力之故。與補無干。如果補之爲害。何喘不見增。病不見甚耶。經曰。能合脈色。可以萬全。豈色悴神疲。喝喝不繼者如是。而能以耗散收功者乎。先哲有云。喘生毋耗氣。氣本弱而復耗之。元本虧而復竭之。抱薪救火。入井下石。脫機甚速。勿怪言之不祥。安波按。讀至斯案。不覺浩歎。雖有回生妙術。奈不見信何。近來見夭枉者甚夥。大抵彼壽固止於此。而吾之道終於不行。豈非命耶。

### 吳媼肺痺

恙經三月。脈大而急。證見噎咳氣築。胸滿背脹。夜不安臥。臥則氣衝。呼吸不利。目爛舌赤。口乾心煩。審諸脈證。是屬肺感燥邪。加之抑鬱。痰氣膠結。肺竅阻閉。清肅失司。釀成肺痺危險。蓋肺爲氣之主。肺氣逆則諸氣皆因之而逆矣。平素質虧。受補。茲則補劑不投。體雖虛而病則實。不去其病。徒補無益。經云。諸氣臞鬱。皆屬於肺。秋傷於燥。冬生咳嗽。計惟清燥宣痺。幸得胸展痺開。方許機關紐轉。倣葦莖湯

遵金匱法。服藥四劑。喉口燥象稍減。舌根焦苔亦退。脈象依然。痺猶時發。甚則胸膈脹。喘喝不已。欲人搥摩。咯出濁痰。略覺寬展。病由燥邪蘊伏上焦。治節不行。痰壅無形之火。火灼有形之痰。交相爲患。夫痺者閉也。內閉則外脫。至危至急。無如上焦不開。未能填補其下。是以每投補劑。其閉更劇。按肺竅蘊結之痰。如屋之遊。樹之蘿。石之苔。膠黏滋蔓。豈尋常消痰之品所能芟刈。原方加葶皮海石。輕清宣痺。病象未減。下虛不能納補。上實通之無功。消補兩難。頗爲棘手。據述每痺甚時。惟飲煎水則痰氣稍平。卽此推求。定有頑痰膠黏肺管。阻塞氣機。葶莖頻投不應。惟有進步葶塵一法。非不慮及老人質虧難任。當此危迫。畏首畏尾。身其餘幾。奈何。葶莖葶塵。乃金匱治肺痺兩大法門。前因年高恙久。不敢驟用葶塵峻攻。惟取葶莖輕清宣痺。冀其病去。元氣不傷。服藥雖見小效。痺終未宣。前論燥熱醞釀爲痰。肺竅氣機阻塞。清肅失司。因而逆滿。却非謬語。夫頑痰滋蔓。譬諸頑民。不服王化。不忍猛而寬。則萑苻盜風。何由而息。所加葶塵。雖係無可如何。亦理之所當然。非徒行險僥倖也。現在痺勢稍鬆。足見有故無殞。從來峻劑。原屬可暫而不可常。然證經數月之久。痰熱瀰漫已極。甫得稍開。若旋行易轍。病根尙在。慮



其復萌。今早鼻仍流血。可知肺火未清。方加石膏山梔竹瀝。徹其痰熱餘波。今夜得以痺再減輕。明日可爲轉手。老人病逾百日。痰凝氣壅。肺痺不舒。上實下虛。原難想法。數番診視。因其痰火勢盛。不能受補。無已。初投葦莖輕清宣肺。繼進葶藶。飲除痰。佐以膏梔竹瀝。以徹痰熱餘波。此皆古人成法。非杜撰也。今痺象稍減。虛狀漸露。高年恙久。恐其元氣不支。商佐保金輔正。

安波按。先生用方用法。絲絲入籠。不比近來庸流。溷亂籠統者也。

### 施婦感證

證逾三候。始而寒熱溷淆。繼則不寒單熱。日晡熱甚。黎明漸退。閱方初投逍遙。次用桃仁承氣。愈醫愈劇。食少便瀉。足腫腹脹。熱甚脹亦甚。熱緩脹亦緩。若云肝氣。未必發熱。亦不必脹。隨熱至。若云血痺。當在下焦。不應脹在中脘。求諸病因。非關氣滯血凝。乃伏邪留着故也。已任編云。秋時晚發。感證似瘧。本是伏暑之病。暑必挾濕。盤踞膜原。膜原卽中焦部位。邪伏既久。乘時而發。自裏達表。是以外熱內脹。至於便瀉足腫。更屬溼病無疑。欲消其脹。須祛其邪。邪一日不去。脹一日不除。所

謂傷寒究六經。溫暑辨三焦。上焦不解。勢必蔓延。中下淡滲。佐以微辛。蓋無形之邪。未可作有形攻擊耳。前議服藥汗出。熱退脹減。伏邪外達之機。蓋暑溼伏邪。與風寒外邪不同。新邪當先微表。伏邪當先清裏。裏清表自解也。日來兼見咳嗽。瀉仍未止。按外感以嗽爲輕。腑病以通爲補。嗽瀉均係伏邪之出路。不可止遏。安波按。擬薄荷山枝辛苦以清裏熱。茯苓皮大豆卷滑石通草之甘淡以滲外溼。杏仁橘紅以開肺。半夏佩蘭以醒脾。

### 江婦崩證

女子二七而天癸至。任脈通。大衝脈盛。月事以時下。故曰月經。經者常也。反常則爲病矣。是以婦人首重調經。經調則百病不生。失調則諸證蜂起。夫血生於心。藏於肝。統於脾。而衝爲血海。血猶水也。若江河之流行。設有枯涸崩決。其爲患也大矣。求其致病之因。有謂血枯者。蓋女子以肝爲先天。素性多鬱。木鬱生火。火灼陰傷。以致經血日耗。地道不通。經言二陽之病發心脾。有不得隱曲。女子不月者。此也有謂崩決者。崩如山冢峯崩。決如波濤橫決。蓋血屬陰。靜則循經營內。動則錯

經妄行。經言陰虛陽搏謂之崩。陽氣內動。發爲心下崩者。此也。病經日久。形瘦陰虧。木火鬱勃。舊春經阻崩暈。現又愆期兩月。勿愁血之不行。切恐崩患復發。議養腎陰以濟心陽。兼培衝任。冀其生生有自。血氣調勻。無錯妄之虞。復經常之度。不徒病去人安。更可勿藥有喜。

安波按。擬自製補煉丸養腎陰以濟心陽。培衝任以贊其職。

### 江氏子足痺誤治成廢

經云。風寒溼三氣雜至。合而成痺。風氣勝者爲行痺。據述證由右足膝蓋痛引腿胛。漸移於左。狀類行痺。行痺屬風。治以驅逐。理不爲謬。但邪之所湊。其氣必虛。况童質稟薄。腎元未充。驅逐過猛。血氣受虧。肝主筋。筋無血養則攣急。脾主肉。肉無氣煦則枯瘦。以致腓日乾。髀日腫。足不任地。釀成廢疾矣。古云。治風先治血。血行風自滅。閱所服諸方。非全無治血之品也。無如桂麻羌獨。藥性太狠。難以監制。故祇見其害。不見其益。在病初血氣未衰。猶可輔驅并行。今則疲憊如斯。尙有何風可逐。何絡可通。倘再求速功。見病醫病。非但病不能醫。而命亦難保矣。要知疾既

成廢。欲圖轉澤同枯。誠非易事。惟有培補肝腎一法。膝爲筋府。肝腎之脈。麗于足。足得血而能步。復有調養脾胃一法。四肢皆稟氣於胃。脾病不能爲胃行其津液。脈道不利。筋骨肌肉皆無氣以生。故不用焉。脾強胃健。四肢得稟穀氣。脈道流行。自能充膚熱肉二法。雖不言治病。然治病之旨。在其中矣。安波按。此症雖經治痊如語。而童質先稟薄弱。已見一斑。大約不壽之徵矣。

### 葉翰周世姪感證反復狀類內傷

曩議和中通腑。大便解後。痞悶漸舒。穀食稍進。時候寒暄不常。質虛最易加感。以致寒熱愈而復作。日來寒象雖除。熱猶未淨。脈虛近急。是屬節外生枝。尙非本證。變幻。特元虧未復。腠理空疏。起居最宜謹慎。若謂此番寒熱不關外感。全屬內傷。則是陰陽兩虛。奇經爲病。不應急驟至此。且內傷之寒熱。當在日晡。日日如是。不能偶然。其狀洒淅。亦不若此之重。據理推詳。似當不類。現在大便又復旬餘未解。腹中雖無所苦。總覺欠舒。呆補惟恐不受。所以然者。病由滯凝氣滯而起。醫藥龐雜。胃腑欠和。輪化失職故耳。淡養胃氣。甘益脾陰。參以潤腸。不至踴躍再生。自可



漸躋蔗境。復診便雖半月未圓。腹無所苦。下不嫌遲。毋庸亟亟。日前感復。寒熱作後。至今申刻仍有微潮。熱時口渴。交戌汗出始退。固屬餘波未清。但熱久津液必傷。商進養陰。陰血下潤則便通。非徒退熱已也。感證反復。熱盛陰傷。腸枯便秘。疊進養陰濡液。熱退餐加。脈急已平。神采漸轉。據述昨午便圓燥糞。依然努掙艱難。足見病魔經久。元氣受虧。津液未充。便通猶防復閉。按救陽氣當用建中。救陰液須投復脈。宗千金方法。佐以人乳團魚燕窩。血肉有情。且俟液復虛回。胃強脾健。再議善後之圖。

安波按。便閉一證。病人每有一通爲愈之意。蓋糞呆物也。必藉中氣之迭送。故便時努力則易下。屢見病後有一二月之久。體已復原。始得暢然下注。可見便閉一途。非徒補血潤腸爲能事。而益氣順氣之助。豈可漠然不道乎。是以經文中氣不足。溲便乃變。

〔清〕

何澹安 著

# 何澹安醫案

中國醫學大成



## 何澹安醫案提要

丹徒縣志云。何游號澹安。金琇子。生而穎悟。過目不忘。其先世皆以醫學著名朝野。慮家學之或墜也。苦志習醫。家藏醫書甚多。無不悉心考究。診脈擬方。別有神解。於是聲名大振。四方爭延致之。凡經診視。立奏奇效。著有醫學折衷十卷。何氏十三方註解一卷。及醫案等書云。此卷即先生醫案未刊稿本。炳章爲其別類編次。分列類中。肝風、眩暈、頭痛、咳嗽、吐血、失音、肺痿、虛勞、遺精、淋濁、尿血、癰閉等類。法則崇尚葉派。用藥善能權變。識證之精。能得病因主腦。且不泥古方。不膠成見。宜其奏效如神。深恐湮沒不彰。爰爲編訂校刊行世。



何澹安醫案提要

# 何澹安醫案目錄

類中	一
肝風	七
眩暈	二二
頭痛	二四
咳嗽	二六
吐血	三九
失音	五六
肺痿	五九
虛勞	六二

何澹安醫案 目錄

二

遺精

七一

淋濁

七五

尿血

七八

小便閉癢

八二

# 何澹安醫案

清 丹徒 何 游澹安著

鄞縣 曹赤電炳章編

## 類中

頭暈體豐。心悸脈動。類中之漸。須安養調治。

熟地四錢

茯神二錢

甘菊五分錢

豨薟草五分錢

石決明四錢

老桑葉五分錢

歸身二錢

棗仁三錢

麥冬二錢

白蒺藜四錢

柏子霜五分錢

陽不交陰。鼻塞不通。兩膝麻而不煖。乃命門火微也。用潛陽溫補。



熟地四錢

茯神二錢

杞子二錢

半夏一錢五分

胡桃肉二錢

歸身二錢

棗仁三錢

茯苓一錢五分

新會皮一錢

少寐頭暈。陽不交陰也。六脈緊數。無疑肝火挾痰爲患。防其類中。

熟首烏

法半夏

茯神

石決明

橘紅

羚羊角

麥冬肉

棗仁

白蒺藜

川鬱金

丸方。去羚羊、蒺藜、鬱金。加於朮、膽星、石菖蒲、淮牛膝、鮮竹茹、鈎鈎。湯泛法丸。卒然厥暈。膈次脹楚。六脈弦數。當用佐金法。

川黃連

歸身

茯神

川棟子

木香

竹茹

淡吳萸

白芍

棗仁

石決明

橘葉

陽本虧而厥陰氣鬱。以致身心勞動。即頭暈肢麻。脈來弦滑。類中之機。預爲調治。

真西黨

石決明

茯神

草鬱金

橘紅

熟首烏

白蒺藜

棗仁

淮牛膝

竹茹

營陰內傷。血不養肝。以致惡寒脈軟。膈脹作痛。兼之舌本不利。語言不清。須寬心安養。可免此患。

紫丹參三錢

法半夏五錢

茯神二錢

炒白芍五錢

川鬱金一錢

大生地四錢

煨木香四分

棗仁三錢

淡菰蓉五錢

橘葉三片

肺胃不清。不能言語。此濕痰凝於肺胃。清竅不利使然。擬方暫服。

炒白朮二錢

法半夏五分錢

麥冬二錢

歸身五分錢

淡乾薑七分

炒毛朮五分錢

新會皮一錢

茯神二錢

白蒺藜四錢

聲音不清。不能言語。屬下焦氣虧。惟宜溫補。

川桂枝

法半夏

茯神

川貝

白芥子

薑汁

製遠志

新會仁

棗仁

杞子

石菖蒲

又丸方

黨參二兩

熟地三兩

夏麴一兩

茯神五錢

菴蓉一兩

橘白七錢

於朮二兩

菖蒲一兩

五味五錢

膽星五錢

棗仁二兩

肉桂四錢

淡蜜水丸。

肝火挾痰。卒然暈厥。當此發生之候。疏風清鎮治。

羚羊角

法半夏

白蒺藜

黑山梔

石決明

熟首烏

橘紅

天麻

淮牛膝

石菖蒲

中虛肝鬱。心嘈膈脹。須開懷調養。否則防類中。

西黨參

歸身

茯神

法半夏

天麻

製於朮

白芍

棗仁

煨木香

橘葉

接服歸脾丸。

手足麻木。面發紅塊。風症將成。和營祛風兼理。



大熟地

歸身

青防風

紅花

厚杜仲

製於朮

川斷

鹿角霜

木防己

桂枝

煉蜜爲丸。

風濕襲於營衛。以致手足麻木。肌膚不仁。以祛濕養營調治。

真茅朮

熟首烏

川斷

白蒺藜

秦艽

川牛膝

製於朮

炒歸身

木瓜

稀莨草

杞子

生米仁

熬鹿角膠 三兩爲丸。

右手足腫痛不仁。艱於言語。此風入絡脈。痰蒙清竅也。宜祛風豁痰治之。

羚羊角

秦艽

刺蒺藜

歸身

防風

法半夏

木瓜

五加皮

橘紅

忍冬藤

積勞內虧。腰痛肢痿。津液內竭。并六脈沉弱。少力。必須溫補。否則防類中。

黨參

熟地

茯神

杞子

北五味

麥冬

歸身

棗仁

菴蓉

胡桃肉

陽微濕困。腰膝無力。軟中之基。須戒酒謹慎。

製於朮

歸身

狗脊

川附子

胡桃

大熟地

杜仲

杞子

五加皮

肝風

質弱火炎。耳鳴頭暈。膈次不寬。先用疎肝清理。然後進補奏效。

製首烏

青蒿

石決明

花粉

澤瀉

元生地

甘菊

老桑葉

鈎鈎

生甘草

耳鳴頭暈。六脈弦滑不柔。肝火挾痰爲患。先清後補。

製首烏

黑山梔

石決明

池菊

白蒺藜

法半夏

茯苓

老桑葉

淮牛膝

卒然厥暈。膈次脹楚。六脈弦數。當用左金法。方在類中複

川黃連

茯神

炒白芍

木香

川棟子

竹茹

淡吳萸

棗仁

石決明

歸身

真橘葉

肝風挾痰。防其癰厥。六脈弦數。暫用疎肝滌飲治。四肢麻時昏沉

製首烏

茯神

白蒺藜

石決明

鈎鈎

法半夏

鬱金

香附

黑山梔

肝風挾痰。統體麻木。兼驚惕不寧。屢欲嘔惡。乃肝邪侮胃。中氣虛也。宜標本兼顧。

臥則不寐行則不能坐則足腫臥則腫退症屬溼痰並非脚氣

於朮

法半夏

白蒺藜

五加皮

茯神

十大功勞

茅朮

白歸身

秦艽

石決明

棗仁

肝風挾痰。上焦清空竅不利也。以清鎮疎肝降氣治。其人壯時暈厥跌倒



羚羊尖

法半夏

黑山梔

茯神

橘紅

陳膽星

製首烏

石決明

白蒺藜

棗仁

降香

咽痛欬痰。膈脹便澹。此中虛厥陰化風。宜調中潤肺治之。

桑白皮

橘紅

炒蘇子

桔梗

薄荷葉

生耆

鈎鈎

大力子

赤苓

冬瓜子

覆診

炒蘇子

炒扁豆

橘紅

桔梗

生甘草

川石斛

生米仁

茯苓

鬱金

膈脹目昏。舌本手指麻木。當此厥陰用事之候。未敢遽補。鄙擬疎風滌飲法。以視動靜。

百蒸於朮

蒺藜

茯神

歸身

石決明

薑製半夏

甘菊

棗仁

新會

冬桑葉

時疾後驚恐。以致下部精滑。上冲嘔惡。觸動肝風。膈脹浮腫。兼右脈滑大。先宜理胃疎肝。然後補其偏勝。

薑製半夏

廣藿

代赭石

鈎鈎

竹茹

赤茯神

黑山梔

白蒺藜

橘紅

肝鬱生風。內熱膈脹。不思飲食。以通爲補。

何澹安醫案 肝風

一二

元米炒川連

廣 藿

新 會

大麥仁

炒白芍

法半夏

鬱 金

橘 葉

歸 鬚

荷 蒂

木鬱生風。心悸口乾。兼之腹鳴侮土。不克輸津長肌。恐成單腹。莫作輕視。

川 連

法半夏

炒白芍

澤 瀉

橘 葉

廣 藿

白茯苓

焦神麴

黑山梔

接服方

土炒於朮

法半夏

茯 神

白 芍

黑山梔

川石斛

白歸身

棗 仁

橘 葉

澤 瀉

肝失所養。內風煽爍。時身心煩動。氣機呼吸不利。以致痰喘。現診脈象。並不細軟。并脾胃無咎。未必陽本虧也。茲此以甘露飲加減法。其人七旬每於亥子時發痰壅氣逆血少肝亢

真西黨

熟地

淡天冬

茯神

柏子霜

元生地

牛膝

大麥冬

棗仁

鬱金汁

丸方

西黨參

半夏麴

茯神

柏子霜

石決明

枇杷葉

大熟地

沉香末

棗仁

胡桃霜

淮牛膝

血虛肝鬱。厥陰化風。病經三載。以柔肝培本。恆服奏效。

熟地

製首烏

茯神

杞子



甘菊花

歸身

石決明

棗仁

牛膝

老桑葉

接服方

炙黃耆

阿膠

茯神

甘杞子

石決明

大熟地

歸身

棗仁

柏子霜

老桑葉

肝火挾痰。卒然暈厥。當此發生之候。宜疎風清鎮治。

羚羊角

法半夏

石決明

白蒺藜

橘紅

熟首烏

天麻

黑山梔

淮牛膝

菖蒲

厥陰之氣有餘。不時發熱。熱甚生風。神昏厥逆。當此升令。宜用清心疎鎮法。不月事

製首烏

麥冬

歸鬚

石決明

枳實

半夏麴

茯神

黑山梔

川鬱金

益母膏沖二錢

營液交虛。心陽飛越。上實下虛。易飢膽怯。延久不痊。神思倦怠。脈數無力。鄙擬甘溫潛納法。附方酌用。

炙黃耆二錢

麥冬三錢

茯神二錢

杞子三錢

新會紅一錢

大熟地五錢

五味四分

棗仁三錢

牡蠣煨四錢

龍眼肉二錢

肝膽熱鬱生風。統體作痛。陽明濕邪下注。以致口渴不清。左脈緊大。先用疎風分理。然後進補奏效。

羚羊片

歸身

白蒺藜

赤苓

生米仁

生白朮

秦艽

川續斷

草薢

忍冬藤

接服方

製首烏

白朮

煅牡蠣

沙苑

細桑枝

歸身

川斷

生米仁

赤神

生甘草

神志不清。頻發厥暈。上焦空竅蒙閉也。以瀉心降氣治。

川黃連

法半夏

代赭石

枳實

竹茹

風化硝

炒蘇子

白茯苓

牛膝

菖蒲

厥陰氣鬱。鬱久生風。風甚生痰。中焦清竅不利也。須戒葷及酒。不致神昏顛倒。

羚羊角

石決明

法半夏

茯神

殭蠶

甘菊花

明天麻

葶藶子

黑山梔

竹茹

厥陰化風。痰氣壅於上焦。以致右脈滑數。癰癰不消。以和肝化痰法。

製洋參

象貝

秦艽

石決明

冬桑葉

夏枯草

麥冬

橘紅

白蒺藜

黑山梔

久患休息。復兼咳血。二端俱愈。惟是內風扇動。以致心悸頭暈。右脈弦數。宜黑歸脾通補。徐徐安痊。

製於朮

煨木香

茯神

炒白芍

炙甘草

炒阿膠

遠志肉

棗仁



炒丹皮

厥陰氣鬱。久而化風。營陰暗耗。不寐。火動及上焦。脈絡痠痛。當此發生之候。宜疎風靜養。

熟地

歸身

茯神

杞子

柏子仁

洋參

麥冬

棗仁

龜板

十大功勞

厥陰化風。神不守舍。屢汗。火升。心悸不寐。以安魄苦泄治。

川連

歸身

茯神

石決明

黑山梔

半夏

麥冬

棗仁

白蒺藜

橘葉

內風煽燄。肺氣不宣。以致鼻竅不利。面部紅腫抽動。以清金化風。熱邪自洩。此方

暫服。

羚羊角

桑白皮

石決明

甘菊

稀莨草

荊芥

生米仁

地骨皮

知母

生甘草

接服方

熟首烏

歸身

桑葉

澤瀉

生甘草

麥冬肉

丹皮

稀莨

黑山梔

陽明有餘。少陰不足。水不涵木。肝火內動。脈數肢痿。宜祛風培水調治。

熟地

歸身

牛膝

杞子

生虎骨

十大功勞

首烏

秦艽

何澹安醫案 肝風

木瓜

赤苓

元武板

多痰頭暈。四肢麻木。由脾虛挾濕。血少肝風。六脈滑大不柔。以平肝燥土調治。

炒熟地

於朮

歸身

白蒺藜

橘紅

法半夏

茅朮

白芍

甘杞子

平昔好飲。操勞火動。傷絡據曾失血。肝失所養。陽氣易浮。立春節近。當從心脾腎調治。

西黨

遠志肉

茯神

米仁

蛤粉炒阿膠

麥冬

女珍子

棗仁

牛膝

桂元肉

水不涵木。肝風內熾。肺氣受尅。肌體不潤。筋骸不利。痛痺之漸。培水柔肝兼治。

製首烏三錢

秦 芫五分錢

稀簽草二錢

五加皮三錢

柏子霜五分錢

十大功勞二錢

淨歸身二錢

米 仁四錢

地膚子五分錢

冬桑葉五分錢

生甘草四分

肺腎兩虛。多痰欬逆。肝風內熾。痰火壅結。腫連頤頸。暫用滌痰清理。然後進補。

生綿耆

製首烏

知 母

橘 紅

生鱉甲

真川貝

蛤 殼

桑 葉

厥陰氣鬱。絡傷經敗。肝失所養。木風愈甚。脈不柔軟。以通爲補。擬用黑逍遙。佐苦  
泄法。

元米炒川連五分 製於朮五分錢

炒黑棗仁三錢

製香附三錢

石決明四錢

炒黑柴胡八分

白茯苓二錢

炒黑丹皮五分錢

草鬱金一錢

橘 葉三張



水虧肝風內動。以致虛裏穴跳動。以交心腎。和肝調治。

熟首烏三錢

川石斛三錢

茯神二錢

黑山梔五分錢

牡蠣煨四錢

大麥冬二錢

炒白芍五分錢

棗仁三錢

新會一錢

湘蓮七粒

始疾咳噎。繼之帝丁脹楚。此邪入厥陰爲患。以培水化風治。

陳阿膠

大力子

人中白

歸鬚

生甘草

淮牛膝

馬兜鈴

枇杷葉

青黛

新絳屑

眩暈

頭暈體豐。心悸脈動。類中之漸。須安養調治。

熟地 茯神 麥冬肉 甘菊  
白蒺藜 老桑葉 歸身 棗仁  
石決明 稀莖 柏子霜  
質弱火炎。耳鳴頭暈。膈次不寬。先用疎肝清理。然後進補。

元生地 青蒿 石決明 花粉  
澤瀉 製首烏 甘菊 老桑葉  
鈎鈎 甘草

耳鳴頭暈。六脈弦滑不柔。肝火挾痰爲患。先清後補。

製首烏 法半夏 淮牛膝 白蒺藜  
茯苓 石決明 甘菊花 黑山梔  
冬桑葉

頭暈膈脹。陰虛肝絡不舒也。理氣疎風兼治。

歸身

茯神

甘菊花

川鬱金

女珍子

橘葉

白芍

棗仁

白蒺藜

製香附

阿膠

頭暈多痰。心悸少寐。坎離不交。心志不寧。以苦泄安神。自然安適。

川連

辰砂拌麥冬

棗仁

丹參

橘紅

法半夏

雲茯神

龍齒

橘葉

竹茹

頭痛

頭風數載。由肝腎不足。兼表陽空疎。稍觸外感。內風輒動。

炙綿耆

女珍子

歸身

石決明

青鹽少許

大熟地

冬桑葉

茯神

甘菊

氣虧表弱。客邪易入。觸動肝風。頭痛嘔吐。以固表養肝治。

炙綿耆

白歸身

白蒺藜

甘菊

黑山梔

製首烏

法半夏

石決明

白芍

桑葉

膈脹頭痛。少陽熱鬱也。防其腹滿。

柴胡

石決明

鬱金

新會皮

牛膝

黑山梔

瓜蒌皮

白芍

澤瀉

佛手

表虛頭痛。甚則腹泄。嘔吐。此肝風侮土也。暫用溫膽法。

川連

法半夏

茯苓

池菊

黑山梔

焦朮

石決明

廣蘆

白芍

咳嗽

咳嗆脾泄。飲食日減。六脈軟弱少力。土不生金之驗。症非輕渺。

製於朮

茯神

川貝母

歸身

川石斛

北沙參

山藥

新會皮

香附

紅棗

久咳膈痛。右脈弦數。肺痿之漸。莫作輕視。



北沙參 川貝母 生耆 橘白  
冬瓜子 紫苑 生蛤殼 米仁  
雲苓 桑葉  
喘咳稠痰轉劇。咽痛脈弱。此非有餘之火尅金。乃氣虛肝液虧也。若再投涼劑。脾胃困敗。須重劑滋補。圖其奏效。

熟地

川貝

橘白

天竺黃

淮山藥

於朮

杞子

茯苓

焙麥冬

建連肉

咳噎、穢痰、氣喘。脈軟中虛。肺絡受傷也。殊非輕恙。

製於朮

川百合

麥冬

茯苓

川貝

茅根

北沙參

生蛤殼

橘白

桑葉

知母

早寒暮熱。脈數煩渴。噎咳不減。無疑表虛火不潛根也。仍用生津止渴。稍佐降氣法。服過涼劑未效。乃下虛上實。

大熟地

橘紅

牛膝

川貝母

米仁

生石膏

蘇子

知母

北沙參

蘆根

咽間碎痛。咳噎唾涎。六脈並不弦數。乃肝陰虧而脾不輸津下布也。所以大便燥結。殊非輕恙。

製於朮

川貝

杞子

橘白

枇杷葉

半夏麴

蛤殼

菴蓉

杏仁

人中白

脾肺兩虛。畏風咳喘。暫用玉屏風法。然後進補奏效。女身後熱乾嘔三月少痰腹脹

生黃耆

防風

蘇子

旋覆花

桑葉

鮮佛手

製於朮

半夏

茯苓

代赭石

橘紅

溫邪留戀。咳喘穢痰。當此夏令。宜救肺滌飲主治。

生耆皮

枇杷葉

橘紅

知母

淮牛膝

阿膠

生米仁

桑葉

川貝

茅根

耳後結痰。潰膿已愈。現在腠理空疎。嗆咳自汗。幸陽明氣旺。不致大害。鄙擬固表潤腸法。否則防復潰。

生耆

知母

麥冬

半夏麴

甜杏仁

米仁

川貝

蛤殼

橘紅

枇杷葉

丸方。去蛤殼。加洋參、石決明、牛膝、胖海參。搗丸。

咳嗆音啞。中虛木火燦金也。

生耆

北沙參

川百合

紫苑

橘紅

丹皮

麥冬肉

川貝母

牛膝

桑葉

欬吐白沫。惡寒脈軟。乃金寒不束津液。以和脾保肺佐降氣治。

西黨參

北沙參

杞子

人中白

生蛤殼

製於朮

川百合

橘白

川貝母

沉香汁

寒熱咳噎。氣陰交虛。此非暴病。未許速痊。

真西黨

北沙參

川百合

杞子

牡蠣

於朮

大麥冬

淮山藥

橘白

久嗽中虛。惡寒咽痛。氣分不足。宜乎溫補。無虞難許。

西黨參

山藥

大麥冬

杞子

橘白

炒熟地

牛膝

五味肉

於朮

青鹽

久噎中虛。氣喘多痰。肝液有虧。咽間梗塞。病根深固。難許速痊。

真西黨

北五味

川百合

橘白



生蛤殼

製於朮

大麥冬

人中白

牛膝

枇杷葉

咳嗆不止。色脈少神。氣分虧也。從脾肺調治。

西黨參

北沙參

棗仁

川貝

淮山藥

製於朮

大麥冬

茯神

橘白

欬沫音啞。中虛。肺氣不清。宜輕劑疎理。

旋覆花

米仁

冬瓜子

枇杷葉

炒蘇子

紫苑茸

橘紅

馬兜鈴

知母

冬桑葉

咳逆音啞。似屬陰虧火動。然脈象未見虛數。可見蘊邪未得清徹。宜輕劑和理。

鮮石斛

杏仁

川貝

馬兜鈴

新會紅

紫苑茸

蛤殼

麥冬

枇杷葉

川鬱金

時疾後。飲食不慎。腹脹欬噎。此土不生金。殊非輕恙。

焦朮二錢

炒蘇子三錢

川石斛三錢

茯苓二錢

橘紅一錢

冬瓜子三錢

法夏五分

白蔻殼四分

生米仁三錢

澤瀉五分

穀芽四錢

欬沫不止。氣喘咽痛。并六脈虛數無力。可見中虛肝液竭也。殊非輕恙。茲擬填補

保肝法。圖其奏效。

炙綿耆二錢

麥冬肉二錢

炒熟地四錢

橘白一錢

茯苓二錢

川百合三錢

人中白一錢

淮山藥二錢

杞子二錢

阿膠二錢  
烊沖

胃痛乾噎。肝絡不和。恐有蓄血。以通絡潤燥。爲暫用之劑。

當歸鬚

淮牛膝

桃仁

瓦楞子

白茯苓

煨木香

炒蘇子

薑皮

川鬱金

新絳屑

中氣不舒。近兼欬噎。六脈弦緊。惟恐咯血。

炒蘇子

旋覆花

橘紅

蛤殼

冬桑葉

法半夏

草鬱金

茯苓

歸鬚

新絳屑

元氣素虛。瘧後膝疎喘欬轉劇。脈數無力。勞怯之漸。愈期未許。

炙耆

北沙參

麥冬

橘白

煨牡蠣

紅棗

玉竹

川貝母

山藥

茯神

冬桑葉

接服方

黃耆

北沙參

麥冬

橘白

煨牡蠣

杞子

熟地

川貝母

山藥

茯神

款冬花

建連

膏滋方

炙耆

五味

淡苳蓉

胡桃肉

熟地

牛膝

煨牡蠣

久嗽不止。中虛表弱也。以致盜汗。膈脹氣喘。脈軟。以健胃固表治。庶克奏效。

製於朮

石斛

蘇子

蛤殼

川貝

紅棗

川百合

橘白

茯苓

米仁

桑葉

接服方

西黨參

北沙參

山藥

菟絲

茯苓

紅棗

製於朮

炒米仁

橘白

牛膝

桑葉

欬喘多痰。咽間梗塞。六脈無力。屬中虛肝液虧也。殊非輕恙。

西黨參三錢

北沙參二錢

蛤殼三錢

杞子二錢

人中白一錢

大熟地四錢

川百合三錢

杏仁二錢

橘白一錢

枇杷葉五分

內熱咳。痰中帶血。此中焦熱鬱。非陰虛所發。不宜大補。



水虧火動。乾噎咯血。六脈無力。可見元氣愈虛。恐交春病劇。

北沙參三錢

地骨皮二錢

元參二錢

橘紅一錢

人中白一錢

麥冬肉二錢

生蛤殼三錢

知母五分

米仁四錢

冬桑葉一錢

元生地四錢

北沙參二錢

麥冬二錢

山藥二錢

茜草一錢

粉丹皮五分

川百合三錢

川貝五分

茯苓二錢

桑葉五分

咳噎反覆。中虛表弱也。宜從脾肺調治。

製於朮

麥冬肉

炒蘇子

橘白

海浮石

法半夏

北沙參

川貝母

茯苓

老桑葉

喘咳傷中。口乾膈痛。以潤肺健胃調治。

川石斛

法半夏

杏仁

麥冬

橘紅

北沙參

炒蘇子

蛤殼

米仁

先曾失血。由絡傷所致。現患咳喘。脾泄痰多。肉削。中氣不足之驗。治宜滌痰健中。舍此無策。

製於朮

淮山藥

桑葉

北沙參

橘白

川石斛

茯苓

款冬

川貝母

炙草

再診。冲嗆不止。比前減少。并脈象數勢緩和。斯屬佳境。但速愈不能。

炒生地

麥冬

川貝

元武板

丹皮

北沙參

橘紅

杏仁

冬桑葉

青鹽

久瘡中虛。肢體困倦。肝膽氣不舒也。頻作嘔吐。病在肝胃。膩補不合。

製於朮

西黨

川貝

石決明

薑汁焙竹茹

半夏麴

茯神

橘白

麥冬

吐血

絡傷見血。幸不咳瘡。乃氣分病也。平肝降氣主治。

元生地

北沙參

茯神

淮牛膝

湖藕

麥冬肉

炒蘇子

棗仁

何澹安醫案 吐血

三九

川鬱金

溫邪傷肺。咳噎失血。六脈弦數。恐延入怯門。

北沙參

麥冬肉

元武板

冬桑葉

丹皮

川貝母

地骨皮

淮牛膝

生米仁

橘紅

內傷失血。咽乾膈痛。雖有咳噎。六脈並不弦數。惟虛陽不潛。須省力調治。

元生地

川斷

北沙參

蘇子

元武板

丹皮

牛膝

大麥冬

橘紅

老桑葉

素有痰喘。近兼失血。頻發不已。兩手脈虛軟。乃中虛氣分受傷也。須培陰保肺兼顧。斯為盡善。

黃耆

陳阿膠

茯苓

甘杞子

製香附

熟地

炒白芍

棗仁

牛膝炭

青鹽

內熱咳血。本元虛也。清陰潤肺治。

地骨皮

玉竹

知母

生蛤殼

藕節

北沙參

麥冬

橘紅

老桑葉

陽絡受傷。咳血膈痛病久脈虛。愈期難決。

熟地

麥冬

北沙參

橘紅

淮牛膝

阿膠

丹皮

石決明

茜草

冬桑葉

何澹安醫案 吐血



覆診脈症。俱見平安。惟有內燒不止。陰分虛也。

元生地

麥冬

北沙參

龜板

橘紅

丹皮

茯神

女珍子

牡蠣

桑葉

晨起欬痰。咽癢見血。肺胃之火。只宜清潤調治。

烏犀角

天冬

知母

枇杷葉

生甘草

小元地

麥冬

橘紅

冬桑葉

茅根

狂失血後脈軟。氣怯胃氣薄弱。非補無策。

炙黃耆

麥冬

淮牛膝

牡蠣

廣橘白

炒熟地

五味

甘杞子

茯神

胡桃肉

蓄血妄行。並不咳噎。氣逆。左脈弦大。乃血去絡不和也。暫用疎滯通絡。接服黑歸脾調理。

歸鬚

丹參

柏子霜

川鬱金

新絳屑

桃仁

蘇子

牛膝炭

石決明

元氣素虛。火動咯血。膈次不利。防其狂吐。

炒生地

蓮鬚

炒蘇子

茯苓

石決明

冬桑葉

丹皮

龜板

川鬱金

淮牛膝

藕汁沖服。

元氣素虛。火動咯血。血雖止而痰涎上泛。恐陰液內虧。茲用健中保肺法。

製於朮

北沙參

山藥

川貝母

橘白

陳阿膠

炒麥冬

茯苓

川百合

青鹽

失血後咳痰氣穢。肝肺絡傷也。無虞難許。

羚羊角

麥冬

杏仁

茜草

炒蘇子

茅根

生米仁

知母

橘紅

牛膝

冬桑葉

氣喘欬血中虛。陽氣易浮。固表納喘兼治。

炙綿耆

煨牡蠣

山藥

麥冬

北沙參

炒熟地

淮牛膝

茯苓

橘白

胡桃肉

質弱火炎。骨蒸不退。痰中雖有血點。幸不致噎。當此春令。須滋肝腎調理。

銀柴胡

熟首烏

茯苓

秦艽

淮山藥

北沙參

川柏

澤瀉

麥冬

陽明絡傷。狂吐衄血。脈絡空虛。氣喘心悸。

炙耆

茯神

白芍

慈石

藕節

大熟地

棗仁

茜草

牛膝

欬血久纏。痰多咽痛。

蛤粉炒阿膠

製洋參

橘白

生米仁

何澹安醫案 吐血

四五

冬瓜子

北沙參

人中白

茜草

冬桑葉

燕窩一分錢

驟然失血半斗。神困脈微。由去血過多。陽氣無依。頗有脫勢。姑擬補氣養心法。斯為要計。

炙綿耆

麥冬

茯神

紅棗

牡蠣

西黨參

五味

棗仁

白芍

炙草

蓄血妄行。絡虛心悸。幸不咳噎。當以黑歸脾調理。

真西黨

麥冬

茯神

牛膝炭

橘紅

炒熟地

遠志

棗仁

炒白芍

桑葉



咳血反覆。咽關不利。左脈弦數。木火刑金也。

熟地

北沙參

枇杷葉

茜草

牛膝炭

阿膠

川百合

麥冬肉

橘紅

青鹽

素體不足。前曾失血。現診脈象弦數不靜。此水虧火不潛根也。久防咳噎。

元生地

茯神

麥冬

龜板心

北沙參

丹皮

棗仁

丹參

石決明

咳血氣穢。六脈弦數模糊。此溫邪入絡。肺胃受傷。以清理救肺治之。

羚羊角

地骨皮

象貝

知母

橘紅

藕節

枇杷葉

冬瓜子

茜草

米仁

茅根

失血過多。木邪侮土。脈不柔軟。以通爲補。

川石斛四錢

白芍五錢

車前二錢

茯苓二錢

新會皮一錢

焦穀芽三錢

淨歸身二錢

蘇子三錢

澤瀉五錢

半夏五錢

冬瓜子三錢

血症復萌。右脈弦數。當此升令。宜用瀉白法。

桑白皮

瓜蒌皮

麥冬

牛膝

炒米仁

地骨皮

枇杷葉

知母

茜草

咳血復萌。近兼遺泄。幸不脈數氣喘。想見陰分不致大虧。乃陽絡傷也。先理後補。

北沙參

川百合

茜草

阿膠

花粉  
茯神

大麥冬

白蓮鬚

丹參

失血過多。氣痺陰絡滿也。以通爲補。

川石斛

歸身

炒蘇子

法半夏

淮牛膝

焦穀芽

茯苓

白芍

炒車前

新會皮

冬瓜子

氣傷血溢。火動欬喘。肝失所養。木火刑金。當用清上納下法。

元生地

橘白

蘇子

淮牛膝

石決明

麥冬肉

丹皮

茜草

川續斷

藕節

欬血咽痛。惡寒喘逆。中虛肺液虧也。以補氣保肺治。

何澹安醫案 吐血

五〇

炙綿耆

北沙參

山藥

阿膠

橘白

熟地炭

大麥冬

牛膝

米仁

桑葉

狂失血後。絡傷氣怯。脈細無力。雖見欬噎。非陰火上衝。乃氣不足使然。以歸脾法調理。

炙綿耆二錢

麥冬二錢

棗仁三錢

白芍一錢

蛤粉炒阿膠三錢

北沙參二錢

遠志一錢

茯神二錢

牡蠣四錢

建蓮肉七粒

嘔瀉蓄血。氣虛陰絡傷也。恐交春後。腹脹不易脫體。

焦朮二錢

炒歸身五錢

川棟子一錢

白芍五錢

赤苓三錢

木香四分

炒青皮一錢

延胡索一錢

澤瀉五錢 穀芽三錢

陽絡受傷。血症頻發。雖不咳噎。六脈甚是弦數。非佳境也。立春在通。預爲調治。

元生地 麥冬 桃仁 花蕊石

紫丹參 藕節 丹皮 牛膝

茜草 冬桑葉 草薢金

嘔瀉蓄血。明陽絡俱傷。氣滯脾困。不克輪津生新。下焦真氣不充。清濁艱於升降。運穀無權。腹膨便溺。六脈軟弱無力。理當溫補佐安神法。再視消息。附方呈政。

土炒製於朮二錢 炙白芍二錢 炒棗仁三錢 菟絲二錢

橘葉三張 土炒歸身五錢 雲茯神二錢 川鬱金後一錢切

澤瀉五錢 焦穀芽四錢

十九日晚覆診。左脈弦動。略有煩燥。此肝陰虧而脾未輪上供也。再擬醒脾化氣。



參用柔肝法。

土炒製於朮一錢歸身分酒炒五錢棗仁三錢川鬱金一錢

澤瀉五分焦穀芽四錢蛤粉炒阿膠二錢白芍二錢

茯苓神二錢炙升麻四分橘葉三張

廿一日脈象兩手均稱條達。惟重按少力。可見中焦氣機稍舒。命門真火未能攝水。脾陽不克運動。所以下體浮腫重滯。飲食能納難化也。仍擬和肝胃佐助元陽法。

炒黃西黨三錢茯苓神三錢巴戟一錢五分川鬱金一錢後入

澤瀉五分焦穀芽四錢土炒於朮二錢棗仁三錢

肉桂三分去炙升麻四分橘葉三張

廿三日診。腹脹不寐。脈反弦數。無疑木旺土衰。肝陰內虧所致。就證參脈。未敢驟

補。此方暫服。

米飲炒製於朮

歸身

茯苓

川鬱金

元米炒麥冬

赤豆卅粒

薑汁製半夏

白芍

藿香

淮牛膝

磨冲肉桂

廿五日診。中不勝濕。濕化為熱。其氣不得快利。以致腐穀少權。二便不暢。脈象動靜。以扶本為主。疎理為佐。拙方候政。

土炒製於朮

歸身

大腹絨

茯苓

益智

煨木香

白芍

炮炮薑

車前

肉桂

深思抑鬱。內滯蓄血。狂吐之後。肝失所養。氣機呆鈍。侮土作脹。診得脈象右弦左軟。可見下焦無火。津不上供也。當用金匱法。

炒西黨

炒熟地

川附

牛膝

丹皮

焦於朮

塊茯苓

肉桂

澤瀉

赤豆

狂失血後。脈絡空虛。其氣無依。喘逆日甚。脈數無力。脾胃不甚強健。大虛候也。當用甘溫納補法。

西黨參

炒熟地

茯神

紫石英

牛膝

製於朮

炒杞子

棗仁

川附子

胡桃

覆診。前擬溫補。病情脈象。未見進退。但元氣久虛。惟宜溫補。舍此無策。

西黨

熟地

麥冬

杞子

附子

於朮

五味

茯神

磁石 坎炁

服參方

人參、於朮、麥冬、五味、茯苓、杞子、炙草。

又覆方。同前去坎炁。加胡桃肉。

狂吐蓄血。肋痞侮中。乃肝脾絡傷。惟恐腹滿。

川石斛 茯苓 鱉甲

焦穀芽 炒蘇子 白芍 新會

厚朴 藕節

肝胃不和。并曾失血。顯係營衛受傷。只宜清理。

生白芍 川鬱金 茯苓 鈎鈎

薑皮 炒蘇子 石決明 新會

何澹安醫案 吐血

五五

澤瀉

內蘊暑邪。咳痰帶血。六脈洪大不柔。補陰劑。不宜早服。

地骨皮

生米仁

丹皮

橘紅

冬瓜子

桑白皮

生蛤殼

知母

甘草

茅柴根

失音

咳逆咽痛音啞。脈象緊數。乃肺虛肝液虧也。甚爲棘手。

川黃連

枇杷葉

橘白

人中白

知母

陳阿膠

紫苑

麥冬

生米仁

雞子黃生沖



腎水不能制火。必致剋金。陰精不能化氣。必致咳病燥。所以欬逆音啞。脈動無神。此木鬱水虧。虛火上炎之象。鄙擬滋納法。以視動靜。

青鹽炒熟地

牡蠣

川貝

川鬱金

雲茯神

鹽水炒廣皮

淮膝

龜板

川百合

雞子黃

邪未透洩。音啞咽痛。爲患未久。無所大害。

旋覆花

馬兜鈴

麻黃

象貝母

桑葉

紫苑茸

杏仁

桔梗

人中黃

接服方

紫苑

人中黃

牛膝

北沙參

桑葉

杏仁

生蛤殼

米仁

天花粉

欬噎音啞。中虛木火燦金。

生耆

北沙參

橘紅

牛膝

川百合

丹皮

麥冬肉

紫苑

川貝

冬桑葉

欬沫音啞。中虛肺氣不清。宜輕劑疎理。

旋覆花

生米仁

枇杷葉

冬瓜子

知母

紫苑茸

炒蘇子

馬兜鈴

冬桑葉

橘紅

咳逆音啞。似屬陰虧火動。然脈象未見虛數。可見蘊邪未得清徹。宜輕劑和理。

鮮石斛

生蛤殼

麥冬

橘紅

川鬱金汁

紫苑茸

甜杏仁

川貝

兜鈴

鮮枇杷葉

肺痿

右膈及臂膀脹痛不仁。六脈弦數。坐臥不寧。此溫邪入絡。恐肺氣痿傷。須用清通法。近時稍

旋覆花

羚羊角

法半夏

當歸

白蒺藜

橘葉

代赭石

川鬱金

炒蘇子

秦艽

生米仁

桑枝

絡不通氣。痺右胸肋高腫。右寸關脈大。恐肺氣痿傷。鄙擬通絡化痰佐理氣法。以

圖鬆解。痰黑帶  
腥稍咳

旋覆花

枇杷葉

牛膝炭

當歸

鈎鈎

桑枝

炒蘇子

半夏麴

瓦楞子

橘葉

鬱金

欬嗆穢痰帶血。右脈絃數。由氣鬱絡傷。肺金受尅。冬至節已近。須寬懷調理。

陳阿膠

丹參

米仁

麥冬肉

炒蘇子

藕節

北沙參

茜草

橘紅

枇杷葉

淮牛膝

患瘧時失於表理。肺氣不宣。膀痿咳血。延久不痊。表虛自汗。并神色光白。症屬肺

痿。不宜過用涼劑。痰腥大  
失血

生

耆

枇杷葉

橘紅

蛤粉炒阿膠

藕汁

米仁

淮牛膝

茜草

川百合

冬瓜子

吞食噎逆。痰喘動血。乃肝鬱刑金肺氣痿傷也。恐盛暑病劇。慎之慎之。

陳阿膠

甜杏仁

麥冬

冬桑葉

冬瓜子

茅根

生米仁

川貝母

橘紅

生蛤殼

枇杷葉

肺氣素虛。又感溫邪。身熱欬血。肺絡傷也。所以咯痰膠膩。六脈數大。正氣雖虛。溫補不合。

生洋參一錢五分

生米仁四錢

川百合三錢

茅柴根四錢

陳阿膠二錢

橘紅一錢

沙參二錢

枇杷葉一錢五分

茜草一錢

淮膝炭五錢



虛勞

氣虛表弱。色脈少神。自汗屬洩。法當培本。

炙黃耆

茯神

白芍

地骨皮

牡蠣

紅棗

川石斛

棗仁

新會

女珍子

桑葉

表裏交虛。形衰脈弱。病經三載。須氣陰並補。

炙黃耆

茯神

山藥

麥冬肉

丹皮

熟地

棗仁

五味

女珍子

紅棗

食少痰多。火動不寐。診得六脈虛弦無力。可見氣陰俱不足也。健中保肺為主。

類瘧兼噎惡寒。脈軟表裏俱虛。非補無策。

西黨參

陳阿膠

茯神

淮藥

麥冬肉

製於朮

北沙參

棗仁

百合

橘白

黃耆

茯神

麥冬

白芍

桑葉

首烏

棗仁

橘紅

牡蠣

紅棗

失血後。喘咳業經一載。氣血俱虛。殊非輕渺。

熟地

北沙參

茯神

牡蠣

橘紅

丹皮

陳阿膠

棗仁

山藥

氣喘咳血。惡寒自汗。脈數腹痛。大便不結。不但營液內虧。肝胃亦困敗。均非佳境。姑擬補土寧金法。以望奏效。

炙綿耆

淮山藥

茯神

菟絲

蛤粉炒阿膠

製於朮

北沙參

牡蠣

湘蓮

枇杷葉

腎水不能制火。必致剋金。陰精不能化風。必致病燥。燥則痒。痒則欬。以致音啞。噎痛。脈動無神。此木鬱水虧。虛火上炎之象。鄙擬滋納。以視動靜。

青鹽炒熟地

牡蠣

川貝

川鬱金

雲茯神

鹽水炒廣皮

淮膝

龜板

川百合

雞子黃沖

質弱火炎。牙痛口乾。六脈並不弦數。此係肝腎虛而不克輪津上供。不宜過投涼

劑。

西黨參

阿膠

茯神

北沙參

青鹽

大熟地

丹皮

棗仁

麥冬肉

氣虧表弱。不時寒熱。營絡空虛。氣喘火升。六脈不甚有力。須氣陰兼顧。

真西黨

茯神

北沙參

麥冬

橘白

製於朮

杞子

懷山藥

阿膠

青鹽

連進補劑。並不膈脹作痛。不但營液有虧。表陽亦不固。甚宜用重劑頻補。庶乎奏效。

西黨參

熟地

茯神

麥冬

牡蠣

北沙參

淮膝

棗仁

百合

水梨

失血兼精滑。肝腎虛損。筋拘而坐臥不寧。六脈細軟無力。屬下虛。而血不養肝。并洩自汗。此大虛候也。須重劑培補。

炙綿耆

茯神

麥冬

狗脊

杞子

大熟地

棗仁

五味

龍齒

鬱金沖

氣分不足。肝絡不和。以補氣養營調治。勞力則食減飢則左肋痛胸膈麻頭痛

於朮

歸身

川斷

鈎鈎

香附

茯苓

白芍

法夏

杞子



丸方

西黨	歸身	川斷	茯苓
法夏	熟地	於朮	白芍
菟絲	木香	新會	炙草

肺腎兩虛。腰痛痰喘。飲食有限。宜補脾腎。保肺調理。

炙耆	於朮	五味	杞子
沙苑	烏賊骨	熟地	麥冬
歸身	杜仲	湘蓮	煅牡蠣

研末。用川石斛煎湯泛丸。

內傷兼少陽熱鬱。鼻衄及便溏帶血。陰陽絡俱傷。須省力調治。

生地炭	白芍	木香	米仁
-----	----	----	----

澤瀉

炒丹皮

鱉甲

山藥

木瓜

中虛陰火不潛。六脈沉弱無力。

元生地

丹皮

茯苓

杞子

玉竹

山藥

澤瀉

萸肉

川柏

蘆根

素體陰虧。近兼欬逆。自汗脾洩。六脈虛數無力。陽本大虧。宜填納溫補。然無虞未許。

炙綿耆二錢

炒熟地四錢

杞子二錢

茯苓神二錢

北五味四分

沉香汁三分

真西黨三錢

製於朮二錢

白芍二錢

棗仁三錢

乾河車五分

久嗽不止。多痰咽痛。及氣喘脈軟。舉動無力。不但陰虧中氣大虛也。均非吉兆。

製於朮 二錢

麥冬 二錢

茯神 二錢

甘杞子 二錢

人中白 一錢

大熟地 四錢

五味 三分

橘白 一錢

煨牡蠣 三錢

久嗽中虛。多痰脾泄。津失供肺。音啞咽痛。此重候也。愈期未許。

製於朮 二錢

北沙參 二錢

生米仁 四錢

茯苓 二錢

人中白 一錢

淮山藥 二錢

川百合 三錢

白扁豆 二錢

橘紅 一錢

冬桑葉 一錢

氣虛骨熱。營液成痰。筋骸不得舒展。以致腫潰膿水。艱於收口。已屬虛損。惟宜培本。

生耆 五錢

熟地 四錢

五味 三分

杞子 二錢

五加皮 一錢

炒棗仁 三錢

歸身 二錢

山藥 二錢

麥冬 二錢

川斷 五錢

細桑枝 四錢

症屬虛損。莫作風溼。治從脾腎培補。以圖元旺病却。并有遺泄。

熟地

淮藥

歸身

狗脊

木瓜

於朮

杞子

川斷

杜仲

羊腎

膏滋方。去山藥、川斷、羊腎。加桑枝、胡桃、黨參、虎骨、龜板、白蜜。湘蓮粉收入。中虛陰火不潛。多痰內熱。勞怯根苗。須省力服藥。

製首烏 三錢

北沙參 二錢

女珍 二錢

橘紅 一錢

製香附 三錢

生綿耆 五錢

歸身 五錢

杜仲 三錢

丹皮 五錢

冬桑葉 一錢

遺精

相火旺而兼溼熱下注。以致陽舉精洩。六脈弦滑。以滋清佐苦泄法。

鮮生地

蓮鬚

赤苓

丹皮

米仁

川柏

龜板

萆薢

澤瀉

甘草

精關不固。腰脊痠痛。六脈細軟無力。宜澀精溫補。

炒熟地

淮山藥

川斷

北五味

湘蓮肉

製於朮

金櫻子

杜仲

白茯苓

丸方。去金櫻。加黨參、狗脊、線魚膠、砂仁。



厥陰氣鬱。膈脹目昏。君火內迫。陰精屬泄。脈不柔軟。當用交心腎苦泄法。由心傳  
服過度作肝火看  
服過度補藥不效

川黃連

黑山梔

澤瀉

蓮鬚

柏子霜

法半夏

赤苓

鬱金

橘葉

坎離不交。驚恐自汗。近兼精滑。精氣神俱虧。脈空無力。須重劑頻補。足痿難行

炙耆三錢

五味四分

茯神二錢

煅牡蠣五錢

川柏一錢

貢乾一兩

熟地八錢

麥冬三錢

棗仁三錢

淮山藥三錢

湘蓮七粒

失血兼精滑。肝腎虛損。筋拘而坐臥不寧。六脈細軟無力。屬下虛而血不養肝。并  
洩自汗。此大虛候也。須重劑培補。

炙耆二錢 北五味四分 茯神二錢 金狗脊五分錢  
 甘杞子二錢 熟地五錢 麥冬肉二錢 棗仁三錢  
 煨龍齒二錢 川鬱金一錢  
 心腎不交。多夢遺泄。素有便血。宜黑歸脾調理。

製於朮 茯神 金櫻子 麥冬肉  
 澤瀉 炒生地 棗仁 蓮鬚  
 北五味

丸方

西黨參 熟地 茯神 金櫻子  
 麥冬 龜板心 製於朮 湘蓮  
 棗仁 五味肉 牡蠣 川柏

蜜丸。

咳血復萌。近兼遺泄。幸不脈數氣喘。想見陰分不致大虧。乃陽絡傷也。先理後補。

北沙參

陳阿膠

丹參

蓮鬚

花粉

麥冬肉

川百合

茜草

茯神

丸方

西黨

麥冬

茯神

白線膠

龜板

北沙參

熟地

五味

棗仁

煨牡蠣

湘蓮

丹皮

藕汁泛丸。

陰分不足。又兼溼火上冲。腦頂下陷。遺泄。督脈痠痛。清上納下治。

熟地	龜板	蓮鬚	石決明
首烏	川柏	茯苓	冬桑葉

淋濁

中氣不足。便濁下注。以四君攝精治。

真西黨	茯神	牡蠣	北五味
炙草	淮山藥	草薺	牛膝

炒白芍

又丸方。即前方加於朮、米仁、湘蓮肉。  
久濁元虛。六脈無力。健中升清。自然安適。

製於朮	草薺	生米仁	牡蠣
-----	----	-----	----

冬瓜子

赤苓

澤瀉

沙蒺藜

山藥

甘草梢

脾腎兩虛。腰痛便濁。未免費心太過。君火下陷。但此患久纏命門。陽氣不攝。以致左脈沉弱。大便溏薄。擬補中益氣合滋腎法。服過大黃數兩未效

真西黨

熟地

茯神

肉桂

炙草

製於朮

升麻

棗仁

萆薢

湘蓮

丸方。去萆薢。加五味、金櫻子、阿膠。搗丸。

誤服藥酒。熱注膀胱。小便下濁。久延不痊。煩渴肉削。診得六脈並不弦數。茲用補中益氣加減法。

西黨參

熟地

麥冬

萆薢



升麻

蘆根

製於朮

茯苓

五味

牡蠣

湘蓮

便濁腰痛。督脈受傷。以固精補氣治。

大熟地

金櫻子

川斷

龍骨

淨歸身

芡實

狗脊

杜仲

久濁不止。腎部痿痛。分清溫潤治。

西黨參

川草薢

淡菰蓉

杜仲

生歸身

大熟地

赤茯苓

沙蒺藜

牡蠣

湘蓮肉

尿血兼濁。頻解溺痛。左肋不和。恐有蓄血。此方暫服。

川連

草薢

瓦楞子

甘草

歸 鬚

赤 苓

元胡索

便濁久纏。溼火下注也。升清分利治。

元生地

川草薢

炙升麻

赤 苓

蓮 鬚

丹 皮

甘草梢

生米仁

澤 瀉

尿血

膈脹尿血。由厥陰氣鬱。膀胱絡傷也。暫用破瘀導下法。

川 連

製 軍

川鬱金

澤 瀉

甘草梢

赤 苓

歸 鬚

延胡索

薑 皮

琥珀屑

接服方

草薺

淡芩

牛膝炭

澤瀉

生藕

赤苓

丹皮

生米仁

蓮鬚

腹膨便溺。下注尿血。由肝經熱鬱。膀胱絡傷也。先宜疎滯。然後培補奏效。女

川黃連

當歸鬚

赤芍

車前

枳殼

製生軍

牛膝炭

赤苓

澤瀉

新絳屑

接服方

生於朮

琥珀屑

赤苓

澤瀉

荷蒂

生米仁

川鬱金

草薺

生 草

溼熱傷絡。曾下尿血。神色萎黃。當用健中分理。年六歲飲食少溺時作痛元旺虛治

川連  
大黃

生於朮

赤 苓

澤 瀉

牡丹皮

冬瓜子

生米仁

草 薢

川 柏

生甘草

尿血兼濁。頻解溺痛。左肋不和。恐有蓄血。此方暫服。

川 連

草 薢

瓦楞子

甘 草

歸 鬚

赤 苓

元胡索

心火內迫。膀胱絡傷。以致尿血。

生洋參

元生地

丹 參

血餘灰

草 薺

大麥冬

牡丹皮

茯 神

琥珀屑

尿血溺痛。久延不痊。六脈無力。須標本兼顧。

西黨參

炒丹皮

草 薺

炒阿膠

湖 藕

雲茯苓

炒杞子

升 麻

甘草梢

尿血久纏。腰腹作痛。屢投利劑。氣陷傷津。以致精神委頓。六脈細軟。若不升清培補。恐交秋病劇。

西黨參

赤茯苓

升 麻

沙 苑

木 香

製於朮

甘草梢

杞 子

草 薺

藕 節

何澹安醫案 尿血



小便閉癰

外症已愈。小溲仍然不爽。脈象亦未柔軟。大補不宜。陰囊潰爛

生洋參

丹皮

草薢

龜板

甘草梢

製首烏

赤苓

米仁

蓮鬚

服。命門氣虧。兼之中虛氣陷。清氣不升。小便溺塞。診得六脈沉弱。所以涼劑不宜多。

西黨參

升麻

菟絲子

草薢

琥珀屑

製於朮

赤苓

甘草梢

澤瀉

涇火下注。小便溺痛。六脈弦緊。須用分清導下法。方許奏效。

錦紋

蓮鬚

草薢

牛膝

甘草梢

川連

歸鬚

澤瀉

赤苓

冬瓜子

頻解溺痛。左脈細軟。乃少陰虧而膀胱挾熱也。以滋腎法。

熟地四錢

升麻四分

赤茯苓二錢

川柏一錢

生甘草四分

肉桂四分

草薢五錢

柏子霜五錢

丹皮五錢

琥珀屑三分

## 何澹安醫案終

何澹安醫案 小便閉癰

八四

〔清〕

邵蘭蓀

原著

# 邵蘭蓀醫酉案

中國醫學大成





## 邵蘭蓀醫案提要

清邵蘭蓀著。蘭蓀爲古越近代名醫。世居楊汎橋。幼從錢清王馥原遊。生平服膺葉氏臨證指南。程氏醫學心悟二書。天資穎悟。頗能神明變化。其於溫暑時感。及虛勞婦女經帶。具有心得實驗。閱其方案。無不從指南心悟二書中得來。先生名高望重。全浙皆知。每日應診。戶限爲穿。是以無暇著作。及歸道山。無片紙流傳。是案四卷。乃炳章欽其學識經驗。爰爲徵求紹興城鄉各病家治愈留存方案。積十餘年之久。乃得彙集成冊。分別門類。爲之釐訂。復請史介生君加以按語付刊。吾知平時欽佩邵氏者。不乏其人。是書一出。自能博得好評也。

邵蘭蓀醫案 提要

## 史序

張仲景著金匱玉函經。爲萬世醫學之準繩。司馬遷爲淳于意立傳。卽後世醫案之權輿。但歷代醫案。類多自己編述。殊少遺方於人。其中發明新理。表示心得者。固屬不少。然而誇張虛語。欺誑後學者。亦所難免。蓋完全是功則歸己。過則諉人。之心理。一經治愈。卽稱驗案。此種自負之通弊。甚無功效之足言。惟葉香巖之醫案。錄自門人之手。細心參玩。精義環生。洵堪稱爲臨證之指南焉。但江浙爲濱海之邦。居溫帶之地。溫熱之症。十中可占八九。傷寒之病。百中祇得二三。良由地勢卑下。氣候多溫。以西金肅殺之氣。北風凜冽之威。感之而多傷寒之症者。不同也。所以葉香巖極少傷寒之案。王孟英善用清涼之劑。而當世服其卓識。良有以也。

吾紹先哲有邵蘭蓀先生者。係王馥原先生之高足。其臨證則四診必詳。而處方則率多桴應。所以名噪浙東者。垂四十年。且其診箋。導喻嘉言之寓意。倣葉天士之程式。方上立案。案中擬方。對於病家。既可徵明病象之進退。若逢同道。亦可討

論治法之步驟。今不佞與曹炳章先生。兼搜並蓄。共得其方案約計二百餘十則。雖未能窺其全豹。而立法處方。大致楚楚。堪與葉案媲美。惟治傷寒之案。尙付闕如。誠如醫宗金鑑所謂大江以南多傷溫之意。夫。倘如同志尙有珍藏者。希卽續行刊布。俾以嘉惠來茲。今不佞不揣謏陋。略分門類。并附管窺之見。以冀高明之教正焉。是爲序。

民國廿二年十月紹興史久華介生識於右軍祠畔之寓次

## 凡例

一、案中病證。有暑邪。而兼濕熱食積。有帶下。而兼經阻咳嗽等類。病名難以鑑別。祇以治法注重何證。作為標準。稍分眉目。例如暑邪而兼濕熱。若治法是清熱利濕。即列於濕熱門中。餘者倣此。

一、案中有初診之方。而無末診者。或有善後養胃之方。而無初診者。恕難一一搜集。祇得根據病象治法。略分門類。

一、案中雖則註明病者地址。今仍照原方錄出。內有數方遺失地址者。則以某字代之。

一、此編時病。尚缺傷寒以及火症兩類。傷寒一症。諒以吾紹地居溫帶。真正傷寒極少。兼以此類方案。一時無從購覓。以後遇見。再當續刊。至於火症。從沈堯封先生謂火之微者曰溫。火之甚者曰熱之意。故凡火症。既散見於各症之中。又立溫熱一門。庶幾眉目朗然。

一、每案有效與否。雖則難以確定。但其理之所存。即法之所在。明哲之士。自能意



邵蘭蓀醫案 凡例

會。編者恕難懸揣。尙希閱者諒之。

# 邵蘭蓀醫案目錄

## 卷一

風

暑

濕

燥

溫熱

## 卷二

咽喉

耳目口齒

咳嗽

.....一

.....六

.....〇

.....一

.....五

.....一

.....二

.....五

## 卷二

咳血

喘

胸痺

虛勞

不寐

心悸健忘

肝風

嘔吐噎格

腕痛

腹痛

.....一五

.....二〇

.....二二

.....二四

.....二九

.....三四

.....一

.....四

.....〇

.....七

泄瀉

產後

三八

痢

三〇

瘰

三二

卷四

腫脹

一

遺精

一

遺尿

四

淋濁

五

疝氣

〇

瘡瘍

二

調經

五

帶下

三

胎前

六

邵蘭蓀醫案

清 山陰 邵蘭蓀先生原著

紹興 史久華介生評註

鄞縣 曹赤電炳章纂輯

卷一

風

魚莊沈 邇來風邪。咳嗽尤甚。脈形浮弦。舌滑膩。形寒。左腋刺痛。宜清肺、和絡、疎風。  
十一月望

百部七分

桔梗錢半

橘紅一錢

金沸草三錢 包煎

炙草八分

紫苑錢半

荊芥錢半

絲瓜絡三錢

象貝三錢

廣鬱金三錢

前胡錢半

引枇杷葉五片 去毛

兩帖。

（介按）凡治風寒咳嗽。必先辛散輕開。宣肺豁痰。俾病從表入者。仍從表出。則肺氣自復清肅之常。而咳嗽自除。此案是風邪於肺。肺氣阻痺。而肝絡不和。以致左腋刺痛。脈形浮弦。而咳嗽尤甚。治以清肺疎風。兼用旋覆花。絲瓜絡以和絡。恰是咳嗽而患腋痛之對症良劑。

遺風郁 風邪伏肺。咳嗽久累。已曾失血。脈寸浮滑。音嘶。宜清肺、疎風、化痰、防損。  
四月五號癸卯十八日

紫 苑 錢半

光杏仁 三錢

枯蕁皮 錢半

蘇 梗 錢半

橘 絡 錢半

白 前 錢半

川 貝 二錢

佛耳草 三錢

荆 芥 錢半

杜兜鈴 一錢

生訶子 錢半

鮮枇杷葉 三片  
去毛

三帖。

（介按）咳嗽由於風寒入肺。肺為嬌臟。一味誤投。即能受害。若用熟地、麥冬、黃肉、五味等。滋膩酸斂之品。補住外邪。必至咯血失音。此徐洄溪之言也。今此人因風邪伏肺。而咳嗽日久。甚至失血音嘶。諒以前醫誤投滋膩。或病家誤食滋補。漸致傷風誤補成勞之症。治以清肺疎風之品。乃是根本療法。



遺風龐 咳嗽日久。咽乾音嘶。脈弦。舌微白。頭疼。姑宜清肺、疎風。

桑 葉三錢 桔 梗錢半 杜兜鈴一錢 絲瓜絡三錢

杏 仁三錢 生甘草五分 廣橘紅一錢 胖大海三錢

甘 菊二錢 川 貝錢半 白 前錢半 枇杷葉三片

（介按）風邪舍於肺。勢必氣逆咳嗽。若能飲食有節。起居有常。而服疎風清肺之劑。則咳嗽自己。諒以病家妄食滋補。而助痰遏風。邪居肺絡。久而釀熱。氣道爲痰所壅。則咽乾音嘶。此方從甘桔湯。而加清肺寧絡之品。可謂治病必求其本矣。

衙前施 風邪未清。左脈浮滑。咳逆。舌薄白。頭疼較差。宜止嗽、化痰、疎風。

百 部八分 紫 苑錢半 馬兜鈴一錢 冬桑葉三錢

生 甘七分 白 前錢半 橘 紅一錢 光杏仁三錢

桔 梗錢半 荆 芥錢半 川 貝錢半 引枇杷葉三片

四帖。

（介按）風邪由皮毛而入。內應於肺。以致頭痛咳嗽。故以清肺降氣。解肌疎風。

爲治。

安昌沈 風邪未盡。脈弦。舌薄白。迎風頭疼。噓咳不已。宜清肺疎風爲主。

紫苑 錢半

桑葉 三錢

石決明 六錢

代赭石 三錢

川芎 一錢

川貝 錢半

廣橘紅 一錢

杏仁 三錢

甘菊 二錢

刺蒺藜 三錢

白前 錢半

鮮枇杷葉 三片  
去毛

（介按）風邪外侵。日久不解。又以肝膽鬱熱內熾。而肺氣不宣。因致咳嗽不已。迎風頭疼。故治法於清肺疎風之中。佐以平肝降氣之品。

安昌葉 風熱頭脹。脈數。氣輪紅。外寒內熱。心悸。宜清疎爲穩。九月十二日

冬桑葉 三錢

木賊草 錢半

人中黃 八分

淡竹葉 錢半

焦山梔 三錢

夏枯草 二錢

甘菊 二錢

蜜銀花 三錢

蕤仁 錢半

生石決明 六錢

光杏仁 三錢

清煎二帖。

又 風熱未清。脈小數。不時汗出。厥陽上越則熱。仍遵前法加減爲妥。九月十七

冬桑葉 三錢

生牡蠣 四錢

青葙子 三錢

稽豆皮 三錢

甘菊二錢

丹皮三錢

刺蒺藜三錢

女貞子錢半

茯神四錢

焦梔子三錢

麤仁一錢

清煎三帖。

又舌微黃。脈弦細數。午後寒熱不清。姑宜清少陽為主。九月廿二日

青蒿錢半

遍釵斛三錢

淡竹葉錢半

女貞子錢半

炙鱉甲三錢

麤仁一錢

刺蒺藜三錢

通艸錢半

丹皮二錢

生石決明五錢

冬瓜子三錢

清煎四帖。

(介按)此症外因感冒風熱。內因肝膽鬱熱。第一方清熱疏風。次方因厥陽上越。不時汗出。參用女貞子、穉豆皮。加減恰好。第三方。因此時外邪已去。少陽之鬱熱未淨。以致午後寒熱。治以清少陽。平肝熱。方法亦佳。

某帶下腰疼不減。脈浮虛。夾風邪。噎咳。癸澀。牙縫出血。宜清肺疎風為主。二月

廿九日

霜桑葉三錢

川貝母錢半

杜仲三錢

烏元參三錢

焦梔子三錢

蘇梗錢半

川斷二錢

粉丹皮二錢

光杏仁三錢

生牡蠣四錢

絲瓜絡三錢

引加竹肉一九

（介按）帶脈不固。腎液未充。是以帶下腰疼。茲以更感風熱之邪。犯及肺胃。以致咳噎而牙縫出血。此方既清肺胃之熱。復補腎液之虛。乃是欲要調經先須去病之意。

暑

遺風王 暑風濕熱。寒熱交作。脈濡。舌滑微黃。脘悶欲嘔。宜和中祛邪。

青皮八分

桂枝五分

仙半夏錢半

廣藿香二錢

厚樸一錢

炒知母錢半

酒炒條芩二錢

防己錢半

大腹皮三錢

原滑石四錢

焦六麴四錢

清煎二帖。

（介按）暑挾濕邪。入於膜原。故寒熱脘悶嘔惡。治以辛香溫化之品。開達膜原之邪。確是對症療法。

坂裏汪 暑邪寒熱。脈弦數。頭疼腕悶。洩數。宜和中清邪。七月三號丙午廿九日

青蒿子 錢半

藿香 三錢

佩蘭 錢半

青皮 八分

炒知母 錢半

白芷 八分

滑石 四錢

威靈仙 錢半

仙半夏 錢半

大豆卷 三錢

蔻殼 錢半

引荷葉 一角

二帖。

又 清解已效。脈虛細。寒熱交作。午後稍差。舌滑白根微黃。便利。宜清暑和中。七

月六號丙午初二日

藿香梗 二錢

仙半夏 錢半

銀花 錢半

連翹 三錢

滑石 四錢

黃芩 錢半

赤苓 四錢

大豆卷 三錢

蔻仁 八分

扁豆衣 三錢

通艸 錢半

引荷葉 一角

二帖。

(介按)此與前案大同小異。而處方亦是開達膜原。但濕熱較輕。故初則頭痛而用祛風之品。繼則寒熱。至午後少差。而仍以清暑為主。

遺風靡 暑風夾濕。寒熱如瘧。渴飲。洩數。脈濡右大。舌白。中心嫩黃。宜清解。防重。



八月十一號丁未廿九日

淡竹葉 錢半

香 薷 七分

蟬 衣 錢半

牛蒡子 三錢

連 翹 三錢

光杏仁 三錢

六一散 四錢  
包煎

通 草 錢半

薄 荷 五分

天花粉 三錢

銀 花 二錢

引 鮮荷葉 一角

二帖。

又

寒熱未除。脈弦濡。舌黃滑。腹中濯濯。姑宜清暑和中。

八月十五號戊申初三

廣藿香 二錢

青蒿子 錢半

炒青皮 八分

炒枳殼 錢半

焦山梔 三錢

連 翹 三錢

山 查 三錢

原滑石 四錢

省頭草 三錢

條 芩 錢半

通 草 錢半

引 鮮荷葉 一角

（介按）葉香巖曰。暑邪必挾濕。狀如外感風寒。忌用柴葛羌防。如肌表熱無汗。辛涼輕劑無誤。香薷辛溫氣升。熱伏易吐。佐苦降如杏仁黃連黃芩。則不吐。宣通上焦。如杏仁連翹薄荷竹葉。暑熱深入。伏熱煩渴。白虎湯六一散。今此人寒熱如瘧。是屬暑而挾濕之候。初方悉宗葉氏之意。次因寒熱未除。故於清暑之中。又佐清少陽餘熱之味。

坂裏汪 暑風傷肺。頭疼發熱。汗微不出。脈右浮濡。身痛。洩數。舌微黃。宜清解。防  
變重。五月十九日

香	薤	八分	桔	梗	錢半	薄	荷	錢半	天花粉	三錢		
連	翹	三錢	象	貝	錢半	六	一	散	四錢	蔻	仁	八分
白	芷	八分	炒	知	母	錢半	光	杏	仁	三錢		

清煎二帖。

（介按）暑風先傷氣分。是屬上焦之病。治以辛涼微苦。廓清肺氣為主。  
蜀阜馬 暑濕傷氣。腕悶發熱。脈濡。右弦細。舌滑白。溺數。惡心。宜開氣分爲治。八  
月初四日

瓜	蒞	皮	三錢	藿	香	梗	二錢	仙	半	夏	錢半	炒	枳	殼	錢半
川	樸	一錢	省	頭	草	三錢	條	芩	錢半	苦	丁	茶	錢半		
通	草	錢半	蔻	殼	錢半	滑	石	四錢							

清煎二帖。

（介按）暑爲熏蒸之氣。濕爲膩濁之邪。熱處濕中。阻於氣分。日久不解。蔓延中

焦。故腕悶嘔惡。發熱溺數。治以芳香止嘔。苦辛開肺。

馬安趙 暑濕傷氣。舌灰黃。汗出發熱。脈虛右濡。頭目不爽。洩數。宜清熱利濕為治。防重。七月廿五號丁未十二日

淡竹葉 錢半

焦六麵 四錢

焦梔子 三錢

藿香 三錢

連翹 三錢

赤苓 四錢

條芩 二錢

光杏仁 三錢

苦丁茶 錢半

大豆卷 三錢

滑石 四錢

引鮮荷葉 一角

二帖。

（介按）肺主皮毛。今以肺氣被鬱。則自汗發熱而頭目不爽。脈虛右濡。尤為暑挾濕之徵。治以辛涼輕劑。清解上焦。兼以滲濕。方法極是。

安昌姚 暑濕傷氣。嘔渴身熱。大便自利。脈弦濡數。舌黃滑。腹痛。症非輕藐。宜清熱和中。候正。七月十八號丁未初五日

藿梗 二錢

焦六麵 四錢

炒黃芩 錢半

天花粉 三錢

六一散 四錢

連翹 三錢

枳殼 錢半

佩蘭 三錢

銀花 三錢

石菖蒲 八分

大豆卷 三錢

清煎一帖。

又 清熱和中。自利嘔渴悉差。脈濡。右弦數。舌黃滑。身熱已緩。頭暈耳鳴。仍遵前法加減為穩。七月廿二號丁未初九日

廣藿香 錢半

苦丁茶 錢半

條 芩 錢半

省頭草 三錢

六一散 四錢

扁豆衣 二錢

赤 苓 四錢

通 草 錢半

銀 花 三錢

連 翹 三錢

焦山梔 三錢

清煎三帖。

（介按）暑濕兼穢。由口鼻吸受而傷氣分。漸入膈膜。下滲大腸。以致嘔渴身熱。腹痛自利。故以清熱和中之劑。諸恙悉差。次診頭暈耳鳴。是屬肝膽餘熱。上犯清竅。而治法注重上焦濕熱。亦是良方。

西池余 暑濕傷氣。潮熱。溺赤。大便如醬。脈濡細數。舌心焦黃。口甜。宜清利。防變。

晚蠶沙 三錢

仙半夏 錢半

光杏仁 三錢

苦丁茶 錢半

連 翹 二錢

赤 苓 錢半

大腹皮 三錢

淡竹葉 錢半

大豆卷 三錢

炒黃芩 錢半

原滑石 四錢

荷 葉 一圓

二帖。

次診 潮熱已退。脈左濡。右細。舌黃燥。口甜。溲溺赤。大便閉。宜瀉心湯加減。防變。

仙半夏錢半

炒黃芩錢半

廣鬱金三錢

省頭草三錢

炒川連六分

炒枳實二錢

厚樸一錢

通草錢半

生白芍錢半

光杏仁三錢

赤苓三錢

二帖。

三診 舌轉嫩黃尙膩。脈兩手絃細。口尙甜。係脾痺。胃鈍。宜瀉心湯加減。

仙半夏錢半

焦神麴三錢

炒穀芽三錢

新會皮錢半

炒川連六分

杏仁三錢

赤苓三錢

滑石四錢

炒枳實錢半

蔻殼錢半

省頭草三錢

清煎三帖。

四診 舌色猶黃。胃氣不振。脈濡。左弦細。便結。心泛。宜養胃清利。最怕變端。

遍金釵三錢

瓜蒌皮三錢

蘆梗二錢

鷄內金三錢

省頭草三錢

光杏仁三錢

穀芽四錢

淡竹葉一錢



原滑石四錢

陳皮錢半

晚蠶沙三錢

五診 舌色未清。大便稍下。饑不欲食。頃六脈虛細。胃逆惡心。濕熱猶存。仍遵前法加減。不致變端無慮。

遍金釵三錢

柏子仁三錢

瓜蒌皮三錢

通草錢半

省頭草三錢

合歡皮三錢

藿梗二錢

蕤仁錢半

鷄內金三錢

白茯苓四錢

炒穀芽四錢

（介按）暑而兼濕。錮結不解。最爲淹纏難愈之症。治療之際。務須辨明暑多與濕多之異。蓋因過用清涼以治暑。則濕愈留戀。過用溫燥以利濕。則化熱劫津。故此案歷經四診。而尙慮變端。實因濕熱膠結。一時難以分化。至於方法。尙屬步驟井然。惟釵斛一味。雖是滋養胃液之妙品。但濕熱尙存。用得过早。須防有戀邪之患。口甘一證。古人名曰脾瘴。因五味入口。必藏於胃。賴脾臟爲之行其精氣。津液在脾。故令口甘。其人必素食甘美多肥之品。肥則令人內熱。甘則令人中滿。其氣上溢。轉爲消渴。內經謂治之以蘭。除陳氣也。後人均以佩蘭治之。但佩蘭之功效。不如建蘭葉之生津止渴。以除胃中陳積蓄熱之氣爲愈也。

蜀阜馬 冒暑受風。頭疼發熱。肢戰。脈浮數。右關勁。腕悶氣衝。咽喉如有物阻。舌微黃。根厚。症屬棘手。宜防痙厥。候正。六月初二日

銀花三錢	連翹三錢	橘核錢半	射干錢半
廣橘紅一錢	焦山梔二錢	甘菊二錢	薄荷一錢
炒僵蠶二錢	光杏仁三錢	竹葉錢半	引荷葉一角

一帖。

（介按）暑月受風。先傷氣分。是以頭疼發熱。日久不解。化熱而引動肝風。以致肢戰氣衝。治以清氣分之熱。迨氣分之熱肅清。則肝風自平。

大義汪 穉孩暑風夾濕。脈浮大。舌滑白。汗多發熱。渴飲。恐變驚風。姑宜清熱祛邪。又月廿四日

瓜蒌根三錢	密銀花二錢	大豆卷三錢	淡竹葉錢半
連翹三錢	扁豆衣三錢	赤苓四錢	白蔻仁八分
六一散三錢	光杏仁三錢	枳殼錢半	

清煎二帖。

（介按）穉年純陽之體。感受夏月之風熱與濕。最防化熱劫液。引動肝風而為  
瘵厥。况其汗多發熱渴飲諸端。是屬熱熾顯然。故治法宜清熱達邪。  
遺風龐。右耳下腫。夾雜暑濕。便瀉。腹痛。脈弦濡。舌根微黃。姑宜清暑和中。六月

廿四日

藿香梗三錢

大腹皮三錢

通草錢半

左金丸八分

益元散三錢

赤苓三錢

扁豆衣三錢

南木香六分

苦丁茶錢半

焦山梔三錢

新會皮錢半

清煎三帖。

（介按）暑氣下降。濕濁上騰。人在濕熱蒸騰之中。感受其氣。兼以穢濁夾雜。歸  
於脾胃而為泄瀉。走於中道則腹痛。治宜清熱開鬱。佐以芳香淡滲。俾穢濁濕  
邪。由此可以分消。

杭垣施素患痰飲。新受暑氣夾濕。潮熱。咳嗽氣急。脈濡滑數。舌白。根微黃。姑宜  
清氣消痰。

瓜蒌皮三錢

光杏仁三錢

廣橘紅一錢

赤茯苓四錢

川貝二錢

連翹三錢

扁豆衣三錢

白蔻仁八分

六一散三錢

淡芩錢半

白前錢半

清煎三帖。

（介按）治痰飲當以溫藥和之。但新受暑邪。先犯氣分。故其治法。先清其暑。兼消痰濕。

遺風徐。暑風熱濕。噎咳耳木。脈濡數。舌白。根微黃。神識乍憤。症勢重險。宜防厥閉。候正。七月廿四日。

石菖蒲八分

焦山梔三錢

橘紅一錢

老天竺黃錢半

遠志八分

滑石四錢

光杏仁三錢

炒黃芩錢半

苦丁茶錢半

象貝三錢

淡竹葉三錢

引荷葉一角

三帖。

（介按）暑熱下逼。濕濁上騰。其邪從口鼻吸受。氣分先阻。而上焦清肅不行。以致噎咳。但暑而挾濕。係是熏蒸粘膩之邪。最難分解。鬱久化熱燂津。遂變神昏耳聾。險象畢露。此種症候。先須認明暑風濕熱。何者為重。分別施治。庶幾奏效。

今以暑熱挾痰濕。由肺而漸逼心胞。最防厥閉之候。治以肅肺化痰。滌暑開竅。以解胞絡之危。洵是佳計。

西柱沈 暑風夾濕。噎咳面浮。舌紅。根黃。口渴。溺多。素患脾泄。宜清暑消痰為法。防重。七月廿二日

烏元參三錢

橘紅一錢

天花粉三錢

石蓮子三錢

益元散四錢

扁豆衣三錢

茯苓四錢

省頭草三錢

銀花二錢

川貝錢半

淡竹葉三錢

清煎三帖。

（介按）暑濕挾痰。留戀上焦。濕痰阻氣。氣不化津。則口渴而舌紅根黃。但素患脾泄之人。尤防濕熱橫滲而化浮腫。治以清熱消痰。兼用扁豆衣、石蓮子、茯苓等之扶脾滲濕。是標本兼顧之方。

安昌李 暑風夾濕。咳嗽吐血。脈寸大。舌白。根微黃。潮熱。宜防瘵。六月十二日

括蕁皮錢半

淡竹葉錢半

茜根二錢

小蘗草三錢

川貝三錢

扁豆衣三錢

焦山梔三錢

銀花三錢



六一散 四錢

光杏仁 三錢

白 前 錢半

荷花露 二兩

引茅草根 一兩

三帖

（介按）此是暑熱燄肺。復燃陽絡。以致絡血上溢。治以滌暑保肺。清絡止血。較諸葉香巖治王姓一方。尤為敏捷。

某婦 伏暑嘔渴發熱。脈寸滑數。衝氣撞腕。洩數。癸水趨遲。慎恐變端。宜瀉心湯加減。候正。十月十一號九月初二日

炒川連 八分

枳 實 錢半

省頭草 三錢

原滑石 四錢

仙半夏 錢半

生白芍 三錢

廣鬱金 三錢

菴 殼 錢半

酒炒黃芩 錢半

光杏仁 三錢

橘 白 一錢

清煎二帖。

（介按）暑熱伏於心膈之間。治以芩連半夏。做瀉心湯之意而泄其熱。又佐杏仁。菴殼以止其嘔。惟衝氣撞腕。尚少鎮衝之品。而癸水趨遲。係是血虛之候。此方先清其暑。治法最佳。待暑解之後。再行調經補血。自無內外夾雜之虞。安昌余 伏暑秋發。始起寒熱。脈濡細。舌微白。底紅。潮熱。頭脹。肢楚。大便不爽。姑

宜清利。

晚蠶沙四錢

青皮八分

苦丁茶三錢

川石斛三錢

光杏仁三錢

焦山梔三錢

廣鬱金三錢

新會皮錢半

六一散三錢

淡竹葉三錢

天花粉三錢

（介按）伏暑內發。新涼外束。故始起寒熱。舌苔微白。清熱利濕。方極穩妥。在鄙見宜去川斛而加入透達之品。則新邪易退。且免戀濕之患。

安昌顧建

陽明伏暑。舌焦膩。脘悶嘔惡。脈弦細。暮夜煩熱。症屬棘手。宜防外脫

內閉。候正。八月廿四日

括藎子四錢

枳實錢半

淡竹葉錢半

廣鬱金三錢

炒川連八分

焦梔子三錢

赤苓四錢

晚蠶沙四錢

仙半夏錢半

原滑石四錢

光杏仁三錢

（介按）伏暑發自陽明。古人以白虎湯為主方。此人係是濁熱黏膩之邪。由陽明而留戀脘膈。治宗小陷胸湯之意。是屬對症療法。

安昌高 秋暑未清。脈澀滯。氣機不和。神識乍憤。溺後精關不固。舌微白。腹痛。仍

遵前法加減治之。七月廿九日

廣藿香 二錢

仙半夏 錢半

生牡蠣 四錢

石蓮子 三錢

省頭草 三錢

茯苓 四錢

蔻殼 錢半

通草 錢半

川棟子 三錢

香附 三錢

左金丸 八分

清煎三帖。

（介按）素患遺精。兼受秋暑。故其治法。於清暑理氣之中。仍佐瀉下之品。雖則標本兼顧。尚宜注重新邪。

濕

茅蓬陳 濕着經絡。寒熱交作。脈弦濡。舌黃滑。口渴。足跗冷徹骨中。宜宣明桂苓

甘露飲加減。三月廿九日

白茯苓 四錢

綿茵陳 二錢

滑石 四錢

晚蠶沙 包二錢

桂枝 七分

煨石膏 三錢

光杏仁 三錢

秦艽 錢半

江西朮 一錢

防己 錢半

瓜蒌根 三錢

澤瀉 三錢

（介按）濕鬱脾胃之陽。脾胃以膜相連。邪伏於此。則寒熱交作。脾主四肢。故足多浮腫。治以桂苓甘露飲。導濕分消而宣通其陽。

某 寒熱不清。脈濡數。舌滑白。咳嗽稍減。濕熱阻隔氣分。宜治手太陰。佐淡滲。四

月十八日

綿茵陳 三錢

光杏仁 三錢

仙半夏 錢半

炒青皮 八分

白蔻仁 八分

茯苓 四錢

炒條芩 錢半

川貝 錢半

滑石 四錢

廣橘紅 一錢

大腹皮 三錢

淡竹茹 一丸

三帖。

（介按）濕熱阻滯氣分。寒熱咳嗽。形同肺癰。故用半貝丸意。以退寒熱。又以清肅肺氣而滲濕熱。

某 咳逆已除。脈弦。舌白。根微黃。大便溏。溺赤澀。濕熱蘊結。

瓜蒌皮 三錢

原滑石 四錢

通草 錢半

蔻殼 錢半

赤苓 四錢

廣鬱金 三錢

枳殼 錢半

光杏仁 三錢

省頭草 錢半

新會皮 錢半

炒穀芽 三錢

清煎三帖。

（介按）濕熱蘊結。脾弱便溏。治法於滲濕之中。參以芳香理氣。則濕易下趨。惟杏仁善泄肺氣。肺氣一降。未免與便溏有礙。馬安趙濕熱傷氣。寒熱交作。肢冷嘔逆。便利。脈沉弱。舌黃滑。兩邊微白。皖悶。宜宣明桂苓甘露飲加減。尤防昏厥之變。候正。六月十六日。

茯苓三錢

澤瀉三錢

仙半夏錢半

藿香二錢

桂枝八分

豬苓錢半

條芩三錢

焦麴四錢

蒼朮錢半

滑石四錢

大豆卷三錢

清煎二帖。

（介按）濕阻氣分。凝遏清陽。鬱而為熱。治療大忌發散。汗之則變痙厥。今倣桂苓甘露飲意。藉滲濕清熱以通陽。是為正治。

遺風龐濕熱寒熱。脈弦濡。中痞氣滯。腹痛便滑。姑宜和中利濕。

草果五分

生香附三錢

仙半夏錢半

炒青皮八分

川樸一錢

赤苓四錢

炒條芩錢半

原滑石四錢



大腹皮三錢

廣木香七分

威靈仙錢半

清煎三帖。

（介按）脾失健運之職。胃失消化之權。濕熱蘊於膈膜。致寒熱交作。氣機阻滯。腹痛便泄。此方開達膜原。健脾和胃。理氣滲濕。均臻穩妥。

盛陵徐 中焦未和。氣衝脘悶。脈滯澀。濕熱蘊蓄。宜順氣和中。

烏藥二錢

綿茵陳三錢

生香附三錢

枳殼錢半

厚樸一錢

澤瀉三錢

沉香麝錢半

玫瑰花五朵

生牡蠣四錢

鷄內金三錢

通草錢半

清煎四帖。

（介按）牡蠣澤瀉散。為治腰以下水氣不行之專方。蓋以澤瀉能啓水中之清氣上行。牡蠣能化下焦之濕濁阻滯。前清葉天士先生善用古方。至用牡蠣澤瀉散。祇取此二味。未曾盡用原方。今此案亦宗此意。因其氣衝脘悶。又佐鷄金散以理氣。確治濕熱蘊蓄之良劑。

盛陵徐 胃氣稍振。濕猶未淨。舌滑嫩黃。脈濡。腰墜。宜滲利為妥。

赤苓四錢

蘘梗二錢

蔻殼錢半

仙半夏錢半

省頭草錢半

焦梔子三錢

光杏仁三錢

穀芽四錢

綿茵陳三錢

通草錢半

大豆卷三錢

清煎三帖。

（介按）病後餘濕流於下焦。治用辛泄。又佐清熱。以存陽明之液。確有見地。其濕自上中蔓延下焦。故方法仍是開泄上中。源清則流自潔之意。安昌葉 濕熱未清。脈濡細。舌薄滑。午後背寒乍熱。宜宣明桂苓甘露飲加減治之。

桂枝五分

江西朮一錢

綿茵陳三錢

淡竹葉錢半

茯苓四錢

寒水石三錢

原滑石四錢

光杏仁三錢

澤瀉三錢

猪苓錢半

釵斛三錢

清煎四帖。

（介按）濕熱未清。脾陽被遏。甘露飲加減極妙。惟釵斛一味。雖滋胃液。未免有戀濕之患。

滴渚吳 舌微黃。脈細數。背寒肢木。腕中窒痺。此屬濕邪。宜溫膽祛邪。

仙半夏錢半

枳實錢半

省頭草三錢

廣鬱金三錢

陳皮一錢

焦山梔三錢

薤白一錢

麥芽三錢

茯苓四錢

淡豆豉錢半

光杏仁三錢

桑梗許一尺

二帖。

（介按）濕熱蔓延三焦。氣機阻塞而不流行。津液凝滯而為痰飲。腕中窒痺。良以痰阻氣機。故其治法。於溫膽湯加薤白杏仁。以通胸中之陽。則背寒肢木自除。參以梔豉。泄其久鬱之熱。佐以省頭草。滌其陳腐之氣。而醒脾胃。此方從王孟英脫胎而來。深可為法。

遺風李 舌色黃滑。根厚。脈濡細。頭暈肢楚。惡寒微熱。洩數便結。宜甘露飲加減治之。五月廿三日

茯苓四錢

炒條芩錢半

光杏仁三錢

棗兒檳榔三錢

桂枝五分

原滑石四錢

防己錢半

炒穀芽四錢

澤瀉三錢

猪苓錢半

大豆卷三錢

清煎二帖。

（介按）脾胃之陽。被濕熱鬱遏而不振。治以清濕熱而扶脾。則諸恙自退。  
安昌顧 濕阻肺衛。脈弦。舌微黃。呃逆頻頻。洩瀉赤。症屬重險。宜宣化肺氣。候正。  
七月十八日

瓜蒌皮 三錢

通 草 錢半

刀豆子 三錢

省頭草 三錢

京川貝 錢半

廣鬱金 三錢

赤 苓 四錢

射 干 錢半

廣橘紅 錢半

光杏仁 三錢

柿 蒂 七個

引 杷 杷 葉 五片

二帖。

（介按）濕阻肺衛。化痰而壅濕膈膜。以致洩赤呃逆。清宣肺氣。治法極是。  
遺風金 舌滑微黃。頭脹肢懈。脈濡細。咳逆。此屬濕熱。宜保和丸加減治之。六月  
廿二號丙午初八日

焦六麴 四錢

山 查 三錢

綿茵陳 三錢

廣藿梗 二錢

連 翹 三錢

赤 苓 四錢

光杏仁 三錢

大豆卷 三錢

仙半夏 錢半

省頭草 錢半

原滑石 四錢

清煎三帖。

（介按）外受之濕。鬱於氣分。則咳逆頭痛。內起之濕。由口腹不慎。而蘊伏中焦。致脾胃失於消化。脾主四肢。今被濕熱阻滯。則肢懈。治以消積滲濕。是屬濕熱夾食之候。

漁莊沈 瘧邪已除。脈弦濡。濕熱猶存。舌滑白。屢次衄血。宜清利為穩。五月十七

綿茵陳 三錢

藿 梗 二錢

大豆卷 三錢

穀 芽 四錢

焦山梔 三錢

淡條芩 錢半

光杏仁 三錢

通 草 錢半

薏 仁 八分

原滑石 四錢

省頭草 錢半

清煎三帖。

（介按）血行清道。從鼻而出。古名曰衄。此症係是陽明濕熱。化火而逼血上溢。故仍以清利濕熱。是屬根本療法。

安昌徐 舌黃滑。罩灰。脈弦濡。胃鈍。跗腫溺赤。此屬濕熱。宜越鞠丸法加減治之。

七月十二號丙午廿七日

焦六麴 四錢

白 芷 八分

綿茵陳 三錢

藿 梗 二錢



香 附二錢

茯 苓四錢

滑 石四錢

新會皮 錢半

焦山梔三錢

鷄內金三錢

炒穀芽四錢

清煎三帖。

（介按）濕熱蘊伏脾胃。而兼氣鬱食積。以致跗腫溺赤。故以治六鬱主方之越鞠丸加減。

遺風胡 濕熱內着。腕悶便結。骨熱。脈瀆滯。舌厚嫩黃。足腫冷。宜清利。六月十五

晚蠶沙三錢

瓜蒌子三錢

焦六麵四錢

炒枳殼 錢半

光杏仁三錢

赤 苓四錢

原滑石四錢

鷄內金三錢

仙半夏 錢半

淡 苓 錢半

大腹皮三錢

路路通七個

三帖。

（介按）舌苔黃厚。腕悶便結。是屬濕熱滯於陽明之證。徒事清熱泄邪。祇能散流走之熱。而不能除胃中蘊結之邪。故於清利方中。佐以蠶沙、蒌仁。兼導濕濁之下趨。

遺風徐 舌黃罩灰。身潮熱。脈弦濡。濕熱蘊於經絡。便澹溺赤。姑宜清熱利濕。慎

恐變幻。八月九號丁未廿七日

炒知母 錢半

瓜薑皮 三錢

仙半夏 錢半

赤苓 四錢

草果仁 錢半

炒枳殼 錢半

條芩 錢半

通草 錢半

大腹皮 三錢

原滑石 四錢

光杏仁 三錢

清煎二帖。

（介按）濕熱蘊結膜原。膜原為脾胃相聯之處。濕勝則便溏。熱勝則潮熱。案中用草果治太陰之寒。知母除陽明之熱。二味合用。為治濕伏膜原而致寒熱交作之良品。

某 濕熱未罷。脈瀯滯。舌厚微黃。足跗酸楚。腕悶。姑宜和中清利。五月十八日

晚蠶沙 三錢

焦六神 四錢

綿茵陳 三錢

藿香梗 二錢

赤苓 四錢

厚樸 一錢

原滑石 四錢

雞內金 三錢

防己 錢半

枳殼 錢半

香附 三錢

清煎三帖。

（介按）夏季身痛屬濕。宜用木防己、蠶沙。此葉香巖先生之言也。今以治足跗

酸楚。洵是對症發藥。其用六麴、鷄金。必係夾食。又用厚樸、枳殼。以除脘悶。餘味均是淡滲之品。藉除未罷之濕熱。又藿梗、香附以理氣。氣機轉運。則濕熱自去矣。

朱墅田 濕熱發黃。脈濇滯。舌滑。面跗浮。症屬重極。宜清利。候正。八月初三日

綿茵陳 三錢

大豆卷 三錢

鷄內金 三錢

冬瓜皮 三錢

赤苓 四錢

白蔻仁 八分

新會皮 錢半

生米仁 四錢

防己 錢半

滑石 四錢

光杏仁 三錢

清煎三帖。

（介按）濕與熱合。瘀鬱不解。未能達表通裏。勢必蒸發為黃。茲用辛淡泄濕。使內瘀之濕熱下趨。則黃從小便而解。

西莊黃 跌仆傷筋。環跳腫痺作痛。脈濡左勁。舌黃滑。濕熱作瀉。姑宜和絡清熱。

利濕。八月十九號戊申初七日

乾地龍 錢半

百藥煎 二錢

炒米仁 四錢

藿梗 二錢

稀簽草 三錢

茯苓 四錢

通草 錢半

車前 三錢

大腹皮三錢 木 瓜三錢 新會皮錢半 引桑 枝許一尺  
三帖。

（介按）因跌仆傷筋而濕鬱腫痺。氣窒絡瘀。壅閉不宣。不通而痛。故用地龍、稀  
 簽、桑枝。以宣通脈絡。又因濕勝便泄。而用健脾滲濕之劑。以清熱止瀉。且米仁、  
 木瓜二味。為治濕熱阻滯。以致足筋酸痛之妙品。  
 遺風龐 舌滑白。脈濡細。腕悶。洩瀉赤。汗出津津。宜和中清利。

焦六麵四錢 藿香梗一錢 炒穀芽四錢 新會皮錢半  
 赤 苓三錢 薏 殼錢半 枳 殼錢半 省頭草三錢  
 川 樸一錢 通 草錢半 淡竹葉錢半 荷 葉一角  
 三帖。

（介按）濕濁上干則腕悶。胃熱內蒸則汗出。病在中焦氣分。故開中焦氣分濕  
 熱。兼以和胃為治。

燥

盛陵徐 閨女秋燥發熱。脈浮數。咳嗽氣急。舌微黃。渴不多飲。症非輕貌。宜防昏  
變。候正。九月初四日

薄	荷錢半	桑	葉三錢	光杏仁	三錢	象	貝三錢
連	翹三錢	蟬	衣錢半	廣橘紅	一錢	淡豆豉	三錢
花	粉三錢	前	胡錢半	淡竹葉	三錢	引活水蘆根	一兩

二帖。

（介按）燥有涼燥、溫燥之殊。涼燥治法宜遵內經燥淫所勝。平以苦溫之旨。而  
此案係是溫燥之症。即內經所謂燥化於天。熱反勝之之候。須防化熱劫液。茲  
從葉氏上燥治氣。辛涼宣上之意。而清燥救肺。俾上焦之燥熱。逐漸清解。  
蜀阜張 閨女秋燥發熱。脈滑數。噎咳痰阻。症非輕貌。姑宜清燥消痰。九月十五

冬桑葉	三錢	炒知母	錢半	白	前錢半	秦	朮錢半
象	貝三錢	光杏仁	三錢	甘	菊錢半	焦山梔	二錢
前	胡錢半	廣橘紅	一錢	老	天竺黃錢半	引	枇杷葉三片
三帖。							



（介按）此係溫燥化熱。燥液成痰而為喘咳。最防內合胃熱。引動肝風。驟變症厥。治以辛涼清解。滋液豁痰。俾痰熱稍蠲。則諸證自痊。  
義橋徐 秋感燥化。頭暈而疼。咳逆發熱。脈右浮滑。左微勁。舌黃尖紅。姑宜辛涼清解。七月初四日

薄荷 錢半

冬桑葉 三錢

銀花 三錢

淡竹葉 錢半

連翹 三錢

甘菊 錢半

焦梔子 三錢

象貝 三錢

桔梗 錢半

前胡 錢半

橘紅 一錢

清煎。二帖。

（介按）先哲何廉臣先生曰。六氣之中。惟燥氣難明。蓋燥有涼燥、溫燥、上燥、下燥之分。涼燥者。燥之勝氣也。治以溫潤。杏蘇散主之。溫燥者。燥之復氣也。治以清潤。清燥救肺湯主之。上燥治氣。吳氏桑杏湯主之。下燥治血。滋燥養營湯主之。今此案係是燥之復氣。故治法悉宗葉氏辛涼清宣之意。

大西莊楊 童年咳嗽。已曾失血。脈細右大。舌微黃。身熱頭脹。此燥氣內逼。宜防成損。八月十七日

霜桑葉二錢

焦山梔三錢

炒知母錢半

苦丁茶錢半

光杏仁三錢

廣鬱金三錢

川貝錢半

銀花二錢

池菊二錢

橘絡錢半

白前錢半

清煎 三帖。

又

童年血後咳嗽較減。頃脈兩手皆弦。舌尖紅。頭暈。宜清燥以育陰。八月廿二

冬桑葉三錢

南沙參三錢

天冬三錢

白前錢半

光杏仁三錢

川貝錢半

女貞子三錢

胖大海三錢

生石決明六錢

橘絡錢半

黃草石斛三錢

清煎。

（介按）時令燥氣。挾肝經之燥火。互相上蒸。衝肺則咳。傷血。衝腦則頭暈目眩。初診脈細右大。治在氣分。所以咳嗽較減。次則治以清肝肅肺。和胃止血。俾肺氣復肅降之權。則咳暈自止。此後如能再進顧松園之八仙玉液。更為穩妥。又據葉氏幼科要略自注云。秋燥一證。氣分先受。治肺為急。若延綿數十日之久。病必入血分。又非輕浮肺藥可治。須審體質證端。古謂治病當活潑潑地。如

盤走珠耳。

### 溫熱

遺風漏 風溫發熱咳嗽。氣急不耐。脈弦數。舌厚膩。症勢非輕。宜治防變。元明廿

薑半夏三錢

萊菔子三錢

前胡錢半

枳殼錢半

光杏仁三錢

連翹三錢

焦山梔三錢

花粉三錢

霜桑葉三錢

象貝三錢

廣橘紅一錢

引竹肉一九

二帖。

（介按）風溫先傷肺分。肺氣不舒。以致咳嗽氣急。脈數舌膩。治法大忌辛溫汗散。宜與辛涼輕劑。肅降肺氣。清解表邪。薑半夏雖能消痰止咳。尚宜慎用。

安昌徐 溫邪未淨。脈尚大。午後肌熱。舌白滑。噎咳面浮。大便溏薄。宜養胃清肺。熄邪。

丹參三錢

生米仁四錢

銀花錢半

金沸草三錢  
包煎

川貝二錢

茯苓三錢

丹皮二錢

通草錢半

省頭草三錢

桔梗錢半

白前錢半

清煎 三帖。

（介按）溫邪濕熱未淨。上衝於肺。則咳嗽面浮。陰液未復。而濕熱蘊蓄。則肌熱便溏。必先清肺熱。則咳嗽自止。滲濕扶脾。則便溏自差。佐清營熱。則肌熱亦退。惟丹參恐是元參之誤。

白馬山李 溫邪上鬱。頭目不爽。脈數。舌微黃。身熱肢楚。宜清解為主。二月廿

淡竹葉錢半

苦丁茶錢半

滑石四錢

炒枳殼錢半

焦梔子二錢

炒遠志肉八分

廣鬱金三錢

炒麥芽三錢

甘菊錢半

石菖蒲八分

乾地龍錢半

清煎 二帖。

（介按）溫病發出之途。自少陽。熱病發出之途。由陽明。此病由少陽而上鬱清竅。則頭目不爽。漸次由陽明而化熱。故身熱肢楚。今以少陽陽明同治。參用地龍竹葉。藉清胃絡之熱。

遺風靡 溫邪發熱。神識乍清。乍憤。脈滑數。口燥。咳逆。便閉。宜防變端。候正。四月

十七號三月初二日

瓜蒌皮三錢

石菖蒲七分

乾地龍錢半

焦梔子三錢

廣鬱金三錢

連翹三錢

枳殼錢半

天花粉錢半

銀花錢半

光杏仁三錢

淡竹葉錢半

清煎二帖。

又

大便稍下。熱猶不解。脈滑數。咳逆。宜清上焦為主。不致變端無慮。三月初四

瓜蒌皮三錢

淡條芩錢半

前胡錢半

萊菔子二錢

焦山梔三錢

廣鬱金三錢

光杏仁三錢

象貝三錢

枳殼錢半

二帖。

（介按）溫邪上受。首先犯肺。傳於陽明。胃熱挾痰而漸逼心胞。致神識乍憤。口燥咳逆而便閉。治以清熱化痰。芳香宣竅。胃熱清降。則大便稍下。然肺分之餘熱不清。故咳逆未止。繼方再清上焦氣分。庶無變幻之慮。魚莊沈歸癸水色尙紫。正夾溫邪。咳嗽尤甚。脈浮大。舌紅。頭疼身熱。邪熱已極。



營絡宜清解消痰。杏月十一日

天花粉三錢

象貝三錢

元參三錢

旋覆花三錢  
包煎

連翹三錢

甘菊錢半

橘紅一錢

光杏仁三錢

丹參三錢

白前錢半

銀花錢半

引枇杷葉三片  
去毛

三帖。

（介按）陰虛內熱。則癸水色紫。更感溫邪。上犯於肺。致咳嗽身熱頭疼。而脈象浮大。足氣分熱熾。已屬顯然。但兩熱相併。易入營分。故此方於清肺止咳之中。兼顧營熱為治。

安昌顧 溫熱言譫。脈促數。舌微黃。疹點隱約。咳逆發熱。肢戰。症屬棘手。宜防痙厥。候正。四月廿四號甲辰初八日

玳瑁一錢

紫草一錢

銀花三錢

天花粉三錢

連翹三錢

蟬衣一錢

廣鬱金三錢

僵蠶三錢

石菖蒲七分

象貝三錢

老天竺黃三錢

引鮮竹葉卅片

一帖。

（介按）病由肺衛而逼入營分。劫液動風。以致言譫肢戰。所幸疹現而咳。邪勢外達。然症象已屬熱極。故用玳瑁、紫草涼解營分。餘味開竅豁痰。清熱透邪。洵治溫邪逼入營分之良方。

盛陵龐 濕溫雜受。中焦格拒。脈澀滯。舌厚嫩黃。便溺不利。藉小陷胸湯防變。候正。五月三號甲辰十七日。

杜括 薑子 錢半

枳 實 一錢

原滑石 四錢

炒麥芽 三錢

薑炒川連 八分

生查肉 三錢

焦梔子 三錢

光杏仁 三錢

仙半夏 錢半

淡竹葉 錢半

省頭草 三錢

清煎 二帖。

（介按）內濕素盛。更感溫邪。蘊伏中焦。化痰而阻其氣化之流行。故以小陷胸湯加味。藉除中焦之濕熱以化痰。

盛陵徐 濕熱溫邪雜受。寒熱交作。脈濡數。大便自利。舌心灰黃。宜防昏蒙之變。候正。五月十號甲辰廿四日。

焦六麴 四錢

赤 苓 四錢

原滑石 四錢

銀 花 錢半

連翹三錢

大豆卷三錢

防己錢半

石菖蒲五分

仙半夏錢半

陳皮錢半

淡黃芩錢半

清煎 二帖。

（介按）濕熱凝滯。大便自利。感受溫邪。寒熱交作。最怕濕阻氣機。挾痰而上蒙清竅。變現神識昏憤。此症既不能表。又不能下。故治法以宣竅而清濕熱為首要。

道墟陶 濕溫雜受。煩熱口燥。身發疹斑。神識乍清乍憤。脈數。舌黃。清竅失聰。症屬棘手。宜防厥閉。候正。五月廿三號乙巳初七日

焦梔子三錢

貫仲二錢

銀花二錢

牛蒡子錢半

淡豆豉三錢

蟬衣錢半

連翹三錢

淡竹葉錢半

石菖蒲八分

天花粉三錢

滑石四錢

引活水蘆根一兩

先服牛黃清心丸一粒。一帖。

（介按）濕熱相蒸。先阻氣分。津液被燄。未能上升。是以煩熱口燥。日久不解。邪熱無處發泄。漸走營分。則神昏譫語。上蒙清竅。則耳聾無聞。幸喜肺胃之邪。

漸從疹斑而透現。然症勢已在險途。故治以芳香通神。淡滲宣竅。俾穢濁濕邪。由此分消。

盛陵蔣 熱入血室。疹斑稍現。舌黃滑。脘悶。大便瀉痢。微熱。勢在重險。宜清解。防厥。六月廿一號丙午初七日

貫仲二錢

碧玉散荷包三錢

大豆卷三錢

小青草一錢

原滑石四錢

赤苓四錢

連翹三錢

通草錢半

銀花三錢

炒枳殼錢半

省頭草錢半

引活水蘆根一兩

二帖。

又。血舍已清。瀉痢較差。脈濡數。舌黃。噎咳。微熱不清。胸前發斑白痞。宜清解為主。六月念四號丙午初十日

淡竹葉錢半

銀花三錢

省頭草錢半

桔梗錢半

京川貝二錢

赤苓四錢

廣鬱金三錢

大豆卷三錢

碧玉散荷包四錢

小青草一錢

通草錢半

清煎二帖。

又瀉痢已差。身熱亦退。脈濡細。腕腹脹悶。咳逆宜治。防變。七月四號丙午二十

桔梗錢半

枳殼錢半

新會皮錢半

白前錢半

川貝二錢

赤苓四錢

廣鬱金三錢

蔻殼錢半

佩蘭錢半

通草錢半

穀芽四錢

引荷葉一角

三帖。

（介按）伏熱由陽明而陷入血室。血下則陽熱上浮。而神識不清。語言譫妄。張仲景屢有刺期門之訓。因期門是肝經之募。瀉其熱而通其經。則汗得遍身而蓄熱外洩。下血自止。而譫語自已。此案治法。雖不宗小柴胡湯之例。而悉遵仲景無犯胃氣及上二焦之戒。仍以清熱利竅。俾鬱熱外洩。而疹斑透現。確是良法。但肝經之熱。恐難速解。故防劫液動風。而變痙厥。幸其鬱熱漸由大腸而自尋出路。治以清解。而斑痞更現。瀉痢較差。身熱亦退。初二兩方之着力。顯然可見。惟初方既用碧玉散。則滑石可以去之。第三方若再注重清解。庶免久咳之累。

西莊易 血舍已清。脈數。氣口滑。噎咳頭暈。身熱未退。舌黃尖紅。腰疼肢楚。還防



變幻。候正。五月廿號乙巳初四日

瓜蒌根三錢

冬桑葉三錢

象貝三錢

乾地龍錢半

連翹三錢

甘菊錢半

廣橘紅一錢

光杏仁三錢

前胡錢半

貫仲二錢

老天竺黃錢半

引竹肉一九

二帖。

（介按）溫邪由肺而傳於胃。表邪雖解。而裏熱尙在熏蒸。是以肌熱未退。上熏於肺。則嗆咳頭暈。故治法仍以肅降肺氣。蠲除胃熱。俾胃熱清解。則身熱咳嗽可除。因其腰疼肢楚。又佐地龍善走經絡以退熱。遺風徐。冬溫汗出發熱。脈數右勁。舌心黃厚。咳逆吸短。右脅刺痛。神識乍憤。症勢重險。宜防厥閉。候正。十月十二日

乾地龍錢半

象貝三錢

冬桑葉三錢

牛蒡子錢半

連翹三錢

前胡錢半

原鬱金三錢

橘紅一錢

光杏仁三錢

銀花錢半

老天竺黃二錢

捲心竹葉卅片

二帖。

又 右脅猶痛。脈滑數。舌黃。吸粗。咳逆痰阻。神色乍憤。還防變幻。

乾地龍錢半

石菖蒲八分

前胡錢半

廣鬱金三錢

銀花三錢

連翹三錢

炒淡黃芩錢半

絲瓜絡錢半

賴橘紅八分

光杏仁三錢

老天竺黃二錢

枇杷葉三片  
去毛

三帖。

（介按）冬溫犯肺。不得外解。最易逆傳心胞。而現神識昏憤。茲以溫邪激動肝陽。燦液成痰。阻滯氣機。而致咳逆吸促。右脅刺痛。治以辛涼之劑。肅清肺胃之痰。而解氣分之熱。然至次診。神色猶憤。症勢已屬棘手矣。

# 邵蘭蓀醫案

清 山陰 邵蘭蓀先生原著

紹興 史久華介生評註

鄞縣 曹赤電炳章纂輯

## 卷二

### 咽喉

白馬山李 溫熱寒熱。脈弦寸口朮。噎咳咽痛。舌白尖赤。症屬陰虛。宜防喉燥。

元 參三錢 橘紅一錢 金果欖錢半 桑葉三錢

象貝三錢 焦山梔三錢 光杏仁三錢 射干錢半

馬勃錢半 白前錢半 胖大海三錢 引枇杷葉五片  
去毛

三帖。

又 咽痛稍差。脈弦右寸大。舌黃紅。噎咳。寒熱不清。宜防喉燥。二月十二日

元參三錢

薄荷錢半

金果欖錢半

桔梗二錢

象貝三錢

橘紅錢半

粉丹皮二錢

甘草八分

馬勃錢半

炒知母錢半

山茶花錢半

引枇杷葉五片

三帖。

又

咳逆稍減。自利未除。脈濡數。舌滑根焦。尙潤形光。最怕變幻。四月初五日一號甲

桔梗錢半

銀花錢半

廣鬱金三錢

淡竹葉錢半

連翹三錢

大豆卷三錢

橘紅一錢

薤仁七分

光杏仁三錢

赤苓四錢

通草錢半

清煎二帖。

（介按）張仲景云。少陰病。下利咽痛。胸滿心煩者。豬膚湯主之。今此案。是屬伏氣自少陰而內發之咽痛。雖不用豬膚湯。而初方以宣散溫邪。清火解毒。得以咽痛少差。次方則從甘桔湯加味。以清少陰內發之熱。而咳逆稍減。三方因其自利。兼用辛淡滲濕。俾濕走脾健。自能告痊。

耳目口齒

漁莊沈 女孩邪火上鬱。始喉痺。繼及耳內頤部。延久不清。鼻塞氣粗。宜清上焦為主。

桔梗 錢半

苦丁茶 錢半

焦山梔 三錢

淡竹葉 三錢

連翹 三錢

光杏仁 三錢

殭蠶 錢半

人中黃 錢半

夏枯草 三錢

銀花 二錢

通草 錢半

清煎三帖。

（介按）風熱之邪。干於上焦氣分。以致清竅不利。而喉痛頤腫。故治法以清解宣散。

安昌王 風熱目澀。頭疼胃餒。脈浮弦。嗆咳。便結。舌微黃。宜清疎為妥。

桑葉 三錢

蔓荊子 三錢

天麻 八分

生石決明 六錢

甘菊花 二錢

刺蒺藜 三錢

杏仁 三錢

丹皮 二錢

蕤仁 錢半

青葙子 三錢

穀精珠 三錢

清煎四帖。

又 風熱未淨。脈弦濡。頭疼已減。目澀胃餒。仍遵前法為妥。十二月十二日



桑葉三錢

釵斛三錢

煨天麻八分

蔓荊子三錢

甘菊一錢

生石決明六錢

刺蒺藜三錢

穀芽四錢

蕤仁錢半

蠍梢二錢

穀精珠三錢

清煎四帖。

又

胃氣尙餒。脈虛細。舌微黃。夜寐少安。姑宜養胃凝神。

釵斛三錢

炒棗仁三錢

穀芽四錢

遠志八分

夜交藤三錢

茯神四錢

石決明六錢

丹皮二錢

蕤仁錢半

丹參三錢

刺蒺藜三錢

清煎四帖。

（介按）局方蟬花散。為治肝經鬱熱。風毒上攻。以致眼目澀痛之良劑。今此人頭疼咳嗽。是屬風熱鬱於肺經。故加杏仁以止咳。蕤仁以退赤。洵是對症發藥。惟初診之方。係從蟬花散脫胎。則蟬衣不必減去。俾風熱容易退淨。次診又加蠍梢。尤能善祛肝經蘊熱。亦為佳妙。三診則肝熱雖退。胃液未復。致肝不藏魂。而夜寐少安。故以養胃柔肝。安神退熱以善後。

盛陵徐 溫邪上鬱。齒浮口臭。牙縫出血。脈細數。肢木。宜防牙疳。

淡竹葉三錢

烏元參三錢

細生地三錢

天花粉三錢

人中黃三錢

僵蠶錢半

丹皮三錢

生石決明六錢

銀花三錢

焦山梔三錢

知母錢半

清煎四帖。

（介按）胃脈絡於上齦。大腸脈絡於下齦。而胃又爲五臟六腑之海。最善容納。邪熱入胃。逼動肝陽。血溢而上結於齦。轉成牙疳。此方清肝涼胃。爲治牙疳之良劑。

### 咳嗽

某 新邪咳嗽氣急。右脅刺痛。宜防血溢之變。五月初三日

乾地龍錢半

枳殼錢半

金沸草三錢

光杏仁三錢

象貝三錢

廣鬱金三錢

焦梔子三錢

馬兜鈴一錢

白前錢半

橘絡錢半

前胡錢半

鮮竹肉一丸

二帖。

（介按）此是溫邪燻肺。故治以清肺寧絡之方。

安昌徐 咳喘不已。脈弦細。口甜。舌色嫩黃。宜清肺胃以化痰。

瓜蒌皮 三錢

仙半夏 錢半

廣橘紅 一錢

金沸花 包煎 三錢

光杏仁 三錢

炒川連 七分

茯苓 四錢

石決明 五錢

紫苑 錢半

白前 錢半

冬瓜子 三錢

川貝 錢半

清煎四帖。

（介按）肝熱燻肺。脾濕釀痰。此方清宣肺氣。兼平肝熱。又佐滲濕化痰為治。

某 咳痰不爽。脈弦。舌微白。臍下氣機不運。姑宜清氣消痰為主。四月念三日

瓜蒌皮 三錢

霜桑葉 三錢

金沸花 包煎 三錢

炒枳殼 錢半

川貝 錢半

石決明 六錢

廣鬱金 一錢

新會皮 錢半

光杏仁 三錢

白前 錢半

焦梔子 三錢

清煎三帖。

（介按）肝陽逆阻樞機。以致肺氣不宣。治以清宣肺痺。平肝理氣。庶幾痰濁肝

和而諸恙自瘳。

安昌高 舌白滑。脈細數。咳嗽痰迷。咯不易出。氣逆。周身骨節痛。宜防損。五月愈。

北沙參三錢

生石決明六錢

甜杏仁三錢

炙甘草八分

茯苓四錢

川貝二錢

懷藥二錢

冬瓜子三錢

生地三錢

紫苑錢半

鹽水炒橘紅一錢

清煎五帖。

又 咳不減。喉中貯痰不爽。咳不易出。脈濡細。舌滑。頭暈肢楚。宜清氣熄風。利濕

化痰。六月初五日

瓜蒌皮三錢

煨天麻八分

冬瓜子三錢

生石決明四錢

川貝三錢

白蒺藜三錢

茯苓四錢

通草錢半

甘菊錢半

光杏仁三錢

廣橘紅一錢

清煎四帖。

又 濕釀成痰。喉中咯不易出。舌滑。大便不快。仍遵前法損益。

瓜蒌皮三錢

金沸花三錢  
包煎

川貝二錢

通草錢半

廣橘紅一錢

廣鬱金三錢

杏仁三錢

焦山梔三錢

茯苓四錢

紫苑錢半

桑葉三錢

清煎四帖。

（介按）肝陽上越。挾濕化痰。阻滯氣機。以致咳嗽而咯痰不爽。初方健脾養胃。清肺滲濕。繼則參以平肝熄風。終則清宣肺氣。兼滲濕熱。三方之中。以次方尤為靈動。

某 濕熱釀痰。脈濡細。舌微白。咳逆。右脅刺痛。洩瀉赤。腹痛。宜清氣、和絡、化痰。

瓜蒌皮三錢

枳殼錢半

光杏仁三錢

降香七分

廣鬱金三錢

象貝三錢

絲瓜絡三錢

橘紅一錢

乾地龍錢半

通草錢半

白前錢半

清煎二帖。

（介按）濕痰阻肺。以致咳久脅痛。故治以滲濕化痰兼和絡。

大西莊宋 嗆咳喉癢。脈弦細。舌轉微白。潮熱較差。食入惡心。宜清肺胃化痰。四

月十六號癸卯廿九日



紫苑二錢

光杏仁三錢

炒穀芽四錢

白前錢半

川貝錢半

茯苓四錢

薤殼一錢

橘紅一錢

仙半夏錢半

青蒿梗一錢

通草錢半

清煎三帖。

又潮熱不清。脈弦細數。咳嗽如前。溲溺赤。宜清熱、通肺、化痰、防血溢。四月念三

號甲辰初七日

秦艽錢半

霜桑葉三錢

白前錢半

焦山梔三錢

丹皮二錢

川貝二錢

廣橘紅一錢

通草錢半

青蒿梗一錢

地骨皮三錢

杏仁三錢

清煎三帖。

（介按）陰虛熱盛。灼液成痰而為咳嗽。今以舌轉微白。繼則溲溺變赤。是屬更感新邪之候。肺胃疊次受戕。肝陽上越莫制。前後兩方。既清內熱。又祛新邪。但陰液驟難恢復。已屬難治之症。後聞斯人於六月望邊竟至不起。錄之以為辨證之一助。

遺風龐 咳嗽不已。脈尙虛數。胃納已和。宜潤肺以清降。四月十二日

生玉竹三錢

霜桑葉三錢

瓜蒌皮三錢

馬兜鈴一錢

川貝錢半

茯神四錢

光杏仁三錢

款冬花三錢

白前錢半

廣橘絡錢半

焦山梔三錢

生石決明五錢

清煎四帖。

（介按）此方清肺養胃以柔肝。為治咳嗽善後之妙劑。

安昌施 咳嗽未除。脈小數。仍屬汗出微熱已退。姑宜清肺斂液。五月一號甲辰

北沙參三錢

紫苑二錢

白薇三錢

白石英三錢

茯神四錢

川貝錢半

炒白芍錢半

炙橘紅一錢

生牡蠣四錢

甜杏仁三錢

炒棗仁三錢

清煎四帖。

（介按）心在天為熱。其液為汗。茲以心火不寧。刑肺咳嗽。氣泄而身熱汗出。故以補益心神。斂液清肺為治。

安昌王 年五十餘歲

酒濕傷肺。咳嗽氣急。痰稠。脈滑數。舌赤。苔薄膩。尤防變幻。候正。

八月六日丁未念四日

瓜蒌皮三錢

廣橘紅一錢

原滑石四錢

炒知母錢半

象貝三錢

天竺黃錢半

廣鬱金三錢

前胡錢半

光杏仁三錢

生煎子二錢

法半夏錢半

引枇杷葉五片

一帖。

（介按）酒濕釀痰。壅滯氣機。肺失治節之權。而氣急咳嗽。茲以清肺氣而滌稠痰。方雖對證。但高年患此。是屬危險重症。案中尤防變幻之語。洵是經驗之談。後聞斯人。祇過四五日而逝世。可見醫家臨證。全在診斷確鑿。審慎周詳也。

安昌李婦。嘔減熱緩。噎咳渴飲。脈滑數。經停月餘。小溲稍利。偶有呃逆。脘痛。宜宣肺和中化痰。九月初五日

瓜蒌皮三錢

射干錢半

廣橘白一錢

白前二錢

廣鬱金三錢

光杏仁二錢

焦山梔三錢

柿蒂七只

川貝母二錢

霜桑葉三錢

天花粉三錢

引枇杷葉五片

三帖。

又 嘔逆已差。脈小滑。經停月餘。噎咳腕悶。氣衝欲嘔。宜清養肺胃化痰。九月初

黃草斛三錢

川貝錢半

大腹絨三錢

蘆梗二錢

橘白一錢

扁豆衣三錢

廣鬱金三錢

綠萼梅錢半

桑葉三錢

炒穀芽四錢

蔻殼錢半

鮮枇杷葉七片  
去毛

三帖。

又 噎咳未除。舌紅。潮熱。脈滑數。經停。胸悶心惕。宜清養肺胃為主。九月十三日

南沙參三錢

冬桑葉三錢

橘紅一錢

炒知母錢半

地骨皮三錢

川貝母錢半

穀芽錢半

綠萼梅錢半

銀胡一錢

紫苑二錢

黃草石斛三錢

鮮枇杷葉七片

三帖。

(介按)肝經鬱熱上升。犯胃則嘔惡呃逆。衝肺則咳噎腕悶。日久而痰氣凝滯。經隧不宣。初方宣肺化痰。繼則養胃清肝。終則又參入滋液退熱。方法頗有次序。

大西莊沈

氣喘噎咳。右脈小數。左關弦細。舌灰黃底紅。癸水不調。外寒內熱。

胃鈍便閉。宜防血溢。十月初九日

霜桑葉三錢

光杏仁三錢

瓜蒌皮三錢

南沙參三錢

川貝二錢

甘菊二錢

焦山梔三錢

橘紅一錢

紫苑錢半

白前錢半

穀芽四錢

引枇杷葉五片  
去毛

三帖。

（介按）肝陰素虧。厥陽上衝肺胃。肺氣失於清肅。以致咳喘而大便不爽。兼以

陰虛內熱。陽微外寒。治以清宣肺痺。養胃液而制肝逆。

柯橋王 咳嗽較減。脈虛。左弦細。腰疼。癸澀早期。還宜前法加減為妥。

紫苑二錢

南沙參三錢

川斷三錢

當歸錢半

川貝錢半

甜杏仁三錢

炒杜仲二錢

炒白芍錢半

丹皮三錢

橘絡錢半

生地四錢  
五分  
炒小橘餅三枚

四帖。

（介按）經水趨早。血熱之徵。脈虛腰疼。腎虛之候。咳嗽略減。是肺氣略見清肅。脈虛而細。是胃液尚未恢復。故其方法。既以清養肺胃。又佐滋液補腎。



遺風龐婦 嗆咳頭暈。左脈弦細。氣口搏大。形寒。鈍胃。經停二月餘。宜清肺胃熄風。三月念號癸卯初二日

南沙參 三錢

桔梗 錢半

穀芽 四錢

桑葉 三錢

蘇梗 錢半

川貝 二錢

川斷 三錢

甘菊 錢半

紫苑 二錢

光杏仁 三錢

炒杜仲 三錢

清煎四帖。

（介按）肝陽化風。旋擾不息。時屆春令。肝陽愈旺。更受外風。逆乘肺胃。遂致嗆咳頭暈。茲以柔肝養胃。清肺疎風。乃是對症療法。

遺風龐婦 咳嗽稍減。腹中瘕塊不利。嘔惡涎沫。癸不及期。宜清肺平肝。調經。

紫苑 錢半

生牡蠣 四錢

仙半夏 錢半

茺蔚子 三錢

川貝 錢半

香附 三錢

廣橘紅 一錢

玫瑰花 五朵

甜杏仁 三錢

釵斛 三錢

生款冬 三錢

枇杷葉 五片  
去毛

四帖。

（介按）衝脈為病。氣逆裏急。在男子則為內疝。女子則為瘕聚。今衝脈之氣上

逆。犯胃則嘔吐涎沫。冲肺則咳喘不止。且衝脈卽是血海。隸於陽明。細揣病情。治宜鎮衝養胃。茲因腹癢嘔惡。治以清肺平肝。方法極佳。如能酌用鎮衝養胃之品。則奏效尤捷矣。

漁莊沈 大便已通。胃氣稍振。脈虛細。舌滑白。宜養胃凝心神。九月十二日

釵斛三錢 丹參三錢 穀芽四錢 新會皮錢半

省頭草三錢 光杏仁三錢 遠志肉八分 淡竹葉錢半

川貝二錢 抱木茯神四錢 合歡皮三錢

（介按）此是咳喘之後。肺胃津液未復。故以清肺養胃。兼安心神爲治。

## 咳血

陡疊王婦 肝氣作痛。脈弦。經閉。咳痰帶紅。損怯已成。非輕藐之症。六月初九日

紫苑錢半 廣橘紅錢半 左金丸八分 白石英三錢

光杏仁三錢 川貝三錢 降香七分 綠萼梅錢半

生牡蠣四錢 茜草錢半 澤蘭錢半 藕節三個

四帖。

（介按）左升屬肝。右降屬肺。茲以胃憊而肝陽橫逆無制。肺失下降之權。以致咳血經閉。此方是泄肝降氣和血通絡之意。

安昌龐 肝陽燦肺。咳痰帶紅。脈弦數。舌色透明。便血。防損。二月初十日

霜桑葉 三錢

光杏仁 三錢

焦山梔 三錢

粉丹皮 二錢

炒驢膠 錢半

生石決明 六錢

川貝 錢半

生米仁 四錢

山茶花 錢半

銀花炭 二錢

橘絡 錢半

清煎四帖。

又 痰紅較差。脈弦勁。噎咳不已。咽痛已減。宜清肺化痰。二月二十日

生地 四錢

生石決明 六錢

川石斛 三錢

炒驢膠 錢半

杏仁 三錢

川貝 二錢

生白芍 錢半

鷄子黃 一枚

元參 二錢

側柏炭 三錢

女貞子 三錢

清煎五帖。

又 咳嗽仍屬帶紅。脈勁數。肝陽上升。宜清降為主。三月初七日

生地四錢	桑葉三錢	側柏炭三錢	小蘗草二錢
光杏仁三錢	生石決明六錢	天冬二錢	茜根三錢
元參三錢	焦山梔三錢	橘紅錢半	茅根一兩 煎湯

五帖。

（介按）內經云。陽絡傷則血外溢。陰絡傷則血內溢。諒以怒勞動肝。暗耗營陰。肺與大腸均受其戕。而逼血妄行。久延愈劇。前後三方。僉以柔肝肅肺。清熱育陰。深合病機。故多奏效。

安昌胡 咳血氣促。脈弦數。舌微黃。寒熱交作。此木火刑肺。宜清少陽為主。

霜桑葉三錢	杜枯薑皮錢半	小蘗草三錢	淮牛膝三錢
生石決明六錢	川貝二錢	淡竹葉錢半	白薇三錢
焦梔子三錢	茜草根二錢	橘絡錢半	

清煎三帖。

又 血已除。咳嗽氣促不已。脈數。舌黃。肝火猶熾。宜清降為妥。十二月初二日

紫苑錢半	桑葉三錢	白前錢半	女貞子三錢
------	------	------	-------

天冬二錢

生石決明六錢

川貝二錢

穀芽四錢

遍金釵三錢

光杏仁三錢

淡秋石八分

清煎四帖。

（介按）陽明脈絡日衰則發冷。陰虧而陽不潛藏則發熱。總之。肝陽橫逆而血上溢。故初方以柔肝肅肺。降氣涼血而獲效。次方於清降之中。參用養胃。立法秩序井然。

張漣俞 咳血未除。脈數。右關弦。胸悶。舌微黃。宜清降消痰。

杜括萆皮錢半

淡竹葉錢半

焦梔子三錢

赤芍錢半

京川貝二錢

廣橘絡錢半

光杏仁三錢

參三七一錢

小薊草三錢

白前錢半

紫苑錢半

清煎四帖。

（介按）胃熱衝肺。逼血上溢。誠以胃脘當心。是肝經交絡所過之處。茲因肝胃鬱熱衝肺。而覺脘悶。治以清肺和絡。涼血消瘀。用藥頗為穩妥。

安昌徐 遭忿動肝。氣衝咳血。脈弦細。舌微黃。姑宜清降消痰。三月初七日



蘇子錢半

焦山梔三錢

苦根三錢

紫苑錢半

川貝二錢

橘絡錢半

光杏仁三錢

天冬二錢

降香七分

白薇二錢

小薊草三錢

清煎五帖。

（介按）嗔怒動及肝陽。血隨氣逆。此方宗繆仲醇氣爲血帥之意。確是對症良劑。

安昌王 陰虛內熱。便結。脈細數。精關不固。咳痰帶紅。宜存陰爲主。六月念七日

遍金釵三錢

焦梔子三錢

光杏仁三錢

茜根錢半

川貝二錢

側柏炭三錢

炒知母錢半

小薊草三錢

生地四錢

柏子仁三錢

廣橘絡錢半

鮮荷葉一角

四帖。

（介按）夏月藏陰。冬月藏陽。茲際夏令。適逢液虧之體。而陽不潛伏。升則血溢。降則遺精。此方滋陰清熱。和血肅肺。治法極佳。

安昌黃 肝陽燥肺。咳嗽帶紅。脈弦。迎風頭疼。舌心光。耳鳴作痛。宜清少陽爲主。

冬桑葉三錢

甘菊二錢

光杏仁三錢

焦梔子三錢

石決明六錢

川貝二錢

側柏炭三錢

苦丁茶錢半

炒驢膠錢半

丹皮三錢

釵斛三錢

淡竹葉錢半

清煎五帖。

（介按）陰液未能上承。厥陽燔燎不已。衝肺則咳嗽帶紅。挾膽熱而上蒙清竅。則頭疼耳鳴。此方養胃肅肺兼清肝膽之熱。確是治病必求於本之義。安昌徐 痰血已除。脈虛數。咳嗽不已。氣逆。宜清降為主。四月初七日

霜桑葉三錢

廣橘絡錢半

淡竹葉錢半

栝蒌皮錢半

光杏仁三錢

焦梔子三錢

生石膏六錢

象貝三錢

馬兜鈴一錢

白前錢半

前胡錢半

清煎三帖。

（介按）此是痰血已除。肺胃餘熱未清之證。故治以降氣清胃為主。

喘

安昌婁 陰火上升。咳嗽氣喘。着枕不耐。脈滑數。舌黃燥底赤。宜防變幻。候正。三月七號壬寅十九日

鮮生地六錢	瓜蒌子三錢	白石英三錢	賴橘紅八分
陳萸肉錢半	川貝二錢	天冬三錢	海石三錢
粉丹皮二錢	杜兜鈴錢半	光杏仁三錢	引青鉛一兩
三帖。			

又 據述痰氣稍平。胃鈍。浮腫溺少。恐痰壅致險。仍遵前法加減。候正。四月十二號癸卯念五日

瓜蒌子三錢	蘇子二錢	炒穀芽四錢	海金沙四錢
川貝三錢	橘紅一錢	白石英三錢	杜赤豆四錢
光杏仁三錢	通草錢半	紫苑二錢	
清煎二帖。			

（介按）喘病之因。在肺為實。在腎為虛。此則虛實兼夾。肺腎同病。虛則虛於腎之不固。實則實於濕痰壅逆。蓋因下元已虛。腎氣不為收攝。痰隨氣升。壅住肺

氣。肺氣不降。以致氣喘不能着枕。初方鎮攝固納。清宣肅降。得以痰氣稍平。然濕濁尙未淨退。而浮腫漸少。繼進清肺滲濕以化痰。治法標本兼顧。

### 胸痺

安昌葉 腕痺氣冲。得暖稍舒。脈弦細。腹中有痞。咳逆。姑宜瓜蒌薤白湯主治。三月二號壬寅十四日

瓜蒌皮 三錢

川 貝 錢半

炒穀芽 四錢

綠萼梅 錢半

薤 白 錢半

生香附 錢半

廣鬱金 三錢

遠志肉 八分

仙半夏 錢半

佩 蘭 三錢

苦丁茶 錢半

清煎二帖。

（介按）陰虛肝旺。腹中聚瘕。挾痰而上衝於肺。肺失清降之司。而阻痺氣機。則暖咳兼作。治法宗仲景辛滑微通其陽。

安昌楊 肺氣不宣。胸腕仍屬窒痺。右脈潛。左沉弦。舌厚膩。仍遵前法加減。三月廿一號癸卯初五日

瓜蒌皮三錢

烏藥二錢

生牡蠣四錢

炒青皮八分

薤白錢半

厚樸一錢

木蝴蝶四分

玫瑰花五朵

仙半夏錢半

炒麥芽三錢

鷄內金三錢

清煎三帖。

（介按）此方平肝運氣。消食健脾。藉以清宣肺氣。

長巷宋 嗆咳痰阻。脈濡細數。胸冷窒痺。舌微黃。宜清氣化痰。

瓜蒌皮五錢

白前錢半

炒枳殼錢半

霜桑葉三錢

薤白錢半

廣鬱金三錢

冬瓜子三錢

綠萼梅錢半

廣橘絡錢半

京川貝錢半

通草錢半

清煎四帖。

（介按）痰飲疑沍。清陽失曠。以致咳嗆而胸冷窒痺。苦辛開鬱。治法極是。

西莊易 血後咳痰不爽。脈弦。肝逆上冲。腕悶。肺氣窒痺。仍遵前法加減為妥。八

月念七日

冬桑葉三錢

栝蒌皮三錢

橘絡錢半

川貝錢半



石決明八錢

薤白錢半

廣鬱金三錢

杜兜鈴一錢

光杏仁三錢

白前錢半

焦山梔三錢

清煎四帖。

（介按）血後肝逆未平。絡傷氣窒。尙有鬱熱未清。故治以降氣通絡。藉滌肝肺之熱。

某 肺痺氣逆。噎咳稠痰。脈浮滑。耳木。姑宜清降消痰爲治。八月念一日

瓜蒌皮三錢

仙半夏錢半

金沸花包三錢煎

桑葉三錢

薤白一錢

川貝錢半

海石四錢

池菊錢半

紫苑錢半

白前錢半

青蛤殼二錢

清煎三帖。

（介按）肝性上升。膽脈貫耳。茲以厥陽與少陽挾稠痰而上騰。阻遏清陽。方以苦降辛通。柔肝肅肺。治法極好。

虛勞

大西莊馬 病損成勞。噎咳。形寒盜汗。曾經失血。脈小數。舌黃。肺氣受戕。非輕藐之症。

北沙參三錢 雲母石三錢 紫苑錢半 光杏仁三錢  
生牡蠣四錢 茯神四錢 川貝二錢 橘絡錢半  
清炙耆皮八分 五味子十粒 冬蟲夏草錢半加紅棗三枚  
四帖。

又 案列於前。頃脈仍屬小數。咳痰膿厚帶紅。總之。肺氣受戕。形寒。屬虛勞重症。

北沙參三錢 白芨片錢半 煅蛤殼四錢 紫苑錢半  
生牡蠣四錢 橘絡錢半 光杏仁三錢 白薇錢半  
川貝二錢 側柏炭三錢 冬蟲夏草錢半引枇杷葉五片  
四帖。

（介按）肺主皮毛。肺傷則失其衛護之職。熱傷元氣。氣傷則不能生津而斂液。以致噎咳形寒而盜汗。但虛勞而至於失血。誠屬重極之症。照此症候。以宜用黃耆建中湯急建中氣。俾飲食增而津液旺。以至充血生精。而復其真陰之不

足。惟此人肺氣受戕。故初方全是清肺生津之品。又佐以善治肺勞之冬蟲夏草。最益肺經之雲母石。確治肺勞之妙劑。據戴氏白芨枇杷丸。用白芨一兩。枇杷葉藕節各五錢。為細末。另以蛤粉炒阿膠五錢。生地汁調之。火上頓化。入前藥為丸。如龍眼大。每服一九。為治咳咯肺血之專方。今次診彷彿戴氏之意。以擬治。真是異曲而同工。

下方橋王 症由暑濕傷氣。咳嗽潮熱。清竅已蒙。右脈小數。左勁。舌光紅。中有白屑。津液重傷。已成虛勞。勢在棘手。宜清降養胃消痰。九月三十日

南沙參 三錢

川石斛 三錢

炒遠志 八分

生石決明 六錢

扁豆衣 三錢

紫苑 二錢

茯苓 四錢

川貝母 二錢

光杏仁 三錢

淡秋石 八分

橘紅 一錢

鹽水炒 引雅 梨 五錢

二帖。

（介按）暑濕傷於氣分。從口鼻吸受。治以辛涼微苦。俾上焦氣分廓清。則愈。乃因日久失治。以致劫燂肺胃之津液。而成虛勞。兼以清竅已蒙。症勢誠屬重險。此方肅肺滋液。以化痰。治法極為適當。

蜀阜馬婦 勞嗽潮熱。脈濇。左細數。舌白。中心紅。經阻形怯。非輕藐之症。

生玉竹 錢半 紫苑 錢半 丹參 三錢 黃草 三錢

川貝 錢半 橘紅 一錢 白石英 三錢 省頭草 錢半

地骨皮 三錢 白前 錢半 穀芽 四錢 枇杷葉 三片  
去毛

四帖。

又咳嗽未除。形怯潮熱。脈虛細右弦。舌微黃。腕悶便瀉。究屬重險之症。宜清氣和中。候正。六月初九日

南沙參 三錢 藿梗 二錢 穀芽 四錢 銀胡 一錢

扁豆衣 三錢 川貝 錢半 茯苓 四錢 地骨皮 三錢

桔梗 錢半 新會皮 錢半 砂仁 七分 江西朮 一錢

清煎三帖。

（介按）衝任皆損。二氣不交。五液消耗。延為勞怯。初方鎮衝活血。清肺養胃。雙方兼顧。未能應驗。次診又見便瀉。是屬脾氣虛弱。雖於清養肺胃之中。參用扶脾理氣之品。究屬難愈之疴。

安昌范 盜汗未除。六脈虛細。舌白少津。咳嗽氣促。腕痛。宜防血溢。二月十九日

北沙參 三錢

炒驢膠 錢半

左金丸 八分

白 前 錢半

茯 神 四錢

川 貝 錢半

橘 紅 錢半

綠萼梅 錢半

生白芍 錢半

生牡蠣 四錢

白石英 三錢

清煎四帖。

又 咳嗽已減。脈左虛細。右較緩。舌滑白。盜汗較差。仍遵前法加減損益。三月十

炙甘草 八分

生 地 四錢

紫 苑 錢半

懷 藥 三錢

炒驢膠 錢半

炙桂枝 六分

茯 神 四錢

川 貝 錢半

東洋參 錢半

生牡蠣 四錢

甜杏仁 三錢

引枇杷葉 三片  
去毛

五帖。

又 前藥已效。咳嗽盜汗悉減。脈虛細。舌滑白。力怯。腰跗不健。還宜前法損益為

妥。三月十九日

炙甘草 八分

生 地 五錢

炒杜仲 三錢

懷牛膝 三錢

老東參 錢半

炙桂枝 六分

茯 神 四錢

京川貝 錢半



炒狗脊三錢

生牡蠣四錢

炒驢膠珠錢半

鮮枇杷葉三片

八帖。

（介按）此症由於腎液已虛。未能上承於心。而陽不潛藏。入春肝木司權。而肝陽化風。衝肺而為咳嗽。盜汗之累。初方於滋陰潛陽之中。參用平肝清肺之品。以防血溢而寧咳嗽。確是良方。故見奏效。繼方兼護衛陽。而盜汗悉減。末方以力怯腰跼不健。而再參用補腎養心諸味。步伐整齊。深堪則倣。

不寐

安昌婁 陽不交陰。寤不成寐。脈數右勁。舌尖赤。咳嗽氣逆。胃餒。姑宜清肺安神。化痰。三月七號壬寅十九日

北沙參三錢

霍石斛三錢

炒棗仁三錢

丹參二錢

天冬三錢

光杏仁三錢

夜交藤三錢

生米仁四錢

紫苑錢半

茯神四錢  
砂拌

橘紅一錢  
鹽水炒

清煎四帖。

（介按）胃為六腑之海。其氣以下行為順。茲以陽明氣逆衝肺。以致咳嗽不寐。故治以肅肺養胃而安神。

漁莊沈 肝陽未靜。夜寐少安。脈右尙弦。左細數。噎咳。舌色如前。還宜柔肝腎以和陽為妥。杏月初四日

生首烏 三錢

紫 苑 錢半

炙龜版 四錢

南沙參 三錢

茯 神 三錢

參貝陳皮 錢半

光杏仁 三錢

生米仁 四錢

桑椹子 三錢

生牡蠣 四錢

炒杜仲 三錢

清煎四帖。

（介按）肝陰已虛。而陽不潛藏。且肝藏魂而肺藏魄。今以魂魄不安。則夜不安寐。肝逆乘肺。則為噎咳。故治以潛陽育陰。柔肝清肺為主。

黃公淩某 噎咳心悸。夜不安寐。脈虛細。胃鈍惡心。宜溫膽和胃。清肺安神。

仙半夏 錢半

枳 殼 錢半

紫 苑 錢半

瓜蒌皮 三錢

陳 皮 錢半

炒棗仁 三錢

川 貝 三錢

炒穀芽 四錢

茯 神 四錢

白 前 錢半

菴 殼 錢半

引鮮竹肉 一九

三帖。

（介按）羅東逸云。膽爲中正之官。清淨之腑。喜寧謐。惡煩擾。喜柔和。不喜壅鬱。蓋東方木德。少陽溫和之氣也。是以虛煩驚悸者。中正之官。以燭熱而不寧也。熱嘔吐苦者。清淨之腑。以鬱久而不謐也。痰氣上逆者。土家濕熱反乘。而木不得遂其條達也。故是者首當清熱及解利三焦。據是以觀。則此症純係少陽未得溫和之氣。以致諸證並起。此方治法。深得羅氏之旨趣。

安昌相 心惕如懸。夜寐不安。脈虛細。左關細勁。舌紅。偶然語感。姑宜補心丹加減治之。辛亥十二月念九日

丹	參三錢	生	地四錢	柏子仁	錢半	甘	菊二錢
麥	冬二錢 去心	炒棗仁	三錢	遠志肉	八分	預知子	三錢 八月錢 札
元	參二錢	釵	斛二錢	茯	神四錢 辰砂拌	引燈	芯七支

四帖。

（介按）心血不足。神志不寧。而致心惕如懸。夜不安寐。故治以補益心神爲主。用生地以滋腎液而承於心。俾心得以藏神。麥冬以清氣熱。丹參以生心血。元

參以清血熱。柏子仁以清氣。酸棗仁以補心。茯神、遠志以安心神。釵斛滋液。甘菊養肝。又用預知子之固腎。燈芯以爲引導。此方誠治心虛不寐之專劑。  
安昌王 暈眩並作。心悸少寐。脈勁。舌色透明。力怯跗腫。宜柔肝腎以安神。四月四號癸卯十七日

生首烏 三錢

炒棗仁 三錢

炒杜仲 三錢

生牡蠣 四錢

杞子 三錢

茯神 四錢  
辰砂拌

炒狗脊 三錢

澤瀉 三錢

甘菊 二錢

遠志肉 八分  
炒

生米仁 四錢

清煎四帖。

又

暈眩已減。夜寐稍安。睡中汗出。脈虛。力怯。仍遵前法加減爲妥。二月念三日

生首烏 三錢

炒棗仁 三錢

煨天麻 八分

懷山藥 三錢

杞子 三錢

茯神 四錢

白蒺藜 三錢

杜仲 三錢

甘菊 錢半

生牡蠣 四錢

桑椹子 三錢

清煎八帖。

（介按）肝陰已虧。而不藏魂。則暈眩少寐。心神不安。則心悸力怯。更兼濕熱滯

於下焦。而致跗腫。故於補養肝腎之中。而佐牡蠣。澤瀉以祛濕。用藥既已雙方兼顧。投劑自然得效。次診又形寢汗。仍是陰液未固而外泄之候。但此時跗腫已除。故祇以柔肝補腎而安神為治。

西莊沈 胃氣仍鈍。夜不安寐。脈濡細。舌黃滑。濕猶未罷。宜溫膽湯加減。元月十

薑半夏 錢半

枳 殼 錢半

綿茵陳 三錢

雞內金 三錢

新會皮 錢半

棗 仁 三錢

生米仁 四錢

炒穀芽 四錢

茯 神 四錢  
辰砂拌

通 草 錢半

薤 殼 錢半

清煎三帖。

（介按）膽為清靜之腑。茲以痰濕未清。胸膈之餘熱未退。而致夜寐不安。胃納尚純。治以溫膽湯加減。兼清濕熱而養胃。

安昌徐 濕熱較減。胃納略增。脈右弦濡。左虛細。夜寐少安。大便艱澀。宜和胃安

神為妥。六月六號乙巳二十日

仙半夏 錢半

炒川連 六分

柏子仁 三錢

夜交藤 三錢

新會皮 錢半

炒棗仁 三錢

炒遠志 八分

通 草 錢半



茯神四錢 辰砂拌

丹參三錢

穀芽四錢

清煎

五帖。

（介按）濕熱方退。腎液已耗。未能上注於心。是以夜寐不安。胃津未復。是以六便艱澀。故治以和胃安神。補心滋腎。略佐滲濕。俾胃氣得和。則臥寐自安。

### 心悸健忘

遺風徐 血後陰耗。脈濡數。舌黃滑。濕火未清。心悸健忘。仍遵前法再進。

生地四錢

焦山梔三錢

黃草石斛三錢

夜交藤三錢

麥冬三錢

茯神四錢

遠志肉八分

白薇錢半

丹參三錢

元參錢半

炒條芩錢半

淡竹葉錢半

加燈心七支

四帖。

（介按）陽明濕熱未清。再以勞神動肝。以致咳血而暗吸腎陰。腎液既虛。未能上承於心。則心悸健忘。滋液清熱。安神養胃。治法極為週到。

某咳嗽盜汗悉差。左脈虛細。右勁。舌滑白。心虛悸惕。宜補心丹加減治之。三月念九日

蘇丹參	三錢	歸身	錢半	甜杏仁	三錢	炙甘草	七分
茯神	四錢	炒棗仁	三錢	遠志	八分	炒杜仲	三錢
老東參	錢半	生牡蠣	四錢	煨龍齒	錢半		
清煎	八帖。						

(介按)肅肺分之餘熱。潛未靖之浮陽。藉以補益心神。則悸惕自瘳。

白馬山李 肝逆乘中。脘痛氣衝。脈弦。語感心悸。姑宜泄降化痰。四月二號癸卯

瓜蒌皮	三錢	川棟子	三錢	生石決明	六錢	仙半夏	錢半
薤白	錢半	延胡	二錢	光杏仁	三錢	沉香	五分
橘紅	一錢	抱木茯神	四錢	遠志肉	八分	引燈芯	七支

四帖。

又衝氣未平。脈弦細。舌白。心無所主。語感。宜鎮肝逆。凝心神。四月六號癸卯十

西琥珀	八分	丹參	三錢	仙半夏	錢半	合歡皮	三錢
-----	----	----	----	-----	----	-----	----

沉香五分

煅龍齒 錢半

新會皮 錢半

炒棗仁 三錢

抱木茯神 四錢

石決明 五錢

遠志肉 八分

石菖蒲 五分

引燈 芯七支

四帖。

（介按）肝升太過。胃降無權。濕釀成痰。阻礙氣機。平肝清肺。治法甚佳。次以肝風浮越。語感依然。因其衝氣未平。再進鎮衝凝神之品。秩序井然。

安昌徐 水虧木旺。脈細勁。音低。心悸。寢寐恍惚。舌心微黃。姑宜滋水涵木。佐以凝神。三月十四日

生地 四錢

阿膠珠 錢半

桑葉 三錢

遠志肉 八分

茯神 四錢

石決明 六錢

淮山藥 三錢

預知子 三錢  
八月札

夜交藤 三錢

炒棗仁 三錢

黃草石斛 三錢  
引雞子殼一枚

（介按）少陰之脈。循喉嚨。挾舌本。今以腎液未能上承。而致音低心悸。此方宗阿膠雞子黃湯加減。俾心腎交合。陽和陰充。則少陰之火。各歸其部。而諸恙自除。

# 邵蘭蓀醫案

清 山陰 邵蘭蓀先生原著

紹興 史久華介生評註

鄞縣 曹赤電炳章纂輯

## 卷三

### 肝風

漁莊沈歸

肝風燄肺。嗆咳久累不已。右脈寸關虛細。左弦。舌心紅。癸水始淡繼

紫。姑宜柔肝以清肺為主。十月十三號九月初四日

冬桑葉 三錢

南沙參 三錢

烏賊骨 錢半

生白芍 錢半

炒驢膠 錢半

川 貝 二錢

粉丹皮 三錢

淡秋石 八分

生石決明 六錢

紫 苑 錢半

甜杏仁 三錢

引 枇 杷 葉 五片  
去毛

五帖。

（介按）肝陽上逆。乘肺而咳。肺津胃液。均受灼燂。以致癸水轉紫。故治以清肝熄風。養胃滋液。

華川趙婦 癸水先後不一。脈左濇右弦。舌心光。頭暈音啞。此肝風燂肺。宜阿膠鷄子黃湯治之。十一月一日

炒驢膠 錢半

霜桑葉 三錢

丹參 三錢

黃草石斛 三錢

鷄子黃 一枚

生石決明 六錢

茯神 四錢

粉丹皮 二錢

稽豆皮 三錢

小胡麻 三錢

甘菊 錢半

清煎四帖。

（介按）腎篋虛而未能上承於心。肝陰虧而厥陽化風燂肺。以致音啞頭暈。治以阿膠鷄子黃湯。參用柔肝養液之品。真是的對之良方。

安昌龐婦

衝任內怯。帶下癸澀。腰酸腹痛。脈濇細。右細數。肝風浮越。頭疼牙痛。

姑宜柔肝熄風為主。六月初三日

煨天麻 八分

生牡蠣 四錢

釵斛 三錢

西洋參 一錢

粉丹皮 三錢

稽豆皮 三錢

小胡麻 三錢

炒杜仲 三錢



甘菊二錢

鈎藤三錢

桑寄生三錢

清煎五帖。

又

帶下未除。腹中疼痛。脈濇數。頭疼牙痛悉差。宜柔肝調經。澀下。六月十四日

桑寄生三錢

炒杜仲三錢

丹皮三錢

製香附錢半

小胡麻三錢

遠志肉八分

炒白芍錢半

覆盆子三錢

元胡錢半

鈎藤三錢

釵斛三錢

清煎五帖。

（介按）素稟陰虧。衝任皆損。是以腰痛連腹。經愆帶下。內風浮越。直上巔頂。則頭暈牙痛。治以柔肝熄風。滋液補腎。而頭疼牙痛悉差。次因腹中尚疼。故用理氣活血之品。

某肝風內震。心惕。頭暈。肢戰。脈弦右虛。癸來夾雜腰疼。姑宜柔肝熄風。仍鎮攝心神。

桑寄生三錢

西琥珀八分

龍齒三錢

甘菊二錢

炒驢膠錢半

茯神三錢

炒遠志八分

杜仲二錢

小胡麻三錢

鈎藤三錢

稽豆皮三錢

引燈芯七支

五帖。

（介按）腎難生液。是以心惕而癸來腰疼。肝不養筋。內風浮動。是以頭暈肢戰。今以柔肝熄風以緩暈。鎮攝心神兼補腎。洵屬對症療法。  
安昌余 大便稍潤。舌根微黃。脈濡。頭角筋惕作痛。此由內風浮越。姑宜清肝。熄風。滲利。九月廿四日

桑葉三錢

黃草斛三錢

蕤仁錢半

苦丁茶錢半

甘菊二錢

生石決明六錢

茯苓四錢

通草錢半

鈎藤三錢

刺蒺藜三錢

淡竹葉錢半

清煎三帖。

（介按）胃虛挾濕。肝陽化風不熄。直上巔頂。而頭角作痛。故治以清肝滲濕之劑。

嘔吐噎格

安昌楊婦 血虛氣滯。濕熱盤踞。肝逆犯胃。每癸來心泛。脈濡。腹滿帶下。故宜和肝調經。

大腹絨三錢

菴藺子錢半

佩蘭二錢

厚朴錢半

仙半夏錢半

茯苓四錢

丹參二錢

玫瑰花五朵

香附二錢

鷄血藤三錢

吳黃四錢

連入分

引路路通七個

五帖。

（介按）此即秦越人所謂帶脈為病。腰溶溶如坐水中之候也。今以帶脈不固。更兼濕熱盤踞。厥陰逆乘而犯胃心泛。治以和肝除濕為首要。大西莊黃 肝逆犯胃。脘格嘔惡。脈右細滯。左弦。舌色還和。宜苦辛通降為妥。八

月十四日

乾薑四分

獾皮錢半

蔻殼錢半

烏藥二錢

厚樸一錢

通草錢半

赤苓四錢

玫瑰花五朵

仙半夏錢半

穀芽四錢

吳黃五錢

連入分

清煎三帖。

又嘔惡已除。脈弦細。舌微白。着根淡黃。濕熱未淨。氣機不利。宜和中利濕爲妥。

八月廿八日

藿梗二錢

蔻殼錢半

穀芽四錢

甘松四分

省頭草錢半

赤苓四錢

枳殼錢半

綠萼梅錢半

厚樸一錢

新會皮錢半

通草錢半

清煎三帖。

（介按）氣機阻滯。清陽不展。初方以平肝和胃。而胃氣漸和。嘔吐已止。次以濕  
尚未淨。故進利氣滲濕之方。

漁莊沈女 閨女便瀉未除。脈弱細。嘔惡已差。胃餒。脘悶少寐。宜養胃、和肝、凝神。

丹參三錢

佩蘭葉錢半

棗仁三錢

穀芽四錢

扁豆衣三錢

猬皮一錢

香附錢半

玫瑰花五朵

茯神四錢

霍斛三錢

通草錢半

清煎三帖。

（介按）肝氣逆乘犯胃。而嘔惡脘悶。肝陽挾濕侮脾則便瀉。更以胃不和而臥不安。故以制肝和胃。扶脾安神為治。

安昌徐婦 帶下未除。脈沉弦。嘔惡。舌微黃。此肝胃不和。癸水不調。宜防隔症。杏月二十日

刺猬皮錢半

吳黃四川 連七分

丹參三錢

茯苓四錢

生白芍錢半

廣皮錢半

綠萼梅錢半

仙半夏錢半

省頭草三錢

蔻殼錢半

鷄血藤三錢

引路路通七枚

四帖。

（介按）肝氣逆行犯胃而嘔惡。更以血枯而癸水不調。方中平肝和胃。參用和血之品。是屬胃津被肝陽劫燥之候。但既防隔症。則蔻殼未免劫津。尚宜慎用為是。

安昌徐婦 隔氣作吐。脈左沉絃。右弦滑。經停五月。舌薄白。根稍厚。此肝逆犯胃。宜厥陰陽明同治。五月十七日



仙半夏錢半

炒穀芽四錢

新會皮錢半

藿梗二錢

吳萸五分

連七分

蘇梗錢半

綠萼梅錢半

狷皮一錢

川樸一錢

木蝴蝶四分

蔻殼錢半

清煎。

又。隔氣較差。腕中稍和。脈兩手切來弦滑。經停五月。舌根微黃。仍遵前法加減為妥。六月二十日

狷皮一錢

廣藿香錢半

烏藥錢半

川棟子錢半

蘇梗錢半

蔻殼錢半

木蝴蝶四分

綠萼梅錢半

釵斛三錢

炒穀芽四錢

新會皮錢半

清煎三帖。

（介按）肝鬱氣逆。胃液被劫。勢成隔症。故以厥陰陽明同治。但脈滑經停而兼嘔吐。雖屬肝胃不和。似乎妊娠之象。且治法並未通經活血。惟用和胃理氣。但案中未曾敘明孕育。鄙見難以臆斷。然蔻殼劫津。究宜慎用。梅陵錢 舌滑白。脈弦緊。食入腕中窒格。此肝逆乘中。脾氣失運。故宜和中疎肝。

六月廿一號丙午初八日

鷄內金三錢

川棟子三錢

小青皮錢半

蔻殼錢半

沉香麝錢半

厚樸一錢

甘松四分

玫瑰花五朵

生牡蠣四錢

菴藹子三錢

左金丸八分

引路路通七個

四帖。

（介按）此肝陽乘侮脾胃。食物不易消化。濕熱聚膈。故治以泄降和胃。否則恐滋脹滿之憂。

白馬山李 舌滑灰黃。脘痛窒格。嘔惡。湯水難入。脈弦濡。食後潮熱。便閉。症屬重險。宜苦辛通降。候正。

淡乾薑二分

炒枳實錢半

瓜蒌皮五錢

生白芍錢半

炒川連八分

滑石四錢

炒麥芽三錢

佛手花八分

仙半夏錢半

降香八分

炒棗仁三錢

清煎二帖。

（介按）上不納食。下不通便。此是清陽日結。脘窄陰枯。腑乏津營。胃氣已失下

行爲順之旨。必須大便通爽。然後脘中納食無阻。但此症已成關格。是屬難治之疴。

### 脘痛

安昌徐婦 血虛氣衝。腰腹痛。帶下。背板。脈沉弦。脘中偶痛。宜養血、和胃、平肝。

歸身二錢

生牡蠣四錢

炒杜仲三錢

川棟子二錢

茯神四錢

草薢一錢

小胡麻三錢

玫瑰花五朵

仙半夏錢半

木蝴蝶四分

丹參三錢

清煎四帖。

又 帶下未除。脈細。舌厚黃。腹痛惡心。仍遵前法加減爲妥。

歸身二錢

仙半夏錢半

覆盆子三錢

小胡麻三錢

炒白芍錢半

廣皮錢半

炒杜仲三錢

佩蘭葉錢半

生牡蠣四錢

延胡錢半

青木香五分

清煎四帖。

（介按）腎虛而帶脈失於固束。則背板腰痛而帶下。肝陽逆行而阻氣。則脘腹作痛。總因血虛肝滯所致。故以和胃平肝。補腎養血為主。次以腹痛惡心。又參用理氣之品。

安昌李彬文。脘痛窒極。口湧清水欲嘔。脈弦。舌白。中心微黃。肢稍乍冷。宜厥陰陽明同治。七月廿四日。

乾薑二分 草薢一錢 降香八分 瓦楞子打三錢

吳萸三分 連入分 桂丁四分 厚樸一錢

仙半夏錢半 穀芽四錢 通草錢半 玫瑰花五朵

清煎三帖。

又 脘痛未除。嘔惡已差。脈弦。肝橫。舌厚嫩黃。宜疎泄厥陰為治。七月廿七日。

川棟子三錢 枳實錢半 瓜蒌皮三錢 郁李仁三錢

延胡二錢 炒穀芽四錢 薤白一錢 玫瑰花五朵

草薢一錢 猬皮錢半 厚樸錢半

清煎三帖。

又 脘痛較減。脈弦。噯氣上逆。肝木未和。姑宜鎮逆和胃爲妥。八月初四日

金沸花<sub>三錢 包煎</sub>

川棟子三錢

瓦楞子四錢

炒穀芽四錢

代赭石三錢

延胡二錢

薤白一錢

鷄內金三錢

仙半夏錢半

猬皮錢半

厚樸錢半

清煎四帖。

(介按)肝氣逆行犯胃。而清水泛溢作嘔。胃脘痺痛。初方通陽泄濁。次則和胃平肝。終則參以鎮逆之品。秩序不亂。故多奏效。

頭蓬何 脘腹聯痛有瘕。脈弦細。舌白。便溺澀。症屬重險。宜治防厥。候政之。六月

廿三日

瓜蒌皮五錢

川棟子三錢

郁李仁三錢

降香八分

薤白<sub>錢半</sub>

草薢一錢

廣鬱金三錢

玫瑰花五朵

生香附三錢

通草錢半

炒延胡三錢

清煎二帖。

又 脘痛未除。大便已通。脈弦細。舌膩。還宜防厥。嘔逆。宜和肝胃爲主。候正。六月



廿五日

仙半夏二錢

川棟子三錢

九香蟲三錢

通草錢半

左金丸八分

製延胡二錢

五穀蟲酒炒三錢

玫瑰花五朵

厚樸一錢

草豆蔻一錢

降香八分

清煎二帖。

（介按）肝陽侮胃。氣聚成瘕。而脘腹聯痛。此因情懷憂鬱。肝氣無從宣洩。前後兩方。係是泄厥陰以舒其用。和陽明以利其腑。藥取苦味之降。辛氣宣通之義。安昌黃嗜酒濕勝。脈弦。肝橫。脘腹痛。宜解酒。分消利氣為主。三月初三日。

川棟子三錢

瓦楞子四錢

鷄內金三錢

鷄棋子三錢

延胡三錢

白蔻仁沖八分

厚樸一錢

玫瑰花五朵

小青皮八分

烏藥三錢

降香八分

清煎三帖。

（介按）水穀之濕內着。脾陽不主默運。胃腑不能宣達。因而肝氣乘侮。以致脘腹聯痛。治以疎脾降胃以平肝。令其氣機運佈而漸瘥。

安昌俞 脘腹聯痛較減。脈弦細。腰跨墜。濕熱猶存。還宜前法加減再進。元月初

川棟子三錢

草薢一錢

鷄內金三錢

九香蟲錢半

延胡三錢

茯苓四錢

木蝴蝶四分

玫瑰花五朵

生牡蠣四錢

稀莨草三錢

通草錢半

引路路通七顆

四帖。

又 腹痛已緩。腰跨猶墜。背掣。脈濡細。口甜。宜和肝胃為主。元月廿九日

仙半夏錢半

稀莨草三錢

木蝴蝶四分

獨活錢半

左金丸八分

絲瓜絡三錢

廣鬱金三錢

玫瑰花五朵

茯苓四錢

沉香麝錢半

通草錢半

引路路通七顆

四帖。

（介按）肝陽侮胃。胃虛不能司束筋骨。兼以濕熱凝滯於脾腎之經。阻其氣血流行之隧道。以致腰跨墜痛。且背為陽明之腑。茲被風陽之擾。不能束筋骨而利機關。遂致背掣。故治以平肝和胃。滲濕通絡之劑。

魚莊沈 脘痛較減。脈弦。舌黃根厚。寒熱交作。仍遵前法加減為妥。四月廿九日

川棟子三錢	棗兒檳榔三錢	生香附三錢	左金丸八分
延胡二錢	廣鬱金三錢	川樸一錢	炒穀芽四錢
降香八分	通草錢半	蔻殼錢半	加路路通七枚
四帖。			

（介按）脾胃濕熱未清。肝陽乘勢侵侮。而致脘痛寒熱。故以平肝滲濕爲治。大義汪。脘痛已差。大便不快。脈弦。舌根黃厚。溲溺赤。宜啓膈。和中。疎肝。十一月三號九月二十日

瓜蒌皮三錢	川棟子三錢	炒穀芽四錢	瓦楞子四錢
薤白一錢	延胡二錢	郁李仁三錢	玫瑰花五朵
厚樸一錢	通草錢半	雞內金三錢	路路通七個

（介按）濕熱阻遏清陽。而肝陽上逆。胃不下行。致大腸失於傳導。小腸失於變化。而二便不爽。然脈象仍弦。故治以泄肝和胃而啓膈通陽。某。水虧木旺。脈形兩手皆弦。食入脘格。臍下脹悶。暮夜手足心發熱。姑宜養胃。和中。清肝。三月十二日

釵斛三錢

鷄內金三錢

穀芽四錢

炒青皮七分

省頭草錢半

石決明六錢

香附錢半

綠萼梅錢半

左金丸八分

川棟子錢半

合歡皮二錢

清煎三帖。

（介按）胃液既虧。脾失健運。而肝陽愈橫。故治以升脾養胃兼柔肝。

蜀阜孫 腹痛聯脘。脈弦。肝橫。噯氣上逆。姑宜疎肝和中。

川棟子三錢

鷄內金三錢

生香附三錢

左金丸八分

延胡二錢

貢沉香五分

廣鬱金三錢

佛手花八分

炒青皮八分

炒穀芽四錢

枳殼錢半

路路通七枚

四帖。

（介按）肝橫氣滯。胃弱不和。以致腹痛聯脘。噯氣上逆。是屬旋覆代赭石湯之症。今以疎肝和中為治。可謂別出心裁。

遺風靡 營虛胃痛。脈虛心悸。宜辛甘治之。又月初三日

丹 參三錢

沉香麴錢半

九香蟲錢半

生牡蠣四錢

清煎四帖。

又

胃痛未除。脈虛左弦。心悸如懸。仍宜養血平肝。六月初八日

全當歸 錢半

川棟子 三錢

茯苓 神 四錢

烏藥 錢半

九香蟲 錢半

炒延胡 錢半

炒穀芽 四錢

玫瑰花 五朵

生牡蠣 四錢

草薢 一錢

丹參 三錢

清煎四帖。

（介按）五液未能上承。心陽過動。愈耗營陰。是以心悸胃痛。養血平肝。洵治此症之要圖。

## 腹痛

漁莊沈 秋暑內逼。腹痛如絞。大便赤不爽。脈絃濡。舌赤。嘔惡。防痢。七月廿四日

蘆香 錢半

紅藤 錢半

炒銀花 三錢

仙半夏 錢半

左金丸 八分

廣鬱金 三錢

滑石 四錢

萊菔子 三錢

省頭草 三錢

川樸 一錢

枳殼 錢半



清煎二帖。

（介按）暑熱內逼肝經。阻礙氣機。擾亂腸胃。因而腹中絞痛。治以平肝清熱。理氣止痛。方法甚佳。

漁莊沈 腹痛已除。胃氣較振。脈兩手皆弦。肝橫氣滯。陰火不斂。姑宜養胃泄肝。  
八月初三日

黃草斛三錢

左金丸八分

焦梔子三錢

川棟子三錢

生石決明六錢

白芍錢半

廣鬱金三錢

佛手花八分

丹皮三錢

枳殼錢半

木蝴蝶四分

引路路通七枚

二帖。

（介按）此係腹痛少減。肝熱未清。胃陰未復之症。

安昌沈 閨女腹痛欲嘔。脈寸弦滑。此由寒溫失調。夾食為患。咳逆。宜開提和中。  
防變。九月廿二日

桔梗錢半

枳殼錢半

省頭草三錢

青木香七分

山查四錢

前胡錢半

原鬱金三錢

光杏仁三錢

紅 藤錢半

薑 香二錢

炒麥芽三錢

清煎三帖。

（介按）寒凝火鬱。挾穢濁食滯而阻遏氣機。故以芳香逐穢。兼以疎泄清肺爲治。

某 便瀉已止。脈弦。腹痛腸鳴。姑宜順肝和中。

川棟子三錢

新會皮錢半

通 草錢半

生牡蠣四錢

茯苓四錢

廣鬱金三錢

炒白芍錢半

玫瑰花五朵

左金丸八分

炒穀芽四錢

廣木香七分

清煎四帖。

（介按）氣滯濕阻。六腑不和。以致先瀉後痛。但古人以胃爲陽土。肝屬陰木。治胃必主泄肝。制其勝也。

安昌陳 腹痛已差。脈弦。腕悶氣衝。舌微黃。故宜順氣和中。五月十七日

烏 藥二錢

川棟子三錢

刺蒺藜三錢

左金丸八分

生牡蠣錢半

厚 樸一錢

枳 殼錢半

玫瑰花五朵

沉香麴錢半

炒青皮八分

仙半夏錢半

清煎四帖。

（介按）肝熱未清。氣機阻痺。治以泄肝和胃。方極穩妥。

某 腹痛較差。脈沉弦。頭暈。仍遵前法加減為妥。五月十三日

川棟子三錢

刺蒺藜三錢

仙半夏錢半

沉香麴錢半

延胡二錢

茯苓神四錢

新會皮錢半

玫瑰花五朵

生牡蠣四錢

鷄內金三錢

左金丸八分

清煎二帖。

（介按）肝氣稍平。而內風未熄。以致頭暈。治以柔肝熄風。兼理氣。藉止腹痛而緩暈。

## 泄瀉

遺風王 舌厚黃滑。便瀉不化。脈弦濡。小便不利。此屬濕熱。皖悶。宜和中清利。六月初八日

藿香梗二錢	焦六麴四錢	蜜銀花二錢	豬苓錢半
原滑石四錢	炒川連七分	扁豆衣三錢	通草錢半
川樸一錢	省頭草三錢	新會皮錢半	引荷葉一角

二帖。

（介按）濕勝便瀉而小便不利。治以清利濕熱。又佐消食扶脾。確是雙方兼顧之療法。

安昌夏 舌滑白。脈弦細。便溏。患小便不多。脘悶。氣衝欲嘔。藉豬苓湯加減。三月十三日

豬苓錢半	廣藿香二錢	仙半夏錢半	大腹皮三錢
澤瀉二錢	滑石四錢	左金丸八分	玫瑰花五朵
茯苓四錢	厚樸一錢	香附三錢	

清煎四帖。

又 濕熱未清。腹中脹悶。脈瀦滯。便瀉。仍宜豬苓湯加減。

豬苓錢半	藿香梗二錢	大腹皮三錢	左金丸八分
------	-------	-------	-------

澤瀉三錢

滑石四錢

製香附三錢

佛手花八分

茯苓四錢

厚樸錢半

佩蘭葉錢半

清煎四帖。

（介按）內經曰。濕勝則濡泄。難經曰。濕多成五泄。茲以濕勝而脾胃失於健運。不能滲化。方從猪苓湯加減。以藿、樸、香附、玫瑰等味。芳香燥濕。二苓、澤瀉、健脾佐運。半夏、左金、和胃寬胸。腹皮、滑石。泄濕利溲。前後二方。大旨相同。即古人所謂利小便即是實大便之意。

漁莊沈婦。便瀉腹痛。右脈濡。左弦細。經停四月。腰痠帶下。心泛。舌微白。咳噎。姑宜清氣和中。十月二十日。

藿香梗二錢

訶子肉錢半

新會皮錢半

桔梗錢半

川貝錢半

扁豆衣三錢

蘇梗錢半

生款冬三錢

大腹皮三錢

廣木香八分

蔻殼錢半

清煎三帖。

（介按）肝腎陰虧。帶脈不固。則腰痠帶下。肝陽橫逆。則腹痛便瀉。上乘於肺。則



咳嗽心泛。先以清肺扶脾。兼用理氣之品。是急則治標之意。

新田酈 據述便瀉較減。舌根厚。面浮。宜和胃為主。六月十三日

焦六麴 四錢

新會皮 錢半

製香附 三錢

鷄內金 錢半

川連 五分

赤苓 三錢

扁豆衣 錢半

大腹皮 三錢

仙半夏 錢半

炒麥芽 三錢

通草 錢半

鮮荷葉 一角

二帖。

（介按）便瀉較減。舌厚面浮。此係濕熱未淨。夾食為患。故治以扶脾滲濕。兼消食滯。

大西莊沈 木尅土便瀉。氣滯經阻。脈右濇左弦。舌心光。胃鈍脘悶。腹中有痕。姑

宜泄木和中。七月廿九日

烏藥 二錢

川棟子 三錢

炒穀芽 四錢

左金丸 八分

茯苓 四錢

木蝴蝶 四分

扁豆衣 三錢

玫瑰花 五朵

大腹皮 三錢

炒白芍 錢半

佩蘭 錢半

清煎四帖。

（介按）肝陽侮胃。氣聚成瘕。陽明隸於衝脈。衝脈卽是血海。茲以胃被肝乘。血海亦同時爲病。以致經阻。治以泄肝救胃。方極穩健可法。

某 據述胃納稍增。便瀉稀水。緣水濕併歸陽明。宜分利爲穩。

茯苓三錢

大腹皮三錢

原砂仁七分

石蓮子三錢

澤瀉三錢

猪苓錢半

綠萼梅錢半

通草錢半

江西朮一錢

新會皮錢半

生白芍錢半

清煎四帖。

（介按）濕歸陽明而爲泄瀉。治以五苓散加減。洵是對症之妙劑。

遺風龐 舌黃滑。脈弦濡。便利腹痛。此屬濕熱。宜治防痢。六月初九日

廣藿香二錢

焦六麴四錢

青木香七分

大腹皮三錢

六一散三錢

炒川連五分

炒枳殼錢半

新會皮錢半

川樸一錢

猪苓錢半

通草錢半

清煎三帖。

（介按）濕熱薄於腸胃。阻遏氣機。而致太陰失健運。厥陰失疎泄。濕蒸熱鬱。傳

導失其常度。而便利腹痛。清熱導氣以滲濕。則諸恙自愈。

某 便瀉較減。脈虛。氣機不和。舌滑。宜固腎止瀉。理氣和中。三月十七日

熟地三錢

骨碎補三錢

炒杜仲三錢

炒米仁四錢

懷藥三錢

茯苓四錢

新會皮錢半

玫瑰花五朵

芡實三錢

原春砂一錢

甘松四分

清煎十帖。

（介按）此是脾腎兼虛為瀉。故君以地黃、杜仲、骨碎補大滋腎陰。填精補髓。臣以芡實、山藥之健脾。又佐澤瀉、米仁以疎水道之滯。使以芳香諸味之理氣。迨氣機轉動。則濕走而腎強脾健矣。

漁莊沈 中虛氣餒。水穀釀濕。成痰作瀉。左脈虛細。右弦濡。舌微黃。心腎不交。寢不成寐。宜治脾腎為主。五月十三日

骨碎補三錢

夜交藤三錢

炒棗仁三錢

炒川連五分

炒杜仲三錢

懷山藥三錢

辰砂茯苓神四錢

粟殼一錢

炒江西朮一錢

陽春砂一錢

百藥煎三錢

清煎五帖。

（介按）雷少逸曰。昔賢云。脾為生痰之源。肺為貯痰之器。夫痰乃濕氣而生。濕由脾弱而起。蓋為太陰濕土。得溫則健。一被寒濕所侵。遂困頓矣。脾既困頓。焉能掌運用之權衡。則水穀之精微。悉變為痰。痰氣上襲於肺。肺與大腸相為表裏。其大腸固者。肺經自病而為痰嗽。其不固者。則肺病移於大腸而為痰瀉矣。雷氏此言。發明痰瀉之病源。已無餘蘊。深堪欽佩。惟此症係是脾腎兼虛。以致水泛為痰。因大腸不固。遂移病於大腸而作瀉。且以心不藏神。陽不交陰。而不寐。故其治法。於固腎健脾之中。參用安神瀉腸之品。

朱墅楊婦

木尅土便瀉腹滿。脈沉澹。舌黃。心泛欲嘔。癸澁。宜防腹脹。十六日二

藿香二錢

大腹皮三錢

新會皮錢半

川棟子三錢

左金丸八分

茯苓四錢

扁豆衣三錢

玫瑰花五朵

佩蘭錢半

通草錢半

香附錢半

清煎三帖。

（介按）衝隸陽明。厥陰對峙。今因肝病犯胃。則心泛欲嘔。乘脾則便瀉腹滿。衝

脈既被肝逆犯胃而受影響。則癸水難以應期而至。故治以苦辛泄降。俾肝逆稍平。胃氣漸和。則諸恙自退。

安昌馬婦 上咳下瀉。形肉日削。脈弱細。經閉脘格。屬棘手重症。宜法候政之。又六月初五日

省頭草五錢

訶子肉三錢

炒穀芽四錢

綠萼梅錢半

川貝三錢

扁豆衣三錢

石蓮子三錢

桑白皮錢半

製香附三錢

新會皮錢半

赤苓四錢

清煎二帖。

（介按）經閉脘格。咳瀉形削。此是脾弱肝橫。生化無權。中氣久虛。血液漸涸。雖用扶脾抑肝之品。究屬難愈之症。

某稚孩

嘔渴已差。脈瀦滯。舌心厚。腹尙大。胃鈍便滑。仍遵前法加減。二月十

烏梅一個

甘松四分

赤苓三錢

生香附錢半

椒目四分

炒穀芽三錢

厚樸一錢

鷄內金錢半

大腹皮三錢

通草錢半

綠萼梅一錢



清煎三帖。

（介按）肝胃濕熱久蘊。脾弱而致腹大便滑。當然以扶脾滲濕。兼清肝胃之熱。某稚孩 腹形不減。氣逆便澹。脈弦細。舌薄滑。身微熱。口渴。仍宜和中分消。防疳。六月廿四日

廣藿香 二錢

省頭草 錢半

鷄內金 錢半

川棟子 錢半

宣木瓜 錢半

甘 松 四分

五穀蟲 三錢

綠萼梅 一錢

大腹皮 三錢

通 草 錢半

香 附 錢半

清煎三帖。

（介按）食物不節。脾胃受戕。肝陽乘侮。而致腹膨便瀉。故治以和肝健脾。清導清熱。

漁莊沈 女孩蟲氣內着。腹痛乍作乍止。脈弦濡。便澹。姑宜安胃和中。五月十

烏 梅 一個

川 椒 粒十四

五穀蟲 三錢

廣木香 八分

川棟子 三錢

延 胡 二錢

茯 苓 四錢

茉莉花 八分

生白芍 錢半

甘 松 四分

佩 蘭 三錢

清煎二帖。

（介按）疳瀉治法。不離脾胃。約分數種。如胃滯當消。脾弱宜補。因熱則苦寒清火。因冷則辛溫健脾。有蟲則用殺蟲之品。因虛則補本臟之母。今此案係是濕熱內滯。夾着蟲積。以致腹痛便溏。治宗安胃丸之意。而以健脾驅蟲。理氣導滯。洵治蟲積腹痛而兼便溏之良方。

遺風龐 女孩疳後受暑。夾食化瀉。脈絃。舌黃。口渴。宜清熱和中。

藿香梗二錢

炒川連八分

百藥煎三錢

銀花二錢

六一散四錢

扁豆衣三錢

生白芍錢半

麥芽三錢

佩蘭三錢

通草錢半

新會皮錢半

清煎二帖。

又 時瘥後。便瀉腹痛。右脈弦。潮熱似瘧。宜和中清利。七月十三號五月廿九日

猪苓三錢

六一散四錢

青蒿子八分

炒川連八分

澤瀉三錢

大腹皮三錢

蔻殼錢半

新會皮錢半

赤苓四錢

扁豆衣三錢

通草錢半

清煎三帖。

又 瘡後便瀉化利。腹痛不爽。胃納較增。舌滑微黃。宜清熱、化氣、分利。七月十七

號丁未初四日

炒川連 八分

萊菔子 三錢

大腹皮 三錢

冬瓜皮 三錢

生白芍 錢半

六一散 四錢

廣皮 錢半

焦六麴 四錢

枳殼 錢半

青木香 八分

生米仁 四錢

清煎二帖。

（介按）麻疹又名曰痧。吾紹通稱曰瘡。江蘇總名曰疹。其實皆一病也。無非因地異名耳。葉氏治法。分晰四時。最爲簡明。其言曰。春令發痧。從風溫治。夏季從暑風。暑必兼濕。秋令從熱燥。燥氣。冬月從風寒。又曰。疹宜通泄。泄瀉爲順。下痢五色者亦不妨。惟二便不利者。最多凶症。治法大忌止瀉。今此案適在夏月。吸受暑熱。兼挾濕食化瀉。治以清暑。最屬正當。逮日久而濕熱內陷。移於大腸。治以導滯而清濕熱。大旨近是。

痢

遺風龐 便痢未除。脈弦急。氣不和。舌厚黃滑。潮熱。姑宜清暑和中。八月初十四號

焦六麴四錢 青蒿子錢半 大腹皮三錢 藿香梗二錢

六一散三錢 扁豆衣三錢 省頭草二錢 通草錢半

川樸一錢 炒麥芽三錢 仙半夏錢半

清煎三帖。

（介按）暑濕痢由於濕熱鬱滯腸胃。每至午後潮熱。治以清暑滲濕。最為適當。後馬周 腸癖久累。脈弦。舌滑。頭暈而疼。宜黃連阿膠湯治之。二月十二日

炒川連八分 炒白芍錢半 白頭翁錢半 北秦皮錢半

赤茯苓四錢 枳殼錢半 青木香八分 草決明三錢即青葙子

炒驢膠錢半 荊芥炭錢半 通草錢半 引荷葉一角

一帖。

（介接）古之所謂腸癖下血。即今之所謂赤痢也。茲以熱入厥陰而為下痢。肝陽上越而為頭暈。治以黃連阿膠合白頭翁湯。藉清肝熱而滋陰。某 休息下痢。脈弦濡。跗浮腕悶。此濕熱蘊蓄。宜和中清利。三月十七日

秦 朮 錢半

藿 梗 二錢

炒枳殼 錢半

猪 苓 錢半

厚 樸 一錢

原滑石 四錢

青木香 七分

澤 瀉 三錢

大腹皮 三錢

冬瓜皮 三錢

新會皮 錢半

清煎三帖。

又

休息下痢。圉而不爽。脈瀯滯。胃鈍。濕熱猶存。舌微白。宜和中清利。三月二

藿 梗 二錢

左金丸 八分

川棟子 三錢

大腹皮 三錢

滑 石 四錢

炒枳殼 錢半

赤 苓 三錢

石蓮子 三錢

厚 樸 一錢

廣木香 七分

新會皮 錢半

清煎三帖。

（介按）休息痢疾。多由病人貪食油膩。或由醫者早投滋陰。以致濕熱留戀。滯而不去。茲因濕熱久蓄。傷及脾臟中氣。中氣一傷。則脾不能為胃行其津液。津液鬱滯。則不能下潤於大腸。所以圉而不爽。初方從藿樸胃苓湯加減。次則參用平肝和胃。此後尚須參用補氣之品。庶奏桴鼓之應。

瘧



瓜瀝楊 太陰濕瘧。脈弦濡細。面跗浮。食入脘中脹悶。姑宜滲濕和中。七月十

草果仁一錢

桂枝八分

生香附三錢

仙半夏錢半

厚樸錢半

酒炒茯苓錢半

滑石四錢

蔻殼錢半

棗 檳三錢

威靈仙錢半

瓜蒌皮三錢

清煎三帖。

又 瘧邪猶來。脈弦濡。舌滑。濕熱未清。仍遵前法加減爲妥。

草果去殼一錢

桂枝八分

炒茅朮錢半

酒炒常山一錢

厚樸錢半

酒炒茯苓錢半

炒青皮八分

新會皮錢半

棗 檳三錢

薑半夏錢半

赤苓四錢

引老薑三片

三帖。

（介按）濕瘧治法。當辨濕重於熱者。藿樸二陳湯加減。熱重於濕者。蒼朮白虎湯加減。此方係從達原飲加以滲濕之品。洵是濕重熱輕之正法。

安昌陳 氣虛邪留。寒熱久羈。脈虛左弦。夜寐少安。姑宜補中益氣湯加減。四月

三十號甲辰十四日

東洋參 錢半

江西朮 一錢

製首烏 三錢

秦 朮 錢半

酒炒柴胡 八分

陳 皮 錢半

辰砂 拌 神 四錢 威靈仙 錢半

當 歸 錢半

清炙耆 三錢

遠志肉 八分

清煎四帖。

又 益氣升陽。寒熱較差。脈虛。按之絃細。邪猶未淨。仍遵前法加減爲妥。五月九

號甲辰廿三日

東洋參 錢半

升 麻 五分

仙半夏 錢半

製首烏 三錢

酒炒柴胡 八分

陳 皮 錢半

炒江西朮 錢半

淮牛膝 三錢

當 歸 二錢

清炙耆 三錢

炙甘草 八分

引紅 棗 四枚

四帖。

（介按）柯韻伯曰。李杲知其爲勞倦傷脾。穀氣不勝。陽氣下陷。陰中而發熱。製補中益氣之法。又曰。凡脾胃一虛。肺氣先絕。故用黃耆固皮毛而護腠理。不令自汗。元氣不足。懶言氣喘。人參以補之。炙甘草之甘以瀉心火而除煩。補脾胃而生氣。此三味除煩熱之聖藥也。佐白朮以健脾。當歸以和血。氣亂於中。清濁

相干。用陳皮以理之。且以散諸甘藥之滯。胃中清氣下陷。用柴胡。升麻氣之輕而味之薄者。引胃氣以上騰。復其本位。便能升浮以行生長之令矣。今此案係是氣虛邪留。瘧久不愈。用補中益氣湯以升脾胃之清氣。初因夜不安寐。故加茯神。遠志以安神。因其寒熱久羈。又加首烏。靈丹。秦艽以退邪。次方參入半夏。牛膝等味。退邪補虛。標本兼顧。洵是虛瘧之良方。後悉此人。年已四旬以外。患瘧年餘。服此方數劑。果然告痊。

邵蘭蓀醫案 卷三

三六

# 邵蘭蓀醫案

清 山陰 邵蘭蓀先生原著

紹興 史久華介生評註

鄞縣 曹赤電炳章纂輯

## 卷四

### 腫脹

遺風龐。暑濕內着。口腹不慎。化脹。脈濡左弦。舌白罩灰。嗆咳腕悶。最重之症。宜分消。候正。八月十一號丁未廿九日

金沸花包煎三錢

赤小豆四錢

大腹皮三錢

冬瓜皮三錢

赤苓四錢

光杏仁三錢

炒枳殼錢半

鷄內金三錢

前胡錢半

蔻殼錢半

通草錢半

清煎三帖。



覆診 浮腫消減。脈浮濡。舌滑白。噎咳音嘶。腕中略和。仍宜分消為穩。八月十四

號戊申初二日

金沸花包三錢

桑白皮三錢

冬瓜皮三錢

萊菔子三錢

赤苓四錢

光杏仁三錢

原滑石四錢

川草薢三錢

大腹皮三錢

杜赤小豆三錢

鷄內金三錢

引路路通七個

三帖。

三診 浮腫已退。脈弦勁。噎咳音嘶。舌滑。宜清肺利濕為妥。戊申初二日

霜桑葉三錢

生米仁四錢

射干錢半

白前錢半

石決明四錢

川貝錢半

茯苓四錢

粉丹皮二錢

光杏仁三錢

冬瓜子四錢

通草錢半

引鮮枇杷葉五片

四帖。

（介按）暑熱外受。濕自內起。無形夾有形之邪。阻遏肺氣下降之司而為咳嗽。乘入脾臟而為腫脹。治法倣徐之才輕可去實之意。而以苦降肅肺。辛淡滲濕。故能奏效。最後一診。浮腫已退。而亦以清肺滲濕為治。方法井井有條。

柯橋李 高年痰濕膠固。腹滿。跗浮。溺少。脈濡細。舌厚膩。微灰兩邊白。噎咳。最重之症。八月九號丁未廿七日

仙半夏錢半

炒蘇子二錢

鷄內金三錢

麥芽三錢

川樸錢半

原滑石四錢

炒萊菔子三錢

橘紅一錢

赤苓四錢

光杏仁三錢

大腹皮三錢

引路路通七個

三帖。

（介按）濕壅三焦。肺氣不降。而脾陽不運。則跗腫腹滿。噎咳痰喘。脹要旨。開鬼門以取汗。潔淨腑以利水。無非宣通表裏。務在治病源頭。故以清肅肺氣。滲濕導滯為治。但高年患此。是屬重險之候。

盛陵徐 腹中仍屬脹悶。食入尤甚。脈濇滯。舌滑尖紅。大便溏。跗浮。究屬重極之症。六月初五日

烏藥二錢

鷄內金三錢

冬瓜皮三錢

妙穀芽四錢

左金丸八分

新會皮錢半

赤苓四錢

佛手花八分

通草錢半

厚樸一錢

枳殼錢半

清煎四帖。

（介按）濕熱阻滯。肝陽橫逆。致脾胃失於健運。而便溏跗浮。治以清肝扶脾兼滲濕。庶免腹滿之虞矣。

安昌沈厚記 濕久化腫。脈瀯滯。舌滑。洩數。脾陽受傷。非輕藐之症。八月廿九日

帶皮苓四錢

猪苓錢半

大豆卷三錢

光杏仁三錢

桂枝五分

車前三錢

原滑石四錢

杜赤小豆三錢

澤瀉三錢

冬瓜皮三錢

萊菔子三錢

清煎三帖。

又 浮腫稍減。脈尚瀯滯。舌滑。洩數。脾陽傷殘。究非輕藐之症。九月初四日

商陸一錢

赤苓三錢

炒菔子三錢

海金沙四錢

桂枝五分

車前三錢

滑石四錢

新會皮錢半

澤瀉三錢

冬瓜皮三錢

大腹皮三錢

清煎三帖。

（介按）濕漫三焦。鬱傷脾陽。故治以通陽祛濕為主。方從河間桂苓甘露飲脫

胎。恰是對症良劑。

後馬金 室女食積化腫。脈濡右大。舌滑。便溺澀。宜消食消腫。

焦六麴四錢

大腹皮三錢

通草錢半

冬瓜皮三錢

炒萊菔子二錢

赤苓四錢

枳殼錢半

炒麥芽三錢

陳皮一錢

車前三錢

杜赤小豆四錢

清煎三帖。

（介按）食積傷脾。脾失運化之權。更兼濕熱壅滯。溢於皮膚而化腫。治以消積逐水。則浮腫自退。

後馬金 閨女舌微黃。脈弦濡。便利稀水。浮腫已退。宜分消為穩。八月廿九日

廣藿梗二錢

炒川連八分

澤瀉三錢

鷄內金三錢

滑石四錢

猪苓錢半

炒萊菔子三錢

通草錢半

省頭草三錢

厚樸一錢

新會皮錢半

清煎三帖。

（介按）濕熱久蘊。脾氣未復化瀉。再以清熱滲濕。理氣消積。俾氣行濕退。則腫

瀉均瘥。

遺風包 痢後浮腫腹大。脈濇滯。舌滑白。溺少。宜和中分消。七月十四日

大腹皮三錢

焦六麵四錢

生香附錢半

炒枳殼錢半

澤瀉三錢

炒車前三錢

赤苓四錢

炒萊菔子二錢

冬瓜皮三錢

防己三錢

通草錢半

清煎二帖。

（介按）痢後脾虛濕滯。故治法仍以扶脾滲濕。

漁莊王 伏暑濕熱。脈濡。舌滑微黃。跗腫洩赤。尤宜防脹。八月廿九日

棉茵陳三錢

赤苓四錢

通草錢半

蔻殼錢半

杜赤小豆四錢

廣皮錢半

省頭草三錢

藿香梗二錢

仙半夏錢半

扁豆衣三錢

焦六麵三錢

清煎三帖。

（介按）濕為黏膩之邪。暑為熏蒸之氣。兩相膠錮。病勢最為淹纏。今以跗腫洩赤。治以芳香理氣。辛淡滲濕。方法俱佳。若日久而濕濁凝滯。傷殘脾陽。即防化



脹之慮

遺風金 痰濕化腫。左脈濡細。右寸關弦滑。嗆咳氣急。胸滿溺少。症非輕藐。宜治防變。

金沸花<sub>包三錢</sub>

炒車前<sub>三錢</sub>

通草<sub>錢半</sub>

川貝<sub>錢半</sub>

沉香麴<sub>錢半</sub>

廣橘紅<sub>一錢</sub>

海石<sub>三錢</sub>

光杏仁<sub>三錢</sub>

杜赤小豆<sub>三錢</sub>

白前<sub>錢半</sub>

地骷髏<sub>三錢</sub>

清煎三帖。

（介按）余閱葉香巖指南醫案。內有朱姓一症。適與此案證治相同。爰節錄之。以資質證。其述病源曰。初因面腫。邪干陽位。氣壅不通。二便皆少。桂附不應。卽與導滯。滯屬有質。濕熱無形。入肺爲喘。乘脾爲脹。六腑開合皆廢。便不通爽。溺短渾濁。時或點滴。視其舌絳口渴。腑病背脹。臟病腹滿。更兼倚倒左右。腫脹隨著處爲甚。濕熱布散三焦。明眼難以決勝矣。經云。從上之下者治其上。又云。從上之下而甚於下者。必先治其上。而後治其下。此病逆亂紛更。全無頭緒。皆不辨有形無形之誤。姑以清肅上焦爲先。（方用飛滑石三錢。大杏仁十粒。生苡

仁三錢。白通草一錢。鮮枇杷葉去毛三錢。茯苓皮三錢。淡豆豉錢半。黑山梔殼一錢。急火煎五分服。葉氏發明病源與誤治之由。以及應當治法。分辨明晰。深堪則倣。今此案與葉氏所述。適相符合。而療法亦意旨相同。惟藥味則大同小異。前哲後賢。如出一轍。正如先哲所謂活法法中多活法。奇方方外有奇方。今以此案徵之。益信。

漁莊沈霖記 木尅土化脹。兩跗皆腫。脈沉弦。便瀉不爽。氣逆溺少。非輕藐之症。

七月初三日

大腹皮三錢

鷄內金三錢

新會皮錢半

川樸一錢

車前三錢

沉香五分

枳殼錢半

炒米仁四錢

通草錢半

省頭草三錢

杜赤豆四錢

清煎三帖。

又浮腫已退。脈虛細。腰痛。胃納尚和。宜金匱腎氣丸加減治之。

生地四錢

陳萸肉錢半

淮牛膝三錢

稀簽草三錢

茯苓四錢

丹皮一錢

炒車前三錢

炒杜仲三錢

懷藥三錢

澤瀉三錢

五加皮三錢

清煎五帖。

又

諸款悉減。脈虛。夜不安寐。臨晚跗浮。嘈雜已差。仍遵前法加減爲妥。九月廿

當歸錢半

夜交藤三錢

仙半夏錢半

穀芽四錢

炒川連六分

茯苓四錢

新會皮錢半

海桐皮三錢

柏子仁三錢

棗仁三錢

稀莨草三錢

清煎四帖。

又

諸款悉差。脈虛細。臨晚跗浮。痠楚。宜分消爲妥。九月廿七日

生牡蠣四錢

杜赤豆三錢

海桐皮三錢

大腹皮三錢

澤瀉三錢

茯苓四錢

冬瓜子三錢

通草錢半

防己錢半

稀莨草三錢

柏子仁三錢

清煎四帖。

又

兩跗猶腫。脈滯。面浮。宜分消。防化脹。十月初三日

生牡蠣四錢

冬瓜子三錢

新會皮錢半

稀莨草三錢

澤瀉 三錢

赤苓 四錢

猪苓 錢半

五加皮 三錢

防己 錢半

商陸 錢半切

大腹皮 三錢

清煎四帖。

（介按）李中梓曰。腫脹之病。諸經雖有。無不由於脾肺腎者。蓋脾主運行。肺主氣化。腎主五液。凡五氣所化之液。悉屬於腎。五液所行之氣。悉屬於肺。轉輸二臟以制水生金者。悉屬於脾。故腫脹不外此三經也。然其治法。有內外上下虛實。不可不辨也。在外則腫。越脾湯。小青龍湯證也。在內則脹。十棗湯。神佑丸證也。在上則喘。葶藶大棗湯。防己椒目葶藶大黃丸證也。在下則小便閉。沉香琥珀丸。疏鑿飲子證也。此皆治實之法。若夫虛者。實脾飲。腎氣丸證也。李氏此言。發明盡致。但此症初起。係是情懷少暢。以致清氣不轉。肝木侮脾。而濕熱停滯。化脹。第一方宗鷄金散加減。以運氣消積。參用滲濕之品。次則因其利久傷陰。宗腎氣湯。意以養陰滲濕。補而不滯。利而不伐。洵治虛脹之良方。故至三診而諸款悉減。然此時腎液未充。心神未安。則宗安神丸以補心而滲濕。四五兩方。皆以牡蠣澤瀉散加減。以分消下焦未淨之濕熱。步驟井然。故多奏效。但三診

方中有仍遵前法加減之言。而且浮腫已退。則此診以前。似乎遺失一方。深懷未窺全豹之感。

### 遺精

上灶屠 屢有遺滑。脈弦細。氣滯。腹中不和。噎咳。舌微灰。宜清肺胃為主。

北沙參 三錢

光杏仁 三錢

生牡蠣 四錢

預知子 三錢即八月札

懷山藥 四錢

川貝 二錢不杵

茯神 四錢

綠萼梅 錢半

石蓮子 三錢杵

砂殼 錢半

穀芽 四錢

清煎五帖。

（介按）腎陰久虧。陽升無制。衝肺則噎。精滑則遺。治法於攝固之中。參以補脾養胃而清肺。乃是上損從陽。下損從陰之義。

某 咳嗽較減。脈虛細。心腎並虧。濕未淨。屢次滑精。宜清養肝腎。佐清肺滲濕。

四月十八日

釵斛 三錢

桑寄生 三錢

甜杏仁 三錢

冬瓜子 三錢

生牡蠣四錢

懷藥三錢

川貝錢半

稀莖草三錢

炒杜仲三錢

生米仁四錢

絲瓜絡三錢

清煎四帖。

（介按）鄒滋九曰。遺精一症。前賢各有明辨。其義各載本門。茲不復贅。大抵此症變幻雖多。不越乎有夢無夢。濕熱三者之範圍而已。古人以有夢為心病。無夢為腎病。濕熱為小腸膀胱病。夫精之藏制雖在腎。而精之主宰則在心。其精血下注。濕熱混搖遺滑者。責在小腸膀胱。今此案病在心腎。陰虛不攝。而兼濕熱留着。若陽升無制。乘肺則咳。腎精不固。下注則遺。如用固攝。決難應病。清肺滲濕。兼以養心補腎。庶克有濟。

安昌高 痰紅已除。脈形小數。溺白。精關不固。溺後有涇。宜固補心腎為妥。七月十八日

東洋參一錢

桑螵蛸三錢

遠志肉八分

蓮鬚一錢

懷藥三錢

抱木茯神四錢

生牡蠣四錢

新會皮錢半

生地四錢

炒驢膠錢半

炒杜仲三錢



清煎五帖。

（介按）汪昂曰。心君火也。君火一動。相火隨之。相火寄於肝膽。腎之陰虛則精不藏。腎之陽強則氣不固。今此案是肝陽上冒。故致痰中兼紅。腎虛不攝。則溺後有涇。治以固攝助納。又佐安神寧氣。氣固則精自守矣。

五月十九日

漁莊沈鼎記

陰火已斂。脈虛細。心腎不交。則精滑。舌白稍潤。宜補心丹加減。

丹參三錢

生地三錢

金櫻子三錢

生牡蠣四錢

茯神四錢

遠志肉八分

懷藥三錢

柏子仁三錢

西洋參一錢

炒棗仁三錢

新會皮錢半

清煎四帖。

又精滑未除。脈細勁。舌微白。大便難。有血。宜補益潤腸。五月廿八日

太子參一錢

龜版四錢

麻子仁三錢

新會皮錢半

茯神四錢

丹皮三錢

金櫻子三錢

生牡蠣四錢

生地三錢

遠志肉八分

稽豆衣三錢

清煎四帖。

（介按）經云。神氣舍心。精神畢具。又曰。心者生之本。神之舍也。今以腎液未能上承於心。而心不藏神。心神一動。腎精遺洩。故治以補心丹加減。藉滋腎液而安心神。但其陰液已虛。未能腴潤於大腸。腸中宿垢。因致秘結不通。傳導之官。失其常度。故次方於滋陰潛陽之中。參用麻仁、生地以潤腸通便。俾得腎液漸充。則便自通暢。而精固神安。

遺尿

老埠頭壽 瀉猶未除。左脈虛細。右濡。小便不禁。姑宜分清養陰。

生地三錢

川草薢三錢

淡秋石八分

潼蒺藜三錢

懷山藥三錢

車前子三錢

茯苓四錢

生米仁四錢

澤瀉三錢

桑螵蛸錢半

石蓮子三錢

引陳淘米泔水並煎

（介按）經曰。下虛則遺尿。又曰。膀胱不約為遺尿。今以膀胱失約。無氣以固。而致小便不禁。又因脾氣未健。濕熱未淨。而瀉猶未除。故治法於滲濕扶脾之中。

參用縮小便之味。

### 淋濁

大義汪 濕熱阻氣。舌白厚。脘格。潮熱。小便澀痛。便結。宜清利。九月十七日

瞿麥三錢

焦梔子三錢

海金沙四錢

蕤仁錢半

車前三錢

淡芩錢半

木通錢半

澤瀉三錢

生牡蠣四錢

滑石四錢

川草薺三錢

兩頭尖七粒包

三帖

（介按）丹溪謂五淋症。濕熱阻竅居多。今兼氣閉而小便澀痛。治以滲濕清熱。固屬佳妙。此方從八正散加減。合牡蠣澤瀉以通調水道。下輸膀胱。且其便結係是腑氣不用。故用兩頭尖以導濁。

東浦陳 濕熱下注。溲溺赤流。脈濡右弦。舌滑跗腫。姑宜分清養陰為主。

川草薺三錢

生地四錢

綿茵陳三錢

川柏錢半  
鹽水炒

澤瀉三錢

懷藥三錢

生米仁四錢

通草錢半

車 前三錢

丹 皮三錢

稀荬草三錢

清煎四帖。

（介按）膀胱者。州都之官。津液藏焉。氣化則能出也。茲因腎陰氣逆於少腹。阻遏膀胱之氣化。以致小便短赤。足跗浮腫。故此方既利膀胱之濕。復滋腎臟之液。

魚莊沈 身熱已退。脈弱。舌滑。小溲仍屬淋漓。宜清利太陽。八月初三日

西琥珀八分

銀 花錢半

木 通錢半

海金砂四錢

車 前三錢

六一散三錢

焦梔子三錢

石 葦二錢

青木香八分

瞿 麥三錢

省頭草三錢

陳淘米泔水並煎

三帖。

（介按）濕熱下注成淋。清利之法極是。

安昌茹 濕熱下注。小便澀痛帶血。脈濡。肢冷背寒。舌黃。宜分清利濕為主。二月十八日

川草薢三錢

西琥珀八分

蒲 黃錢半

赤 苓四錢

澤瀉二錢 炒車前三錢 當歸三錢 木通錢半  
海金沙四錢 血餘炭一錢 粉丹皮錢半

又濕熱未清。溺後仍屬有血。惟澀痛較差。脈濡。舌滑。藉四物湯加減治之。四月九號癸卯廿三日

生地四錢 蒲黃錢半 生甘梢八分 焦梔子三錢  
當歸錢半 血餘炭一錢 澤瀉三錢 瞿麥錢半  
丹皮三錢 炒車前三錢 木通錢半

又尿血遇勞即發。脈濡細。舌黃滑。濕熱蘊蓄。姑宜涼血、清熱、分利。五月十五號  
生地四錢 血餘炭一錢 川草薢三錢 淡竹葉錢半  
丹皮三錢 茯苓四錢 銀花錢半 木通錢半  
焦梔子三錢 澤瀉三錢 生米仁四錢  
清煎四帖。

又 尿血屢發屢差。脈濇數。肺氣窒痺。胸次痰阻。姑宜瓜萆薢白湯主之。元月初

瓜萆皮三錢

光杏仁三錢

炒蒲黃錢半

白薇三錢

薤白一錢

廣鬱金三錢

血餘炭一錢

兒茶一錢

焦梔子三錢

丹皮二錢

通草錢半

清煎三帖。

（介按）陰虧而濕熱下墜。致尿管阻痺而為血淋。初方宗分清飲意。再加琥珀、赤苓以通血利竅。是通則不痛。痛隨利緩之義。故能澀痛較差。次方雖是四物湯加減。適與錢氏導赤之意相符。以清小腸火腑之熱。乃是滋陰涼血之方。但其陰未固攝。濕未退淨。以致過勞即發。且濕熱蘊蓄不解。屢次化熱劫液。又進清熱滲濕。兼以涼血之劑。而血餘炭尤擅一方之長。在愚見尙堪兼用陳棕灰。則更為特效。至第四診。濕化痰涎。阻痺肺氣。又用瓜萆薢白湯以除胸次之痰。此等方案。洵堪作為後學之師範。

茅蓬陳 濕火下注。莖腫作痛已潰。脈弦濡。舌白厚。宜龍膽瀉肝湯治之。四月十

龍膽炭七分

銀花三錢

澤瀉三錢

綿茵陳三錢



當歸 錢半

生甘梢 七分

條芩 錢半

生米仁 四錢

炒車前三錢

赤茯苓 四錢

海金沙 四錢

清煎四帖。

（介按）濕熱下注前陰。用龍膽瀉肝湯以清肝膽之濕熱。但恐過於滲利。耗傷津液。故佐當歸以養肝。

長巷沈 濁流未除。小便仍屬澀痛。脈濡。氣口滑。舌根黃。咳逆。仍遵前法加減為妥。元月廿九日

瞿麥 三錢

瓜蒌仁 三錢

西琥珀 八分

川草薢 三錢

車前三錢

木通 錢半

丹皮 二錢

光杏仁 三錢

甘草梢 八分

海金沙 四錢

血餘炭 一錢

引陳淘米泔水並煎

四帖。

（介按）肺主氣化。今被濕熱阻滯。以致濁流未止。故治以清肺滲濕。通血利竅為主。

東關金 心腎不交。陰分尙虧。脈細數。手心熱。精竭形怯。小溲乍赤。宜養陰清熱

為主。七月一號五月十七日

細生地三錢

釵斛三錢

夜交藤三錢

川 蘼三錢

川 柏鹽一錢炒

茯 神四錢

遠志肉八分

生甘梢八分

淡秋石沖八分

地骨皮三錢

生米仁四錢

清煎四帖。

覆診 養陰清熱。精濁較差。脈尚細數。耳鳴。寢寐恍惚。仍遵前法加減為主。五月

廿四日

細生地四錢

釵 斛三錢

川草蘼三錢

茯 神四錢

懷山藥三錢

炒遠志八分

澤 瀉三錢

生米仁四錢

淡秋石沖八分

骨碎補三錢

夜交藤三錢

鮮帶心蓮子七粒

八帖。

（介按）此係心神常動。腎精暗洩。以致有形敗濁。阻於隧道。隨尿而出。前後兩方。均是安神寧心。養陰通濁之品。洵屬對症之藥。

疝氣

安昌陳 濕熱鬱遏。臍下脹悶。舉丸偏墜。脈滯。舌黃膩。宜疎利為主。四月廿

川棟子三錢 橘核三錢 雞內金二錢 川草薢三錢

延胡三錢 赤苓四錢 香附三錢 玫瑰花五朵

炒青皮八分 澤瀉三錢 通草錢半 引兩頭尖粒七十

四帖。

（介按）此係七疝中之氣疝。其脈滯。而舌黃膩。是夾濕熱之候。方從濟生橘核丸加減。確治舉丸偏大。痛引臍腹之專劑。茲又加以草薢、赤苓、澤瀉等味。以利濕。用兩頭尖以濁導濁。治法極是。若再參用荔枝核、山查核等味。尤為靈效。此鄙人所歷驗不爽者。

某 小便流濁澀痛。右脈弦細。舉丸偏墜。宜金鈴子散為主。四月初四日

川棟子三錢 川草薢三錢 木通錢半 海金沙四錢

延胡三錢 澤瀉三錢 赤苓四錢 車前子三錢

橘核三錢 生香附二錢 炒枳殼錢半 引兩頭尖粒七十

四帖。

（介按）此與前案大同小異。方從金鈴子散合橘核丸加減。而參用利濕導濁之品。治法極為穩妥。

### 瘡瘍

清水開陳 濕熱下注為痔。始起下疳。脈滑數。九月身發疹痘。係是結毒。宜清解。仰希外科政之。

苦參一錢

藏連丸一錢

桑寄生三錢

稀莨草三錢

銀花三錢

炒知母錢半

茯苓四錢

天花粉三錢

炒條芩錢半

焦山梔三錢

生白芍錢半

清煎四帖。

（介按）此症雖是濕熱下注。恰係脾腎陰虧。以脾司統血之職。腎主攝納之權。茲以陰絡被傷。其血內溢。故治法以清熱滋陰為主。

漁莊沈湘記

結喉旁及右手臂腫潰而不斂。左脈細數。右寸關弦。不時汗出。形

體怯弱。宜防瘡勞。五月初十日

北沙參三錢 霍斛三錢 稽豆皮三錢 忍冬藤三錢  
 扶神四錢 炒白芍錢半 棗仁三錢 地骨皮三錢  
 灸黃耆皮八分 生牡蠣四錢 新會皮錢半 引陳南棗三枚  
 三帖。

又

瘡毒未斂。脈弦細數。陰火上升。齒痛。舌白少津。宜養陰清降。防瘡勞。五月十  
 西洋參錢半 骨碎補三錢 生地四錢 天花粉錢半  
 粉丹皮三錢 懷藥三錢 廣皮錢半 蜜銀花錢半  
 釵斛三錢 生牡蠣四錢 冬桑葉三錢

又

瘡勞胃鈍。脈虛濡。舌滑白。通由濕熱傷氣。清竅不利。宜清利為妥。又月初  
 骨碎補三錢 生米仁三錢 蔻殼一錢 冬瓜子四錢  
 炒遠志八分 抱木扶神四錢 新會皮錢半 川貝錢半  
 茶丁茶錢半 穀芽四錢 石蓮子三錢  
 清煎四帖。

又 瘡勞形怯。胃氣稍振。脈虛細。舌滑白。濕熱猶存。仍遵前法損益。又月初七日

骨碎補三錢

生米仁四錢

丹參三錢

省頭草錢半

遠志八分

懷藥三錢

新會皮錢半

通草錢半

茯神四錢

炒穀芽四錢

冬瓜子四錢

清煎四帖。

又 諸款悉減。脈虛細。瘡口未斂。宜補虛扶元爲妥。六月初九日

太子參一錢

歸身錢半

霍石斛三錢

金櫻子三錢

茯神四錢

炒白芍錢半

新會皮錢半

懷山藥三錢

夜交藤三錢

生牡蠣四錢

炒杜仲三錢

清煎五帖。

（介按）此症潰而未斂。膿血去多。營液大耗。以致形體怯弱。次以胃熱上衝而齒痛。三因濕熱重傷。故其處方。初以養胃斂陰。次則參以滋陰潛陽。三四兩方。又佐滲濕。終則悉屬扶脾益腎以安神。俾脾能統血。肝能藏血。心能生血。血液充足。則形體亦得恢如常矣。



# 調經

某便瀉已除。六脈濇細。癸來澀少。腕中脹悶。皆緣肝橫氣滯。仍遵前法損益。

八月初三日

左金丸八分

烏藥二錢

茯苓四錢

鷄血藤錢半

厚樸一錢

佩蘭三錢

丹參三錢

綠萼梅錢半

通草錢半

炒穀芽四錢

大腹皮三錢

清煎四帖。

（介按）秦天一曰。血氣之化。由於水穀。水穀盛則血氣亦盛。水穀衰則血氣亦衰。是水穀之海。即是陽明胃氣。又是衝脈之本。故月經之本。所重在衝脈。所重在胃氣。所重在心脾生化之源耳。今以胃被肝乘。失其生化之源。是癸來澀少。腕中脹悶。此方清肝和胃以養血。庶幾肝逆稍平。太衝脈盛。則月事以時下矣。瓜瀝王頭暈心泛已差。六脈細濇。癸來腰腹聯痛如刺。宜和營衛為主。五月四號甲辰十八日

當歸 二錢小茴香五分拌炒

製香附 三錢

雞血藤 三錢

炒白芍 錢半

杜仲 三錢

茯苓 四錢

延胡 二錢

川芎 一錢

小胡麻 三錢

丹參 三錢

玫瑰花 五朵

清煎五帖。

（介按）血積不散。為氣所冲。新血與故血相搏。引動衝任。以致經來腰腹刺痛。此方養血理氣。調和營衛之意。

西莊俞。潮熱不清。右脈瀦。左關沉弦。大便忽瀉。經停。腹中有瘕。臍下痛較緩。氣轉至咽。舌微黃。宜清熱養胃。和肝。

銀柴胡 一錢

扁豆衣 三錢

製香附 三錢

烏藥 錢半

地骨皮 三錢

茯苓 四錢

杜仲 三錢

綠萼梅 錢半

青蒿梗 錢半

丹參 三錢

廣木香 七分

清煎五帖。

又寒熱較差。胃納已和。右脈虛。左弦細。經停。腹中有瘕。臍下偶痛。肝木抑鬱。仍宜逍遙散加減。十一月初四日。

柴胡八分

當歸錢半

青木香五分

木蝴蝶四分

炒白芍錢半

製香附二錢

杜仲三錢

川棟子錢半

茯苓四錢

生地三錢

炒青皮八分

清煎四帖。

（介按）肝鬱不暢。血氣凝滯。以致臍下偶痛。而經停成瘕。然大便作瀉。又是肝陽侮脾之候。治以理氣疎肝。健脾清熱。而寒熱較差。胃氣稍和。次以泄肝熱而解肝鬱。逍遙散為對症之方。因其既和氣血。又佐柴胡以微升。藉引少陽之生氣。如是治療。俾鬱勃之氣。由此可以條暢。

某

衝任內損。腰疼背掣。脈濇細。頭疼心悸。癸澀。宜柔肝。補心。調經。

桑寄生三錢

炒杜仲三錢

煨龍齒三錢

煨天麻八分

白茯苓四錢

甘菊錢半

遠志肉八分

穉豆衣錢半

炒棗仁三錢

丹參三錢

鷄血藤膠錢半

清煎四帖。

（介按）肝為風木之臟。內寄相火。體陰用陽。其性主升。全賴腎水之涵。血液之

養。庶得遂其條達之性。茲以肝腎並虧。血液已虛。因而內風時動。即覺頭暈心悸。腰背痠痛。癸水澀少。此方治法。係是緩肝熄風。滋腎退熱之意。

某 腕悶氣滯。癸澀。脈濇細。右弦。帶下腰痠。宜養血和中。又月初三日

鷄血藤 三錢

製香附 錢半

大腹皮 三錢

丹 皮 三錢

冬瓜子 四錢

小胡麻 三錢

丹 參 三錢

清煎五帖。

（介按）濕熱蘊蓄。因而氣滯血阻。以致帶下腰痠。故治以理氣和血。清熱滲濕。安昌包 閨女月事仍閉。脈沉濇。腹痛腕悶。肢體浮腫。頃經少安。

當 歸 錢半

澤 蘭 錢半

通 草 錢半

冬瓜皮 三錢

川 芎 一錢

製香附 三錢

車 前 三錢

鷄血藤 三錢

延 胡 三錢

大腹皮 三錢

杜赤豆 四錢

清煎四帖。

（介按）此因血液被濕熱逼出。旁流膈膜。以致肢體浮腫。經來之時。濕熱乘虛而入。阻礙血脈之周流。血既凝滯。自然經閉腹痛。利水活血以行氣。方法面面

顧到。

某帶下腰疼。脈虛細。癸澀。腹左有瘕。病在衝任。宜柔肝調經。

桑寄生三錢

炒杜仲三錢

炒白芍錢半

生牡蠣四錢

全當歸二錢

覆盆子三錢

木蝴蝶四分

綠萼梅錢半

茺蔚子三錢

香附三錢

鷄血藤三錢

清煎入帖。

（介按）衝任並虛。肝鬱成瘕。故以柔肝固腎。理氣活血為治。

安昌顧氣鬱成痺。脈瀯。右寸關弦音嘶。腹痛有瘕。癸水早期。宜泄降清肝。三月

廿七日

瓜蒌皮三錢

石決明六錢

川棟子三錢

茺蔚子三錢

薤白一錢

丹皮三錢

木蝴蝶四分

綠萼梅錢半

霍斛三錢

炒延胡錢半

新會皮錢半

清煎四帖。

（介按）情懷不暢。肝鬱化熱。以致癸水早期。氣逆上升。則胸脘阻痺。腹中瘕痛。

故治以泄肝養胃。

某 便瀉未除。舌色左邊厚。癸水早期。腕悶氣滯。右脈虛細。左關沉弦。肝木偏橫。宜養胃平肝調經。六月七號

霍 斛三錢

雞血藤三錢

通 草錢半

紫香附錢半

佩 蘭三錢

穀 芽四錢

石蓮子三錢

生米仁四錢

丹 皮二錢

木蝴蝶四分

丹 參三錢

清煎四帖。

（介按）便瀉未除。是挾時令之濕熱。癸水早期。是屬肝熱而不藏血之徵。肝陽橫逆。則腕悶氣滯。而左脈沉弦。胃被肝乘。未能與衝脈生化血液。則右脈虛細。治宜雙方顧到。故以養胃和血平肝滲濕之劑。安昌壽 血虛木旺。脈弦。右虛細。項背掣痛。癸水先後不一。腕中偶痛。夜寐少安。宜補心平肝為主。

丹 參三錢

當 歸錢半

生牡蠣四錢

小胡麻三錢

茯 神四錢

炒白芍錢半

木蝴蝶四分

雞血藤錢半



棗仁三錢

炒杜仲三錢

川棟子三錢

清煎五帖。

（介按）肝主筋而藏魂。腎主五液而惡燥。茲以腎液不能上承。則心不生血而癸水愆期。肝不藏魂。則夜寐不安。又不養筋。則項背掣痛而聯及腕中。故治以補腎養心。柔肝和血。

瓜瀝王 癸瀝後期。脈虛左瀯。腰痠帶下。胃納不旺。姑宜養胃、調經、瀝下。

釵斛三錢

鷄血藤錢半

覆盆子三錢

小胡麻三錢

省頭草三錢

炒杜仲三錢

川斷三錢

丹參三錢

生牡蠣四錢

穀芽四錢

製香附三錢

清煎十帖。

（介按）月經之本。所重在衝脈。而衝脈隸於陽明。今以胃納不旺而血海漸涸。是以癸瀝後期。腎虛而帶脈不固。則腰痠帶下。治以養胃補腎。庶幾經調帶止。瓜瀝王 癸瀝遲滯。氣冲腕悶。脈左瀯。右弦滑。痰濕下注為帶。宜養血理氣為主。

四月廿三號

歸身二錢

仙半夏錢半

鷄血藤三錢

製香附三錢

炒白芍錢半

新會皮錢半

羌蔚子三錢

沉香四分

川芎一錢

生牡蠣四錢

杜仲三錢

清煎四帖。

（介按）濕痰下注於帶脈。帶脈不能約束而下濁液。但帶脈又通於衝任。衝任並虧。則氣衝癸澀。治以補脾腎之氣。又佐舒肝之品。俾血旺氣和。則諸恙自愈。安昌顧心悸帶下。癸澀過滯。腰痠。臍下痛。脈濡濇細。適有頭疼。齟起脹泡。宜勝金丹加減。五月二十日。

生地三錢

小胡麻三錢

遠志肉八分

炒杜仲三錢

當歸錢半

釵斛三錢

茯神四錢

石決明四錢

白芍錢半

香附三錢

鷄血藤膠錢半

清煎五帖。

（介按）傅青主曰。帶脈橫生。通於任脈。任脈直上。走於唇齒。唇齒之間。原有不

於腎矣。惟有熱邪存下焦之間。則津液不能化精而反化濕也。今此案係是帶任兩脈。液虛熱熾之象。故用勝金丹加減。藉以養血清熱。柔肝安神。

### 帶下

遺風龐 血虛嘈雜。知飢少納。脈虛細。腰痠帶下。舌色灰厚。姑宜養血。和中。平肝。

當歸身 錢半

仙半夏 錢半

遍金釵 三錢

鷄血藤 三錢

茯 神 四錢

左金丸 八分

木蝴蝶 四分

佩 蘭 錢半

丹 參 三錢

炒穀芽 四錢

生牡蠣 四錢

清煎五帖。

（介按）衝脈之血。係是陽明水穀所化。茲以胃液已虛。未能容納水穀。而致知飢嘈雜。且肝腎並虧。而致腰痠帶下。故以柔肝和胃。養血為治。

遺風龐 帶下腰痠。脈關尺澀細。經停七月。腹中有形。病在衝任。宜柔肝。澀下。

三月廿三日

桑螵蛸 三錢

歸 身 錢半

菟絲子 三錢

生香附 錢半

炒杜仲三錢

木蝴蝶四分

川斷三錢

綠萼梅錢半

生牡蠣四錢

大腹絨三錢

覆盆子三錢

清煎四帖。

（介按）任脈通。太衝脈盛。則月事以時下。茲以衝任並虧。而經停七月。肝鬱不暢。則腹中有形。腎虛而帶脈不固。則痠下腰帶。治以柔肝瀝下。即是攝衝任之意。

黃公淩徐 小腹仍屬滯痛。脈尙濇。白帶未除。衝任腰跨痠痛。宜和肝瀝下為穩。  
六月七號乙巳廿二日

當歸錢半小茴香炒拌

省頭草三錢

覆盆子三錢

杜仲三錢

延胡錢半

九香蟲一錢

烏藥錢半

香附三錢

炒小胡麻三錢

生牡蠣四錢

玫瑰花五朵

清煎七帖。

（介按）王叔和曰。帶脈為病。左右邊臍。腰脊痛。衝陰股也。據是以觀。則此症係是帶脈失司。肝逆未平之候。

盛陵徐 衝任內怯。腰疼背掣。帶下。脈濇細。癸澀不調。頭疼。姑宜養血調經。澀下。  
八月廿二號戊申十四日

全當歸 三錢

羌蔚子 三錢

鷄血藤 三錢

稀莨草 三錢

炒白芍 錢半

炒杜仲 三錢

覆盆子 三錢

化龍骨 三錢

川芎 錢半

生牡蠣 四錢

桑寄生 三錢

清煎七帖。

（介按）女人月水。由諸絡之血。彙集血海而下。茲以衝任內怯。肝腎液虛。是以  
頭疼腰痛。背掣帶下。養血補腎以調經。深得內經先其所因。伏其所主之旨。  
安昌馬 帶下如注。小腹滯痛。脈濇左弦細。癸澀不調。舌厚膩。汗出穢穢。宜疏泄  
厥陰為主。四月廿八日

川棟子 三錢

當歸 錢半

桑螵蛸 錢半

柏子仁 三錢

延胡 三錢

麻子仁 四錢

生香附 錢半

海金沙 四錢

省頭草 三錢

車前子 三錢

青木香 八分

清煎三帖。

（介按）此係肝鬱侵脾。濕熱下陷。是以脾精不守。未能化為經水。反變白滑之物。直下而為帶。故治以疎泄厥陰。兼滲濕熱而澀下。

胎前

瓜瀝謝 經停二月餘。右脈滑數。脘格嘔惡。食入即吐。宜防妊育。

釵斛三錢

藿梗二錢

桑寄生三錢

生香附錢半

蘇梗二錢

陽春砂六分

杜仲三錢

焦梔子錢半

新會皮錢半

炒穀芽四錢

條芩錢半

清煎二帖。

（介按）婦人受妊。全賴腎氣之旺。腎氣旺則容易攝精而蔭胎。茲由肝熱挾胎氣上衝。致妊娠二月。嘔吐惡阻。故於平肝養胃之中。參以補腎之品。確治惡阻之良方。

頭蓬胡 肝風犯胃。頭疼暈眩。嘔惡。脈左虛細。右稍滑。經停厭食。宜防孕育。未知然否。候正。



桑寄生三錢

扁金釵三錢

新會皮錢半

炒杜仲三錢

炒驢膠錢半

蘇梗錢半

釐梗錢半

陽春砂六分

稽豆皮三錢

明天麻八分

甘菊錢半

清煎四帖。

（介按）胃虛而肝風內震。以致眩暈嘔惡。治以滋肝和胃而理氣。是惡阻而兼肝風之良法。

漁莊沈 姪育頭脹。腹中氣機不和。脈弦濡滑。溲溺短數。嘔惡涎沫。胃鈍。宜和。中理氣護胎。五月初四日

大腹皮三錢

江西朮一錢

桑螵蛸錢半

釐梗二錢

蘇梗錢半

新會皮錢半

車前子三錢

焦梔子二錢

天仙藤錢半

陽春砂七分

條芩錢半

清煎二帖。

（介按）肝陽橫逆。阻滯氣機。挾濕而侵侮脾胃。是以嘔惡頭脹。故治以安胎為主。兼清濕熱以佐之。

產後

黃公漢徐 小產後帶下如注。脈弦細澹。腕中有形。攻觸而痛。癸水不調。姑宜澀下平肝。六月七號乙巳廿二日

生牡蠣 四錢

草豆蔻 一錢

仙半夏 錢半

丹皮 錢半

化龍骨 錢半

製香附 二錢

廣皮 錢半

玫瑰花 五朵

炒杜仲 二錢

左金丸 八分

木蝴蝶 四分

清煎五帖。

（介按）劉宗厚曰。帶下多本於陰虛陽竭。營氣不升。經脈凝澹。衝氣下陷。精氣積滯於下焦而成。今此案係是肝經抑鬱。耗及營液。以致帶脈失固。衝氣下陷。故小產之後。而帶下如注。衝任虛氣挾肝陽上逆。則腕腹作痛。治宜平肝補腎為先。

華舍施 產後濕臑。洩黃。腹滿。足腫。脈滯。舌黃。症勢棘手。民國十年七月十九日

杜赤小豆 錢半

大腹絨 錢半

帶皮苓 四錢

光杏仁 三錢

冬葵子 三錢

椒 目五分

澤 瀉 三錢

地骷髏 湯一兩煎  
代水

晚蠶沙 包一兩

淡附片 四分

炒米仁 四錢

四帖。

又

產後臃脹。舌仍黃。洩較長。腕未展。脈尚滯。症尚棘手。

淡附片 五分

鷄內金 三錢

杜赤豆 錢半

棗 橫 錢半

光杏仁 三錢

桃 仁 十粒

官 桂 五分

椒 目 五分

晚蠶沙 包一兩

沉香 麝 錢半

冬葵子 三錢

地骷髏 湯一兩煎  
代水

又

產後臃脹。脈尚滯。洩長。舌黃。症尚棘手。八月初五日

沉香 麝 錢半

晚蠶沙 一兩

蛭 蟬 三隻

大腹絨 錢半

炒鷄內金 三錢

冬葵子 三錢

烏 藥 錢半

椒 目 五分

杜赤豆 錢半

淡附片 四分

原粒砂仁 一錢鹽炒

地骷髏 湯一兩煎  
代水

(介按)產後而患臃脹。須防瘀血凝結。但用普通治濕臃之藥。決難奏效。雖則在後二方。用桃仁十粒。亦難濟事。若能參用抵當湯。庶幾近之。否則兼與黃連、丹參、大黃、五靈脂、蒲黃等品。下其瘀血。或能中鵠。後聞斯人轉就診於潘星如。

君而全愈。諒必兼用消瘀之品矣。此方滲濕扶陽。若治普通濕臑之症。亦是極好。惟產後血臑。尙欠斟酌。今特錄之。以資後人之鑑戒。

## 後記

《程杏軒醫案》分初集、續錄、輯錄三集，合刊于公元一八二九年。作者程文囿，清代嘉慶道光年間新安人，其先于嘉慶丁丑年著《醫述》十六卷，後于道光丁亥年著本書。

全書輯錄作者歷年所治疑難病驗案，不分門類，每病自成一案。病證、病理論述頗詳，審證亦較細致。對於真假寒熱、實證類虛、陰極似陽等複雜病證的辨析，頗能掌握要領，在治法上融貫諸家之長而有所發揮，立方遣藥，能隨證靈活化裁，文筆生動，引人人勝。

山陰陳安波爲本書作了評注，陳氏爲清代名醫王士雄學友，學問淵博，經驗豐富，所評內容，對闡明病理，解釋方義，很有補益，并有獨到見解，能幫助讀者起到登堂入室的作用。

《何澹安醫案》一卷。成書于清代光緒元年（公元一八七五年）。作者何游，號澹安，江蘇丹徒（今鎮江附近）人，世醫出身，其先人何澄、何仁源、何繩源，及其父何金琇等皆以醫名，家藏醫書甚多。

何游繼承家學，通內、外、針灸各科，在當地頗有名望，常至外省出診，好行善義之事。除撰有本書之外，還有《醫學折衷論》、《何氏十三方注解》等著述，惜未見刊行。

本書以內科雜病為主，分類中、肝風、眩暈、頭痛、咳嗽、吐血、失音、肺痿、虛勞、遺精、淋濁、尿血、小便閉癰等十二病症。其治法推崇葉天士，處方能隨證化裁而不泥于古，但記叙較為簡略。

《邵蘭蓀醫案》四卷，由近人曹炳章征集經邵氏治愈的病家所留存的醫案二百餘則，予以分門別類，整理而成。

邵蘭蓀，清代浙江紹興人，世居楊汎橋，曾從社馥原學醫，對溫暑時證、虛勞及婦女經帶，頗有心得經驗，為當地名醫，病人求治者甚



多。生平推崇葉天士《臨證指南》及程氏《醫學心悟》二書。

本書卷一爲風、暑、濕、燥、溫熱，卷二爲咽喉、耳目口齒、咳嗽、咳血、喘、胸痹、虛勞、不寐、心悸健忘，卷三爲肝風、嘔吐噎格、脘痛、腹痛、泄瀉、痢、瘡，卷四爲腫脹、遺精、遺尿、淋濁、疝氣、瘡瘍、調經、帶下、胎前、產後，共三十餘病證。醫案語簡意明，每案之後，并有史介生之評注。

此次重刊，僅對以上三書的個別錯字及句逗作了正誤，以保持《大成》之本之原貌。

陳 熠